


749
1976



ಪ್ರಗತಿ



ಕರ್ನಾಟಕ ಸರ್ಕಾರ
ಶಿಕ್ಷಣ ಇಲಾಖೆ

1976 4





სტუდია

მხატვრული თარგმანისა და ლიტერატურული ურთიერ-
თობების საქმეთა მთავარი სარედაქციო კოლეგია

შ ი ნ ა ა რ ს ი

კ რ ი შ ა

ვასილ ბიკოვი. ფრუზა. მოთხრობა. თარგმნა მედეა შავლიაშვილმა	5
ცირილ კოსმეჩი. საყვირისა და ღრუბლის ბალადა. რომანი. თარგმნა ნათელა ლორთქიფანიძემ	25
ისააკ ბაბელი. მოთხრობები. რუსულიდან თარგმნა თამაზ კვაჭანტირაძემ	64
ჯეიმზ ჯოისი. ულისე. ინგლისურიდან თარგმნა ნიკო ყიასაშვილმა	104
აკუტაბავა რიუნოსკე. ამბავი სიკეთის საზღაურისა. მოთხრობა. თარგმნა ედიშერ გიორგაძემ	129
ალექსეი სერაფიმოვიჩი. სამბლოვიარო მარში. მოთხრობა. რუსულიდან თარგმნა პაპუნა წერეთელმა	149
ველიმირ ხლეზნიკოვი. მონადირე. მოთხრობა. რუსულიდან თარგმნა მურმან ჭგუბურიამ	148
იური იაკოვლევი. ბრალდება. მოთხრობა. რუსულიდან თარგმნა მარინა სოხაძემ	154
ტენესი უილიამსი. ცისფერი ბავშვების მღელღ. მოთხრობა. ინგლისურიდან თარგმნა ვახტანგ კობაიძემ	161
ჰუგო რასი. ჩინებული კონიუნქტურა. მოთხრობა. თარგმნა დალი კოკაიამ	168
ბურაჟი. სანთლის კაცები. მოთხრობა. თარგმნა ამირან გაბესკირიამ	175



ეროვნული
ბიბლიოთეკა

4

(13)

ივლისი
აგვისტო

მსოფლიო ლიტერატურის ერთვითრი
ალმანახი

1976

შინაარსი

კონფიცია

ბელორუსი კოეტები. ლექსები. თარგმნა ზურაბ ლორთქიფანიძემ	125
უაინინ უულიევი. ლექსები. თარგმნა ომარ დოხნაძემ	141
ჩინგიუ ალიოლლი. ლექსები. თარგმნა ტაგუ მებურიშვილმა	152
ლიტერატურული გეგვიდრობა	
ჰომეროსი. ილიადა. ქება პირველი. ძველბერძნულიდან თარგმნა რომან მიმინოშვილმა	182
ბიკენტი ვერესაევი. ეპიგის ჩანაწერები. რუსულიდან თარგმნა რამაზ კობიძემ	198
ვივეკანანდა. ნაწყვეტები ლექციებიდან. თარგმნა თამაზ ჩხენკელმა	219
კრიტიკა, კუბლიცისტკა	
ვენერა ურუხაძე. „ვეფხისტყაოსნის“ ინგლისურ ენაზე თარგმნის ზოგირთი საკითხი	223
იონან გრიგორესკუ. ჭუჭყიანი სამოთხე. თარგმნა სოსო პაიჭაძემ	228
ჩვენი ავტორები	239
გარეკანზე: ვრუბელი. „ვენეცია“	



მთავარი რედაქტორი: კონსტანტინე ლორთქიფანიძე.

სარედაქციო კოლეგია: მზია ბაქრაძე, ბაჩანა ბრეგვაძე, ნანა ღარჩია (პასუხისმგებელი მდივანი), მაგალი თოდუა, ნოდარ კაკაბაძე, კარლო კალაძე, მისხილ კვესელავა, ჯურაბ კიკნაძე, ვასუშტი კოტეტიშვილი, რომან მიმინოშვილი, ოთარ ნოდია, ნიკო ყიასაშვილი, თამაზ ჩხენკელი.

ფ რ უ ჯ ა

მ ო თ ხ რ ო ბ ა

თარგმნა მელვა შავლიაშვილმა

მაღალი კარი იყო, ძველებური, მძიმე. ცოტაზე გამოაღებდი თუ არა, გაბმით ჭრიალებდა ხოლმე. ამ ექვსი-ოდე წლის წინათ ფრუზა წარამარა ზეთავდა დაჟანგებულ ანჯამებს, მაგრამ ვერაფერს გახდა. და ქალიც ჭრიალის ხმას თანდათანობით ისევე მიეჩვია, როგორც კარის უცნაურად მოღუნულ სახელურს, როგორც იმას, რომ მეკარე იყო და მეტად იოლი მოვალეობა ეკისრა.

დღეში ორჯერ, დილასა და საღამოს, შემოსასვლელში ფეხაჩქარებით ჩაივლიდნენ დაწესებულების თანამშრომლები. ამ დადინჯებულ, ჩაფიქრებულ ადამიანებს ფეხის ხმაზე ან კარის გაღებაზე თვალდახუჭული სცნობდა ფრუზა. დირექტორის, ივან კუზმიჩის გამოჩენას მისი ავტომობილის თუხთუხი აგებინებდა. მანქანა მუდამ მოულოდნელად

მოგრიალდებოდა ხოლმე სადარბაზოსთან, მაშინვე აღრჭიალდებოდა მუხრუჭები და ერთი წუთის შემდეგ რალაც უცნაურად, გაბმით გაიჭრიალებდა კარი. ივან კუზმიჩი მაღალი, ზორბა, პირმოღუმული კაცი იყო. მას ყველა პატივსა სცემდა. ხოლო ფრუზას კიდევ ეშინოდა მისი და ამიტომ მაშინვე „დილა მშვიდობასაო“ — ჩაილაპარაკებდა. ივან კუზმიჩი ქვედა ტუჩს მოკუმავდა და საღამოზე მხოლოდ წარბებს აქაჩავდა პასუხად.

ფრუზას დირექტორი მხოლოდ ასეთი ენახა და სხვანაირი ვერც წარმოედგინა. იგი უცხო და გამოუცნობი კაცი იყო ქალისათვის.

ასეთივე უცხო და გამოუცნობი ეჩვენებოდა ამხანაგი პეტრაჩენკოვიც — გალეული და ღვარძლიანი კაცი. ფრუზა ზოგჯერ ფიქრობდა, ამ კაცს საკუთარი კოსტიუმებისა და

პალტოების გამოფენის გარდა სხვა არაფერი აღარდებდა. სქელშუშიანი სათვალთან პეტრაჩენკოვი წარამარა თავის მხრებს, სახელოებსა და მკერდს ათვალთვლებდა და არარსებულ მტვერს გაჩხიკული თითებით იშორებდა. თან დიდშუბლა, პატარა თავს აქეთ-იქით აქნევდა; ისე იყო გართული საკუთარი ამბებით, რომ ფრუზასთან მისასალმებლად იშვიათად იცლიდა. დაწესებულებაში ქალები ცოტანი იყვნენ. ამ ქალებში ყველაზე მეტად დირექტორის მოადგილის, საკმაოდ ხანდაზმული დუბჩენკოს ცოლი ნონა გამოირჩეოდა. დილით, როგორც კი კარი ჭრიალს იწყებდა, სადარბაზოს კიბეზე ნონას ქუსლების პაკაპუკი ესმოდა ფრუზას. კარში ისე მოხერხებულად გამოსხლტებოდა ხოლმე, გვგონებოდა, კარი არც კი გამოუღიაო. მუდამ აგვიანდებოდა, მუდამ ჩქარობდა, მაგრამ არასოდეს ავიწყდებოდა, მეკარისათვის ტკბილად გაეღიმა. ფრუზა აღტაცებულ მხერას გააყოლებდა ხოლმე. ნონა მეტიხმეტად მოსწონდა, რადგან ახალგაზრდა. მიმზიდველი და თანაც ესოდენ მიუწვდომელი იყო!

ინჟინერი შავროვი ყველაზე ადრე ცხადდებოდა სამსახურში, მუდამ ერთნაირად უბრალო, მხიარული, ტკბილმოუბარო. შემოსვლისთანავე ფარდაზე ფეხებს გაიწმენდდა და ფრუზას გაეხუმრებოდა:

— გამარჯობა. ფრუზა, რასა იქმ, როგორ ცხოვრობ?

ქალი თავდაპირველად გაიღიმიებდა. მორცხვად შეათვალთვლებდა ნაცრისფერ კოსტიუმში გამოწყობილ, ოდნავ ჩასუქებულ კაცს და მერე თვალებს დახრიდა. ასე ეგონა, ინჟინერი ალბათ რაღაცას მამჩნევსო, და თავს უხერხულად გრძნობდა...

— ნუ დარდობ. ფრუზა! მალე

მოგინახავთ საქმროს, გაგათხოვებთ, დაგასახლებთ და იცხოვრებთ სიამტკბილობით შვილებთან და შვილიშვილებთან ერთად, — ეუბნებოდა შავროვი, როცა კიბეზე არბოდა. ფრუზასაკენ თავმობრუნებულს ჭროლა, ცოცხალი თვალელები უელვარებდა.

ფრუზა მუხლებზე კაბის კალთას გაისწორებდა, ამოიხრებდა და ფანჯარას ველარ აშორებდა მხერას.

მარტოხელა ცხოვრებამ ფრუზა დაკვირვებული გახადა. ხშირად ეგონა, ადამიანები საკუთარი თავისადმი უსამართლონი არიანო, ვერ ხედავენ და ვერ აფასებენ ცხოვრების იმ დიდ სიკეთეს, რასაც აგრერიგად აფასებდა და ამდენი წლების განმავლობაში აგრე ამოდ ელოდებოდა თვითონ.

მასთან ერთად მეკარედ მრავალშვილიანი, ბუზლუნა დროზდოვა მუშაობდა. ეს არცთუ ისე ხანში შესული ქალი მუდამ უკმაყოფილო, მუდამ რაღაცით გაღიზიანებული იყო, მთელ ქვეყანას ერთთავად ლანძღავდა და თათხავდა, ყველაზე მეტად კი თავის ქმარს არტემას, საამშენებლო ტრესტის დურგალს. თუმცა არც ბავშვებს ელოლიავებოდა, იმათაც უხეშად ექცეოდა, წარამარა უყვიროდა და წუწუნებდა, ოჯახი სიცოცხლეს მიმოკლებსო. ფრუზა უსიტყვოდ უსმენდა დროზდოვას ჩივილს და არასოდეს თანაუგრძნობდა. ეს ქალი უბრალოდ ბრმა იყო: ოჯახი ჰქონდა, შვილები ჰყავდა, ნეტა სხვა რაღა უნდოდა, რას თხოულობდა? რაც დროზდოვას სიცოცხლეს უმწარებდა, ფრუზას ის დიახაც გააბედნიერებდა. ოღონდაც ქმარი ჰყოლოდა და არამცთუ არ გალანძღავდა, ბევრს რად ეწევიო — მაშინაც არაფერს ეტყოდა, ვთქვათ, სამსახურის შემდეგ ძმაკაცებთან რომ ექეიფა და შინ გვიან დაბრუნე-



ბულიყო. არც ბავშვებს უსაყვე-
დურებდა, თუ ქუჩაში ბოდიას
მოჰყვებოდნენ და დედას ცივ საუზ-
მეს მოუტანდნენ. იგი ნამდვილად
დააფასებდა ამ თავის პატარა ბედ-
ნიერებას. მაგრამ წლები გადიოდა
და მისთვის ერთი თბილი სიტყვაც
არავის ემეტებოდა. ყველა თავისი
საქმით, თავისი ოჯახით იყო გარ-
თული.

ჰოდა, ფრუზაც ალბათ ასე გაღვე-
და თავის სიცოცხლეს, რომ ის ამბა-
ვი არ შემთხვეოდა.

იმ ზამთარს დიდთოვლობა იყო.
ფრუზა ჩვეულებისამებრ კარის სი-
ახლოვეს იჯდა, როცა შეამჩნია, რომ
კარის ფიცარი გამხმარიყო და ქვე-
ვით ღრიჭო გაჩენილიყო. ქალმა საქ-
სოვი გადადო და უკანა კარიდან
ეზოში გავიდა. ფარდალალა გარაჟში
რამდენიმე მანქანა იდგა. ფრუზამ
შიგ შეიხედა, ნაცნობი შოფერი ხომ
არ არისო, მაგრამ ასეთი არავინ აღ-
მოჩნდა. დატკეპნილ თოვლზე ყუ-
თები და კასრები ეყარა. გარაჟის
სიღრმიდან რკინის ჭახუნი ისმოდა.
ქალმა გაყინული ხელები დაბამბუ-
ლი ქურქის ჯიბეებში დამალა, გარა-
ჟის კარში შევიდა და მოკრძალებით
გაჩერდა. ერთი უცნობი შოფერი
რადიატორზე გადაყუდებულიყო და
ძრავაში რაღაცას ჩხირკედელაობდა.
იგი სამსახურში ამ ცოტა ხნის წი-
ნათ მიიღეს. ფრუზამ ამ კაცს სთხო-
ვა დახმარება.

შოფერმა რომელიღაცა ქანჩი მო-
უჭირა, წელში გასწორდა და ქალი-
საკენ ხანდაზმული, ცუდად გაპარ-
სული და გათხუპნული პირისახე შე-
მოაბრუნა. ჯერ გაოფლიანებული
შუბლი გაიწმინდა დაბამბული ქურ-
ქის სახელოთი, მერეღა შეეკითხა:

— რა მოხდა, გაფუჭდა და გამ-
კეთებელი არავინაა? თქვენი სამე-
ურნეო უფროსი სად არის?

კაცი, ცოტა არ იყოს, უხეშად და
პარაკობდა, როგორც იმ ხალხსა
სჩვევია, გადაუდებელი საქმე რომა
აქვთ მუდამ. და ქალმაც გულში ინა-
ნა, რატომ ვთხოვეო. მაგრამ კაცი
მაშინვე ჩამოხტა „ზილის“ მაღალი
ბუფერიდან, კაბინიდან რაღაცა აიღო
და შენობისაკენ მტკიცე ნაბიჯით
წამოვიდა. ფეხზე ლანჩებგამოკერე-
ბული თექის ჩექმები ეცვა.

— აბა, სად არის? მაჩვენე!

ფრუზამ ღრიჭო აჩვენა, შოფერმა
ორი თუ სამი ლურსმანი უსიტყვოდ
ჩაარჭო და მერე მუშტით შეამოწმა
ფიცრის სიმაგრე.

— ესეც ასე, გამთელდა. ახლა
აღარ დაგიბერავს.

ქალმა მადლობა გადაუხადა, მერე
ისიც შეჩვილა, ფანჯრის ქვეშ ბატა-
რეიდან წვეთავს და იატაკის წარამა-
რა წმენდამ თავი მომაბეზრაო. რამ-
დენჯერ ვთხოვე სამეურნეო უფ-
როსს და ყურსაც არ იბარტყუნებს,
ლუდხანაში ათენ-აღამებს, თუ ასი
გრამი არაყი არ დააღვეინე, ახლოს
არ გაგიკარებსო. შოფერი თამბაქოს
ახვევდა და დინჯად, ქუშად შეჰყუ-
რებდა ფრუზას. რამდენჯერმე რომ
გააბოლა, მერე შეჰპირდა:

— კარგი, გავაკეთებ! ახლა არა
მცალია, ნასადილევს შემოვივლი,
შენც შემახსენე, დეიდაჩემო.

გამომშვიდობებისას ფრუზას თვა-
ლი ჩაუკრა და შესასვლელში უჩვე-
ულო სუნი—მაგარი თამბაქოს სურ-
ნელება დასტოვა. რატომღაც მაშინ-
ვე დანადვლიანდა ფრუზა, ფანჯარა-
ში გახედვა მოუნდა და იმ კაცის
დანახვა, თოვლში აუჩქარებლად
რომ მიაბიჯებდა თავისი მანქანისა-
კენ...

შოფერმა ბატარეიაც შეაკეთა.
თუმცა იმ დღეს კი არა, მხოლოდ
მეორე დღეს შემოიარა. ფრუზას
გვერდით შეჩერდა, თამბაქო გააბო-

ლა და ერთხანს დაკვირვებით უყურა, რა სწრაფად მოძრაობდა ქალის თითებში წინდის ჩხირები.

— ცუდი ხელთათმანები არ იქნება, — ჩაიციხა კაცმა და ვეებერთელა დახეთქილი ხელისგულები ერთმანეთს გაუხახუნა.

ფრუზა ამ თათმანებს ბაზარზე გასაყიდად ქსოვდა, მაგრამ მოულოდნელად იგრძნო, რომ ამ კაცისაგან რაღაცით დავალებული იყო.

— მართლა მოგწონთ? — შეეკითხა ქალი და გაუბედავად აიხედა მალლა, — თუ არა გაქვთ, ეგება თქვენთვისაც მომექსოვა?

— არა, გმადლობთ, — უპასუხა შოფერმა. — რისი მაქნისია, ერთ გზობაზეც არ მეყოფა. აი, ტყავისა რომ ყოფილიყო, კიდევ ჰო. თუმცა ისინიც ერთ კვირაზე მეტს არა სძლებს.

კაცი წავიდა. ფრუზას ისევ მოეძალა დარდი. უნდოდა ამ კაცთან კიდევ ემასლაათა, მაგრამ მიხვდა, რომ მას ფრუზასთან მუსაიფი მაინცდამაინც არ ეპიტნავებოდა. ერთი კვირის შემდეგ ფრუზა შებინდებულზე დაბრუნდა შინ. ქალაქგარეთ ცხოვრობდა, შარაგზის პირას, ნახშირის კვამლით შებოლილი ბარაკის განაპირა, პაწაწინა ოთახში. ქალაქის შუაგულიდან, სადაც მისი დაწესებულება იყო. სახლამდე რომ მიეღწია, ჯერ სამი სხვადასხვა ავტობუსით უნდა ეჯაყჯაყა, მერე უდაბური ხრამი გაეგლო და თითქმის ერთი კილომეტრი ფეხით ტალახი ეზილა. ზამთარში კიდევ რა უშავდა, ბილიკით ხრამში ჩავიდოდა, გაყინულ წყაროზე გადაივლიდა და გზას მოკლედ მოსჭრიდა. ახლაც ხრამიდან ამოვიდა, ბოსტნები გალია. მის წინ გადაჭიმული შარაგზაც უნდა გაეგლო, ქალაქის გარეუბნის სახლებს შუაში რომ მოემწყვდიათ.

ცა მოღრუბლული იყო, ერთი ვარსკვლავიც არსად კიაფობდა. მქრქალ ბინდში ხეები და სახლები ერთნაირად ჩაშავებულიყო. დათოვლილ მინდორზე აქა-იქ შავ ლაქებად ჩანდა გაშიშვლებული მიწა. ფაშარ თოვლს უკვე დნობა შეჰპაროდა. ქალი ფეხაჩქარებით მიდიოდა, ამ ბინდბუნდში სახლის სითბო და მყუდროება თავისკენ იზიდავდა. ქირზის ჩანთით პური, ქაშაყი და ერთი კილო წიწიბურას ბურღული მიჰქონდა, რათა ერთი-ორი დღე იოლად გასულიყო და შეშის ფული გადაენარჩუნებინა.

შარაგზაზე ფარების შუქმა დააბრმავეა. გვერდით გრილით მიჰქროდნენ მანქანები. იმ ადგილას, სადაც სახლისაკენ მიმავალ ბილიკზე გადაუხვევდა ხოლმე, საბარგო მანქანა იდგა. ქალმა ყურადღებაც არ მიაქცია. ან რა ყურადღების მისაქცევი იყო! შარაზე წარამარა ჩერდებოდნენ მანქანები და ცოტა ხნის მერე ისევ თავიანთ გზას აყრიდნენ ბარაქას. ქალი დერეფანში შევიდა. დაბამბული ჯუბის ჯიბეში გასაღები მოიხელთა და კარი გააღო. ოთახში ციოდა. უკვე მესამე დღე ილეოდა, ღუმელი არ აენთო. ფრუზამ მიმოიხედა. ვიწრო საწოლზე აფუმფულებული ბალიშები ეწყო, კედელზე იაფფასიანი ხალიჩა იყო გაკრული... მორეცხილ და მოკრიალებულ იატაკზე კუთხიდან კუთხემდე ირიბად ეფინა ფეხსაფენი. პაწაწინა მაგიდაზე დაწყობილ ჭურჭელს დოლბანდი ეფარა. მაგრამ ამ პაწაწინა ოთახს თითქოს რაღაცა აკლდა. ყური მიუგდო, მეზობლების ჩამიჩუმი არ ისმოდა. ღუმელი უნდა აენთო, მაგრამ, სამწუხაროდ, შეშა არ ჰქონდა დაბობილი.

კარზე ვიღაცამ დააკაკუნა. ფრუზასთან იშვიათად თუ შემოივლიდა



ვინმე, ამიტომ ყოველი კაკუნი გულს უხეთქავდა ხოლმე. კარი გაიღო და ოთახში ტლანქად შემოაბიჯა გულგადაღელილმა, კეფაზე ქულმოგდებულმა კაცმა. ეს ამას წინათ გაცნობილი შოფერი იყო.

კაშკაშა სინათლემ შემოსულს თვალები მოაწკურინა. ეტყობა, მასპინძელი ვერ იცნო. ფეხი მოინაცვლა და მერე თქვა:

— საღამო მშვიდობისა, დიასახლისო! გაჭირვება დამადგა და ხომ არ მიშველიდი? მანქანა გამიფუჭდა, მე მარტო ვერაფერს გავახერხებ.

ფრუზას თავსაფარი უკვე შეეხსნა, მაგრამ ახლა რატომღაც ისევ შეისკვნა. შემოსულს შესცქეროდა და უცნაურმა წინათგრძნობამ გული აუძგერა.

— რა მოუვიდა მანქანას? — რამდენადაც შეეძლო, მშვიდად შეეკითხა ფრუზა.

— ეჰეი,—გაოცდა შოფერი, როცა კარგად დააკვირდა. — ეს თქვენა ხართ? აქა ცხოვრობთ?

— აქა ვცხოვრობ. ეს-ესაა სამუშაოდან მოვედი.

— სინათლე რომ აინთო, აქეთ ვიყურებოდი. ვიფიქრე, მოდი, მივალ და დავაკაკუნებ-მეთქი. — უკვე დარწმუნებული და თითქოს გახარებულიც ლაპარაკობდა შოფერი.

მის მოღრეცილ თეჭის ჩექმას თოვლი შეადნა. ფეხებზე დაიხედა და ზღურბლს მოშორდა.

— დასწყევლოს ღმერთმა შოფერის ბედი! გუშინ მინსკში ვიყავი, უკან დაბრუნებულმა კი ვეღარ მივალწიე ადგილამდე—კონდესატორმა მიღალატა. მარტოდმარტო ვარ. მანქანას უპატრონოდ ვერ დავაგდებ. არადა ვერც დამიქოქავს! რა ვქნა, აღარ ვიცი! ეგება თქვენ მიგეხედო მანქანისათვის, ხელი არავინ ახლოს,

ან იქნებ გარაჟში გაქცეულიყავით... უბედურება თუ გინდა, ესაა...

აღელვებულმა ფრუზამ შოფერი ოთახში შეიპატიჟა, დაბრძანდით, გათბითო. თუმცა მოუბოდინა, შეშის დაპობა ვერ მოვასწარიო... თვითონ კი ამასობაში ჯუბა შემოიცივა ისევ.

— რა გაეწყობა, რახან საჭიროა, უნდა წავიდე. ხელად მივალ, ავტობუსით. როგორ უნდა ვთქვა, რა ჰქვია მაგ ნაწილს?

— კონდესატორი. იქ დიმიტრუკოვს ან ტერეშჩენკოვსა თხოვთ, უთუოდ მოგცემენ, — თქვა კაცმა. — მე თვითონ წავიდოდი, მაგრამ მანქანა დატვირთულია, რაც უნდა იყოს, შარაგზაა...

კაცმა გასვლა დააპირა, მაგრამ ქალმა შეაჩერა.

— ნუ სწუხართ, აქ დარჩით, ცოტა გათბით. ფანჯრიდან ხელისგულივით მოჩანს იქაურობა.

კაცმა მადლობა გადაუხადა და დარჩა, ფანჯარასთან მდგარ სკამზე მძიმედ დაეშვა. ფრუზა კი შარაგზისაკენ გაიქცა. თან გზადაგზა იკრავდა ჯუბას. უნდა ეჩქარა, ეგებ გარაჟის დაკეტვამდე მიესწრო.

კონდესატორი დიმიტრუკოვს გამოართვა, მაგრამ გარაჟამდე მისვლას კარგა დიდი დრო მოუხდა. ოთახში სინათლე არ ენთო. ნუჟრიანი კუნძები, აგერ ორი წელიწადია ეზოში დასახეთქად რომ ეყარა, კარლია ღუმელში ტკაცან-ტკაცანიო იწვოდა და ნაპერწკლებს ისროდა. ღუმელის გვერდით ტაბურეტზე შოფერი ჩამომჯდარიყო, მუხლები განზე გაედგა, თავი ხელებზე ჩამოეყრდნო და ისე ჩასძინებოდა. კარის ქრიალზე არც შემობრუნებულა, არც თავი აუწევია.

ფრუზამ კონდესატორი მაგიდაზე დადო, ჯუბა გაიხადა, უხმაუროდ გაწმინდა ყინვისაგან ლამაზად მოხა-



ტული მინა და ფანჯარასთან სკამზე ჩამოჯდა, რომ მანქანისათვის აქედან ეთვალთვალა.

ვინ იცის, რამდენი დრო გავიდა. მოფერი კი ისევ ტკბილ ძილში იყო.

ღუმელში შეშა ჩაიწვა და მოელვარე ნაკვერჩხალი დასტოვა. კედელზე, ჭერთან ახლოს ათინათი კრთოდა, წითელი შუქი დაჰფენოდა კაცის გვერდზე გადახრილ თავს, მხარსა და სახელოს. მის უმოძრაო ჩრდილს კი მთელი კედელი დაეფარა.

ქალი ხან შარაგზას გაჰყურებდა, ხან სტუმარს და თანდათანობით მისი არცთუ იოლი ცხოვრებისადმი ჩუმი სიბრალულითა და თანაგრძნობით განიმსჭვალა. რატომღაც სიამოვნებდა, რომ ამ დიდ კაცს მის ოთახში ეძინა. დაე, ეძინოს, ხელს არ შეეფუშლიო, ალერსიანად გაიფიქრა ფრუზამ და თავისი გაუხარელი ცხოვრება გაიხსენა, შეებრაღა საკუთარი თავი და გული ეტკინა. ისევ გაედვიდა ძველი, თითქმის დავიწყებული წყურვილი ადამიანური სიტბოსი. თავს ძალა დაატანა, ეს უსიხარულო განცდები რომ დაეთრგუნა, მხოლოდ ოხვრას მოუხშირა, ოღონდ ძალიან წყნარად და ჩუმად, რადგან სტუმრის გადვიძებას და შეწუხებას მოერიდა.

მაგრამ სტუმარმა მაინც გამოიღვიძა. გონს მოეგო თუ არა, ირგვლივ გაოცებით მიმოიხედა.

— უჰ, შენ უკვე მოხვედი? — კაცი ფეხზე წამოდგა, — რა ჰქენი?

— აი, მოვიტანე, — ფრუზა სკამიდან ადგა და კაცს კონდესატორი გაუწოდა.

ეტყობა, კაცი ჯერაც ძილბურანში იყო, გაიზმორა და ისევ ტაბურეტზე ჩამოჯდა.

— უჰ. რა კარგია, რომ მოვიტანია, დიდი მადლობელი ვარ. რაშია

საქმე, არავისი ხმა რომ არ ისმის? განა მარტო ცხოვრობ?

— მარტო, — ამოიოხრა ფრუზამ.

— შენი... შენი ქმარი სადღაა? თუ არცა გყოლია?

— არა მყოლია, — რატომღაც შეშინებულმა უპასუხა ფრუზამ. მერე კაცის პირდაპირ სკამზე ჩამოჯდა. ამ თავშეკავებულმა მამაკაცურმა ცნობისმოყვარეობამ უცებ საოცრად პატარად, უსუსურად და თითქოს დამნაშავედაც კი აგრძნობინა თავი.

მოფერი გაჩუმდა, თავის საფიქრალს მიეცა. ქალი კი ისევ უსიტყვოდ ათვალეირებდა. თუმცა ცეცხლის მოცახტაზე შუქზე ძლივსღა არჩევდა მის სახეს.

— ცუდია მარტოობა — თქვა კაცმა ცოტა ხნის შემდეგ. — ძნელია მარტოობა... ეს მე კარგად ვიცი...

კაცი პაპიროსის მოკიდებას შეეცადა. ჩანავლებულ ნაკვერჩხლებთან მიიტანა ქაღალდი. აბრიალებულმა ალმა ერთი წამით გაანათა მისი გაჯაგრული, ულამაზო, მაგრამ კეთილი და მშვიდი პირისახე. ქალი ისევ ფანჯარასთან იჯდა გაყუჩებული.

კაცმა პაპიროსის ნამწვავი ღუმელში შეაგდო. მერე ქალს მიუახლოვდა, გახეშეშებული ხელისგული ძალიან ფრთხილად, თავშეკავებულად შეახო მის მხარს და ჩაილაპარაკა:

— ძნელია მარტოობა, მაგრამ რა გაეწყობა... აბა შენ იცი, დარდმა არ დაგჯაბნოს! ცმადლობთ დახმარებისათვის...

როცა კაცი წავიდა, ფრუზა ფანჯარას მიადგა. შუბლით მიეყრდნო და შეორთქლილი მინიდან კარგა ხანს გასცქეროდა, როგორ ჯახირობდა იგი ძრავასთან, როგორ აჩხაკუნებდა კაპოტს და როგორ ტკეპნიდა თოვლს მანქანის გარშემო. ქალი არაფერზე ფიქრობდა. არც



ცრემლებს იწმენდდა, ნელ-ნელა რომ ჩამოსდიოდა ლოყებზე...

იმ საღამოს შემდეგ ფრუზა კიდევ უფრო გულჩახურული გახდა. მორიგეობის დროს ხშირად ოხრავდა. ინჟინერ შავროვის ხუმრობაზე იშვიათად იღიმებოდა. ხშირად გადიოდა ეზოშიც, სადაც ხანდახან იმ კაცს ხვდებოდა, თავის მანქანას რომ დასტრიალებდა და ზოგჯერ რამდენიმე უმნიშვნელო სიტყვას მიუგდებდა ქალს. მაგრამ ფრუზა გუმანით ხვდებოდა: ეს კაცი კეთილად ეკიდებოდა, ისე არა, როგორც სხვა ლაზრანდარა მოფრები. ნეტამც შესძლებოდა და ამ კაცისათვის მისი ამბავი გამოეკითხა... ქალი გრძნობდა, რომ არც ის უნდა ყოფილიყო მაინცდამაინც ბედნიერი. რაკი კეთილ კაცად მიაჩნდა, ფრუზასაც უნდოდა რამე კარგი ესურვა მისთვის... მან უკვე იცოდა, რომ გვარად პარხომოვი იყო, ბარანოვიჩიდან, მაგრამ ცოლი ჰყავდა თუ არა, ამაზე არა უწყობდა რა.

ასე მიიწურა ზამთარი და დადგა გაზაფხულის პირველი თვე — მარტი. ქუჩებში თოვლმა დნობა დაიწყო. მისი ნარჩენები მანქანებით ქალაქგარეთ გაიტანეს. დღისით სახურავებიდან ასფალტზე ხმაურით ეცემოდა მძიმე წვეთები. პარკებსა და ქალაქგარეთ მიდამოებში ისევ თოვლი იღო, თუმცა ყოველი მზიანი დღე სულ უფრო და უფრო აშიშვლებდა მიწას, ერთმანეთს უახლოვებდა და აერთებდა ლილოებს. ხის კვირტები თვალსაზრისწინ ივსებოდნენ და იბერებოდნენ.

ქალთა დღე — რვა მარტი ფრუზას დასვენების დღეს დაემთხვა. დაალაგა თუ არა ოთახი, დილიდანვე შეუდგა შალის ძველი სარაფანის გადაკეთებას. კერვა ძალიან ეხალი-

სებოდა. უყვარდა, როცა ჩაიზომებდა. ტანზე მოირგებდა კაბას, მოიაზრებდა იმას, როგორ გაეკეთებინა, რომ იაფი და ლამაზი გამოსულიყო. ახლაც ჩვეულებრივი მცდელობითა და გულისყურით შეუდგა საქმეს, მაგრამ მალე აიყარა სამუშაოზე გული და ფიქრით ისევ პარხომოვს გადასწვდა. რა კაცია, ვინ არის, რად ექცევა ასე ყურადღებით, სხვათაგან განსხვავებით? დროგამოშვებით ოხრავდა, საკერავს მუხლებზე დაიდებდა და კარგა ხანს გასცქეროდა შარავზის მოვლვარე ასფალტს, იმ ადგილს, სადაც ზამთარში კაცი მანქანას უკირკიტებდა. სულ უფრო უქლიერდებოდა მისი ნახვის სურვილი, მისი მშვიდი და ჰკვიანური საუბრის მოსმენა ეწადა. ცოტა რომ ჩაუფიქრდებოდა, საკუთარ თავს ტუქსავდა: ეგება იმ კაცს ოჯახი აქვს, შვილები ჰყავს, ეგეც არ იყოს, განა ცოტაა ჩემზე ახალგაზრდა, აბა ეს ორმოცი წლის ქალი ვის რად ვუნდივარო? მაგრამ მაინც ფანჯრისაკენ გაუბრბოდა თვალი, დეღავდა, ბორგავდა, ცდილობდა თავის დაოკებას, მაგრამ არაფერი გამოსდიოდა.

მერე ფიქრი დაწესებულების თანამშრომლებზე გადაიტანა. ცოტათი ყოყოჩა, მაგრამ ბუნებით კარგი ხალხი ეხვია გარს. გაიხსენა უბრალო, ხანდახან ენაჭარტალა მოფრები, დამლაგებლები, მეკარეები... ნეტა ამ ბოლო დროს ასე იშვიათად რად იცინის ნონა? ეტყობა. ოჯახში ვერა აქვს სიამტკბილობა... მოავონდა, დროზდოვამ რომ უამბო, ქმარს წავეჩხუბეო, ისიც გაიხსენა, პეტრაჩენკოვს ზამთარში გრიპი რომ შეხვდა, როგორ განიცდიდა ყველა და ავადმყოფს ზრუნვას არ აკლებდნენ.

ფრუზამ საკერავს ძაფი კბილით



შეაწყვიტა, ფანჯარაში გაიხედა და უცებ ადგილზე გაშეშდა. შარაგზიდან ბარაკისაკენ პარხომოვი მოდიოდა.

ალბათ ქალი ფანჯარაში ადრევე შეამჩნია, რადგან შორიდანვე უღიმოდა და ხელს უქნევდა. იღლიის ქვეშ რაღაც შეხვეულები ამოეჩარა. ახალთახალი შავი კოსტიუმი ნათხოვარივით ულაზათოდ ადგა ტანზე, კეფაზე დაუდევრად მოგდებულა ნაცრისფერი ქუდი ლამის იყო გადავარდნოდა თავიდან. ფრუზა ჯერ კარს მიაწყდა, მერე მაგიდას მიუბრუნდა, საკერავის ნაკუწები წამოკრიფა. საწოლზე მიყარა, იქიდანაც აიღო და ღუმელს უკან მიმალა. ისე დაიბნა. აზრი ვეღარ მოიკრიფა. კაცი კი ამასობაში უკვე კარს მოსდგომოდა და უკაკუნებდა. ქალი ხმას არ იღებდა. გონებადაფანტული ჩურჩულებდა მხოლოდ: „ოჰ. ღმერთო ჩემო, ღმერთო ჩემო!“ კაცი ფრთხილად, ხანდაყოვნებით აკაკუნებდა და უცდიდა. როდის შეიპატიყებდნენ. როდის-როდის მოისაზრა ფრუზამ, რომ სტუმარს უნდა შეგებებოდა, და კარისაკენ გაქანდა. შოფერმა ალერსიანად შეხედა. ზღურბლს გადმოაბიჯა. ფეხები საგულდაგულოდ გაიწმინდა და ქუდი მოიხადა.

— შუადღე მშვიდობისა, მასპინძელო! მომილოცავს რვა მარტი, ქალების დღესასწაული! გამახსენდა. მარტო რომ ხარ, და მოსალოცად მოვედი. მეც ხომ შენსავით მარტოხელა ვარ.

ქალმა დასაჯდომად მიიპატიჟა, სკამი ახლოს დაუდგა, დაფაცურდა, თუმცა შიშისაგან ჯერაც გონს ვერ მოსულიყო. სტუმარმა შეხვეულები მაგიდაზე დააწყო, ჯიბიდან ერთი ბოთლი არაყი ამოაძვრინა. თავგზააბნეული ქალი მღელვარებისაგან

აცახცახებული თითებით თავსაფრის ბოლოებს სრესავდა.

ეს უჩვეულოდ გამოწყობილი, ყელსახვევიანი, გაპარსული და რატომღაც ძალიან გამხიარულებული კაცი სულაც არ ჰგავდა მუდამ პირმოქუშულ პარხომოვს.

— ვიფიქრე, ამისთანა დღესასწაულია, ქალი კი მარტოდმარტოა, მოწყენილი, მოდი, შევივლი და დავხედავ, მაინც შორს არა ცხოვრობს-მეთქი.

— იჰ, ამას თუ შორს არ ეთქმის, მაშ სიშორე რაღაა?—ჩაიცინა ფრუზამ და თავის დიდ, ულამაზო ხელებს ადგილი ვერსად მოუძებნა.

— განა ეს შორია! სამი-ოთხი კილომეტრი რა დიდი მანძილია. ასე ვთქვათ, ავტო-ფოტო-მოტო კაცი-სათვის. შენ რასა იქმ, როგორა ცხოვრობ?—კაცმა იქაურობა მოათვალიერა. — ეს რა არის, წყალი ჩამოგდის? — მიანიშნა ჭერზე გამოტანებულ სველ ლაქაზე.—როგორმე უნდა მოახერხო. რემონტი გააკეთებინო, თორემ ეს რასა ჰგავს? ქალთა დღესასწაულია და ქალს კი თავზე აწვიმს! ასვლა და დახედვაა საჭირო. ეჰე, იატაკიც შეკეთებას თხოულობს. კარგი იქნებოდა ხელახლა დაგება, თუ კოჭები არ არის ჩამპალი, თორე ასე როგორ იქნება?

კაცმა პაპიროსს მოუკიდა. ასანთი და პრიალა პორტსიგარი კი მაგიდაზე დადო. ბოლი და კარგი თამბაქოს საამო სურნელი ოთახში ერთად დატრიალდა. ამ სუნმა ფრუზას როგორღაც გულს დარდი გადაუყარა და ქალმა შვეებით ამოისუნთქა. თავს ძალა დაატანა, გონება მოიკრიფა და ჭურჭლის გამოლაგება დაიწყო.

პარხომოვი ხალისიანად ჰყვებოდა შოფერების ცხოვრებაზე, გარაყის საქმეებსა და წესებზე. ხოლო ქალი

ახალგაზრდულად, ხალისიანად და მოხერხებულად საქმიანობდა მაგიდასთან. კიტრი მოიტანა, ძეხვი თხლად დაჭრა, ქაშაყი გაასუფთავა, თეფშები გააწყო, ერთ თეფშს ჭიქა ჩაუდგა. მეორეს — პატარა სირჩა.

პარხომოვმა სირჩა ხელში აიღო, მიატრიალ-მოატრიალა და უკმაყოფილოდ გადასდო გვერდზე.

— რათა ეგეთი პატარა, ცოტა მოზრდილი არა გაქვს?

— არა. — თქვა ფრუზამ.

კაცმა ეჭვიანად შეხედა მასპინძელს. გაიღიმა და ხელი ბოთლისაკენ გაიწოდა.

— რა გაეწყობა, მოდი, აღვნიშნოთ ქალების დღესასწაული! დაჯექ, რაღას ტრიალებ!

ქალი ისე მორჩილად და მორიდებულად ჩამოჯდა სკამზე, თითქოს თვითონ იყო სტუმრად.

დალიეს. კაცმა ნახევარი ჭიქა გამოსცალა, ქალმა — თავისი სირჩა. პარხომოვმა ქაშაყი დააყოლა. ქალმაც აიღო კიტრის პაწაწინა ნაჭერი და ნელა დაიწყო ჭამა. პირველივე სირჩამ ბედნიერი ფიქრების მთელი გუნდი ფუტკარივით აუშალა და სულში სიხარული და სიბოზ ჩაუღვარა. მაგრამ ქალი თავს იკავებდა და მხოლოდ იღიმებოდა. კაცმა ალერსიანად მიუცურა ძეხვიანი თეფში და ისე შესთავაზა, თითქოს მართლაც ქალი ყოფილიყო სტუმარი.

— ჭამე ძეხვი, გემრიელია, მოსკოვური, რბილი. არც ქონი აქვს ბევრი.

მერე კიდევ დალიეს...

ფრუზა არასოდეს ყოფილა ასე ახალგაზრდული სიხალისით სავსე. პარხომოვი გემრიელად ილუკმებოდა. პირისახე წამოსწითლებოდა, თან უბრალოდ, მეგობრულად ემასლათებოდა ქალს. ლაპარაკობდა და

ლაპარაკობდა გაუთავებლად, მაგრამ რას, ფრუზას არც კი ესმოდა. მთელ მის არსებას ახალი გრძნობა დაუფლებოდა — ჩუმი ბედნიერება, მახლობელი ადამიანის დამათრობელი სიბოთი გამოწვეული.

როცა ბოლოს და ბოლოს სტუმარი დანაყრდა, თეფშები მაგიდის შუაგულისაკენ მიაცურა და პორტსიგარი გადახსნა. ფრუზა თვალს ვერ აშორებდა კაცის თითქოსდა გაახალგაზრდავებულ პირისახეს. როგორც ყოველთვის, იგი ახლაც დინჯი და აუღელვებელი ჩანდა. ბოლოს კარგად დიდი ნაფაზი დაარტყა, თავისი ტაბურეტი ახლოს მიაცურა ფრუზას სკამთან და თავდაჯერებით, ოღონდ არც უხეშად და არც დამამცირებლად ქალი თავისკენ მიიზიდა.

ქალი ისე დაჰყვა კაცის ნებას, როგორც ძალზე სასურველსა და საწადელს. მთელი ტანით მიენდო, გახურებული პირისახე მის მკერდში ჩარგო და გაინაბა. კაცი ხორკლიან ხელისგულს უსიტყვოდ უსვამდა მხრებზე. ქალი კი ისე უჩვეულოდ კარგად გრძნობდა თავს, იმ წუთში სიკვდილზეც არ იტყოდა უარს.

ჰაიპარად პირდაბანილი პარხომოვი დილით უცბად მოემზადა და წავიდა. კარის ზღურბლთან ქალს სასწრაფოდ მოეხვია, აკოცა და უთხრა:

— აბა, ნახვამდის, არ მოიწყინო, რა ვუყოთ მერე! შენ მართლა კარგი ქალი ხარ...

ქალმა ოთახი მიალაგა, ლოგინი გაასწორა; ჭურჭელი დარეცხა. მთელი დღე გახარებული იყო იმ ამბით, რაც მოხდა. უხაროდა, რომ ამქვეყნად ასეთი უბრალო და ასეთი შესანიშნავი ადამიანი დადიოდა. სიამოვნებდა ის ფიქრი, რომ არც იგი გასწირა და დაჩაგრა ბედმა, სხვა ქალებივით ისიც მიმზიდველი და სასურველი გახადა კაცებისათვის, რომ



იმ კაცმა ამდენი სიტბო და ალერსი გაიმეტა მისთვის. სადღაც გაქრა ნაღველი, ამდენი ხანი გულს რომ უჭამდა, და ისე ეგონა, ძველი, დიდი ხნის წინათ დავიწყებული ახალგაზრდობა დამიბრუნდაო.

ასე გახარებული მივიდა სამსახურში. შესცვალა თუ არა დროზღოვა, მაშინვე იატაკი მოწმინდა, ფანჯრის რაფები დაასუფთავა. როგორც ყოველთვის, ახლაც ჭრიალებდა კარი, ახლაც მედიდურად ჩაუარა გვერდი ივანე კუზმიჩმა. ქალმა სალამი მისცა, მაგრამ განა წინანდელივით შეშინებული ხმით, არამედ იმ ადამიანივით, ვინც საკუთარი თავის ფასი და ყადრი იცის. მალე პეტრე-ჩენკოვმაც გაიარა. კატასავით უხმაუროდ და რბილად მიაბიჯებდა. აღარც ის მოეჩვენა მეკარეს ადრინდებულად მიუწვდომელი, შორეული და გამოუცნობი. ხოლო როცა ნონამ ქუსლების პაკაპუკით ამოიბინა სადარბაზოს კიბე და შემოსასვლელში შემოიჭრა, ფრუზამ თავი ვერ შეიკავა და ქალს სალამზე ტკბილი პასუხი დაუბრუნა:

— მომილოცავს გუშინდელი დღესასწაული, ნონა ვასილევნა.

მთელი დღე ნატრობდა ფრუზა. ნეტა ვინმე გაჩერდეს და გამოემლაპარაკოსო. ძალიან უნდოდა თავისი სიხარული ყველასათვის გაეზიარებინა.

იმ დღიდან მოყოლებული პარხომოვი ხშირად დადიოდა ფრუზასთან. როცა სამუშაოზე ხვდებოდა, საქმიანი, მკაცრი და შეფიქრიანებული ჩანდა, სხვებივით თითქოს უხეშიც. ფრუზა ახლოს არასოდეს მიდიოდა, შეხვედრისას შორიდან ესალმებოდა მხოლოდ. ქალის ფიქრით მათ შორის ძალიან დიდი და მნიშვნელოვანი ამბავი მოხდა და ამ ამბავს სხვათა თვალთაგან მოფარება და

მოფრთხილება სჭირდება, განა იმიტომ, ვინმემ ხელი არ შეუშალოს, უბრალოდ გამოაშკარავება უხერხული იყო. ქალს თითქოს ეშინოდა კიდევ, მაგრამ რად ეშინოდა, არკი იცოდა. გულგადაღებული უცდიდა შაბათსა და კვირა დღეს, როცა ორივეს ერთდროულად ჰქონდათ დასვენება. ამ დღისათვის ოთახს განსაკუთრებით დააწკრივებდა, გვირისტიან ლურჯ კაბას ჩაიცვამდა და ფანჯარასთან მოიკალათებდა. პარხომოვი სალამოხანს მოდიოდა. ხანდახან ხელს ღვინოს გამოაყოლებდა ხოლმე. ქალი ძველებურად ღელავდა. კაცი კი გაშინაურდა, ამ ოთახში თავდაჯერებულად ირჯებოდა. სანამ ფრუზა ვახშამს ამზადებდა, უსაქმოდ რომ არა მჯდარიყო, ხან ნაჯახს წამოავლებდა ხელს კაცი, ხანაც ჩაქუჩსა და ოჯახში ჩალიჩობდა. იატაკის ღრიჭოები ამოავსო, სახურავი შეაკეთა, მიწაყრილთან ძველი სკამი ჩადგა. მეზობლები ჩურჩულებდნენ, შეხვედრისას ეშმაკურად უღიმოდნენ, მაგრამ ქალს არაფრისა არცხვენოდა, მშვიდად, თავშეკავებულად, ქალური სიამაყით აღვსილი დადიოდა. ამაყობდა საკუთარი თავითა და იმ კაცით, გვერდით რომ ედგა.

სიახლოვის წუთებში ორივენი მეტწილად ღუმდნენ. პარხომოვი თავისკენ იზიდავდა და ხანგამოშვებით ოხრავდა. ქალი ხვდებოდა, ვებრალებო. პარხომოვი არასოდეს უამბობდა არც თავის გრძნობებზე და არც თავის ოჯახზე. ფრუზამ უკვე იცოდა, რომ ბარანოვიჩში იმას ოჯახი ჰყავდა. არც თვითონ ეკითხებოდა რამეს, ეშინოდა, არ დაერღვია თავისი მოულოდნელი, ძნელად დასაჯერებელი მერყევი ბედნიერება. ამ ბედნიერებას ქალი მეტისმეტად აფასებდა და უფრთხილდებოდა...

ოდონდ გული უგრძობდა, ხან-
მოკლე იქნებო ბედნიერება...

დადგა მზიანი ძაისი. ქალაქის
თავზე ცა უმეტესად ლურჯად და
უღრუბლოდ კიაფობდა. კედლებთან
ლურჯი ჩრდილები გაწოლილიყო.
ქუჩის კუთხეში უკვე ნაყინი და
ტკბილი წყლები იყიდებოდა. პეტ-
რაჩენკოვმა შაშის დაფასავით ჭრელ-
ჭრელა, კუბოკრული პიჯაკი ჩაიცვა,
თითქოს მხრებში ჩამოსხეპილი.
ნონამ წვრილქუსლიანი ქათქათა
თეთრი მაშიები ააბაკუნა. დაწესე-
ბულების წინკართან ყვავილნარი
იყო გაშენებული, სამფერა იები მი-
წას ჯერ რიგიანად არ ასცილებოდ-
ნენ, მაგრამ იქაურობა უკვე აეჭრე-
ლებინათ.

ერთ დღეს კარის ჭრიალი რომ
მიწყნარდა და თანამშრომლები თავ-
თავიანთ კაბინეტებში მიიმაღნენ,
ფრუზამ კიბის ქვეშ შენახული სარ-
წყავი გამოიღო, წყლით გაავსო და
ყვავილნარის მოსარწყავად გამოვი-
და. გრილი შესასვლელის შემდეგ
მზე საკმაოდ მცხუხვარედ მოეჩვენ-
ა ქალს.

ფრუზა ფრთხილად ადგამდა ფე-
ხებს, რათა იები არ გაექელა, ყვა-
ვილებსა რწყავდა და თან იმ არა-
ჩვეულებრივ პარხომოვზე ფიქრობ-
და. უკვე ერთი კვირა იყო, რაც
მივლინებაში იმყოფებოდა და ქალს
ამიტომაც არც სამსახურში და არც
შინ აღარ მიუხაროდა.

ამ დროს გაიღო კარი და მცონა-
რა და ძილისგუდა დამლაგებელმა
ანამ გამოყო თავი.

— დეიდა ფრუზა, პეტრაჩენკოვი
გთხოვთ.

ქალს უსიამოვნო წინათგრძობამ
შეუკუმშა გული. სარწყავი ასფალ-
ტზე დადო, მკერდზე გულსაბამი
გაისწორა და აჩქარებული ნაბიჯით
შენობისაკენ წავიდა. მეორე სარ-

თულზე კარის წინ ერთი წამით შე-
ყოყმანდა, მერე სახელური თავისკენ
გაუბედავად გამოსწია. პეტრაჩენკო-
ვი რაღაცას სწერდა, ახალი მოდის
ძვირფასი ავტოკალამი ქალაღზე
ლაღად დასრიალებდა.

— აჰა, ახლავე, — ჩაიბურტყუნა
კაცმა.

ფრუზა პეტრაჩენკოვის მაგიდას-
თან შეჩერდა და მოთმინებით დაუ-
წყო ცდა. თან ცდილობდა გამოეც-
ნო, რისთვის დასჭირდა ამ კაცს მისი
გამოძახება.

როცა წერა დაამთავრა, პეტრა-
ჩენკოვმა ქალაღების ქექვა დაიწყო
და უცებ, თითქოს სხვათა შორის,
იკითხა:

— მართალია, თქვენზე რომ ამ-
ბობენ... ვითომ იმ შოფერთან... რა
ჰქვია... ჰო, პარხომოვთანო...
ჰა?

პეტრაჩენკოვის სათვალემ წა-
მიერად გაიელვა. ამ უხეში, ჯიქუ-
რი კითხვით გაოცებული ფრუზა
უსიტყვოდ იდგა და საკუთარ ხე-
ლებს დასცქეროდა.


— ჰა? — ისევ შეეკითხა პეტრა-
ჩენკოვი. — ეტყობა, ჭორია, არა?

ქალი არასოდეს ცრუობდა. თუკი
დანაშაულსა გრძობდა, თავს გაი-
მართლებდა. ჰოდა, თუმცა ეწყინა,
ასე მოურიდებლად რომ ელაპარა-
კებოდნენ, მაგრამ მაინც არ იუარა,
მხოლოდ მხრები აიჩეჩა და თქვა:

— მერე რა? ხანდახან მოდის
ხოლმე...

პეტრაჩენკოვმა ისე გახედა, თით-
ქოს ფრუზას ზურგს უკან ვიღაც
დგას და იმას იმოწმებსო, მერე
ცალყბად ჩაიციხა:

— მართალი ვითხრათ, ამას არ
მოველოდი... კლასიკურად პირდაპი-
რი პასუხია... მერე იცით კი, რომ...
რომ თქვენი... მე ვიტყვოდი, სამარ-
ცხვინო საქციელი ჩრდილს აყე-



ნებს, ასე ვთქვათ, მთელ დაწესებულებას? იცით კი, რომ იმ თქვენს, რა ჰქვია, პარხომოვს ოჯახი ჰყავს, ვის მიმართაც, ასე ვთქვათ, განსაზღვრული მოვალეობა აკისრია. დიახ! ჰოდა, ახლა თქვენი არაორაზროვანი განცხადების შემდეგ მე, როგორც ადგილკომის თავმჯდომარე, იძულებული ვარ არ ვიკმარო ეს სიტყვები და მივიღო, ასე ვთქვათ, გადამწყვეტი ზომები, იმ გაგებით, რომ...

ფრუზას არაფერი ესმოდა, მაგრამ გულისტკივილით გრძნობდა, რომ საზიზღარი, სამარცხვინო ამბავი მოხდა და რომ ის რაღაცაში დამნაშავე იყო.

უაზრო თვალებით მისჩერებოდა ფრუზა ფანჯრიდან იმ კარს, რომლის იქითაც ჩვეულებრივ პარხომოვის მანქანა იდგა ხოლმე. ახლა კარი დაკეტილი იყო. ქალს ნაღველი შემოაწვა გულზე. — მას მარტოდმარტოს უნდა ეკისრა ეს მძიმე ბრალდება. ფრუზა ქვემოთ ჩავიდა, ფანჯარასთან მივიდა და რაფას დაეყრდნო.

მან გაოცებით გაიფიქრა, რომ აღრე არასოდეს მოსვლია აზრად, თუ ვინმე მის საქციელს სამარცხვინოდ ჩათვლიდა. პეტრაჩენკოვის ნათქვამის შემდეგ ქალისათვის ნათელი გახდა, რომ შოფერთან სიახლოვეს არავინ აპატიებდა, მაგრამ რა დააშავა, ქალმა ვერა და ვერ გაიგო. განა ვინმეს რამეს აიძულებდა? ან რამე ცუდ საქციელზე უბიძგებდა პარხომოვს?

საღამომდე ძლივს მიატანა და, შინისკენ მიმავალმა, გზაში მოიოხა გული ტირილით. გარკვევით კი ბოლომდე ვერ გაერკვა, რა შესცოდა ასეთი.

მეორე დილით გულის კანკალით ელოდა ცხრა საათს, როცა თანამშრომლები მოვიდოდნენ. როგორც ყოველთვის, ამ დღესაც პირველი

შავროვი გამოცხადდა. გულმოდგინედ გაიწმინდა ფეხები და ფრუზას მოკლედ მიუგდო:

— სალამი! რასა იქმ?

რაღაც სხვანაირი კილო ჰქონდა შავროვს და ფრუზამაც ყური ცქვიტა. შავროვმა კი, ვინ იცის, ხუმრობით თუ მართლა გააგრძელა:

— გავიგე, შენ უკვე ისა... საქმრო გიმოვია... აქვე, ახლოს, თანაც ცოლშვილიანი! ყოჩაღ, ყოჩაღ!

მან ალბათ იქვე დაივიწყა თავისი ნაოხოუნჯევი, ფრუზამ კი იგრძნო: ცოტაც და გული წაუვიდოდა. აღარავინ შეუმჩნევია, აღარავის მისალმებია. არც ივან კუზმიჩს, არც პეტრაჩენკოვს. გვერდით რომ ჩაუარა და გამოთეთრებული თვალებით ცივად გადმოხედა. არც ნონას, მეტისმეტი თავაზითა და დამცინავი ხმით რომ მიესალმა... ფრუზა შეურაცხყოფილი და გულნატკენი დარჩა ამ ხალხზე, მთელ ქვეყნიერებაზე!

იმავე დღეს საღამოს მივლინებდან პარხომოვი დაბრუნდა. გაიხედა თუ არა ფრუზამ ფანჯრიდან ეზოში, მაშინვე დაინახა მისი მანქანა, ალყაფის კარში შესასვლელად შემობრუნებას რომ ცდილობდა. ქალს გული ისევე აუფანცქალდა, როგორც პირველი შეხვედრისას. ერთი პირობა იფიქრა, შევეგებებო, მაგრამ მერე დაცდა ამჯობინა, ვინემ პარხომოვი მანქანას არ დააბინავებდა.

როგორც კი პარხომოვმა აკუმულატორი მოხსნა და ჩვრით გაპრიანება დაუწყო, ნაბიჯების ხმა შემოესმა და შემობრუნდა. ფრუზამ გაუბედავად გაუღიმა.

— იცი. პეტრაჩენკოვმა გამომიძახა: ლანძღვა დაძიწყო... მკითხა, მართლა თუ დადიხარ ჩემთან.

კაცის მტვერდადებულ, დაღლილ პირსახეზე შიშმა და წუხილმა გადაიბრინა. ფრუზა მოიბუზა.



— მერე... შენ რა ჰქენი? რა უპასუხე?

— მე რა მეტქმოდა? ვუთხარი, დადის-მეთქი... სულ ეს არის.

— სულელო! — პარხომოვმა ჩვირი გაბრაზებით დაახეთქა ძირს.— განა შეიძლება ეგრე? შენცა ხარ, რაღა!..

ქალს უნდოდა ეთქვა, რომ მას სხვაგვარად არ შეეძლო, ვერ მოახერხა, არ გამოუვიდოდა. მაგრამ როცა პარხომოვის გაბროტებულ სახეს შეხედა, ხმა აღარ ამოიღო, გაჩუმდა. ძლივს მიიტანა წელი შესასვლელში მდგარ თავის სკამამდე. ჩამოჯდა და თავი ველარ შეიკავა, მწარედ აქვითინდა. იქვე გვერდით ხალხი დადიოდა, რაღაცას ლაპარაკობდნენ, რაღაცას ეკითხებოდნენ, მაგრამ ქალს არც ერთხელ არ აუწევია ნამტირალევი. ცრემლისგან დაბრმავებული თვალები...

ამ დღიდან მოყოლებული მძიმე დღეები დაუდგა ფრუზას. პარხომოვი შინ აღარ აკითხავდა, სამუშაოზედაც გაუბრბოდა. თავს არიდებდა. ქალი ხშირად ხედავდა, შოფრებში რომ იდგა. პაპიროსს ეწეოდა, მასლაათობდა. ფრუზა ძველებურად ილტვოდა მისკენ. არაფერში ადანაშაულებდა. ახლა უკვე ნანობდა, პეტრაჩენკოვს რად გამოვუტყდიო, მაგრამ რა ექნა. როცა სიცრუე, ტყუილის თქმა, თავის მოკატუნება არ შეეძლო, არ ეხერხებოდა.

მალე გამოირკვა, რომ დედა უნდა გამხდარიყო. როცა წარმოიდგინა, რა თვალით შეხედავდნენ ამ ამბავს სამსახურის თანამშრომლები ან მეზობლები, შეძრწუნდა. თავხარი დაეცა. საოცრად მოუხდა სადღაც გაქცეულიყო და გადაშალულიყო. მაგრამ სულ მალე გაუჩნდა ახალი ფიქრი, ამ ფიქრმა თვითონვე ძალიან გააოცა: მას ეყოლება შვილი, პატარა,

საყვარელი არსება, ამქვეყნად ყველაზე ახლობელი და ყველაზე ძვირფასი. უცებ გაიხსენა მეზობლების შვილები, დროზდოვას პატარები და მის გულში საწინააღმდეგო გრძნობები შეეჭიდნენ ერთმანეთს. ფრუზამ იცოდა, რომ ძალიან გაუჭირდებოდა, პეტრაჩენკოვი არ მოეშვებოდა, ბოროტი ენებიც ქვეყანას მოსდებდნენ მის ამბავს. მაგრამ ეს ყოველივე ძალას კარგავდა და ფერმკრთალდებოდა დედობის ბედნიერების წინაშე.

ფრუზა თანდათანობით დამშვიდდა. გამხიარულდა. ახლა უკვე საკუთარ თავს უფროთხილდებოდა, ცდილობდა დროზე ეჭამა, გვიანობამდე არა მჯდარიყო, თავის ისედაც პატარა ჯამაგირიდან მაინც ახერხებდა ცოტა გადაენარჩუნებინა. ფული ხომ საჭირო იქნებოდა. როცა ქვეყანას მისი შვილი მოევლინებოდა... შინ დაბრუნებისას ბალებთან ან პარკებთან ჩერდებოდა და ეტლებში ჩაძინებულ პაწაწინა ბავშვებს ღიმილით შესცქეროდა...

ასე გადიოდა დღეები. ფრუზა გარეგნულად შეიცვალა და ეს უკვე ხალხმაც შეამჩნია. ერთხელ დროზდოვამ მის საეჭვოდ დამრგვალებულ მუცელს თვალი შეავლო და მერე თავხედურად ჯიქურ შეეკითხა:

— შენ რამ დაგამრგვალა ასე? ბავშვს ხომ არ ელოდები?

ფრუზას შერცხვა, გაწითლდა. ხელი დაიფარა მუცელზე.

— ჰო, ბავშვს ველოდები...

— აგრემც მიწა გაგსკდომიათ შენცა და შენს ბავშვსაც! — განზრახ გაბრაზებით აჯაჯლანდა დროზდოვა. — როგორ მიიყვახე საქმე აქამდე, დროზე ვერ შეატყვე თავს? ადრე უნდა გეზრუნა, ახლაც შეიძლება. თან არც ძვირია... ჯანდაბა და დოზანა შენს თავს!...

4193

ქართული ლიბრერია



— რათა?... — წყნარად შეესი-
ტყვა ფრუზა, როცა მიხვდა, რას ურ-
ჩევდა დროზდოვა, — დაე, გაჩნდეს.

— გაჩნდესო? — გაიკვირვა დრო-
ზდოვამ. — აი, სასწაული! გაჩნდე-
სო! ეგ რამ გაფიქრებინა, ქალო?
აგრე როგორ შეიძლება? უქმროდ
შვილის გაჩენა ვის გაუგია... გაჩნ-
დესო! შენა გგონია, ბავშვი გაჩნდე-
ბა და მორჩა საქმე? კატორლაში
ჩაიგდებ თავს, შენს ცხოვრებაში ვე-
ლარ გაიხარებ, თავბედს დაიწყევლი.
ეგ შენ უვიცობით მოგდის, შენთვის
პირველია და იმიტომ, მე კი უკვე
ექვსი გავაჩინე. მაგათ ჩამიმწარეს
სიცოცხლე, ეგენი ჩამიყვანენ მალე
სამარეში!

ფრუზას ხმა არ გაუღია, ოღონდ
კოფთა და წინიდან დამოკლებული
კაბა გაისწორა, დაბლა დაქაჩა. კარ-
გი იყო, უფრო განიერი, თავისუფა-
ლი კაბა შეეკერა, მაგრამ ფული ვერ
გაიმეტა. ან რაში სჭირია? არც არა-
ვისი რცხვენია, არც ვინმეს უმა-
ლავს. პატარაზე ფიქრს ისე შეეჩვია
და შეეთვისა, კიდევაც ამაყოფდა
თავისი ორსულობით.

დროზდოვა კი ვერა და ვერ დამ-
შვიდებულყო. ყოველ დილას
ფრუზასთან შეხვედრისას (ალბათ
პირს უკანაც) ერთთავად ლანძღავდა
და საყვედურობდა, მაგრამ ყველა-
ზე მეტად პარხომოვს თათხავდა.

— ახ, შე უბედურო, შე უსინდი-
სო და ბოროტო, ეს რა ჩაიდინე! —
გაჰკიოდა იგი და აინუნშიც არ აგ-
დებდა, რომ ტიხარს გადაღმა ხალხი
მიდი-მოდოდა. — მე შენს ადგილას
თვალეზს დავთხრიდი, ცხვირს ჩავუ-
ჩეჩქავდი, სამუდამოდ დავახსომეზ-
დი თავს მაგ უწმინდურსა და წყე-
ულს. არა, მე არაფრით არ ვაპატი-
ებდი. აქ რას უდგებარ? — დაუტა-
ტანებდა ხოლმე ფრუზას. — წადი
დირექტორთან, მიდი ადგილკომში.

დაე აიძულონ ეგ ოხერი ცოლად შე-
გირთოს.

მაგრამ ფრუზა არსადაც არ მი-
დიოდა. პარხომოვს არავისთან არ
უჩიოდა. უჩიოდა კი არა, ამდენ
საზრუნავში იმისი არსებობა თითქ-
მის კიდევც დაავიწყდა. კი მიხვდა,
რომ შეცდა, მაგრამ განა იმან რამე
ცუდი გაუკეთა? იმ კაცთან დაკავში-
რებული ამბები ტკბილად და სა-
სიამოვნოდ აგონდებოდა. ხოლო თუ
პარხომოვი ძველებურად აღარ ეკი-
დებოდა, თუ მისდაძი სულ შეიცვა-
ლა, მერე რა... ფრუზა ხომ პატარ-
ძლობას არ აპირებდა, ახ თვითონ ის
სადაური ნეფე იყო! ფრუზას ფიქ-
რით პარხომოვზე გულისმოსასვლე-
ლი და ჯავრის საყრელი არაფერი
ჰქონდა. ჰოდა, ცხოვრობდა ძველე-
ბურად თავისთვის, წყნარად, ოღონდ
ახლა მარტოობისა აღარ ეშინოდა და
ის პარხომოვიც დიდად აღარ ესაჭი-
როებოდა.

მაგრამ ხალხი არ ასვენებდა.
ეტყობა, პარხომოვის ცოლმაც რა-
ღაცას მოჰკრა ყური, რადგან სულ
მალე გაახსენა თავი. დილას ის-ის
იყო მორიგეობას შეუდგა. რომ
ჭრიალა კარებში დირექტორს შე-
ეფეთა. ქალი გვერდზე გახტა, სალა-
მი მისცა და შეეცადა მალე გარი-
დებოდა, მაგრამ დირექტორი მოუ-
ლოდნელად შეჩერდა.

— ჰო, მართლა, რა მოგიხდათ
პარხომოვთან? იმისმა ცოლმა წერი-
ლი გამოგზავნა, სასამართლოთი
იმუქრება. მე ის გუშინ დავითხოვე
სამსახურიდან... საკუთარი სურვი-
ლით წავიდა. მაგრამ თქვენ? თქვენ
რას ფიქრობთ?

დირექტორს გაჩეჩილი წარბები
შეეჭმუხნა და ქალს თვალს არ აშო-
რებდა. ფრუზა გრძნობდა, როგორ
უშლიდა ხელები და სად წაელო
ისინი, არ იცოდა. ბუცველზე დაფე-

ნილ კოფთის ბოლოებს თითებითა სრესდა და ნატრობდა, მიწა გასკდომოდა და თან ჩაეტანა, ოღონდ ამ მკაცრ თვალებს სადმე დამალვოდა. ხმას ვერ იღებდა, პასუხს არ აძლევდა, მხოლოდ იმაზე ფიქრობდა, თავს როგორმე მორეოდა და არ ეღელვა, რადგან მღელვარება პატარას ავნებდა. დირექტორი ერთხანს ასე იდგა, მერე თავი გადააქნია და კიბისაკენ წავიდა.

„ოღონდ არ ავღელდე, ოღონდ თავი შევიკავო როგორმე და არ ავღრიალდე“, ვინ იცის, მერამდენჯერ გაიმეორა ფრუზამ, როცა ფანჯრისაკენ მიდიოდა. მეორე დღეს შინაც იმასვე ეუბნებოდა თავის თავს, როცა მიწაყრილთან შეგროვილი მეზობლების ჭორაობა ესმოდა...

დადგა შემოდგომა... ფრუზას უკვე აღარ შეეძლო გაჭედილი ავტობუსით მგზავრობა, სადაც ხალხი ერთმანეთს აწყდებოდა და ჯიკაობდა. სამსახურშიც და შინაც უმეტესად ფეხით დადიოდა. ისე ეგონა, თითქოს ხალხს რაღაცა აწყენინა, რაღაცა გააკეთა ისეთი, რაც არ უნდა გაეკეთებინა. ნეტამც შესაძლებელი ყოფილიყო სულაც არავის დანახვებოდა თვალით. კიდევ კარგი, შემოდგომა იყო, წვიმა გადაუღებლად ასხამდა. ქალმა თბილი ჯემპრი ჩაიცვა და მუცელიც ისე ძალიან არ ეტყობოდა.

დროზდოვა აღარ ეჩხუბებოდა. მხოლოდ ერთხელ, როცა ფრუზა შეუძლოდ გახდა, გულმოსულმა დაუყვირა, შენს თავს ეგრე უყურადღებოდ ნუ ექცევო, თვითონ დაჯდა მის ადგილზე და ფრუზა შინ გააგზავნა. არც პარხომოვი დაივიწყა, იმასაც შეუკურთხა და მერე საკუთარ ბედზე აწუწუნდა — არც იმას ჰქონდა ტკბილი ცხოვრება.

რისაც ყველაზე უფრო ეშინოდა

ფრუზას, სწორედ ის მოხდა: მშობიარობა სამსახურში დაეწყო. დიდიდანვე ძალიან ციოდა, საშინელი, სუსხიანი ქარი ქროდა. ამისთანა ამინდში ფრუზამ მთელი ქალაქი ფეხით გაიარა. როცა მორიგეობა გადაიბარა და სკამზე დაჯდა, წელი ვეღარ აიტანა ზევით. სხეული ერთიანად გაუხურდა, ფეხები წაერთვა. ისე გაუჭირდა, სადილობამდე ძლივს მიატანა. მერე კი უკვე შეუძლებელი გახდა მოთმენა.

ანას შეეხვეწა, ჩემ მაგივრად იმორიგეო, და თვითონ ფრთხილი, გაუბედავი ნაბიჯით გაემართა სამშობიაროსკენ. შორს არც იყო წასასვლელი, იქვე ახლოს უნდა მისულიყო...

დილისათვის უკვე ყველაფერი დამთავრებული იყო. ისე მოიმშობიარა, დაუყვირია კი არადა. ერთი კვნესა არ ამოხდომია, საშინელი ტკივილი უსიტყვოდ და უდრტვინველად გადაიტანა, ხალხის შეწუხების ერიდებოდა. ექიმმა ქალმა მოთმინება და ვაჟკაცობა შეუქო. ხოლო როცა უთხრეს, ძალიან ჯანმრთელი და კარგი ბიჭი გააჩინეო, ყველაფერი ერთბაშად დაავიწყდა.

როცა პატარა დედას მოაშორეს და მეორე ოთახში გაყვანა დაუბირეს, ისეთი ბოხი ხმით აღრიალდა, იმ წამიდან მოყოლებული დედას სამუდამოდ დაამახსოვრდა ეს მომთხოვნი, მბრძანებლური ხმა. მერე პაწაწინა მოწითალო პირსახე დაინახა, მაგრად დახუჭული თვალები და რძის ხარბად საწუწნად აპრეხილი ზედა ტუჩი. ისე ტკბილადა სწოვდა ხოლმე ძუძუს, ისე აწლაპუნებდა პირს, ლამის დამდნარიყო ფრუზა.

სამშობიაროში თავს ჩინებულად გრძნობდა. ოღონდ თორმეტი საათისათვის, როცა სანიტრებს წინ და უკან სირბილი აუტყდებოდათ, როცა მე-



ლოგინებს შინიდან გამოგზავნილ საჭმელ-სასმელს ჩამოურიგებდნენ, ფრუზა თავს უხერხულად გრძნობდა. პალატაში სათითაოდ ყველა მაგიდას ნაირ-ნაირი ყვავილები ამშვენებდა ლარნაკით. მხოლოდ მისი ლარნაკი იდგა ცარიელი. ფრუზას ეს ყვავილები სულაც არ ენაღვლებოდა, ეგ იყო, ხალხის თვალები აწუხებდა... ამ თვალებს არაფერი დაემალებოდათ, ისინი ყველაფერს კითხულობდნენ, რაც შენს სულში ხდებოდა. პალატის მეზობლები და ბებიაქალები, ეტყობა, ყველაფერს ხვდებოდნენ, მაგრამ არაფერს ეკითხებოდნენ და ფრუზაც დიდად მადლიერი იყო მათი.

და მაინც ვერა და ვერ დაეძლია გულში შემოპარული შიში. დიდი ხნის წინათ მის მშობლიურ სოფელში მომხდარი ამბავი სულ თვალწინ ედგა. ის იყო ომი დამთავრდა, ჯარისკაცები საკუთარ კერას უბრუნდებოდნენ. ყველა ოჯახი მოუთმენლად ელოდა ჯარმთავრის ვაჟკაცს. ერთადერთი ქვრივი ელენე იყო, არავის რომ არ უცდიდა. მისი მეუღლე ეფიმი ჯერ კიდევ ათას ცხრას თექვსმეტ წელში მოკლეს უცხო-სა და შორეულ გალიციაში.

როცა ეს საზარელი ამბავი შეიტყო, რამდენიმე დღის განმავლობაში ელენე ისე მოსთქვამდა, მთელ სოფელში ისმოდა. მერე ჩალისფერი ცხენი ორთვალაში შეაბა და მინდორში წავიდა.

ფრუზა მაშინ ერთი ბეწო გოგო იყო, მინდორში მამასთან სადილი დაჰქონდა ხოლმე. ვერაფრით ვერ გარკვეულიყო, ეს ახალგაზრდა ქალი ერთთავად გუთანთან რად იჯდა და რა ატირებდა. მაგრამ მალე გამოუჩნდა მხსნელი ქალს, დამშვიდდა, გამხიარულდა და ერთ მშვენიერ დღეს პატარა გოგო ნიუშკაც გააჩი-

ნა. ფრუზას კარგად ახსოვდა, არყის ხის ლატნებისაგან მოწნულ აკვანში როგორ იწვა ეს ერთი ციცქნა არსება და ცივი ხმით გაჰკიოდა. უმამოდ გაჩენილი გოგოს სანახავად სოფლის გოგო-ბიჭებთან ერთად ელენეს სახლთან ფრუზაც დარბოდა და ფანჯრიდან იჭყიტებოდა. სოფელში ეს იმდენად უჩვეულო ამბავი იყო, რომ მარტო ქალები და კაცები კი არა, ბავშვებიც კი ნიშნისმოგებითა და გაკილვით ლაპარაკობდნენ. მერე კი ის საშინელი უბედურება დატრიალდა, რომლის გახსენება ახლაც თავზარსა სცემდა ფრუზას. რომელიღაც უქმეზე უგონოდ გამომთვრალმა ელენეს პირქუშმა და უხი-აკმა მამამთილმა რძალი ისე უმოწყალოდ სცემა, სასიკვდილოდ მოაქცია. ნახევარი წელიწადი ახველებდა და ნახველს სისხლს აყოლებდა ქალი, ბოლოს ლოგინად ჩავარდა და მოკვდა. მთელ სოფელში ერთი სულიერი არ გამოსარჩლებია, არავის შებრალებია, არავის გაუმართლება ელენე. დასაფლავებითაც კი სასაფლაოს განაპირას დასაფლავეს საფლავის ბორცვი მალე დაფარა შამბნარმა, მაგრამ სოფლის დედაკაცები ელენეს სახელით კიდევ დიდხანს აშინებდნენ ბალებს.

მართალია, ახლა სხვა დრო იყო, მაგრამ ადამიანებს გახა ერთნაირი ბუნება აქვთ. ფრუზას გული უსკდებოდა, ვაითუ დაწესებულებაში ეს სამარცხვინო დედობა არ მაპატიონო... ისევ დაიწყებდა თათხვას პეტრაჩენკოვი, ვინ იცის, ეგება ადგილკომშიაც გამოეძახათ და სასჯელი დაედოთ... ყოველგვარ ღონესა ხმარობდა, არ ეფიქრა ამ საშინელებაზე, შვილს ეფერებოდა და ელოლიავებოდა, მაგრამ შავ ფიქრებს მაინც ვერ იცილებდა. ის კი სჯეროდა მხოლოდ, რომ შვილის გუ-

ლისათვის ყოველივეს გაუძლებდა და გადაიტანდა.

ძალიან მალე მომჯობინდა ფრუზა. რამდენიმე დღის შემდეგ ადგომის ნებაც დართეს. საწოლზე ჩამომჯდარი გულგადაღებული ელოდებოდა, როდის მოიყვანდნენ ეტლში ერთმანეთის გვერდით ჩაწოლილ, თეთრ სახვევებში გამოკრულ პაწაწებს. კარის ზღურბლიდანვე სცნობდა თავის ბიჭს, სიხარულს ვერ იოკებდა, პირველი ეგებებოდა და მერე უხალისოდ ატანდა უკან. ბებიასა და ძალიან უქებდნენ შვილს. ექიმმა ქალმა ისიც კი უთხრა, ნამდვილი გოლიათია, ოთხ კილოსა და რვაას გრამს იწონისო. ამის გაგონებაზე დედის გული სიამაყით ივსებოდა.

დადგა სამშობიარო სახლის დატოვების დღეც. უკანასკნელ ღამეს განსაკუთრებით შეფოთავდა ფრუზა. ახალჩაძინებულმა საშინელი სიზმარი ნახა და გათენებამდე ვერა და ვერ დახუჭა თვალი. პეტრაჩენკოვი, დირექტორი ივანე კუზმიჩი და შავროვი ესიზმრა, ვითომც სამივენი სამშობიაროში მოსულიყვნენ და ბავშვის წართმევასა ლამობდნენ. ქალს ახალშობილის მიტაცებას და მითვისებას აბრალებდნენ, გულგახეთქილ დედას კი ვერ დაემტკიცებინა, ჩემი საკუთარი შვილიაო. შიშისაგან გამწარებული ფრუზა სასოწარკვეთილი დარბოდა ხან ოთახებში, ხან ქუჩებში და შვილს მალავდა, მაგრამ მდევარი ფეხდაფეხ მოყვებოდა.

გაიღვიძა თუ არა, ის გაიფიქრა, დილით რაღაცა საშინელება მოხდებოდა. დილაბნელზე წამოდგა, თავისი ხაბაკ-ხუბაკი მოაგროვა, სამსახურში დარეკა. ანას, ვინც თურმე ფრუზას მაგივრად მორიგეობდა, სთხოვა, დროზდოვას გადაეცი, ბავშვის თეთ-

რეული მომიტანოსო. ძალიან გაუჭირდა ათ საათამდე მოცდა, როცა ექიმები უნდა მოსულიყვნენ და გაეწერათ.

დრო ნელა მიიზღაზნებოდა. ათიც შესრულდა და თერთმეტიც, დროზდოვამ კი არსად ჩანდა. ფრუზას ჩააბარეს დაბადების მოწმობა, ცნობა იმაზეც, ბავშვს ყველაფერი აცრილი აქვსო. დაბადების მოწმობა, როგორც ყველაზე ძვირფასი საბუთი, ქალაქში გაახვია და უბეში ჩაიდო ფრუზამ. დროზდოვას მოლოდინში დერეფანში ბოლთასა სცემდა და ფიქრობდა, ამ ყინვასა და სიცივეში შვილი შინამდე როგორ მიეყვანა. ადრევე უნდა ეზრუნა და ეყიდა თბილი საბანი, მაგრამ ფული ყველაფერს ვეღარ გააწვდინა. როცა მომვლელმა ქალმა კარი გამოაღო და გამოუძახა, ფრუზა შეკრთა. წინა გასასვლელ ოთახში დროზდოვა დანახა. თბილ შალში შეფუთულს პლუშის მოკლე პალტო ეცვა, ხელში თეთრი შეკვრა ეჭირა და ელოდებოდა. ფრუზას ოდნავ გაუღიმა და თავისებურად უხეშად, მოურიდებლად დაიწყო:

— აბა, რას შვრები, საცოდავო, გამოდიხარ? გეტირა ყოფის დღე? არ გეუბნებოდი, შავი დღე დაგადგება-მეთქი? აბა, სად არის ის შენი სისხლისმწოველი? აი ესენი მოგიგროვეთ... შენთან სახლში არ წავსულვარ, ძალიან შორსაა.

დროზდოვამ ფრუზას ხელში შეაჩეჩა ფუთაში გამოხვეული საბანი, ზეწრები და ლურჯი ბაბთით შეკრული ბავშვის სახვევები. ქალი გაოცდა, ვისიანო ეს ყველაფერი?

— აიღე, აიღე. — წაუთქულუნუნა დროზდოვამ. — ყველაფერი შეგიგროვეთ. ნონამ და შავროვმა ორმოცდაათ-ორმოცდაათი მანეთი მომ-

ცეს. მეც ჩემი რამდენიმე სახვევი წამოგიღე, გამოგადგება.

— გმადლობთ, — ფრუზა ძლივს იმაგრებდა ცრემლებს, მოულოდნელად საოცრად შეებრაღა საკუთარი თავი.

— ჰო, წადი, ჩქარა მაჩვენე შენი დოდრიალა ბიჭი, — ისევ გაჰკრა მუჯლუგუნი დროზდოვამ.

ფრუზამ სასწრაფოდ გადაიცვა დაჭმუჭნილი ტანსაცმელი — ტანსაცმელს უკვე გადასჩვევოდა — თან ერთთავად კარისაკენ იყურებოდა, საიდანაც მისი შვილის, მისი იმედისა და ბედნიერების პირველი გზა და სავალი უნდა დაწყებულიყო.

მუდამ ფაცურა და მოუცლელმა ბებიქალმა ლამაზად გახვეული შეკვრა ფრუზას გადასცა და დაემშვიდობა. ფრუზამ ფრთხილად და ნაზად აიყვანა შვილი ხელში, ზეწარს ყური აუწია და შეიჭყიტა. დროზდოვამაც დახედა ახალშობილს.

— გძინავს? შენ კი რა გითხარი! პირწავარდნილი პარხომოვი ხარ! კარგი, კარგი, რაცა ხარ, ეგა ხარ. გაიზარდე დიდი ბიჭი! მომეცი აქ ბავშვი.

ქალმა უბოდიშოდ ჩამოართვა დედას შვილი, ორივე ხელი მარჯვედ შემოხვია, კარი მხარით გააღო და გავიდა. ფრუზაც გაჰყვა.

სანამ მიყრუებული შესახვევებით მიდიოდნენ, სადაც ხალხი ნაკლებად ირეოდა, ფრუზას ერთხელაც არ გახსენებია თავისი ამასწინდელი შიში და გულისხეთქვა. ახლა თავს მარტო აღარა გრძნობდა, ახლა მასთან ყველაზე ახლობელი, ყველაზე ძვირფასი არსება იყო, მისი სისხლი და ხორცი, მისი სიცოცხლის აზრი და ბედნიერება. აგე ეს ჯაჯღანა დროზდოვაც კი მოლბა და ამდენი მზრუნველობა გამოიჩინა...

დაწინაურებული დროზდოვა გან-

ზრახ გაჯავრებული კილოთი ესაუბრებოდა პატარას. ამ ქალის ბუზლუნს კარგა ხანია შეეჩვია ფრუზა და ახლა მოფერებადაც კი ეჩვენებოდა, ნონასა და შავროვსაც ძალიან ემადლიერებოდა. ალბათ მართლაც ახლობელია ამ ხალხისათვის, მზრუნველობა და ყურადღება რომ გამოიჩინეს. როცა დაწესებულებას მიუახლოვდნენ, უცებ დროზდოვამ შესასვლელი კარისკენ გაუხვია

— მიდი, აჩვენე შენი დოდრიალა ბიჭი. დაე ყველამ ნახოს, თორემ გული გააწყალეს, ფრუზა ასეთია. ფრუზა ისეთიაო! მიდი, ჰო, მიდო, აბა შენა ხარ, რას გადექი განზე! — შეუყვირა ქალმა.

ფრუზა შეყოყმანდა. ძალიან ერიდებოდა ბავშვის იქ შეყვანა, მაგრამ დროზდოვასთან განა რას გახდებოდა. თითბრის სახელურს ხელი ჩაავლო და გამოსწია. კარმა ისე მძიმედ დაიჭრიალა, თითქოს ძველ ნაცნობს მიესალმა.

მოსაცდელში სიწყნარე იყო. პირველმა ანამ მოირბინა თავისი ქუსლებმოქცეული თექის ჩექმებით. დროზდოვა ბატარეიასთან მარჯვედ მიჯდა და ბიჭს საბანი შემოაცალა.

— მოდით, ნახეთ, რა ვაჟკაცია. ყველას გეგონათ, ფრუზა სხვაზე ნაკლებიაო? ეგეც თქვენი ფრუზა. აი, როგორ იზმორება ეს ღორმუცელა! მარტო მიართვი და აჭამე, სხვა ყველაფერი ფეხებზე ჰკიდია! — ლაპარაკობდა დროზდოვა და თან ბიჭს აწიშვლებდა.

მოჰკრეს თუ არა ყური ამ ახალ ამბავს, რომელიღაც დერეფნიდან საჩქაროდ მოვარდა ორი დამლაგებელი. აპაკუნდა წვრილი ქუსლები და კიბის მოაჯირს ნონას ხუჭუჭა თავი გადმოეკიდა.

— რა ამბავია, რას აკეთებთ მანდ? — გადმოიძახა ზემოდან და



ბაკუნ-ბაკუნით ჩამოირბინა კიბე. — ვაი, რა პაწაწინაა, რა ბუთხუზაა! მომეცით რა. დამაჭერინეთ! — აჟღერტულდა ნონა, სახვევებში გამოკრული პატარა მოუხერხებლად აიყვანა და გულზე მიიკრა.

ფრუზა შეშფოთდა, გული გადაუქანდა, ნონას ბავშვი არ გაუვარდესო, და ორივე ხელი შეაშველა ქვემოდან. ნონა კი მალლა აბტუნებდა და მერე გულში იკრავდა პატარას. თურმე რამდენი სითბო და სინაზე ჰქონია ამ ახალგაზრდა ქალს. ამ დროს შავროვიც გამოჩნდა და თავისებურად, დაბოხებული ხმით შორიდანვე შემოუძახა:

— გამარჯობა, ფრუზიკო! რასა იქმ, როგორა მყავს შენი თავი? ოჰო, ამას რას ვხედავ — მომილოცავს გამრავლება! უჰ, რა ყოჩაღი ქალი ყოფილხარ! — შავროვი შავი ლაბადის შრიალ-შრიალით მიუახლოვდა ფრუზას. — მომეცით, მეც დამაჭერინეთ ეგ კაცი!

მაგრად გამოკრული ბავშვი ნონას ჩამოართვა, მალლა აისროლა და მარჯვედ დაიჭირა. ბიჭი უსიამოვნოდ შეიშმუშნა.

— ძალიან კარგი ბიჭია, ძალიან კარგი, — ინჟინერს სიხარულისაგან თვალეები უბრწყინავდა. — სახელი რა ჰქვია? — იკითხა შავროვმა, მაგრამ პასუხს აღარ დაუცადა. ზემოთ, კიბის მოედანზე პეტრაჩენკოვი შეამჩნია. ადგილკომს ჩამოსვლა ვერ გადაეწყვიტა, ფეხს ითრევდა. — ჰეი, პეტრაჩენკოვ, მოდი აქ, ნახე, რანაირი კაცი მოევლინა ქვეყანას.

ფრუზა შეკრთა, წუხანდელი სიზმარი გაახსენდა. იფიქრა, პეტრაჩენკოვი საყვედურებს მოჰყვებო, მაგრამ ადგილკომის თავმჯდომარემ დიდი მზრუნველობით გაისწორა ცისფერი ყელსახვევი ჭრელი პიჯაკის ქვეშ, კიბეზე ფრთხილად ჩამოდგა

ფეხი და ქვემოთ ჩამოვიდა. მის ნაადრევად დამჭკნარ სახეს ცნობისმოყვარე თუ დამნაშავე ღიმილი შეადნა.

— აი, შეხედე. — არ ეშვებოდა ინჟინერი. — კაცი, ადამიანი გაჩნდა! ასეა, ძმაო, სიცოცხლე სიცოცხლესა ჰქმნის. მართალი არა ვარ?

ყველა იღიმებოდა. პეტრაჩენკოვი ახლოს მივიდა, დახედა ბიჭს, შავროვი რომ ათამაშებდა. მართალია, ფრუზას ბიჭისთვის ხელი არ მოუვლია, მაგრამ მისმა მოწყალე ყურადღებამ ქალი დაამშვიდა და გული საგულეში ჩაუგდო.

— რა გაეწყობა... ადამიანი გაჩნდა, სინამდვილეს ვერ გაექცევი! ამას დასტურიც არა სჭირდება, — თავისი პრიალა სათვალისაგან პეტრაჩენკოვმა იქ მყოფთ გადახედა, ოდნავ გაიღიმა, ფრუზას შემოუბრუნდა და დაუმატა: — იცით რა, სემაშკო, ადგილკომში განცხადება შემოიტანეთ. რომ სამასი მანეთით დაგეხმარონ. რაღაი საჭიროა, რა გაეწყობა... ჰო, კიდევ ის უნდა მეთქვა. დირექტორმა თქვა, სახლში ჩემი „პობედით“ წაიყვანეთო. ისე რომ ფეხით არ წახვიდეთ.

ფრუზამ შავროვს ჩამოართვა და პირველად თავისი ხელით შეახვია ის, ვინც ხალხის ესოდენ სასურველი ყურადღება მოუხვეჭა. ძალიან დელავდა, მაგრამ უკვე აღარ ცდილობდა თავის დამშვიდებას. დროზდოვა არ ეხმარებოდა, შორიდან უყურებდა დაკვირვებით დედის ჯერ გაუბედავ მოძრაობას, შავროვი გულლიად და კეთილად იღიმებოდა. შეკავებულ სიხარულს გაეშუქებინა ანასი და ორი დანარჩენი დამლაგებლის თვალეები.

მხოლოდ ნონა მოღრუბლულიყო რატომღაც, წვრილი წარბები მოეჭმუხნა და საკუთარი ფეხსაცმელების ჭვინტებს დასცქეროდა ჩაცვიებით.



ქართული
ენობათმცოდნეობის
ინსტიტუტი





საყვირისა და ღრუბლის გალაქა

რომანი

თარგმნა ნათელა ლორთქიფანიძემ

I

ნაღვლიან ჰანგს უკრავდა საყვირი და მტრედისფერ ცაზე უდარდელად მიცურავდა თეთრი ღრუბელი.

ცოტა ხნის მერე კი...

ყველაფერი უბრალოდ და კარგად დაიწყო.

ჩემოდანი, ზურგჩანთა და საბეჭდი მანქანა იატაკზე დადეს. მყუდრო, ცოტათი ბნელი ოთახიც კი იყო, ან იქნება ნაშუადღევის მზის მწველი სხივებით გაჩირალდნებული ქუჩიდან შემოსული კაცის თვალს ეჩვენა ასე.

სახლის პატრონმა, მაღალმა, ხმელ-ხმელმა, წელამდე შიშველმა გლეხმა, მოკლე შარვალი რომ ეცვა, ზანტად მოიწმინდა ოფლით დაცვარული შუბლი, ვიწრო ეზოში გამავალ ფანჯრის რაფას მიეყრდნო და გაბანჯგლული ნიკაპი მოიქექა. ეზო თვალისმომჭრელი მზის სხივებით ჩახჩახებდა და ფანჯარასთან მდგარი კაცი ამიტომაც შავად მოჩანდა.

პეტერ მაიცენმა ერთი კი შეავლო მზერა სახლის პატრონს და მაგიდასთან მივიდა. ისე, უნებურად შეავლო და მისმა გაწაფულმა თვალმა წამსვე დაადგინა: „დიდმოწამის ჩაშავებულ გოთურ ქანდაკებას ჰგავს, ოღონდაც გადიდებული“.

ისიც გაიფიქრა, ეს რა მარჯვე შედარება გამომივიდაო, მაგრამ იმ წუთს არც შედარება ენაღვლებოდა და არც ეს კაცი. თავში ათასნაირი ფიქრი უტრიალებდა, გული კი სიხარულით ჰქონდა სავსე. ხელი წამოავლო დანჯღრეულ მაგიდას და ოღროჩოდრო იატაკზე გააჩოჩა, ეგებ სხვაგან უფრო მყარად დადგესო.

სახლის პატრონმა ისევ მოიქექა ნიკაპი, მერე ჩაახველა და ამოღერდა:

— ჰმ, მაშ ასეა საქმე... მაშ წერთ, არა?

— ვწერ! — თავი დაუქნია პეტერ მაიცენმა.

— ჰმ!.. ისე კი შეგხედავთ კაცი და ან მასწავლებელი ეგონებით, ან ექიმი... ან კიდევ სხვა ვინმე...

— ჰოდა, ხომ ნახეთ, არ ყოფილა ეგრე! აი, სათვალეც არ მიკეთია! — გაიხუმრა პეტერ მაიცენმა. შუახნის კაცი იყო, მაღალი არ ეთქმოდა. დღეს მხიარულ გუნებაზე იყო, ცოცხლად გამოიყურებოდა და თავის ჭრელაჭრულა პერანგს დიახაც იფერებდა. „ბედნიერი ვარ! ბედნიერი! — ისე უჩქროლავდა გული, ცოტა არ იყოს, რცხვენოდა კიდევ. — ბალღით ვხარობ და პაემანზე პირველად მიმავალი ჭაბუკივით ვღელავ“.

— ჰმ, მაშ ასე, — გააჭიანურა სათქმელი სახლის პატრონმა, — წიგნებს წერთ?

— წიგნებს... „ეს ხომ მართლაც ასეა თითქმის“.

— ასე ვთქვათ, ისტორიებს?

— ისტორიებს... „მუდამ ისეა, თითქოს პირველად ვიწყებ“.

— მერე თვითონ იგონებთ?

— მე თვითონ. „მხოლოდ ქალები არ ჰგვანან ერთმანეთს“, — პეტერ მაიცენმა ჩაიციხა, მაგრამ პირისახეზე თითქოს ჩრდილმა გადაურბინა.

— ჰმ, მაშ ასე. — ნიკაპის ქექვით დაუკრა კვერი სახლის პატრონმა, — ეს, ასე ვთქვათ...

— ჰო, რასაკვირველია! — ხელაღვე შეაწყვეტინა სიტყვა პეტერ მაიცენმა.

— იმას გეუბნებოდით, წერთ-მეთქი... მაშ ეგრე, წერთ...

— როგორ? — ჰკითხა პეტერ მაიცენმა, მაგრამ წამსვე იაზრა და მხიარულად გაიღიმა. — რასაკვირველია, რასაკვირველია! ეგრე, ეგრე! — მან ოდნავ შეარხია მხრები და მაღალ შუბლზე ჩამოშლილი ქერა ქოჩორი გადაიყარა. „როგორც კი საბეჭდ მანქანაზე დახრი თავს, სეტყვასავით წამოვა აზრები“. შუბლზე, ლოყებზე და ტუჩების ირგვლივ ღრმა ნაოჭები ასხდა — თითქოს ყოველდღიურ საზრუნავსა თუ გადატანილ გულისტკენას დაესერა ბასრი დანით. მაგრამ ამ წუთას მისი სახე შთაგონებას გაეცისკროვნებინა, გზაშივე რომ დაუფლებოდა.

— ჰმ, მაშ ასე, — განაგრძობდა სახლის პატრონი. — რაც თავში მოგივათ, იმას წერთ?

— რაც თავში მომივა, იმას ვწერ... „ისე ადვილია, მეტი აღარ შეიძლება! ნეტა იცოდეთ, რა სიამეა!“

— ზოგჯერ კი ყურს მოჰკრავთ რაიმეს და იმაზე წერთ?

— ეგრეც ხდება ხოლმე! — დაეთანხმა პეტერ მაიცენი და კვლავ შეავლო თვალი. „იქნებ რაიმეს დაწერა გინდა შემომთავაზო? მაღროვე, ძმაო! ახლა არა მცალია! ძველი გმირები მელოდებიან! აგერ რამდენი წელია ჩემს მოლოდინში არიან! ტემნიკარი მელის, ჩემი მთავარი გმირი!“

— ჰმ, მაშ ასე, — ლულულულებდა სახლის პატრონი. — რა არ შეემთხვევა კაცს.

— სწორია, სწორია... რა არ შეემთხვევა...

— ჩვეულებრივ კაცსაც კი!

— სწორედ ჩვეულებრივი ხალხია ხოლმე არაჩვეულებრივი.

— ჰმ, მაშ ასე...

— ხოლო არაჩვეულებრივი ადამიანები უმთავრესად ყოველად ჩვეულებრივები არიან.

— ხალხი ხალხია.

— იქნებ არც ეგრეა! — შეეკამათა მოულოდნელად პეტერ მაიცენი.

გლახმა ნერწყვი გადაყლაპა.

— ჰმ, მაშ ასე... ზოგჯერ არცაა ეგრე!

— არა, არა! — მხიარულად აქნევდა თავს პეტერ მაიცენი, თითქოს ამ მწარე ჭეშმარიტებამ საოცრად გაახარა.

— რას იზამ კაცი! — მორჩილად ამოიოხრა სახლის პატრონმა. — ასეა და...

— ჰმ, მაშ ასე! — თავისთვისვე მოულოდნელად თქვა პეტერ მაიცენმა და მიმოიხედა. მერე ღონივრად დასწვდა თავის ჩემოდანს, მსუბუქად მოისროლა ლოგინზე და გახსნა. ჩემოდანში ელაგა წიგნები, საწერი ფურცლები და ხელნაწერებით სავსე საქაღალდეები.

— მაშ, ომზე, — განაგრძო კვლავ სახლის პატრონმა, — ომზედაც წერო?

— ომზედაც.

— ჰმ, რასაკვირველია... ომზე ბევრი რამის დაწერა შეიძლება.

— ბევრის! ბევრის! — თავი დაუქნია პეტერ მაიცენმა, — და არა მარტო შეტევებზე, ბრძოლებზე, გამარჯვებასა და საყვირზე, ომის შემდეგ რომ თავის ტრა-რა-რას აგუგუნებს! — მან ფურცლები მაგიდის კიდეზე დადო, ხელისგულები ტუჩებზე მიიღო, ფეხისწვერებზე შედგა და ქვეყნის სამი კილით დააყვირა: — ტრა-რა! ტრა-რა-რააა! ტრა-რა-ტრააა!

სახლის პატრონმა შიშით თვალები გადმოკარკლა.

— აბა, როგორია? აა, გიკვირთ, საყვირით რომ დავუკარი, არა! — გაიცინა პეტერ მაიცენმა, — ოჰ, ნუთუ არ გაგიგონიათ, რომ ხელოვანი ბალღით არის? ცელქი და მიამიტი ბალღი! მთლად ჭკუადამჯდარი არისო, ვერ იტყვი მასზე! მაშ არადა, ჭკუადამჯდარი კაცი თიხის ზელას მოჰყვება, ან საღებავებით თხიპნას, ან კიდეც ნაირ-ნაირ ამბებსა და ლექსებს დაწერს? როგორ გეკადრებათ! ეს ხომ ბალღური გართობაა და სხვა არაფერი. ამიტომაც არის, რომ გონიერი ადამიანები ხელოვან ხალხს არად აგდებენ და ჭკვიანი ქალებიც ტუტუცებად თვლიან მათ.

გლახმა ჩაახველა.

— ჰმ, მაშ ასე... ქალები ხომ...

— ასეა! ასე! — სიტყვა გააწყვეტინა პეტერ მაიცენმა. მარცხენა ხელით დონჩი შემოიყარა. მარჯვენა ასწია და საჩვენებელი თითი წინასწარმეტყველივით შემართა. — დიდება კი სიკვდილის შემდეგ მოვა! სახელმწიფო სახსრებით დაკრძალავენ. იმ სახლზე, სადაც დაიბადა, ცხოვრობდა და ქმნიდა — მემორიალურ დაფას გააკრავენ; ასევე მემორიალურ დაფას გააკრავენ იმ სახლზეც, სადაც გარდაიცვალა, ქუჩას მის სახელს დაარქმევენ, საფლავზე ძეგლს დაუდგამენ! მერე ასპარეზზე გამოვა მეცნიერთა მამაცი რაზმი — კუშტად მოკუმავენ პირს, შუბლს შეიჭმუხნიან და უწინარეს ყოვლისა თავიანთ გრძელ ცხვირს ჩაჰყოფენ ყველა ნაწერსა და ნაჯღაბნში, რაც კი დაუწვავი გადარჩებათ შინაურებს. მერე მიჰყვებიან მისი ცხოვრების დახლართულ კვალს, ოფლში ვაიწურებიან და შეუცდომლად გამოარკვევენ, სად დადიოდა, სად ატარებდა დროს, სად სვამდა განსვენებულს, რამდენი საყვარელი ჰყავდა, თვალადი თუ ართვალდი, აქ რას აკეთებდა და იქ კიდეც რას! ჯარი სად მოუვლია, სამო-



ქალაქო სამსახურში სად უმუშავნია, ფულს რამდენს შოულობდა და რას ახ-
მარდა. მერე რა, რომ რეზინის ხელთათმანები არ ეცმევათ, წმინდა მეცნიე-
რულად მოაფათურებენ ხელებს მის ღვიძლსა, თირკმლებსა თუ საშარდე
ბუშტში, გამოიკვლევენ ნაწლავებს, გაუკვეთენ გულს, გაუპობენ თავის ქალას
და გაუზომავენ, ტვინს აუწონიან, ნეკნებსა და თმის ღერებს დაუთვლიან
მკერდზე! ამას ყველა თავთავისი ხერხით გააკეთებს, აქაოდა, სხვას არა ვგა-
ვარო. კაცმა რომ თქვას, რად არ უნდა დაამტკიცოს, შემთხვევა ხელიდან რად
უნდა გაუშვას? გულგრილად და საქმიანად მოჰყვებიან იმის მტკიცებას, რომ
სასვენ ნიშნებს განსვენებული აზრის მიხედვით სვამდა და საყოველთაოდ მი-
ღებულ წესებს არ დაგიდევდათ; რომ იგი ცოცხალი, ხატოვანი, მსუბუქი ენით
წერდა, თუმცა ვერ ვიტყვით, ძარღვიანი ენა ჰქონდაო; რომ იგი იყო კარგი
სტილისტი, ის კი არადა, ძალზე კარგი სტილისტიც კი, თუმცა ზოგჯერ ზომი-
ერება ღალატობდა და არტისტიზმი ეუფლებოდა; რომ იგი იყო ოსტატი რე-
ალისტური დიალოგისა, თუმცა წმინდა რეალისტად ვერ ჩაითვლება; რომ მის
ნაწარმოებში ბევრი ეპიკური ადგილია, მაგრამ ჭეშმარიტი ეპიკოსი მწერალი
ვერასოდეს ვერ გახდა; რომ იგი დარჩა დახავსებულ ლირიკოსად, ვის არსე-
ბაშიც ერთობ ჭარბობდა რომანტიკული სული; რომ იმდენად ძლიერი სატი-
რული ენა ჰქონდა, ხშირად იმისთვის გაუკრავს კბილი, რისთვისაც არ უნდა
გაეკრა; რომ ფაქიზად ჩამოყალიბებული მისი აზრები, უფრო ხშირად ორი-
გინალურებიც კი, მით უმეტეს ვერ ჩაითვლება მეტისმეტად ღრმა აზრებად;
რომ იგი მოწინავე შეხედულებების კაცი იყო, თუმცა საზოგადოებათმცოდ-
ნეობის შესასწავლად არც მაინცდამაინც შეუწუხებია თავი; რომ მისი მხატ-
ვრული სახეები ცხოვრებისეულია და ნათელი, გმირები — ხორცშესხმული
ადამიანები, თუმცა მონუმენტალურ, გამოქანდაკებულ სახეებს ვერ ქმნიდა;
რომ იგი ცოტა არ იყოს დაცინვით, მალლიდან დაჰყურებდა სამყაროს, თუმ-
ცა სინამდვილეში ჰუმანიზმით იყო აღსავსე; რომ ძალიან ცოტა დაწერა, მაგ-
რამ წერდა ნატიფად, საკმაოდ თავისებურად და შთამბეჭდავად, ოღონდაც
საბოლოო ჯამში მას მაინც რაღაც აკლდა; რაც... რაც... მოკლედ რომ ვთქვათ,
ყველაფრის მიუხედავად, განსვენებული იყო ადამიანი და ხელოვანი და დია-
ხაც გულდასაწყვეტია, რომ ასე უდროოდ ჩავიდა სამარეში... იცით, ყველა ხე-
ლოვანზე ასე ამბობენ, უდროოდ მოკვდაო, მაშინაც კი, თუ იგი ას წელსაა
გადაცილებული...

გლებმა გაოცებით აახამხამა წამწამები.

— ჰმ... მაშ ასე... ამბობენ კი, სიკვდილი დროული არავისთვის არ არისო.

— ასე გგონიათ? — შეეპასუხა პეტერ მაიცენი. — მაგრამ ზოგჯერ ხომ
ელიან და უხმობენ, ის კი არ მოდის და არა.

გლებმა პირი დაადო, გაძვალტყავებული თითები ბანჯგვლიან ნიკაპზე
შერჩა.

— ასე არ არის? — ჰკითხა პეტერ მაიცენმა.

გლები კვლავ დუმდა.

— აბა, აბა! — გამამხნეველად გაუღიმა პეტერ მაიცენმა. — ყველაფერი
გულთან კი არ უნდა მიიტანო კაცმა. მე ხომ გაგაფრთხილეთ, ხელოვანი ადა-
მიანები ჭკუადამჯდარი ხალხი ვერაა-მეთქი? გასაგებია? მაშასადამე, სიკვდილ-
ზე ფიქრი არავის არ ეამება. არც მე არ მეხატება გულზე. მეტადრე დღეს.
რატომ?... იმიტომ, რომ ჩემი დრო დადგა... ის ბედნიერი დრო, როცა სამუშა-



ოს მივუჭდები, ამიტომ ვარ კარგ ხასიათზე. ცოტათი ახირებულ, მე ვიტყვო-
დი, უჩვეულო, მაგრამ მხიარულ ხასიათზე. ასეთი ბუნება მაქვს. ასეთ ღროს
ჩემთვის ყოველივე — რაც არსებობს და რაც არ არსებობს — ცოცხალი, მშვე-
ნიერი და აზრით სავსეა. რადგან ყოველივე ეს სიცოცხლეა. იგი სიკვდილშიაც
კია!..

სახლის პატრონი გაოგნებული შესცქეროდა პეტერ მაიცენს.

— იქნებ თქვენ გეუცნაურათ ამის მოსმენა, მაგრამ ასე კია და! — უთხრა
პეტერ მაიცენმა. — ნურა გენაღვლებათ! თუკი თავად არც მაინცდამაინც გამე-
გება ეს ამბავი. ალბათ ვერც თქვენ გაიგებთ... მაშ-მაშ! — გაიცინა მან და ჩე-
მოდანს მიუბრუნდა.

პეტერ მაიცენმა საქალაქეები მაგიდაზე დადო და გულმოდგინედ,
აუჩქარებლად შეუდგა მათ დაწყობას, თუმცა უკვე გული აღარ უთმენდა იმ
ბედნიერი წუთის მოლოდინში, როცა თურქულ ყავას მოიდუღებდა, მაგიდას
მიუჭდებოდა, სივარას გააბოლებდა და ბოლოს და ბოლოს კვლავ შეხვდებო-
და თავის გმირებს. სულწასულმა მოძებნა საქალაქე — „პირველი და
უკანასკნელი ბრძოლა“, ასე ეწერა ზედ — და გახსნა, რათა შავად
ნაწერისათვის თვალი გადაეგლო.

თვალწინ ტემნიკარი დაუდგა. მისი სახე ახლა უფრო გამოკვეთილი და
ნათელი იყო. ვიდრე ოდესმე.

იგი მჭვარტლისაგან გაშავებულ თალიან კარში იდგა. კარი ძველი,
განმარტოებული სახლის დერეფანში გადიოდა. იდგა ტანმაღალი და
მოხდენილი. სწორედ ასეთი შეხვდა ზამთრის იმ დღეს, თავისი აღსასრუ-
ლის დღეს, როცა უკანასკნელ გზას — თავისი პირველი ბრძოლის გზას
დაადგა. იდგა დაბზარულ ქვის ზღურბლზე; ძველი, ძირგამოვარდნილი
ჩექმები და ავსტრიელი ჯარისკაცის ფარაჯა ეცვა, გაქუცული ბეწვის ქუ-
დი ეხურა, ილიაში არყით სავსე მათარა ამოეჩარა, უბეში ნაჯახი ედო,
ჯიბეში — მძიმე, დატენილი რევოლვერი.

„რა გულმშვილი კაცია, — აღფრთოვანებით გაიფიქრა პეტერ მაიცენმა. —
რა დიდებული და მშვენიერია! თუმცა კარგად გრძნობს, რომ ხუთი, ექვსი,
დიდი-დიდი შვიდი საათის სიცოცხლე დარჩენია, მაგრამ ამაზე არ ფიქრობს,
ეჭვი არ ეპარება, რომ სიცოცხლის წუთები დათვლილი აქვს“.

ტემნიკარმა თავი ასწია. გაფანჩული წარბებიდან ნათელი მზერა და-
თოვლილ ფერდობს მოავლო, წუთით თვალი ვრანეკის წვეტიან თხემ-
ზე შეაჩერა, მერე კი მალლა, მოლურჯო-ფოლადისფერ ზეცას ააყოლა.
იქ, ჰორიზონტთან ზამთრის მზის სხივებში ნელა ირხეოდა მისი ცხოვრე-
ბის მშვენიერი თეთრი ღრუბელი. ტემნიკარს მოლურჯო-ფოლადისფერ
თვალეში ორი ვერცხლისფერი კურცხალი აუბრწყინდა, მაგრამ სახე
მშვიდი, მტკიცე, დიდებულიც კი ჰქონდა.

— მივდივარ! — ჩუმად წარმოთქვა მან. უნდოდა ერთხელ კიდევ
შეეგლო თვალი გრძელი, ჩაბნელებული დერეფნისთვის, სადაც კერიას-
თან სამი აღელვებული ადამიანი — მისი ცოლი, ქალიშვილი და ვაჟი-
შვილი იდგნენ, მაგრამ უკან აღარ მოუხედავს. სასწრაფოდ ეზოში ჩა-
ვიდა, ნაჯახი გულზე მიიკრა და რევოლვერზე ხელი მოივლო.



— წადი! იჩქარე, იმ ქაჯებმა არ მიგასწრონ! დრო არ იცდის! — წარმოთქვა პეტერ მაიცენმა.

— დრო არ იცდის! — თქვა ტემნიკარმა და მტკიცედ გააბიჯა ახლად დათოვლილ მიწაზე.

პეტერ მაიცენმა იგრძნო, რომ თვალები დაენისლა, მაგრამ ამაყად და ნაღვლიანად გააყოლა ტემნიკარს მზერა.

*

— დრო არ იცდის! დრო არ იცდის! — ჩაილაპარაკა პეტერ მაიცენმა, საქალაქად გვერდზე გადადო და კვლავ ჩემოდნისკენ დაიხარა.

სახლის პატრონმა იატაკზე ფეხები გააფრატუნა და ჩაახველა.

— ჰმ, მაშ ასე, — კვლავ მოიქეჩა მან ბანჯგვლიანი ნიკაპი, — ჩქარა კი მიგდით საქმე?

— რა საქმე? — შეკრთა პეტერ მაიცენი, აღარც ახსოვდა, ეს კაცი თუ აქ იყო.

— ჩქარა თუ წერთ-მეთქი?

— ზოგჯერ ჩქარა ვწერ, ზოგჯერ ვერა, — მხრები აიჩეჩა პეტერ მაიცენმა. „აი, ტემნიკარზე კი ხელად დავწერ. იმდენი ხანია მასზე ვფიქრობ, სწორედ დროა ქალაქად გადავიტანო“.

— ჰმ, მაშ ასე, — დაეთანხმა სახლის პატრონი. — თუმცა თქვენ ხომ მანქანა გაქვთ.

— ამ საქმეს ყველაზე მეტად სიწყნარე შველის! და განმარტოება! — ხაზგასმით თქვა პეტერ მაიცენმა, ჩემოდანთან ჩაცუცქდა და წიგნების ქექვას შეუდგა. „ნეტა ეს საცოდავი გულს არ შემეწუხებდეს. ქალაქიდან იმისთვის წამოვედი, რომ სადმე განმარტოებულიყავ და მშვიდად მეწერა და არა იმისთვის, რომ მთელი დღე ვინმე თავზე დამრატრატებდეს!.. უნდა ვთქვა, რომ შესაფერისი კუთხე კი ვპოვე. ეს ძველი, თეთრად შეფეთილი კარმიდამო ძალიან მომწონს — განმარტოებით დგას ხეობის პირას, ზემოდან შავი ფიჭვნარი დაჰყურებს. სახელიც კი მხიბლავს მისი. სწორედ რომ შესაფერი სახელია შავი ხევი ამ ადგილისათვის! თუმცა სევდიანი, რომანტიკული ადგილი კია, მაგრამ ეგ არაფერი! ასეთი მიდამო ხომ ფრთას ასხამს წარმოდგენას, ზოგჯერ ღრუბლებში, ფანტაზიის სამეფოშიც შეგაფრენს. არც ეს არის ცუდი. როგორც ამბობენ, ფანტაზია ხელოვნებას არას ვნებს. ხალხიც უფრო დიდი ინტერესით ეკიდება გამოგონილ გმირებსა და შეთხზულ ისტორიებს, ვიდრე ცხოვრების ბრმა ასლებს... ასე რომ ეს საქმე კარგად მოვაწყვე. ოღონდაც ეს მოხუცი შემხვდა ცოტა არ იყოს მოსაწყენი. თუმცა ვერაფერს ვიტყვი, ამ არემარეს კარგად ერწყმის. რაღაც უცნაურად ჩამოსტირის თავპირი, მისგან რომანტიკული, ის კი არა და, ფანტასტიკური სახეც შეიძლება შექმნა კაცმა. მის სულში ჩახედვაც არ იქნებოდა ურიგო. მაგრამ სადა მცალია... და არც მეხალისება. რაღაც არ მომწონს ეს კაცი. მეზიზღება-მეთქი, ვერ ვიტყვი, მაგრამ არ მომწონს კია. ეს არის და ეს. ასეთ კაცს ხელს ვერ ჩამოვართმევდი... განა საოცარი არ არის, რომ ზოგი ადამიანი გარეგნულად არ გეამება ხოლმე? ეს



კაციც სწორედ ასეთია. კარგად ვიცი, ძალიან საინტერესო ვინმეც რომ აღ-
მოჩნდეს, მისი ასახვა გამიჭირდებოდა. მე ყველა ჩემი გმირი უნდა მიყვარ-
დეს, ისინიც კი, ვისაც ვებრძვი და ვინც მძაგს. ეს კაცი კი არ მომწონს. უფ-
რო და უფრო არ მომწონს. იქეჭება, გაუთავებელივ ლულულულებს: „მაშ ასეო“,
სახეც ისე ჩამოსტირის, თითქოს თორმეტგოჯა ნაწლავის წყლული ჰქონდეს...
იქნებ ეს საწყალი მართლაც ავადმყოფია, თორემ ასე რამ ჩამოახმო“.

სახლის პატრონმა ჩაახველა.

— ჰმ... მაშ ასე, — მოიქეჭა მან კვლავ ნიკაპი. — მაშასადამე, სიწყნარე...

— ჰო, სიწყნარე! სიწყნარე! — გააწყვეტინა პეტერ მაიცენმა. „თანაც ერ-
თი საათით კი არა, ანდა ერთი დღით! არც ერთი კვირით! სულ მუდამ სიწყნა-
რეა საჭირო!“

— ჰმ... რაც შეეხება სიწყნარეს, აქ მართლაც სიწყნარეა... თუ აქ გამო-
იზამთრებთ, უკეთ გაიგებთ სიწყნარის ფასს! აქ სიმარტოვე თითქოს გიყვებს
კაცს!

„ერთი ამას დამიხედეთ, ამ ბედშავ ქეჭიას! — გაუკვირდა პეტერ მაიცენს. —
ასე ხომ ტილჩკამ უთხრა ტემნიკარს, როცა ზამთრის გრძელი ღამე გადაეფა-
რა ტემნიკს“. პეტერ მაიცენმაც ახლა ტემნიკარის სიტყვებით უპასუხა სახლის
პატრონს:

— დაე სიმარტოვემ იყეფოს, ხალხი ნუ აყეფდება ოღონდაც!

— ჰმ, მაშ ასე, — ჩამოიფარცხა ნიკაპი სახლის პატრონმა. — მარტოობა
მუდამ როდია კარგი, მაგრამ ზოგჯერ ხალხიც გიშლის ხელს კაცს.


„რაო? ესეც ხომ ისევ ტემნიკარის სიტყვებია! — შეკრთა პეტერ მაიცენი
და გული უცებ უსიამოდ აუჩქროლდა. — საოცარია! ისინი ხომ ასეული კი-
ლომეტრის დაშორებით ცხოვრობდნენ და არასოდეს არ უნახავთ ერთმანეთი.
რა უნდა ჰქონდეთ საერთო?“

მან მოიხედა და მოხუცი შეათვალიერა. ეზოდან ფანჯარაში შემოჭრილ
მზის ჩახჩახა შუქზე მართლაც დიდმოწამის გადიდებული, ძველი გოთური ქან-
დაკება იხატებოდა. გლეხი საოცრად გამხდარი, ზეზეურად ჩამომხმარი იყო.
ჩამოგრძელებული სახე, მაღალი შუბლი, დიდრონი თვალები, ჩაცვნილი ლო-
ყები და გაწინწილებული ცხვირი ჰქონდა, ჭაღარა ულვაშები ლოლუებივით
ჩამოჰკიდებოდა, მზემოკიდებულ გახევებულ კანიდან ვიწრო ნეკნები გამოს-
ჩროდა. ეტყობა, მუცელი არასოდეს გამოსძლოდია. მუქი ყავისფერი ხავერდის
მოკლე, ჭუჭყიანი შარვალი ტომარასავით ეკიდა თითქოს ხიდან გამოჩორკნილ
ბარძაყებზე. ფართო შარვლიდან ორი გრძელი, გაჩხიკული ფეხი მოუჩანდა,
მაგრამ მუხლები ისეთი მსხვილი და დაკვანძული ჰქონდა, თითქოს მათ გამომ-
ჩორკნელ ხუროს ყველაზე უფრო ის ადარდებდა, ჩემმა ნახელავმა სამარადი-
სოდ გასძლოსო.

„არა, ამას არაფერი აქვს საერთო ტემნიკართან. შორიდანაც კი არ მო-
გაგონებს მას. ტემნიკარი დევგმირი იყო, ეს კი ჭოკივით აყუდებულა. თუმცა
ვერაფერი ბედენაა, კაცი ჭოკს შეადარო“.

— ჰმ, მაშ ასე... — თქვა გლეხმა. — კი ნუ დამძრახავთ და. ღირს ვითომ?

„ახლა ხმა როგორი აქვს! უსიამოდ და ჩახრინწული! თითქოს ყელიდან ხის
ღარით კენჭები სცვივა. ტემნიკარი რომ ხმას ამოიღებდა, ირგვლივ გუგუნნი
ისმოდა. აღსარებას რომ ამბობდა, მთელმა არემარემ იცოდა მისი ცოდვები.
„ჩუმად, ჩუმად, ერნვი!“ — აწყნარებდა ხუცესი სააღმსარებლოში. მაგრამ



ტემნიკარი უფრო აუწყევდა ხოლმე ხმას: „თუ უფალს სურს უწყობდეს, ჩვენი ცი ვარ, ხალხმა რაღად არ უნდა იცოდეს! მე ხომ მიწაზე ვცხოვრობ და არა ცაში“.

— ჰმ... — იქეჭებოდა სახლის პატრონი. — ხომ იცით...

— რასაკვირველია, ვიცი!

— ნუ დამძრახავთ... მე ხომ ისე გკითხეთ.

— რა? რა მკითხეთ? არ გამიგია!

— ღირს კი ვითომ წერა?

— არა! — წარბი შეიკრა პეტერ მაიცენმა და კვლავ ჩრდილმა გადაურბინა სახეზე. „ეს ქაჯი მართლაც გულს შემიწუხებს. იგი, რა თქმა უნდა, მხოლოდ ფულზე ფიქრობს, მე კი წყლულზე მაჭერს ფეხს“.

— ჰმ, მაშ ასე... ხალხი ახლა ძალზე ცოტას კითხულობს... აი, ბავშვებია კიდევ... ზამთარში... საქონლის მწყემსვისას რომ...

„სწორედ დროა აქედან გავაბრძანო!“

— ... ჰო, ხალხი ძალიან ცოტას კითხულობს... ომზე კი სულ არა სურთ რაიმეს წაკითხვა... ყველა დაღალა ომმა.

— რასაკვირველია...

— ჰმ, მაშ ასე. თანაც მწარეა მოსაგონებლად... როგორც იტყვიან, ჭრილობა ჯერ არ შეხორცებიან... თუკი ოდესმე შეუხორცდათ.

— დრო ყველაფრის წამალია! — მტკიცედ უთხრა პეტერ მაიცენმა და წიგნების შეკვრა მაგიდაზე დადო. — ხომ ვერ მიშოვნით კიდევ ერთ მაგიდას?

— მგონი, რომ ვერა, — თავი გააქნია სახლის პატრონმა.

— ოჰ, ნეტა მიშოვიდეთ საიდანმე ძველ მაგიდას. აქაურობა ხომ ნამდვილ ციხე-დარბაზსა ჰგავს.

— აჰ, მაგიდას? — ჩაჰკითხა სახლის პატრონმა. — მაგიდას ვიშოვნით. მაშ ასე. მხოლოდ, იცოდეთ, უარესი არ გამოვიდეს!

— რატომ გამოვა უარესი? — ჰკითხა პეტერ მაიცენმა, თან თვალი არ მოუცილებია გლეხისათვის. „უკვე კარგად ვიცი, რაც იქნება უარესი, რისიც მეშინია და რაც მიღრღნის გულს!.. მაგრამ დაიცა, დაიცა... მგონი, რომ შენც რაღაც მიღრღნის გულს“.

— არა, არაფერი, არაფერი! — აჩქარდა სახლის პატრონი და გაღიმებაც კი სცადა. — ასე იტყვის კაცი, თორე... — გლეხი კვლავ ნიკაპს იქეჭდა. საოცრად გრძელი თითები ჰქონდა, ძვალტყავა და ისეთი ჩაყავისფერებული, თითქოს ბებერი ხისგან გამოეთალათ.

„არ მომწონს ეს კაცი, რა ვქნა, არ მომწონს! — თავი გაიქნია პეტერ მაიცენმა. — იქნებ მართლაც ბეჩავი და წამებული ვინმეა, მაგრამ მაინც არ მომწონს!..“

— მაშ მომიტანთ მაგიდას?

— ახლავე? — სახლის პატრონი არც ფიქრობდა ადგილიდან დაძვრას.

— ახლავე, ახლავე!.. „საჩქარო რა აქვს! სიკვდილმა რომ მოუკაკუნოს კარზე და უთხრას: „წამო, ჩრნილოგარო!“, ეს ამასლა ჰკითხავს: „როდის, ახლაო?“

ორივენი ოთახიდან გამოვიდნენ. ბნელი დერეფნის ბოლოში ძველი მაგიდა იდგა. პეტერ მაიცენმა იქვე დაგდებული რაღაც ძონძი აიღო და მაგიდა გადაწმინდა.



— ასე, ახლა ყველაფერი მოწესრიგდება! — ხაზგასმით თქვა მან.

— მოწესრიგდება კია? — ჰკითხა სახლის პატრონმა.

— რასაკვირველია.

— კარგი კი იქნებოდა... მაგრამ ვაითუ არ მოწესრიგდეს...

— დარდი ნუ გაქვთ! — გააწყვეტინა სიტყვა პეტერ მაიცენმა და მაგიდა მალლა აიტაცა.

— ღმერთმა ხელი მოგიმართოთ, — მიუგო სახლის პატრონმა და ფეხდაფეხ შეჰყვა ოთახში.

პეტერ მაიცენმა მაგიდა დადგა და ხრიგინით გააჩოჩა იატაკზე.

— ჰმ, მაშ ასე, — თქვა სახლის პატრონმა და კვლავ ფანჯრის წირთხლს მიეყრდნო. — დანჯღრეული კია, მაგრამ გამოდგება მაინც.

— რასაკვირველია, გამოდგება!.. „ნეტა პასუხს რაღად ვაძლევ, — გაუწყრა პეტერ მაიცენი თავის თავს. — აღარ უნდა ვუბასუხო და წავა, აბა რას იზამს!“ — მან სიგარეტები გადმოჰყარა კოლოფიდან, რომ კოლოფი მაგიდის ფეხისთვის შეედო.

— ჰმ... თუ რაიმე დაგჭირდეთ, მითხარით...

— გეტყვით! გეტყვით! — დაეთანხმა პეტერ მაიცენი. — „მეტს კრინტსაც აღარ დავძრავ! — მან მუყაო მოლუნა და მაგიდის ფეხთან ჩაცუცქდა. — ჩუმად უნდა ვიყო! რას ველაქლაქები, ტემნიკარზე უნდა ვიფიქრო!“

აზრი რომ მოიკრიბა, კვლავ დაუბრუნდა ხედვაცა და სმენაც.

— მეტს კრინტსაც აღარ დავძრავ! — გადაწყვიტა ტემნიკარმა და ჩექმა წამოიღვა.

— კეთილი, — მკვახედ უთხრა ცოლმა და ქოთანი ღუმელში შედგა. — ბრიყვი ბრიყვად დარჩება! დილამდე რომ ანჯღრიო, გონს ვერ მოიყვან!

— სიტყვა აღარ გავიგონო! — გაიმეორა ტემნიკარმა და მეორე ჩექმაც ჩაიღვა.

— თქვი მაინც, რამ წამოგიარა ასე უცებ?

ტემნიკარი გამჭვარტლულ ბუფეტთან მივიდა და ლურსმნიდან თავისი ძველი ავსტრიული მათარა ჩამოიღო.

უკვე მერამდენედ ასწონ-დასწონა გუნებაში: „ეს ქაჯები ჯერ გზას დაადგებიან, მერე ვრატარის ბილიკს გაუყვებიან, მე კი მალნოვის მთას გადავივლი და მაგათზე ადრე მივალ. ყამირით ვივლი და მაინც დავასწრებ. ამ მზიან დღეს ეგ ძაღლთაპირი თხუნელები მაინცდამაინც არ იჩქარებენ“.

— თქვი, ერნეი! — ბრძანებით წარმოთქვა ქალმა და ბრახუნით მიაგდო კუთხეში სატაცი. — ადამიანივით მოიქეცი! მთელი სიცოცხლე რად უნდა გეჩხუბო?

— ჰმ, მაშ ასე, — არა ცხრებოდა სახლის პატრონი. — მითხარით, ხალხნი არა ვართ?

— რასაკვირველია... — უგულისყუროდ ჩაიბურტყუნა პეტერ მაიცენმა და წიგნები მაგიდაზე დააწყო.

— ხომ უნდა ვილაპარაკოთ...

— რასაკვირველია... „მე უკვე მეყო და!“

— მე უკვე მეყო და, — თქვა ტემნიკარმა და მათარაში არაყი ჩასხა.

— ჰოო? — აგდებით ჩაიფრუტუნა ცოლმა, — ვერ მეტყვი მაინც, რად აღარ მომიწევს შენთან ჩხუბი?

— მე უკვე მეყო...

— სიკვდილამდე უნდა გეჩხუბო! მე ხომ კარგად ვიცი, რომ ღმერთმა ჭკუაზე გაგანაწყენა!

— გეუბნები: მეყო-მეთქი...

— ჰმ? — კვლავ ჩაიფრუტუნა ქალმა, — ხომ არა გგონია, რომ სიკვდილი ცელით ხელში დგას და ეგერ, კუთხეში გელოდება?

— არა, არ მელოდება, — მშვიდად უთხრა ტემნიკარმა და კარი გაიხურა. იქ, დერეფანში, მისი ძველი ავსტრიული მაზარა ეკიდა.

— ჰო! კიდევაც რომ დაგელოდოს, ცელით მაინც ვერას გააწყობს შენთან. სარი თუ ექნება, არ ვიცი!

— სართაც შეიძლება. ვინ იცის... — მოისმა სიბნელიდან არაჩვეულებრივად წყნარი და გულში ჩამწვდომი ხმა.

— ერნეი! რა გჭირს დღეს? — ქალს მღელვარებისაგან ხმა გაუწყდა.

— რა იყო? — ჰკითხა ტემნიკარმა და პირი იბრუნა, რათა ცოლს მისი სახე არ დაენახა.

— დღეს რაღაც უცნაური ხარ... თითქოს შენს თავს არ ჰგავხარ.

— აი უკვე ორმოცი წელია საკუთარ თავს არ ვგავარ, დღეს კი კვლავ დავემგვანე.

— ნუთუ! — დაცინვით თქვა ქალმა. — უკვე ორივე ფეხი სამარეში გიდგას და იმ პირველ სიყვარულზე კი ფიქრობ!

ტემნიკარი ადგილზე გაშეშდა. „ერთი უყურე, — ყვედრებით უთხრა თავის თავს, — მივდივარ და ის კი არ გამხსენებია! ტილჩკა!“ — უხმო ფიქრებით ქალს და ქალიც უმაღ გამოეცხადა, ისეთივე ცოცხალი, თეთრი, ლამაზი. ასეთი კარგა ხანია აღარ უნახავს. „ტილჩკა!“ ოჰ, ვინ იცის, იმ ხანმოკლე ზაფხულს, იმ მეტისმეტად ხანმოკლე ზაფხულს, მათ რომ ერთად გაატარეს, რამდენჯერ დამალულა ტილჩკა კარს უკან, დერეფნის ბნელ კუთხეში. ტემნიკარი კი ეძებდა საყვარელ ქალს, მთელ სახლს გადაატრიალებდა, ეძებდა და უხმოებდა, მერე, ჭანცაგაწყვეტილი, შუა ოთახში დადგებოდა და ლანძღვას მოჰყვებოდა გულმოსული. ამას კი ველარ მოითმენდა ტილჩკა — ბნელი კუთხიდან ოქროს ვაშლივით ესროდა კისკისს. ტემნიკარი მყის გვერდზე გახტებოდა და ქალს მივარდებოდა; ქალი მაღალ მკერდზე მიიკრავდა პატარა მუშტებს და გაიტრუნებოდა. თეთრი იყო, მსუბუქი, პატარა, ლერწამივით თრთოდა, თითქოს გულის კანკალით ელოდა იმ ცეცხლოვან გრიგალს, ასეთი უცნაური ძალით რომ აბობოქრდებოდა კაცის არსებაში. „ტილჩკა!“ ქალი მუდამ კარს უკან ემალებოდა, ტემნიკარი კი ჭიუტობდა, არ სურდა მისი იქ მოძებნა, აქა-



ოდა, სულ ხომ იქ არ დამემალემა, ახლა სხვა ადგილს მონახავდაო... მე-
რე კი, როცა ტილჩკა სახლიდან გაასვენეს, მრავალი წლის მანძილზე შინ
შემოსვლისთანავე პირველად კარს უკან, კუთხისკენ მიიხედავდა ხოლმე.
პირველ ხანებში ისე ცოცხლად მოეჩვენებოდა ტილჩკა, მთელი სხეული
ასტკივდებოდა; მერე ქალის პირისახე თანდათან გაფერმკრთალდა და
იშვიათად თუ გამოეცხადებოდა ნისლიანი ღრუბელივით. ორმოცი წელი
მაინც ორმოცი წელია. ამ ორმოცმა წელმა კიდევ ერთხელ დაამტკიცა
ძველი ჭეშმარიტება, რომ დიდი სიყვარული და დიდი მწუხარება მარა-
დიული არაა — დიდი სიყვარული თავისსავე ცეცხლში იფერფლება, დი-
დი მწუხარება კი თავისსავე ზღვაში იხრჩობა... მაგრამ დარჩა მოგონე-
ბები, ტკბილი, კეთილი მოგონებები; ასეთი მოგონებები კი დიდი, სუფ-
თა გრძნობებისა და გადატანილი მწუხარების შემდეგ რჩება მხოლოდ.
„ტილჩკა!“ უცნაური კია, მაგრამ ახლა უკვე ეს მოგონება აღარ იყო!
ქალი კვლავაც მის წინ იდგა, თეთრი და ნაზი. ცრემლიანი თვალები ღი-
მილით გაბრწყინებოდა, პატარა მუშტები მაღალ მკერდზე მიეკრა. თით-
ქოს ცოცხალი იყო. ტემნიკარმა გაოცებაც ვერ მოასწრო. საჩქაროდ მო-
იგდო მაზარა და ტილჩკა შიგ დამალა, ცოლს რომ არ დაენახა.

— იქნებ მაინც მითხრა, საით გიყო პირი ეშმაკმა? — წყენით ჩა-
ილაპარაკა ქალმა.

ტემნიკარი შეკრთა და ტილჩკაც გაქრა.

— რას დაბოდიალობ მაგ სიბნელეში? — გამკივანი ხმით მიაძახა
ქალმა. — აქ მო!

ტემნიკარმა მოხედა ცოლს. ქალი ღუმელთან ფართიფურთობდა, —
პატარა, გალეული, ჩამომდნარი დედაკაცი თითქოს საკუთარი თავის ლან-
დად და საკუთარი გაუხარელი ცხოვრების ანარეკლად ქცეულიყო. ტემ-
ნიკარს გული შეეკუმშა. ბევრჯერ დამართნია ასე.

— ნუ ბრაზობ, მარიანა, გული ნუ მოგდის! — დაუყვავა მან.

— ეეჰ! — აღშფოთებით აიჩეჩა გამხდარი მხრები ქალმა. — შენსას
მაინც არ იშლი: აგიჩემებია, ნუ ბრაზობ და ნუ ბრაზობო! ისა სჯობს
მითხრა, საით გაგიწევია, რომ სადარდებლად არ გვყავდე!

ტემნიკარი ცოლთან მივიდა. „სიამოვნებით გეტყობდი, რობში მივ-
დივარ-მეთქი, მაგრამ რომ არ გამიშვებ!“ — გაიფიქრა ნაღვლიანად.

— იქნებ მართლაც არ გინდა მითხრა? — ქალი მკაცრად, შეშფოთე-
ბით შესცქეროდა ქმარს.

— ეჰ, სად უნდა წავიდე ნეტა? — აღერსიანად და უღარდელად
უთხრა ქმარმა. — ტყეში მივდივარ, თავადაც იცი!

— მერე არაყი რად ჩაისხი?

— არ შეიძლება თუ? რაც უნდა იყოს, ზამთარია! — მშვილად უთხ-
რა ქმარმა და მაზარის ჩაცმას შეუდგა.

— ერნეი! ნუ სულელობ! — წინ გადაედობა ქალი ქმარს. მის ხმა-
ში დაუფარავი შიში გაისმა. — აბა ვინ მიდის შინიდან შობის წინა-
დღეს?

— შობის წინადღეს? — წარბი შეიკრა ტემნიკარმა. — დიახ! ზოგ-
ჯერ შობის წინადღესაც გავა კაცი სახლიდან. რამდენი ვინმე არ ზის შინ
ახლა!

— მერე ეს რა შენი სადარდებელია! — მიუგო ცოლმა.

— ჩემი სადარდებელი არ არის? — მკაცრად შეიკრა წარბი ტემნიკარმა, მაგრამ მაშინვე დამშვიდდა და გულგრილად დაუმატა:

— ვინ გითხრა, შინ არ ვიქნებო? სადამომდე ბევრი დროა! ჯერ შუადღეც არ გადასულა!

— ნეტა არ სულელობდე! — ცოტა დამშვიდებით თქვა ქალმა. — ყური მიგდე, ერნეი! ღვეზელს გამოგიცხობ. მთლად გამოვბერტყავ ტომარას და ერთ-ორ მუჭა ფქვილს მოვაგროვებ როგორმე. შენ კი ღუმელს შეშა შეუკეთე, რომ სადამოთი ცოტა დაგვითბეს სახლი.

ტემნიკარს ცივმა ჟრუანტელმა დაუბრინა ზურგში. თვალწინ დაუდგახუთი თეთრგვარდიელი*, რალაც ნახევარი საათის წინ რომ გაიხურეს მისი სახლის კარი; მკაფიოდ მოესმა მარტინ ლუჟნიკის იქედნური ხმა: „ხი-ხი, ტემნიკარ, რა სჯობს შინ ყოფნას, ჩვენც არ გვაწყენდა, ერთი დღე მაინც გაგვეთბო ძვლები, მაგრამ რა ვქნათ, რომ არ შეიძლება! რა ვქნათ, მეტად შემბრაღე გული გვაქვს, ხი-ხი! ვიყნოსეთ, რომ რობში რამდენიმე დაჭრილი აფარებს თავს. კარგა ბლომად ყოფილან, თანაც ყველა ისეა, ხელ-ფეხის განძრევა არ შეუძლიათ, ხი-ხი! გერმანელების ალყას თავი დააღწიეს, ჩარევის გამოქვაბულში დაიმალნენ და ახლა „ამხანაგების“ დახმარებას ელოდებიან. მაგრამ „ამხანაგებს“ ამჟამად მათი თავი არა აქვთ, ხი-ხი! აბა რად უნდა გაიყინონ ეს საწყლები ამ შობა დღეს ჩარევის გამოქვაბულში? ჩვენ მათ ბეთლემში ვუკრავთ თავს, ხი-ხი! იესოს ბაგაში, ხი-ხი! გავათბობთ ერთი, ხი-ხი! არ გაოცდება იოსები, სამი წმიდა ხელმწიფის ნაცვლად ათიოდე წვერ-ულვაშგაბურძენული და განაწამებ-გატანჯული წარმართი რომ შეუვარდება ბოსელში, ხი-ხი! კი, ბატონო, ინებეთ და აღსარება თქვით, ცოდვები აღიარეთ! თანაც ამაღამვე, ხი-ხი! ამიტომაც ჩვენ მათ უმოკლესი გზით ბეთლემში გავისტუმრებთ! ჰოდა, მარტინ ლუჟნიკი არ ვიყო, თუ დაღამებამდე იქ არ გავაჩინო ისინი, ხი-ხი! შენ კი ბაგა მოგვიმზადე აქ და შეშაც ბლომად შეუკეთე ცეცხლს, რომ ჩვენც გავითბოთ მერე გვერდები, ხი-ხი!“

— ერნეი! — კვლავ შეუტია ცოლმა, — გესმის, თუ მთლად დაყრუვდი?

— მესმის! — კუმტად დაუქნია თავი ტემნიკარმა, რომელიც ამ დროს გამჭვარტლული ხის კიბიდან ნაჯახს აძრობდა.

— ნაჯახი რალად გინდა?

— აბა როდის წავსულვარ უნაჯახოდ ტყეში? — მშვიდად ჰკითხა ტემნიკარმა და გახეშეშებული თითით პირი მოუსინჯა ნაჯახს.

— ოჰ, ღმერთო ჩემო! — თავი გაიქნია ქალმა. — რა მოგდის დღეს, მართლა და მართლა? ერთი შენს თავს შეხედე! ნახევარი საათის წინ მთლად გამწვანებული, არაქათგამოცლილი იყავი, ახლა კი ჩექმები ჩაგიცვამს, ნაჯახი ილღიაში ამოგიჩრია და ჰაიდა — ტყისაკენ!

— არაქათგამოცლილი ვიყავი? — ეჭვით შეუბრუნა კითხვა ტემნიკარმა, მათარა ქამარზე ჩამოიკიდა და კარისკენ გაემართა.

* სახალხო-განმათავისუფლებელი ომის წლებში სლოვენიაში თეთრგვარდიელებს ეძახდნენ სლოვენელ გამცემლებს, გერმანელ და იტალიელ დამპყრობთა ხელის შემწყობებს.



— ახლა იტყუები კიდევ?.. შენ არ იყავი, არაყში რომ არნიკას იყრიდი?

— მაგან მიშველა სწორედ, — თქვა ტემნიკარმა და ზღურბლზე შეჩერდა. თავადაც უკვირდა, რამ დაავიწყა დღევანდელი დილა. მას უთენია გაედვიდა. გული საოცრად დამძიმებოდა სევდით, მალე სასოწარკვეთილებამ აიტანა, სულს თითქოს ყინულის ლოდი უხუთავდა. ტემნიკარი ველარ ისვენებდა, შფოთავდა. ერთი-ორჯერ ისეთი წაიხვრინა, ცოლს გაედვიდა და ქმარს დახედა: „აღარ დაწყნარდები ბოლოს და ბოლოს! რა ბებერი ცხენივით ხვრინავ და წიხლებს ისვრი!“ ტემნიკარს უნდოდა ეთქვა ცოლისათვის, თავს ცუდად ვგრძნობო, მაგრამ გადაიფიქრა, მთლად გადაირევა დედაკაცი და ველარ გავაჩერებ, გააბამს: „აი, შე ასეთო და ისეთო, რა გული გამიწვრილე შენი ავადმყოფობით! რატომ მე არ მტკივა არაფერი? დაიძინე!“ დაძინებით კი ტემნიკარს არა და არ ეძინება. ადგა და არნიკა ჩაიყარა არაყში, აქაოდა, მამაკაცისათვის ერთადერთი უებარი წამალი ეს არისო, თუმცა კი გული უგრძნობდა, ახლა ეს წამალიც ვერაფერს უშველიდა... მაგრამ დათოვლილ გზაზე მიმავალ მარტინ ლუჟნიკსა და მის ძაღლთაპირ თხუნელებს რომ თვალი გააყოლა, გადაწყვიტა თავადაც წასულიყო რობში და იქ შეებოდა მათ. ეს რომ იფიქრა, გულზე მოეშვა. თავი კვლავ ჯანიანად იგრძნო. ირგვლივ ყველაფერი გამშვენიერდა, განათდა და გამხიარულდა; ამ ხნის კაცმა ერთხელ, მხოლოდ ერთხელ განიცადა ასეთი რამ. მის ახალგაზრდობაში საშინელმა წარღვნამ წალეკა მთელი ხიდები, ბოგირები და სანაპიროზე მდგარი რამდენიმე სახლიც კი. მან კი გადაწყვიტა როგორმე ტილჩკა ენახა; ტემნიკარმა მაშინ საჩქაროდ შეკრა სამი მუხის მორი და არც დაფიქრებულა, ისე მიენდო აბობოქრებულ სტიქიონს; წყალს იგი ზასეკარევის ჭორომზე უნდა გაეყვანა, მაგრამ გულმა უგრძნო, რომ ამ ადგილს ასცდებოდა და მის მოპირდაპირე მხარეს, უსადარევის მეჩეჩს მიადგებოდა. ასეც მოხდა... როგორც ამ ორმოცდაათი წლის წინათ, ახლაც ასეთივე განცდა ჰქონდა. ზღურბლზე მდგარმა გადაწყვეტილება მიიღო თუ არა, ირგვლივ წამსვე სახე იცვალა ყოველივემ. ყველაფერი განათდა. დაიწმინდა, დიდად მნიშვნელოვანი გახდა: მსხლის ხეც, კაკალიც, საპობი მორიც, წყალიც, გაყინული ღარიდან ვერცხლის ჭავლად რომ მოედინებოდა სათლში, ასკილის შიშველი ბუჩქიც, ჩაშავებული მესრიდან ბაღში რომ იჭვრიტებოდა, დათოვლილი ბილიკიც, ჯადოსნური გველივით რომ მისრიალებდა ციცაბო ფერდობზე, ვრანეკის დაკბილული თხემიც, მოლურჯო-ფოლადისფერი ზეცაც, თეთრი ღრუბელიც, თრთოლვით რომ ეთხოვებოდა მას. ზამთრის მზის სხივებს ისე მოეკრიალებინა ეს ქვეყანა, ძნელი იყო სიკვდილზე ფიქრი. მაგრამ ტემნიკარმა ერთი რამ იცოდა კარგად: დაუყოვნებლივ გზას უნდა გასდგომოდა და ის გაეკეთებინა, რისი გაკეთებაც ევალეებოდა. ცოცხალი კი ველარ დაბრუნდებოდა. ასე იქნება...

— ერნეი! — მიაძახა ცოლმა.

ტემნიკარი შეკრთა და მოიხედა.

— იქნებ ისევ აგტკივდეს! — მოაგონა შეწუხებულმა ცოლმა და წინსაფარი აიწია, რომ ნიადაგ აცრემლებული თვალები ამოეწმინდა.



— რა უნდა ამტკივდეს? — უნებლიეთ ჩაილაპარაკა ტემნიკარმა.

— როგორ თუ რა? მუცელი.

— არაფერიც არ ამტკივდება!

— რას ამბობ? — ქალმა ხმას აუმაღლა.

— გეუბნები, არაფერი არ მომივა-მეთქი! — საოცარი ალერსიანი ღიმილით გაუმეორა ტემნიკარმა, მაგრამ მაშინვე შეიკრა წარბი, თავის თავზე გაბრაზდა. მოეჩვენა, ზედმეტი წამოვარანტალე და ცოლი ტყუილად შევაშფოთეო. მიხვდა, რომ კარგად არ გამოუვიდა. ამიტომაც საჩქაროდ დაუმატა მკაცრად: — ყოველ შემთხვევაში, დღეს არაფერი მომივა!

— ოჰ, რა გმირად მოგაქვს თავი! — ჩაიციხა ქალმა. — ნუ დაგავიწყდება, რომ სამოცდაათი წლის კაცი ხარ!

— არ დამავიწყდება! — მოუჭრა ტემნიკარმა და მტკიცედ გადააბიჯა ზღურბლს.

— ეჰეი! — გაისმა ქალის მკვახე ხმა.

პეტერ მაიცენი უმაღლ გამოერკვა, სახლის პატრონისაკენ მოიხედა და უნებლიეთ ჰკითხა:

— რა მოხდა?

— დედაბერი შეძახის, — მიუგო მან. — ჩემი ცოლი. ბრაზობს...

— ჰო, ცოლი... — ჩაიბურტყუნა პეტერ მაიცენმა. უკმაყოფილო იყო, რად გავამყდავნე, რომ შევკრთიო.

— ჰმ, მაშ ასე. მკვახე ხმა აქვს ჩემს ცოლს.

— მკვახე... — „ტემნიკარის ცოლივით“, გაიფიქრა პეტერ მაიცენმა. იგი კვლავ თავის ტემნიკართან იყო.

— ჰმ... დიასახლისი ხომ ის არის.

— ჰოო, დიასახლისი...

— ჰმ, მაშ ასე... კაცი რომ ზედსიძედ შევა, მოჯამაგირეობიდან თავს ვეღარ დაიხსნის.

— ჰოო, მოჯამაგირეობიდან...

— ჰეი! — ახლა უფრო ხმამაღლა დაიძახეს ეზოდან.

პეტერ მაიცენმა დაინახა, სახლის პატრონმა რომ ხელი გაჰყო ფანჯარაში და ვილაცას დაუქნია. ისიც გაიგონა, რომ გლახმა იმ ვილაცას რაღაც მიყვირა კიდევ. მაგრამ მისი სული და გული ამ წუთში მხოლოდ გრძელი, გამხმარი ხელისკენ იყო მიპყრობილი, შემომწვარ, დაკორძილ შეშის ღერს რომ ჰგავდა და მზის კაშკაშა სინათლეზე ნელ-ნელა რომ აიწ-დაიწია.

„დიდად საყურადღებო კაცია, — გაიფიქრა მან. — კარგად უნდა დავიხსოვო!“

გლახმა ხელი გამოსწია და ნიკაპი მოიქექა.

— ჰმ, მაშ ასე! — ამოიხვნეშა მან. — ცელი უნდა მოვპირო.

— ჰოო, ცელი... — ბურტყუნებდა პეტერ მაიცენი. იგი ჩემოდნისკენ დახრილიყო, რათა იქიდან ფანქრები, მელანი და სხვა რამერუმეები ამოელაგებინა.

— ჰმ... წავალ, აქვიტს მოვთიბავ.

— ჰოო, აქვიტს... — უნებლიეთ გაიმეორა პეტერ მაიცენმა და უცებ გა-



კვირვებით მიმოიხედა. — აქვიტს? ახლა? ახლა ხომ... — უნდოდა ეთქვა, „ახლა ხომ ზამთარიაო!“, მაგრამ დროზე გაახსენდა, სადაც იმყოფებოდა, და ენაზე მომდგარი სიტყვა ზედვე შეაშრა. ამ ამბავმა კი ისე ბავშვივით გაახარა, გაიციინა და თავი გაიქნია.

— მერე სად წახვალთ სათიბად?

— წყნარ ბარში.

— კარგი სახელია.

— ჰმ, მაშ ასე, აქვიტის მოთიბვა თითქოს ნაადრევია, მაგრამ წყნარ ბარში მიწა კარგია, წყალი სამყოფი და ბალახი სწრაფად იზრდება.

— ჰო, ჰო, ჰო! — თავს უქნევდა პეტერ მაიცენი და თავისთვის იღიმებოდა. „ოჰ, რა სულელი ვარ! თუმცა რა მოხდა ისეთი? აქ ახლა ზაფხულია, მაგრამ მე ხომ ტემნიკართან ვარ. იქ კი ზამთარია, თოვს. მთელი ღამე ითოვა და მუხლამდე დადო თოვლი... ამიტომაც ვერ გაუგია ტემნიკარის ცოლს, რად გაუწია მის ქმარს გულმა ტყისაკენ...“

— ერნეი! — მიაძახა ტემნიკარს ცოლმა.

ტემნიკარი ის იყო ბოსელს მიუახლოვდა. უკან არ მოუხედავს, მაგრამ გული კი დაუმძიმდა.

„ისე მომკივის, თითქოს გული ცუდ რასმე უთქვამს, — გაიფიქრა მან. — თუმცა ალბათ არც ატყუებს.. ავი წინათგრძნობა მე დილით მქონდა, ამას კი, როგორც ჩანს, ახლა უგრძნო რაღაცა გულმა“.

— ერნეი!

ტემნიკარმა მოიხედა. ქალი ზღურბლზე იდგა — ჩაბნელებულ კარში შავი ლანდივით ჩანდა. შეეცოდა კაცს.

„ცუდი ცოლი არ იყო ჩემთვის! თავადაც იტანჯება საწყალი, უხიაკი ხასიათი რომ აქვს. კაკლისა და წაბლის ქერქის სისქე კანი აქვს შემოკრული გულზე — მაგარი ლენჭო, ზედაც ეკლიანი ქაცვები... ცუდი ცოლი კი ნამდვილად არ იყო! ტილჩკა თავის ბავშვიანად დაიღუპა. ამან კი ორი შობა. თუმცა არც ერთი არა მგავს, ორივე დედის ფეხია. ჯანდაბას, გოგო რაც არის, არის, მაინც გოგოა. ის ბიჭი მენანება მხოლოდ. ჩემდა სავალალოდ, ძალიან აზიზი მყავს. მაგრამ ეს ქალი რა დამნაშავეა? რა თქმა უნდა, არაფერ შუაშია... ვუყვარდი მე მავას. მეც მიყვარს ჩემებურად, თუმცა ტილჩკა სულ სხვა იყო ჩემთვის... ხვალ-ზევ, როცა რობში მიპოვნო, ეს საწყალი ერთ ვაიუშველებელს ატეხს...“

— ერნეი! — ძრწოლვითა და რისხვით დაუყვირა ქალმა.

კაცი ნელა მიუახლოვდა.

— ყური მიგდე, მარიანა, — უთხრა მან საოცრად გულში ჩამწვდომი ხმით, — სულ მუდამ რად უნდა ვიჩხუბოთ? ან რად გინდა მუდამ შენი გაიტანო? დღეს მაინც, ამ შობა დღეს... როცა ყველა კარგ გუნებაზეა, ასე ვთქვათ... დღეს მაინც რატომ არ უნდა ვიყოთ ტკბილად?.. ჰა, მარიანა?

— ერნეი, რა მოგდის? — მიუგო ქალმა და ხელები წინსაფარზე დაიკრიფა.

— რა? — ჩაიციინა ტემნიკარმა. — რა, რა... მოდი, ცუდი ყველაფე-

რი დავივიწყოთ! შენ ღვეზელი გამომიცხვე, მე კი ტყეში წავალ, იმიტომ რომ ასე მაქვს გადაწყვეტილი. აბა, მომეცი ხელი!

— რა მოგდის ღღეს, ერნეი? — ქალმა გაოცებით გააქნია პატარა თავი.

— არაფერი. ხელი მომე-მეთქი.

— ღღეს რაღაც უცნაური ხარ, — უთხრა ქალმა, თუმცა უნებლიეთ ხელი მაინც გაუწოდა ქმარს.

— აი, ხომ ხედავ! — თავი დაუქნია ტემნიკარმა. — განა ასე არა სჯობს? უფრო ჭკვიანური არ არის? ახლა შემიძლია დამშვიდებული წავიდე... — ტემნიკარმა მაგრად ჩამოართვა ხელი და საჩქაროდ მოეფარა მოსახვევს.

— ერნეი!.. ერნეი!..

— ჰეი! — კვლავ გაისმა ქალის გამყვიანი ხმა.

პეტერ მაიცენი უნებლიეთ შეკრთა, თუმცა უკვე იცოდა, ვინც იყო ამ ხმის პატრონი.

— ცოლი ისევ გეძახით, — უთხრა მან სახლის პატრონს, ქალის ხმაზე რომ არც შერხეულა.

— ჰმ, მაშ ასე, — ესლა ამოღებულ სახლის პატრონმა, მერე კი აუჩქარებლად გაჰყო გრძელი ხელი ფანჯარაში და მზის სინათლეზე აიქნ-დაიქნია.

— ეს ქალი თქვენი მეორე ცოლია? — ჰკითხა პეტერ მაიცენმა. „ღმერთო, მიშველე, ეს რა მომივიდა აზრად? ყველაფერში ტემნიკარს რად ვადარებ ამ კაცს? სულ ამერია ტვინი“.

— მეორე? — გაკვირვებით გააგრძელა გლეხმა და ძვალტყავა თითებით კვლავ ნიკაპი მოიქეჭა.

— ოჰ, მაპატიეთ! მაპატიეთ! თავადაც არ ვიცი, ეს რამ მაფიქრებინა! უბრალოდ, რაც ენაზე მომადგა, ის წამოვროშე, — თავს იმართლებდა პეტერ მაიცენი. სახე კი უღიმოდა, მაგრამ თავის ქერქში ვერ იყო. მან მაგიდაზე მოისროლა სქელი საქალაღდე და მის გახსნას შეუდგა.

„სულიან-ხორციანად ტემნიკარში ვარ ჩაფლული... ამიტომაც დროა ეგ „მაშ ასე“ გარეთ გავაბრძანო... თუ ახლავე არ ვიქმ ამას, კვლავ წამომაყრან-ტალღებინებს რაღაც სისულელეს!“

— ჰმ, მაშ ასე, — თქვა სახლის პატრონმა. — ხდება ხოლმე, ზოგჯერ ისეთ რასმე წამოვროშავ კაცი... თქვენი თქმისა არ იყოს, არაფერ შუაში რომ არ არის. რა ვუყოთ მერე, — გლეხმა ნიკაპი მოიქეჭა და დინჯად დაუმატა: — რა-კი სიტყვამ მოიტანა, შემიძლია გითხრათ, რომ მე მაგ ქალის მეორე ქმარი ვარ.

— ჰოო! — თქვა გულდამშვიდებულმა პეტერ მაიცენმა. „მართლაც თავად უნდა მივმხვდარიყავი, შენ რომ ორჯერ ცოლის შემრთველი კაცი არა ხარ“.

— დიახ... დიახ... სწორედ რომ ასეა... როგორც იტყვიან, თავი შემართვე-ვინა, გესმით?

— მესმის, მესმის...

— მე ხომ მანამდეც მათ სახლში ვცხოვრობდი, ვინემ მისი ქმარი ცოცხალი იყო... მოჯამაგირედ ვყავდი, თუმცა უფრო მეტი პატივით მექცეოდნენ. მანამდე კი ვვაჭრობდი საქონლით, ხე-ტყით, ზოგჯერ მიწის ნაღველები-



თაც... წვრილმან-წვრილმანებით ვკმაყოფილდებოდი. ვაჭარი კაცი არ ვიყავი ბუნებით. მიხაროდა, რომ სხვადასხვა საქმეებზე ქვეყნის ოთხივე კუთხით დავეხეტებოდი... ხომ გესმით?

— მესმის, მესმის...

— ჰო, ბევრჯერ მომიწია შავ ხევეში ჩამოსვლა. ერთხელაც აქ გავათიე ღამე და... თვითონაც მოგეხსენებათ, რაც მოხდებოდა და რაც ხდება ხოლმე, როცა მოხუცი კაცი ავადმყოფობს და ლოგინად არის ჩავარდნილი, ქალი კი ახალგაზრდაა, ჯანიანი და, როგორც იტყვიან, ცხელსისხლიანი...

— მესმის, მესმის...

— ჰმ, მაშ ასე. მე სულაც არ ვიყავ კმაყოფილი ამ ამბით. მაგრამ რას იზამ, უძლური ხარ კაცი... გადავაწყდი აი ამისთანას და... დავრჩი კიდეც, ბირკასავით მომეწება ეს დედაკაცი... ხომ გესმით?

— მესმის, მესმის...

— მერე კი, როცა ბერიკაცი მოკვდა, ჩვენ შევევულდით... კარგი კი იყო, ეს არ მომხდარიყო.

— რადა? — ჰკითხა პეტერ მაიცენმა, თუმცა სულაც არ აინტერესებდა.

გლესმა პასუხი შეაგვიანა:

— ჰმ, მაშ ასე, მოჯამაგირე სახლზე არ არის მიჯაჭვული, სახლის პატრონი კი... სახლშიც რომ არის, არც მაშინაა ყოველთვის ოჯახის თავი...

— ჰო, რასაკვირველია...

— ხოლო თუ დედაკაცია ოჯახის თავი და გლესსაც გაგიყვებით უყვარს ეს დედაკაცი, მაშინ... მაშინ...

— რა მაშინ? — კვლავ უხალისოდ ჰკითხა მისდა უნებლიეთ პეტერ მაიცენმა. იგი მაგიდის უჯრაში ქაღალდებს ალაგებდა.

გლესმა ჩაახველა.

— ... მაშინ დედაკაცი კისერზე მოაჯდება... როგორც იტყვიან, თითზე დაიხვევს... მართალია, ბერიკაცი ამ ქალისთვის ჭკუაზე იშლებოდა, მაინც ხვდებოდა ბევრ ისეთ რამეს, რასაც სჯობდა არ მიმხვდარიყო...

— რა იყო ასეთი? — ჰკითხა პეტერ მაიცენმა და გლესს ახედა. „ვინ იცის, რა უხამსი ამბავი იმალება!“

გლესს ბანჯგვლიან ნიკაპზე შეაცივდა თითები. ალბათ უკვე ნანობდა, ასე რად შევეტოპეო.

— ჰმ, მაშ ასე... მე მინდა ვთქვა, რომ კაცი ისე აღარ იქცევა, როგორც უნდა მოიქცეს. რასაკვირველია, თავად არის დამნაშავე, რახან ასეთი დოყლაპიაა...

— რასაკვირველია! ყოველი კაცი რაღაცაში სცოდავს და ყოველ კაცს რაღაცა გასაჭირი ადგას! — თქვა პეტერ მაიცენმა და უჯრა ჯახუნით მიხურა, თითქოს ამით უნდოდა ეთქვა, მოთმინების ძაფი გამიწყდაო.

— ყოველ კაცს, მაშ!.. — შვებით ამოისუნთქა სახლის პატრონმა.

— ყოველ კაცს, ყოველ კაცს!..

გლესმა ჩაახველა.

— ჰმ, მაშ ასე. ახლა შეუდგებით?

— რას?

— რასა და... წერას?

— რასაკვირველია! „რომ ვეღარ ვეღირსე შენს აქედან წასვლას!“ — პე-



ტერ მაიცენმა მაგიდაზე დადო ზურგჩანთა, რომ იქიდან სპირტქურა, ყავა, შაქარი და ყავის საფქვავე ამოელღო.

— ჰმ, მაშ ასე... მერე და წავა საქმე?

— რად არ უნდა წავიდეს? — შეეკითხა პეტერ მაიცენი და ფერმა გადაჰკრა. მან ყავის მარცვლები საფქვავეში ჩაყარა და დაფქვას შეუდგა... — თუ საქმე გემარჯვება, თავსაც მოაბამ. თუმცა ბოლომდე მაინც ვერასოდეს გაიწაფები!..

— სიცოცხლე მეტად მოკლეა.

— ორჯერ უფრო გრძელიც რომ იყოს, მაინც ასე იქნებოდა. არ ღირს ახლა ამაზე ლაპარაკი!..

— ჰმ, მაშ ასე. იმუშავე და ითმინე, ვინემ კარზე არ მოგდგომია...

— ვინ?

— ვინა და ის, ცელით რომ დადის.

— ის რა სახსენებელია!

— გინდ ახსენე, გინდ არა, სულ ერთია — მაინც მოგადგება!

— სწორედ ამიტომაც არ ღირს ლაპარაკი! — თითქმის დაიყვირა პეტერ მაიცენმა, თავი ჩაჰკიდა და უფრო სწრაფად დაატრიალა საფქვავე.

— ნუ გამიჯავრდებით, ერთი რამ მინდა გკითხოთ, — თქვა გლეხმა, — რაზე უნდა წეროთ?

— ტემნიკარზე.

— ვისზე?

„ღმერთო ჩემო, ნუთუ მართლა ვერ ვიმუშავე?“

— რაო, რა თქვით, ვისზეო?

— ერთ ბერიკაცზე... შეიძლება ერთი ტოლჩა წყალი ვთხოვოთ?

— ერთი ტოლჩა? — იკითხა გლეხმა. — ჰმ... თუ სხვა არაფერს ითხოვთ...

— არა, არ ვითხოვ! — მოუჭრა პეტერ მაიცენმა და ყავის საფქვავე მაგიდაზე რახუნით დასდო. — ერთი ტოლჩა წყალი მინდა მხოლოდ, რომ ყავა მოვიდულო.

— ჰეი! — გაისმა ეზოდან ქალის გაბრაზებული ხმა.

— მადლობა ღმერთს! — უნებლიეთ ხმამაღლა წამოსცდა პეტერ მაიცენს. მაგრამ მაშინვე დაუმატა: — ერთი უთხარით, წყალი მომიტანოს!

სახლის პატრონი მარდად გადაეკიდა ფანჯარაში. ეტყობოდა, კმაყოფილი იყო: წყლის მოტანას ცოლს ვთხოვ, იქნებ ამით გავაჩერო.

— ერთი ტოლჩა წყალი მოიტა! — დაუყვირა მან ქალს.

— რაო?

— ერთი ტოლჩა წყალი, ბატონს უნდა ყავა მოიდულოს!

პეტერ მაიცენმა კედლისკენ მისწია დანჯღრეული ტუმბი, ძველი გაზეთი გადააფარა და ზედ სპირტქურა, ჯეზვა¹ და ფინჯანი დასდო.

— ახლავე მოიტანს, — თქვა გლეხმა. იგი კვლავ ფანჯარას მიეყრდნო, ნიკაპი მოიქეჭა და იკითხა: — მერე რა მოუვიდა?

— ვის?

— აი იმ კაცს. როგორ თქვით, რა ჰქვიაო?

— ტემნიკარი! — უთხრა პეტერ მაიცენმა. აღარ იცოდა, როგორ შე-

¹ ჯეზვა (არაბ.) — ყავის მოსახარში ჭურჭელი.



ეწყვიტა ეს მოსაბეზრებელი საუბარი, ისე რომ სახლის პატრონისთვის არ ეწყენინებინა.

— ჰო, ტემნიკარი! რა მოუვიდა მას?

— ისეთი არაფერი! — ხელი ჩაიქნია პეტერ მაიცენმა. — ხუთ თეთრგვარ-დიელს შეება თორმეტი მძიმედ დაჭრილი პარტიზანის გადასარჩენად. ისინი ამხანაგებმა ალყიდან იხსნეს და ტყეში დამალეს. აი, ეს გადახდა თავს!

— ჰმ, მაშ ასე... მერე მარტო იყო?

— მარტო...

— სძლია კი მათ?

— სძლია...

— ბერიკაცი იყო, ამბობთ?

— სამოცდაათი წლისა...

— ჰმ... თავადაც დაილუბა?

— თავადაც დაილუბა... მაშ ასე! მაშ ასე! — მჭახედ მიუგო გაბრაზებულმა პეტერ მაიცენმა. — ჰო, დაილუბა! და მაინც ეს იყო ყველაზე მშვენიერი დღე მის ცხოვრებაში!.. ამას თქვენ ვერ გაიგებთ!

გლებკაცი გაქვავდა. პირდაღებული, თვალის დაუხამხამებლად ისე მიჩრებოდა პეტერ მაიცენს, თითქოს მაიცენი გველი იყო და შიგ გულში უპირებდა კბენას.

— მე მინდოდა მეთქვა, ამას ასე აუხსნელად ვერ გაიგებთ-მეთქი! — სცადა ნათქვამის გამოსწორება პეტერ მაიცენმა და უნებლიეთ თავადაც გაშეშდა ამ ქანდაკების დამნახავი. იმ წამს მხოლოდ იმან გაუელვა ფიქრად, სასტიკად შეურაცხვეყო ადამიანი. მოგვიანებით, საკმაოდ მოგვიანებით, იგი თავს აღმფოთებით გაკიცხავს: ეს მწერალი კაცი ასე რამ დააბრმავა, როგორ ვერ დაინახა, რომ თავისი სიტყვებით თითქოს მარტივი დააყარა ჩრნილოვარის ისედაც მოუშუშებელ ჭრილობას, ჯერაც რომ სისხლი სდიოდა და ხორცსა და სულს უშანთავდა. იქნებ იმიტომ გამოეპარა ეს ამბავი, რომ ჩრნილოვარი არც აინტერესებდა და არც მაინცდამაინც ეპიტნავენებოდა. ასე იყო თუ ისე, იმ წუთს იგი ვერაფერს მიხვდა, მხოლოდ ისღა იგრძნო, რომ ამ კაცს შეურაცხყოფა მიაყენა, და შეეცადა როგორმე თავი ემართლებინა:


— მე მინდა გითხრათ, რომ თქვენ ამ ამბავს ვერ გაიგებთ, ვერც ვერავინ გაიგებს, თუ ტემნიკარის მთელი გავლილი ცხოვრება, ბედი, დარდი და ნაღველი არ უამბე, თუ არ აუწერე ყველა ის გარემოება, რამაც გავლენა მოახდინა ამ კაცზე, მთლიანად გარდაქმნა იგი, შიში სიმამაცედ უქცია და... სიკვდილს ისე შეხვდა, როგორც სიცოცხლის გამოცხადებას, ისე შეხვდა, როგორც...

ამ დროს კარზე დააკაკუნეს და დიასახლისმა წყალი შემოიტანა. პეტერ მაიცენს უკვე ნანახი ჰყავდა ეს ქალი, მაგრამ მხოლოდ ახლა მოხვდა თვალში მისი სიმაღლე და ტანადობა.

— აჰა! გეყოფათ, ხომ? — იკითხა ქალმა და ტოლჩა ზედ წიგნზე დადო. მერე პასუხსაც აღარ დაუცადა, ქმარს მივარდა: — ჰეი! უკვე მოასწარი მიტმანა?.. რა საკუთარი საფლავის ძეგლივით აყუდებულხარ?!

მერე ქალი კვლავ პეტერ მაიცენს მიუბრუნდა:

— ეს მხოლოდ სიკვდილის მოსაყვანად უნდა გაგზავნო კაცმა, მერე დაჯდე და გულდამშვიდებით ელოდო განკითხვის დღეს!



ქმარმა ჩაახველა.

— ჰმ, მაშ ასე. ლაპარაკში გავერთე...

— ლაპარაკშიო? — ქალმა ხელები თეძოებზე შემოიღო და რაღაც უცნაურად, თითქოს ქედმაღლურად ჩაიციხა. — ლაპარაკში? ყოჩაღ... ვერაფერს იტყვი კაცი... იქნებ ეხმარები კიდევ, ჰა?... ბატონს ხელს უშლი ალბათ, ეს არის და ეს! სწორე არა ვარ, ბატონო?

— არა, რათა, — საჩქაროდ მიუგო პეტერ მაიცენმა. ცოლი მას ქმარზე ნაკლებად მოსწონდა. რაღაცნაირი არაწმიდა, საკმაოდ უჭკუო და უგულო ქალი ჩანდა.

— ჰმ, მაშ ასე! — გაიციხა ქალმა და თეთრი, ხორცსავსე მკლავები გაიქნია. — არც მე მაწყენდა წამასლაათება, მით უმეტეს განათლებულ ხალხთან, ვინც ბევრ რამეს ამიხსნიდა... ვისაც ავი თუ კარგი ვაეგება... შეუძლია ესეც გაგიმარტოს და ისიც... ჩვენ ხომ უბრალო ხალხი ვართ... უსწავლელი... თუმცა მაინც ადამიანები ვართ და... სწორე არა ვარ, ბატონო?

— რასაკვირველია, რასაკვირველია! — თავი დაუქნია პეტერ მაიცენმა, ეშინოდა, ახლა ეს ქალი მთლად გამიწყვეტს მოთმინების ძაფსო. და აღარ იცოდა, როგორ დაეხსნა მისგან თავი.

— მეც მაგას არ ვამბობ, — მიაყარა ქალმა, — ზოგჯერ უბრალო ადამიანიც წაიფორხილებს... მე მინდა ვთქვა — ვერც მიხვდება, ისე... მერე კი იტანჯება და ეწამება, როგორც გველი ძველი პერანგიდან გამოძრომისას... სულ რომ არ არის საჭირო, ისე... სწორე არა ვარ, ბატონო?

— დიახ, დიახ...

— ჰო... იყო დრო, — არა, მე არ ვამბობ, ცუდი დრო იყო-ნეტქი, არა, არ იყო ცუდი... მხოლოდ სხვა დრო იყო... კარგი დრო... ოღონდ როცა ომმა თავის მორევში ჩაგვითრია და იმ საშინელმა ამბებმა თავგზა აგვიბნია... მე მინდა ვთქვა, მაშინ ძნელი არ იყო თავგზის აბნევა... და არც არაფერი საოცარი ამბავი ეს არის...

— დიახ, დიახ! — თქვა პეტერ მაიცენმა, ტოლჩა აიღო და ტუმბთან მივიდა.

გლებმა ჩაახველა და უცებ ისე ხმამაღლა წამოისროლა აჩემებული „მაშ ასე“, პეტერ მაიცენმა უნებლიეთ მოუხედა.

— ჰო... ჰო... ნეტა რას ვყბედობ ამდენს? — გაიციხა ქალმა და აწითლებული სახე ყვავილებიანი წინსაფრით მოიწმინდა. — დედაკაცური ლაქლაქი გავაბი...

— დიახ, დიახ! — თქვა პეტერ მაიცენმა. — ცუდი როდია ეს! მხოლოდ, იცით, მინდოდა წამემუშავა.

— მაგას არ ვამბობ! — სასწრაფოდ დაეთანხმა ქალი. — ყველაფერს თავისი დრო აქვს. სწორე არა ვარ, ბატონო?

— რასაკვირველია, რასაკვირველია!

— აი, ხომ ხედავ? — მიუბრუნდა ქალი ქმარს, — წავიდეთ! თავად თუ არ ხარ მუშაობის ხასიათზე, სხვას მაინც ნუ უშლი ხელს. სწორე არა ვარ, ბატონო?

პეტერ მაიცენს აღარაფერი უპასუხნია.

ცოლ-ქმარს კრინტიც აღარ დაუძრავთ. ისე ჩუმად გაიხურეს კარი, თითქოს ამ სახლის პატრონები თვითონ არ იყვნენ.

— უჰ! — ხმამალა ამოიოხრა პეტერ მაიცენმა.

მან ჯეზვა სპირტურაზე დადგა, ტოლჩა კი იატაკზე. მერე ისეთი ძალით გაიზმორა, სახსრებს ტკაცატკუცი გააღებინა და მალე შეხტა, თითქოს მძიმე, მტანჯველი ტვირთი მოიშორაო.

— უჰ! გული ვიჯერე მასლაათით. იმედი მაქვს, ახლა ვახშობამდე ვერც „მაშ ასე“ გავიგონებ და ვერც „სწორე არა ვარ, ბატონო?“

მან ხელები ჯიბეებში ჩაიწყო და ინგლისური ნელი ჰანგის სტვენა დაიწყო, კარგა ხანია ყურებში რომ ედგა. უსტვენდა და თან წყლის ადუღებამდე ტუმბთან ცეკვავდა. მერე საჩქაროდ ყავა შეამზადა და დაისხა.

— ესეც ასე! ახლა ვიმუშაოთ! — შესძახა მან და მაგიდას მიუჯდა. ნაფაზი დაარტყა, საქალაღდე ახლოს მიიწია, ნელა გახსნა და, პატარა ბიჭვიით გაცელქებულმა, ფრანგულად მოუხმო ტემნიკარს, ცოტა არ იყოს შინაურულადაც კი, თითქოს საბრძოლველად იწვევდა: Et maintenant, Temnicar, a nous deux! ¹

მაგრამ ვაი რომ ტემნიკარი არ მოდიოდა!

პეტერ მაიცენს შეეშინდა. ჯერ ფართოდ გაახილა თვალები, მერე მაგრად მოჭუტა, რომ სიბნელეში კარგად დაენახა. მაგრამ ის ზმანებანი, ეს წუთია ისე ნათლად და გამოკვეთილად რომ ხედავდა, თუნდაც სურათს გადაუღებდა, უცებ გაქვავდნენ, მერე რუხ ლაქებად გაიდღაბნენ და ბოლოს სულაც გაქრნენ. თვალწინ უკუნი სიბნელეა ედგა. მერე ამ სიბნელეში წითელი, მწვანე და ყვითელი წრეები არიალდა, ერთმანეთს შეეჯახა; პეტერ მაიცენს თვალთაუჭრელდა და საფეთქლები ასტკივდა. მალე ეს წრეებიც გაქრა. მათ მაგივრად ახლა შავი ლაქები აცეკვდა თითქოს შავ ყინულზე.

— წყეული გლეხი! წყეული დედაკაცი! — დაიყვირა პეტერ მაიცენმა, ბრაზით გასწია მაგიდა და ოთახში აწრიალდა, — ასეც ვიცოდი, აქამდე რომ მიმიყვანდნენ!

„იცოდი? შენ გგონია, მართლაც ეს ცოლ-ქმარია დამნაშავე?“

— მაშ არადა! — შეჰყვირა პეტერ მაიცენმა, ამ ყვირლით ცდილობდა ჩაეხშო თავისი შინაგანი ხმა. — „ჰმ, მაშ ასე, წავა კი საქმე?.. ჰმ, მაშ ასე, ჩქარა თუ მიგდით საქმე?.. ჰმ, მაშ ასე, საინტერესო ამბავი თუ გამოდის?.. ჰმ, მაშ ასე, ღირს კი?“

იდუმალი სევდა, სასოწარკვეთილება, ნაღველი ყინულის ლოდვიით დააწვა გულზე. შემოქმედებითი სიხარულის ცეცხლი, სულ ახლახან რომ სახე გაუბრწყინა, ჩაქრა. ჰო, ასეა მუდამ!.. მერე რატომ? საიდან მოდის ეს შიში, სასოწარკვეთილება, ეს ნაღველი?

მან საქალაღდე დახურა და განზე მისწია. მაგიდას იდაყვებით დაებჯინა, თავი ხელებზე დააყრდნო და ფანჯარას მიაშტერდა. ვიწრო ეზო იყო; ოთხი მეტრის მოშორებით სახლის მეორე ნაწილის მაღალი თეთრი კედელი აღმართულიყო, მის ზემოთ მოჩანდა ყავისფერი სახურავი და დაბალი საკვამური, საიდანაც გამჭვირვალე მოცისფრო კვამლი ამოდიოდა.

— ყოველივე კვამლია და მეტი არაფერი! — გაიფიქრა გულმოკლულმა პეტერ მაიცენმა.

¹ აბა ახლა კი, ტემნიკარ, ჩვენ ორნი დავრჩით (ფრანგ.).



მან თვალი გაუსწორა ცის ვიწრო ზოლს, სახურავს ზემოთ რომ მოჩანდა. ცას მუქი ლურჯი ფერი გადაჰკრავდა, ღრმა და მყუდრო იყო.

„ღრუბელიც არ ჭაჭანებს!.. ტემნიკარს კი თავისი საკუთარი ღრუბელი ჰქონდა. შინიდან რომ გადიოდა, ვრანექთან დაინახა იგი, ხოლო მერე, რომში რომ იწვა — ბრეზამის ცაზე ჰკიდა თვალი. ტემნიკარის უკანასკნელ ამოსუნთქვის უმალ გაქრა ის ღრუბელი... ჩემი ცა კი უკვე ცარიელია, ცარიელი და უძირო უფსკრულივით ღრმა“... პეტერ მაიცენს შეაყრუოლა.

„ახია ჩემზე, თავში რომ ასეთი საშინელი შედარებები მომდის! — მან ნაღვლიანად ჩაიციხა. — უფსკრული? ჰო! ცის ეს სწორკუთხედი უძირო უფსკრულის უძირო ვიწრო ხახაა მხოლოდ, მე კი ვზივარ აქ, მიწის სიღრმეში, ღრმა სარდაფში, და მოულოდნელად ახლა, სწორედ ამ წუთს, დედამიწა გაიპობა და უფსკრული მიყოფს პირს. მე ღია სარკმელში ჩავვარდები, მაღალ თეთრ კედელს, სახურავს, საკვამურს ჩავუფრენ გვერდით, კვამლში გავაღწევ და ვიფრენ ასე ქვევით. ისიც ვიცი, რომ ფსკერს ვერასოდეს მივალწევ, რამეთუ არ არსებობს იგი; მე მხოლოდ დაბლა-დაბლა დავეშვები მანამდე, სანამ სევდა არ დამარეტიანებს და გრძნობას არ დავკარგავ... ჩემ ირგვლივ კი უსასრულო სიჩუმე დარეკავს ზარივით, თითქოს კედელი რკინისა იყოს...“

პეტერ მაიცენი უნებლიეთ მაგიდას მოეჭიდა.

და მაშინ, სწორედ იმ წამს, მოსაპირავი ცელის რაწკუნნი გაისმა. ისეთი მოულოდნელი და მჭახე იყო ეს ხმა, პეტერ მაიცენი წამოხტა.

„ჰმ, მაშ ასე... — ჩაიციხა მან, როცა გამოერკვა, — ეს წყეული „მაშ ასე“ თავის ცელს პირავს. აკი თქვა, აქვიტის მოსათიბავად უნდა წავიდეო... სადაო? რა ადგილასო?“

„წყნარ ბარში“.

„ჰო, წყნარ ბარშიო... მაინც რა საოცარი სახელები ჰქვია აქაურ ადგილებს! შავი ხევი, წყნარი ბარი!“

„ალბათ იმიტომ, რომ ნაღვლიან ფიქრებში ჩაიძირო... გეყოფა, გეყოფა! კაცი იფიქრებს, სიკვდილის ზღურბლზე დგასო. სახლის პატრონი თუ ცელს პირავს, რა საოცრებაც ეგ არის?!“

„საოცრებო? რასაკვირველია, არა! მაგრამ ეს ცელი ისე წკრიალებს, ჩემი უძირო უფსკრულის სიჩუმეს ჰკვეთს... ჰო, სწორედ ასეა — სიკვდილი შემომჯდარა მთის წვეროზე, თავისი ვეება ცელი მთელი ხეობისათვის გადაუწვდენია და ახლა ჩემ ზემოთ პირავს ამ ცელს“.

„რა სისულელეა!.. ეს ხომ სიკვდილი არაა, ეს გლეხკაცია. თუმცა ისიც ჩონჩხივით არის ჩამომხმარი“.

„იქნებ თავის მოსაკლავად ლესავს იმ ცელს?..“

ამ ფიქრმა ისე გააოცა პეტერ მაიცენი, თითქოს თავად ესურვებინოს იმ გლეხის სიკვდილი.

„ღმერთმანი, ჭკუაზე აღარა ვარ!.. დღეს რაღაც საოცრება მემართება, ჩემივე თავი გამიხდა უძირო უფსკრული. რა საზარელი აზრები მეზადება“.

„აბა, თავს სძლიე და ფიქრებს სხვა მიმართულება მიეცე!“

„მივცემ კიდევ უთუოდ! — პეტერ მაიცენმა ხელები დამუშტა და აიქნია. — თუმცა... განა უცნაური არ არის, რომ უცებ ასეთი აზრი დამეზადა? აბა, რად უნდა დაუდგეს ამ კაცს აღსასრული? ან საიდან მომივიდა ფიქრად?“

„საიდან? სხვა ფიქრებს მოჰყვა. ფიქრებს კი პასპორტი არ გააჩნია, რომელიც კაცმა მათი სადაურობა გაიგოს!“

„ჰო, რასაკვირველია! თავის შინაგან სამყაროს ადამიანი სიკვდილამდე ვერ შეიცნობს. ნელ-ნელა იხსნება ახალი და ახალი ქვეყნების კარი. აი ახლა გადაიშალა ის მწუხარე ქვეყანა, სადაც ბუდობს ფიქრები წარმავლობასა და სიკვდილზე...“

პეტერ მაიცენმა ხელი ჩაიქნია, სიგარეტს მოუკიდა და ოთახში გაიარ-გამოიარა.

მერე კვლავ გაირინდა და ფიქრებში ჩაიძირა.

„კი მაგრამ, იქნებ აქ მაინც რაღაც ხდება? უცნაური კაცია ეს ჩრნილოგარი... მისი ცოლიც... რაო, რას ყბედობდა ეს დედაკაცი? გული მიშფოთავს როგორღაც“.

პეტერ მაიცენმა ირგვლივ მიმოავლო თვალი. ისმოდა მხოლოდ ცელის ნაწყვეტ-ნაწყვეტი ჟღერი. ხმა ფანჯრიდან ოთახში იჭრებოდა, კედლებიდან ირეკლებოდა და პეტერ მაიცენს შიგ საფეთქლებში უკაკუნებდა.

იგი ფანჯარასთან მივიდა. გლეხი შესასვლელი კარიდან სამიოდე მეტრის მოშორებით მიწაზე იჯდა. მისი თითქმის მოტვლებილი თავი ჩაქუჩის ყოველ დარტყმაზე მზემოკიდებულ გრძელ კისერზე ირწეოდა. პეტერ მაიცენმა ის იყო პირი დაალო და უნდა ეკითხა, როდის მორჩები მაგ საქმესო, მაგრამ დროზე შეიკავა თავი.

— ბოლოს და ბოლოს ეგ ბერიკაცი ჩემზე იფიქრებს, ჭკუაზე შეიშალაო! — ჩაიბურტყუნა მან, ხელი ჩაიქნია, ახალ სიგარეტს მოუკიდა და მტკიცე იერით მიუჯდა მაგიდას.

მან საბეჭდი მანქანა ახლოს მოიწია და ფურცელი ჩაღო. მაგრამ კლავიშებზე თითის დაკარებაც ვერ მოასწრო, რომ საყვირის ხმა გაისმა. სადღაც შორიდან მოდიოდა ეს ხმა, ძლივს ისმოდა, თუმცა საოცრად მკაფიოდ კი გაიგონებდა კაცი.

პეტერ მაიცენს ხელები გაუშეშდა.

სიჩუმე ჩამოვარდა...

ცელის ხმაც მიწყდა.

პეტერ მაიცენმა დააყურადა.

„იქნებ მომეჩვენა? როცა კაცი გულდამძიმებულია, რა არ მოუვა თავში...“.

პეტერ მაიცენმა ასწია ხელები, მაგრამ ვერ მოასწრო კლავიშებზე დადება, რომ კვლავ საყვირის ხმა გაისმა. ახლა ჰანგიც კი გაარჩია. ეს იყო სევდიანი ხალხური სიმღერა, მაგრამ მხოლოდ დასაწყისი, ორი პირველი ფრაზა. პეტერ მაიცენმა კარგად იცოდა ეს სიმღერა, მაგრამ სიტყვები ვეღარ მოიგონა. ამან გააშმაგა. იგი ელოდა, იქნებ კიდევ გაისმას საყვირიო, სანაცვლოდ კი ლითონის ჟღარუნი მოესმა, თანაც ისე ძლიერად, თითქოს ჩრნილოგარს საყვირის ხმის ჩახშობა სურდა.

— ვინ უკრავს? — ხმამაღლა იკითხა პეტერ მაიცენმა, — და რას უკრავს?

იგი დიდხანს ელოდა, მაგრამ რომ დარწმუნდა, საყვირს ვეღარ გაიგონებდა, ცელს კი უფრო ხმამაღლა გაჰქონდა წკრიალი, საბეჭდი მანქანა გვერდზე მისწია და წამოდგა.



„არა! მამაღმერთიც ვერ დამარწმუნებს, რომ აქ არაფერი არ ხდება... წავალ, გავივლი!“

პეტერ მაიცენი ზღურბლზე შედგა. თავგზა აურია იმის გაფიქრებამ, რომ გლახკაცისთვის უნდა ჩაევილო გვერდი. შერცხვა თავისი წელანდელი ფიქრებისა და იმისაც, რომ ვერ შეასრულა გადაწყვეტილება — ოთახში მჯდარიყო და ემუშავა. მან ცხვირზე შავი სათვალე წამოიცივა. გადაწყვიტა, სახლის პატრონი თუ შემომიჩნდა, ორიოდ სიტყვით მოვიშორებო, და ნელი ნაბიჯით გამოვიდა ეზოში.

მაგრამ სახლის პატრონს არაფერი გამოპარვია. მან საოცრად სწრაფად მოატრიალა მისკენ თავი და ასევე სწრაფად ჰკითხა:

— არ გამოდის?

— რა? — პირქუშად გაეპასუხა პეტერ მაიცენი.

— წერის საქმე?

— არა! — საკმაოდ მტრულად უთხრა პეტერ მაიცენმა, რაკი გლახის ხმაში სიხარული მოესმა. — არც თქვენი საქმე გამოდის! ერთი საუკუნეა ასე აკაკუნებთ!

— ერთი საუკუნე? — გაოცებით შეხედა სახლის პატრონმა. — ათი წუთიც არ გასულა!

— ათი წუთიო?.. „ნუთუ მართლაც მხოლოდ ათი წუთი გავიდა, რაც ეს კაცი ცელის მოპირვას შეუდგა? ნუთუ სულ რაღაც ათიოდე წუთში განვიცადე და ვიფიქრე ამდენი?“

— თუ ცელის მოპირვას ყური მიუგდე, — თქვა გლახმა. — კაცს ეგონება, ერთი საუკუნეა, რაც პირავენო.

— დიახ, დიახ... — თავს უკანტურებდა პეტერ მაიცენი. — ვინ უკრავს აქ?

— უკრავსო? — გააჭიანურა სიტყვა გლახმა და კვლავ გაოცებით შეხედა პეტერ მაიცენს.

— ჰო. საყვირზე.

— საყვირზე?

— რაო, არ გაგიგონიათ თუ?

— თქვენ კი გაიგონეთ საყვირის ხმა?

— როგორ, აქ მახლობლად არავის არა აქვს საყვირი?

— საყვირი? — გლახი ჩაფიქრდა.

— საოცარია პირდაპირ, — გაუკვირდა პეტერ მაიცენს, — ნუთუ მართლა არ გაგიგონიათ?..

— რა... საყვირის ხმა?

— ჰო, საყვირისა... ან იქნებ მართლაც ჩამესმა... ისეთი სიწყნარეა, მიუჩვეველ კაცს რაღა არ მოეყურება.

— მოეყურება?

— ჰო. ასე იტყვიან ხოლმე, როცა კაცს ყური მოატყუებს.

— ჰმ, მაშ ასე... ხდება ხოლმე... განსაკუთრებით შუალამისას.

— აბა, კარგად იყავით! — პეტერ მაიცენი ცოტა არ იყოს უხერხულად გრძნობდა თავს, მაგრამ სამი ნაბიჯი გადადგა თუ არა, შეჩერდა: — სად არის ის წყნარი ბარი?

— წყნარი ბარი? — შეუბრუნა კითხვა სახლის პატრონმა, თან თვალეზით სჭამდა პეტერ მაიცენს.



— ჰო, წყნარი ბარი, განა თქვენ არ თქვით, მოსათიბავად წყნარ ბარში უნდა წავიდეთ?

— წყნარი ბარი?

— ჰო, წყნარი ბარი! — გაიმეორა პეტერ მაიციენმა და უნებლიეთ შეკრთა იმის გაფიქრებაზე, ვაითუ ეს სახელიც ჩემი ფანტაზიის ნაყოფიაო.

— მართლაც ასე ვთქვი.

— აი, ხომ ხედავთ! მერე სად არის ეს წყნარი ბარი?

— სად უნდა იყოს? აგერ იქ, — გლახმა ხელი ასწია, მაგრამ არც მარცხნივ გაუშვევრია და არც მარჯვნივ. — რა გინდათ იქ... ნესტია. ხომ გითხარით, ჭაობია-მეთქი... ტალახი... თუ გასეირნება გსურთ, აგერ ხეივნის ბოლოს მარჯვნივ მოუხვიეთ, მოკირწყლულ გზას გაჰყევით. ლამაზი ადგილებია იქ. გზა დაჩრდილულია, ტყის პირს მიჰყვება, ზედ სამიკიტნოს მიგაყენებთ.

— კეთილი! კეთილი! — საჩქაროდ დაეთანხმა პეტერ მაიციენი და სწრაფად მიტრიალდა, რაკი კარებში დიასახლისი შეამჩნია.

— ჰეი! — ქალის ხმა ისე ეცა ზურგში, პეტერ მაიციენმა კინალამ წაიფორხილა სწორ ადგილზე. — ჰეი! — მეორედ მოხვდა ზურგში.

— რა გნებავთ? — პეტერ მაიციენი მოტრიალდა. „ახლა ველარ დავიხსნი თავს!“.

— ნუ გამიბრაზდებით, ბატონო! — თქვა ქალმა, — აგერ, ამან მითხრა, — ქალმა ქმრის მხარეს გაიქნია თავი, — თითქოს თქვენ იცნობდით კაცს, ვინც მარტოდმარტო შეება ხუთ თეთრგვარდიელს.

— რასაკვირველია, ვიცნობდი, მხოლოდ...

სახლის პატრონმა ჩაქუჩი აიღო და ღონივრად დაჰკრა ცელს.

— ჰეი! მოეშვი ერთი! — უბრძანა ქალმა და პეტერ მაიციენს მიუბრუნდა: — მოგვიყევით, ბატონო, მოგვიყევით, როგორ მოხდა ეგ ამბავი!

ქალის თხოვნა ისე მოულოდნელი იყო, პეტერ მაიციენმა პირველად ვერც კი მოისაზრა, როგორ მოქცეულიყო. გულით უნდოდა მოტრიალებულიყო და წასულიყო, მაგრამ უხეშად მოქცევა არ სურდა და გადაწყვიტა მოკლედ ეამბუნა ამათთვის თავისი მოთხრობა.

— ჰო, როგორ მოხდა ეგ ამბავი? — ქალი ქმრის გვერდით მიწაზე დაჯდა და ხელები მუხლებზე შემოიხვია.

— ისე! — საკმაოდ გაურკვეველად დაიწყო პეტერ მაიციენმა. — იგი ხუტორში ცხოვრობდა...

— ჩვენსავით. — შეაწყვეტინა ქალმა და ქმარს ფერდში იდაყვი წაჰკრა.

— დიახ. სახლი ზედ საზღვარზე იდგა, აქეთ გათავისუფლებული მიწები იყო, ჭრით — დაპყრობილი. ამიტომ იქ პარტიზანებიც იოლად შემოდდიოდნენ და თეთრებიც.

— როგორც ჩვენთან!

— ამბავი შობის წინადღეს მოხდა...

— შობის წინადღეს?

— ჰო, სწორედ შობის წინადღეს, — გაიმეორა პეტერ მაიციენმა. „ჰოი, წყევლო დიაცო, ნუთუ თვითეული სიტყვა ცალ-ცალკე უნდა დაგიღებო, რომ გადაყლაპვა მოახერხო!“

— შობის წინადღეს... ჰო... ჰო... მერე რა მოხდა?



— დილით მან გულდამძიმებულმა, ცუდ გუნებაზე გაიღვიძა და სასწრაფოდ წამოხტა, არაყს გადავკრავო...

— გულდამძიმებულმა და... როგორ გუნებაზე?

— მერე მიხვდა, თურმე სიკვდილს უგრძნობდა გული; რადგან დიდ ხანს არ გაუვლია, რომ ის ხუთი კაცი მოადგა კარს...

— დაიცათ, დაიცათ-მეთქი! — ქალმა ხელები ასწია. — მაშ ის გლები დაილუპა?

— რასაკვირველია, დაილუპა, ხომ იცით...

— რასაკვირველია, დაილუპა! — გაიმეორა ქალმა და კვლავ ფერდში წაუჭიკავა ქმარს. — ჰო, შენ კი არ გითქვამს, დაილუპაო!

— ჰმ, მაშ ასე. ისედაც ნათელია.

— ისედაც ნათელია! — გაიმეორა ქალმა და კვლავ პეტერ მაიცენს მიუბრუნდა. — მერე რა მოხდა?

— მერე, — თქვა პეტერ მაიცენმა, — მოვიდა ის ხუთი თეთრგვარდიელი, თქვეს, მაღალ მთაზე, კლდეებში იმალება რამდენიმე დაჭრილი პარტიზანი და ახლა იქ მივდივართ, რომ ამ პარტიზანებს ბეთლემში ვუკრათ თავიო. მათ უნდა...

— ბეთლემში? რატომ ბეთლემში? — პირი დაადო ქალმა.

— უნდოდათ ეთქვათ, ამოვხოცავთო. ტემნიკარმა კი...

— ამოვხოცავთო! — ქალმა კვლავ ჯლიქვი ჰკრა ქმარს.

— ამოვხოცავთო! — კვერი დაუკრა პეტერ მაიცენმა. — ტემნიკარმა აიღო ნაჯახი, რევოლვერი და ტყისკენ გაეშურა, გზაზე დახვდა იმათ და იქვე მიაწვინა...

— მიაწვინა კი... მიაწვინა?

— მიაწვინა! — დაუდასტურა პეტერ მაიცენმა. — აი ეს ამბავი გადახდა იმ გლებს! — პეტერ მაიცენმა სული მოითქვა და წასასვლელად გატრიალდა.

— მაპატიეთ, ბატონო... როგორ მიაწვინა? — ჰკითხა ქალმა.

— როგორ? — ჩაფიქრდა პეტერ მაიცენი. — ეს ჯერ არ ვიცი.

— როგორ თუ არ იცით? — პირი დაადო ქალმა.

— ჯერ არ ვიცი, — გულგრილად აიჩეჩა მხრები პეტერ მაიცენმა. — მერე გამოჩნდება.

— ჰმ, მაშ ასე, — თქვა გლებმა. — ამაზე ბატონმა ჯერ უნდა იფიქროს. ასეა თუ ისე, ამ ამბავს ბატონი თავად იგონებს.

— ა-ა-ა! — სული მოითქვა ქალმა. — თავად იგონებს... მაშასადამე, არ არის მართალი... მაშასადამე, ეს არ მომხდარა? ჰოო! — ქალი მიუბრუნდა ქმარს და იდაყვით კინალამ ფერდი შეუნგრია, თითქოს უნდოდა ეთქვა: „ასეც ვიცოდები, რომ ზღაპარი იქნებოდა!“

— ვინ თქვა, რომ არ არის მართალი? — წელში გაიმართა შეურაცხყოფილი, მოთმინებიდან გამოსული პეტერ მაიცენი. — ვინ თქვა, ეს არ მომხდარაო?.. რამდენი მასეთი ტემნიკარი ყოფილა ქვეყნად, ვისზედაც ჯერ კიდევ არაფერი დაუწერიათ. მაგრამ როცა მე ჩემს მოთხრობას დავწერ, მაშინ კი ნამდვილად მოხდება, — მე მინდა ვთქვა, ეს სინამდვილედ იქცევა, წმინდა და ჭეშმარიტ სინამდვილედ!

— ჰმ, მაშ ასე, — გლებმა ნიკაპი მოიქეჩა და ჩაქუჩი წყალში ამოავლო, რომ თავისი საქმე განეგრძო.



— რასაკვირველია, რასაკვირველია, ჰო... — თავი ააქანქარა ქალმა, თან გაოცებით მიაჩერდა ქმარს. — მხოლოდ მე... ბატონო... ჩვენ...

— მხოლოდ თქვენ ეს არ გაგეგებათ! — მიახალა პეტერ მაიცენმა, მაგრამ იმავ წამს კინალამ ენა მოიკვნითა. გაახსენდა, რომ სულ ახლახან ასეთივე სიტყვებით ძალიან ატკინა გული მის ქმარს... — აბა რა სალაპარაკოა! — დაუდევრად ჩაიქნია მან ხელი. — ახლა კი ცოტას გავივლი, ნახვამდის!

— ნახვამდის! — სწრაფად მიუგო გლეხმა. — გზაჯვარედინზე მარჯვნივ გაუხვიეთ, მოკირწყლულ გზას გაჰყევით!

III

პეტერ მაიცენი მხრებში გაიმართა, მთელი მკერდით ამოისუნთქა და ხეივანს გაუყვა. ფეხებს თავისთავად მიჰყავდა იგი და ეს კიდეც ეამებოდა.

„ჰო, სიკვდილი ჯერ შორსაა! — დაცინვით გაიფიქრა მან. — შორსაა, თუმცა კაი ორმოცი წელია მტკიცედ მივაბიჯებ მისკენ“.

მან თავი ასწია და ცას შეხედა. ცა მაღალი იყო და ლურჯი, ხოლო მზე — დიდი და მცხუნვარე, ნამდვილი მზე. მას თავისი ოქროს სხივები ყოველი ფოთლისთვის, ყოველი ბალახის ღეროსა თუ პაწაწინა მტვრიანასათვის მიებჯინა დედამიწაზე და ისე დაეჭიმა ეს სხივები, სპილენძის სიმებივით გუგუნებდნენ.

— მაგარი დღეა, ზარივითაა! — დაასკვნა პეტერ მაიცენმა.

ამ ფრაზამ ყურებში გაუზუზუნა, ეუცხოვა და თანაც ისეთ ნაცნობ ფრაზად ეჩვენა, წუთით შეჩერდა კიდეც.

„ვინ თქვა ეს? ტემნიკარმა! — პეტერ მაიცენი სიხარულმა აიტანა, — ტემნიკარმა! რასაკვირველია, ეს ხომ მისი სიტყვებია!..“

პეტერ მაიცენმა გზა განაგრძო. მაგრამ ახლა მიდიოდა კი არა, მიფრინავდა, თითქოს ფრთები გამოსხმოდა.

გზაჯვარედინზე შეჩერდა: მარჯვნივ გზატკეცილი მიდიოდა, მარცხნივ — შარაგზა. „გზაჯვარედინზე მარჯვნივ გაუხვიეთ, მოკირწყლულ გზას გაჰყევით!“ — მკაფიოდ მოესმა სახლის პატრონის ხმა. მარჯვნივ მოუხვია, მაგრამ მალე კვლავ შეჩერდა.

„იქნებ წყნარ ბარში გამეგლო? წავალ! ჰო, ჰო, იქ წავალ!“

გაიფიქრა და შარაგზაზე გადაუხვია, მაგრამ რამდენიმე ნაბიჯი რომ გადადგა, გულმოსულმა უკან მოიხედა.

„ღმერთმანი, ბავშვივით ვჯიუტობ! — წარბი შეიკრა მან. — რაკი მითხრეს, მარჯვნივ მოუხვიეო, გადავწყვიტე არ დავიჯერო და მარცხნივ მოუხვიეო, რომ წყნარ ბარში ამოვეყო თავი. მაგრამ რაკი ასეა, ჯიბრზე იქით აღარ წავალ!“

პეტერ მაიცენმა შუბლზე ჩამოშლილი ქოჩორი უკან გადაიყარა და მობრუნდა. მაგრამ ის იყო გზატკეცილზე მისი ნალდაკრული ფეხსაცმელები აპაკუნდა, რომ უნებლიეთ შეჩერდა.

„საყვირია! უკრავს!..“ — თავი ასწია და ყური მიუგდო.

დიახ, მართლაც საყვირის ხმა იყო, სადღაც შორიდან მოდიოდა და, თუმცა ძლივს ისმოდა, მაინც გარკვევით ყდერდა.

— საყვირია! — აღმოხდა პეტერ მაიცენს. — დიახ, საყვირია! — გაიმეო-



რა მან და სიხარულით მკერდზე ხელი მიირტყა. — საყვირია! — თქვა ერთ-ხელ კიდევ და გრძელ ხეივანს თვალი გააყოლა, გლეხის სახლ-კარს გახედა. ეტყობა, ქალი ამდგარიყო, ხოლო სახლის პატრონი კვლავ იჯდა, თუმცა ჩაქუჩის ხმა აღარ ისმოდა.

— ახლა ხომ გაიგონე? — ხმამალლა ჰკითხა პეტერ მაიცენმა, თითქოს გლეხი გვერდით ჰყავდა.

ქალი სახლისკენ მიტრიალდა. ცელის მოპირვის ხმა კვლავ გაისმა. ეს ხმა ახლა უფრო ხშირ-ხშირი და ნაწყვეტ-ნაწყვეტი ეჩვენა პეტერ მაიცენს.

— დაჰკა, დაჰკა! მაგრამ ერთი ეს მითხარი, როგორ მოხდა, რომ აქამდე ვერ გაიგონე საყვირის ხმა? რაო, ყრუ ხომ არა ხარ?..

პეტერ მაიცენი ჩაფიქრდა.

„ხმა მარცხნიდან მოდიოდა! წყნარი ბარიდან... რად მითხარი, იქით ნუ გაივლიო? რა ჭაობია იქ ასეთი? ან რა ისეთი ნესტია?“

მან წარბი შეიკრა, მერე კი თავი გაიქნია:

„თუმცა უცნაური აქ არაფერია! თუკი მე ძლივს გავიგონე ეს ხმა, რაღა გასაკვირია, გამოყრუებულ ბერიკაცს გამოჰპარვოდა! ნეტა ეს წყნარი ბარი რაღა არის? ჯანდაბას ეს წყნარი ბარი! არა, ყველაფერი ბუნებრივია, თავად მე მჭირს რაღაც უცნაურობა. რა სულელი ვარ! — პეტერ მაიცენმა ჯოხი აიქნია. — განა სახლიდან იმისთვის გამოვედი, რომ საკუთარ ქვეცნობიერ განცდებს, გულის ამაფორიაქებელ და ბნელ წინათგრძნობას ავყვე? ერთი ამ ხეს, ამ მუხას შეხედე! მზისკენ ისწრაფვის მხოლოდ და სულაც არ ანაღვლებს იდუმალი ტოკვა თავისი ფესვებისა, მარადიულ წყვდიადში რომ ბურღავენ და ბურღავენ გამუდმებით ამ შავ მიწას! ადამიანს შემოქმედების გვირგვინი იმიტომაც ჰქვია, რომ შეცნობილი ჰყავს თავისი თავი, შეცნობილი აქვს თავისი სიცოცხლის გარდუვალი ბოლო, თავისი არსებობის წუთიერობა და წარმავალობა...“

კვლავ ამღერდა საყვირი. პეტერ მაიცენმა დააპირა შეჩერებულიყო, მაგრამ მერე მტკიცედ გადაუხვია მარცხნივ და შარაგზას დაადგა.

მერე ის იყო, მესამედაც გაისმა საყვირის ხმა. ისევ ცნობილი ძველი ხალხური სიმღერის პირველი ორი ფრაზა დაუკრეს.

„საოცარია, რამ დამავიწყა ამ სიმღერის სიტყვები! — მაგრამ ამ ამბავმა აღარ გააბრაზა, მოულოდნელად დამშვიდდა: — ხდება ხოლმე! ნაცნობი, ნაღვლიანი ხალხური სიმღერაა. საყვირის ხმებიც ისე ნელა, ისე ნაზად ირხევა ტყეში, გეგონება, ოხრავს, კვნესისო!“

პეტერ მაიცენმა უნებლიეთ თავი ასწია. ცა იყო ლურჯი და მოწმენდილი, ჰაერი თრთოდა, თითქოს ციდან გამჭვირვალე, მქრქალი რიდე ჩამოშვებულიყო.

— ეს საყვირის ხმა კი არა, ხვატია! — გაიცინა მან და წინ გააბიჯა, მაგრამ ქვაზე წაიბორძიკა და კინაღამ არ დაეცა. — რა სისულელეებს ვროშავ! მაგრამ მაინც უცნაური ამბავია! საყვირი ნაღვლიანად, სევდიანად, მწუხარედაც კი უღერს, მე კი აღარ მალეღვებს.

იგი წუთით ჩაფიქრდა და მხრები აიჩეჩა. ცოტა მოგვიანებით, რაღაც სამიოდე საათის შემდეგ მას შერცხვება თავისი გულგრილობისა. მაგრამ იმ წუთას ძალიან მშვიდად იყო. შემოქმედების სიხარულმა კვლავ გაიღვიძა მასში, ამიტომაც ეჩვენებოდა ყველაფერი ასე მშვენიერი, საყვირის ხმაც ეამებოდა, თუმცა სევდიანი იყო.



შარაგზა ტყეში შედიოდა. ტანმაღალ, მოშავო-მოყავისფრო ფიჭვებში მზის ოქროსფერი სვეტი თრთოდა. გუნდ-გუნდად რიალებდნენ მუმლები, გუ-გუნებდნენ ბრუცები. შავმა ხოჭომაც ჩაიქროლა, სიფრიფანა, გამჭვირვალე ფრთების ნარნარი რხევით დინჯად შემოუარა ხეებს, მზის სხივებში მიიკვლევდა გზას.

„ნეტავი ამას!.. თუმცა ამ წუთს შესანატრი მეც არავისი მაქვს, — გაიფიქრა პეტერ მაიცენმა. — რაც მართალია, მართალია!“ მან ჯოხი მიართყა ხის ტანს, მერე ჯოხი ხელში შუბივით დაიჭირა, კვლავ გაიმართა მხრებში და ის იყო ჩვეულებისამებრ ინგლისური სიმღერის დასასტვენად ტუჩები მოამზადა, რომ უცებ იქვე, ორმოცდაათიოდე ნაბიჯზე, თავის წინ ვიღაც უცნობი ქალიშვილი დაინახა.

„საიდან გაჩნდა აქ?“ — პეტერ მაიცენმა უნებლიეთ ნაბიჯი შეანელა. ყმაწვილი ქალი თითქოს მიწიდან ამომძვრალიყო, ანდა ციდან ჩამოვარდნილიყო.

მაღალი, ტანსრული გოგო იყო, მაგრამ ძალზე მოხდენილი. მწვანე ქვედა კაბა და უსახელო შავი ზედაწელი ეცვა. თავზე ვიწრო თეთრი ტომარა წამოეკოკოლავებინა დაგვერდებულად. ქალი მზის სხივების სვეტში შევიდა და ტომარასაც უცებ შუქი მიაღგა. რაღაცნაირი ფართოფართლიანი ჩინური ჩალის ქუდი ეხურა. გოგო ფეხშიშველი იყო. აშოლტილ ფეხებს ისე მოქნილად ადგამდა, თითქოს შიგ უჩინარი ზამბარები ჰქონოდა. ყმაწვილი ქალი მიდიოდა კი არა, მიცურავდა. ისეთი ენით აუწერელი მოხდენილობა ეტყობოდა, ისეთი ახალგაზრდა, ჯანსაღი, სისხლსავსე, მშვენიერი არსება ჩანდა, როგორსაც ზოგჯერ შექმნის ხოლმე ბუნება იდეალური სილამაზის ნიმუშად და თავისი ოსტატობის დასამტკიცებლად.

პეტერ მაიცენს გაახსენდა „კაზაკების“ მარიანკა, „წყნარი დონის“ აქსინია, საკუთარი წარმოსახვით შექმნილი ტილჩკა.

„ჰო, ასეთი უნდა ყოფილიყო ტილჩკა. ასე ცეკვა-ცეკვით, თავზე ტომარა შემოდებული ბრუნდებოდა იგი წისქვილიდან რეიჩევის ტყით. ტემნიკარი კი უხმოდ მოსდევდა უკან. ქალი რომ მოსახვევში გაუჩინარდებოდა, ტემნიკარი სულსწრაფად მყის წამოეწეოდა და მაშინვე გულში ჩაიკრავდა!..“

ქალიშვილი მოსახვევში გაუჩინარდა. პეტერ მაიცენი ფეხის წვერებზე შედგა, ერთი ვნახო, საით მიეფარაო თვალს.

მოსახვევთან რომ მივიდა, ადგილზე გახევდა. ყმაწვილი ქალი ათიოდე ნაბიჯზე იდგა მისგან. ქალმა ტომარას თეთრი მკლავები შემოავლო, ნელა ჩამოიღო და კუნძზე დადო. მერე თავსაფარი შეიხსნა და თავი გაიქნია. ქერა თმა ზურგსა და მხრებზე ჩამოეყარა. ქალმა მოიხედა. ირგვლივ სულ ფიჭვნარი იყო, მხოლოდ ქვემოთ, გზის პირზე აღმართულიყო ტანმაღალი ნეკერჩხალი. ეს იყო ლამაზი და ნათელი ხე, ამ ქალიშვილივით ლამაზი და ნათელი. ქალი ნელა მივიდა ხესთან და ტოტებს შეაცქერდა. მოვერცხლისფერო-მომწვანო ფოთლები ჩაშავებულ ფიჭვებში ცახცახებდა. ქალმა ალერსიანად გადაუსვა ხელი ნაცრისფერ ტანს ხისას, მოეხვია და მთელი სხეულით მიეკრო.

ლამაზი სურათი იყო და გასაგებიც, თუმცა რატომღაც მძიმე და უსიამო. ირგვლივ ყოველი გაუგებარი სევდიოთა და მარტოობის დამთრგუნველი გრძნობით იყო სავსე.

„ყოველ კაცს აქვს უფლება მარტო დარჩეს!“ — გაჰკიცხა თავი პეტერ მაიცენმა და სურათს თვალი აარიდა. მან ჯიბიდან სიგარეტი ამოიღო, მაგრამ



არ მოუკიდა, ვაითუ დამინახოსო. ჰოდა, მანამდე სრისა და სრისა სანამ დაჭყლეთილი ჰილზი არ შერჩა ხელთ.

ქალიშვილი მეორე მოსახვევში გაუჩინარდა. მაშინ პეტერ მაიცენი ნელა მივიდა ნეკერხალთან. ეს მართლაც მშვენიერი ხე იყო, სწორი, ტანკენარი. ეს კია, მალლა, მიწიდან ორიოდ მეტრზე ძველი, უკვე მოშუშებული ჭრილობა მოუჩანდა. ქერქზე ოდესღაც ვილაცას რაღაც ამოეჭრა. პეტერ მაიცენმა თვალები დაძაბა და ძლივს გაარჩია:

*

24

XII

43

„24. XII. 43!.. თორმეტი წლის წინათ. შობის წინადღეს. სწორედ იმ საღამოს, როცა ტემნიკარი თავის უკანასკნელ გზას დაადგა... საოცარი დამთხვევაა!.. რა მოხდა ნეტა აქ? ამ გოგოსაც ეხება ეს? უნდა დავეწიო და ვკითხო“.

მან ფეხს აუჩქარა, მაგრამ იმავ წამს გაიფიქრა, ახლა რომ ვკითხო, ლამაზი არ იქნებაო.

„სხვა დროს იყოს, სხვა დროს!..“ — გადაწყვიტა პეტერ მაიცენმა და ნაბიჯი შეანელა.

მალე წინ ხეობა გადაეშალა, დაახლოებით ერთი კილომეტრის სიგრძისა და ნახევარი კილომეტრის სიგანისა. მყუდრო, ამწვანებული, თვალწარმტაცი ხეობა იყო, მსგავსი მართლაც იშვიათად თუ შეგხვდება, ისეთი ლამაზი, რომ პეტერ მაიცენს ყმაწვილი ქალი გადაავიწყდა.

„ლამაზია! ღმერთმანი, ლამაზია!.. ეს არის ნამდვილად ის წყნარი ბარი!.. კი, კი... ჰოდა, თუ წყნარი ბარი ეს არის, შავი ხევიც აქვე იქნება. გზაც მშრალია... ჭაობიც არსად ჩანს... მაგრამ რად მითხრა იმ კაცმა, იქ არ წახვიდეთ? კარგი, გავანებოთ თავი ამ მოურჯულებელ ახირებულ ადამიანს! წინ წასვლა უნდა ვიჩქარო, რომ თავისი ცელი ველარ მომიწვდინოს!“

გზა მარცხენა ფერდობის ძირს მიჰყვებოდა. ქვემოთ მდინარე მიიკლაკნებოდა. წყალი შიგ ნელა, უხმაუროდ მიედინებოდა. მეორე მხარეს მდელი გაშლილიყო, მწვანე ხავერდის სწორი უნაპირო საბანი რომ ეფარა.

ფერდობი ოღროჩოღრო იყო და დამრეცი. შუა ფერდობზე ვეება მუხა იდგა. მას მისდევდა ოთხი განიერი ზოლი აყვავებული წიწიბურასი, ისე უშფოთველად რომ ასხივებდა ვარდისფერს, ვით ზამთარში მოსალამოებულზე ააბზინებს ხოლმე მზის მშვიდი სხივები დათოვლილ ფერდობს.

— ასეა! — თავი დააქნია პეტერ მაიცენმა. — წიწიბურას ზემოთ ალბათ მდელი იქნება, მდელიზე კი — ეული ხუტორი.

მარჯვენა ფერდობი უფრო ციცაბო იყო. მთის წვერომდე მოგრძო ზოლებად მისდევდა ზვარი. წვეროზე ხეთა კორომი მოჩანდა, მათ უკან — ჩაშავებული ჩალის სახურავები.

„მარნებია“, — მიხვდა პეტერ მაიცენი. შუა ფერდობზე სახლი იდგა, ისეთი კოხტა და მყუდრო, პეტერ მაიცენმა მზერა ვერ მოსწყვიტა. ახლად შეთეთრებულ სახლს სახურავის ჩალა ჩამუჭებოდა, კარი შავი იყო, ორი შავი მოგრძო სარკმელი კი წყვილ დახუჭულ თვალს მიაგავდა.

„გეგონება, ქერათმიანი, შავთვალა გოგოს კოხტა თავია, ცხელ დღეს რომ ჩაუთვლემია, ერთი დაძახება და — წამსვე გაიღვიძებს...“

სახლის წინ მდებარე ხასხასებდა მწვანედ. შუა მდებარე ეულ ხეს გადაეშალა ხშირი, მუქ-მწვანე წვრილ-წვრილი ფოთლები.

„ბებერი მსხლის ხეა“.

ქოჩორა ტოტებში რაღაც ბრწყინავდა და ირხეოდა.

„ჰო, რასაკვირველია! ჭრიალა ტრიალებს, მხოლოდ ჩიტები აღარ უფრთხიან“.

პეტერ მაიცენმა ფერდობი აიარა და შეჩერდა. იქით გზა მთისკენ მიდიოდა. მთელ გზაზე ნორჩი ხეები ხვდებოდა. პეტერ მაიცენმა შარაგზას ხელი დაუქნია გამოთხოვების ნიშნად და მდინარის პირს გაჰყვა. ფეხს მსუბუქად და მოქნილად ადგამდა, სწრაფად მიდიოდა ბილიკზე. იგი ხშირ ბალახებში ძლივას მოჩანდა.

მერე სამ ბებერ მოკაკულ ტირიფს გადაეყარა, თავზე კალათაშემოდებულ ტანმორჩილ გლეხის დედაკაცებს რომ ჰგავდნენ.

პეტერ მაიცენმა ჯოხი აიქნია, ტირიფები უკან მოიტოვა და მალე ფართო თხრილის პირას გავიდა.

„აჰა! აი ისიც. ჩრნილოგარის ჭაობი, ნესტიც არის... მაგრამ საშიში არაფერია!“

პეტერ მაიცენმა უკან დაიხია, გამოექანა, თხრილს გადაახტა და მხიარულად განაგრძო გზა. თავადაც არ იცოდა, როდის წამოიწყო თავისი საყვარელი ინგლისური სიმღერის სტვენა.

მალე ღრმა მორევი გადაეღობა წინ. შიგ სუფთა მომწვანო წყალი იდგა. საოცრად ტანმალალი, ტოტებგაშლილი რცხილა ჩრდილს აფენდა მორევს. რცხილას ისეთი სქელი ტანი ჰქონდა, ორი ზორბა მამაკაცი ძლივს შემოაწვდენდა ხელებს. ისეთი დაკორძილი იყო, თითქოს საზღვაო ბაგირებისაგან დაეწნათ. ხის ტანზე ვილაცას ოთხკუთხედი ამოელრუტნა, კიდებზე უკვე შეხორცებულ იყო იარა. ამონალრუტნში ძველი, დაბზარული მაიოლიკის ჭურჭელი მოჩანდა, შიგ თეთრი ზიზილებისა და რაღაც მოლურჯო-მოცისფრო ყვავილების თაიგული იდო. პეტერ მაიცენმა არ იცოდა, რა ერქვა ამ ყვავილებს.

რცხილის ძირში სარეცხის გასარეცხად ორ ფეხზე შემდგარი დიდი წანწალები იდგა, ეტყობოდა, დიდი ხანია გამოეთალათ მთლიანი ხისაგან. ისეთი სრიალა, თეთრი წანწალები იყო, ჩრდილში ისე ბზინავდა, თითქოს ეს მზე მათთვის ანათებდა, თანაც ისეთი ნათელი და კრიალა, ვით სოფლელი გოგოს კისკისი.

— აჰა! აქ ქალიშვილები სარეცხს რეცხავენ, — თქვა პეტერ მაიცენმა. — ხოლო მთვარის შუქზე — ვილები! საქმიანობენ. დაბურულ რცხილის ტოტებში ჭაბუკი პანები იმალებიან — ბრაზობენ, გული ასე ძალუმად რად გვიცემსო, თავიანთ სუნთქვას ვერ ეწყობიან, ასე სტვენით რად აღმოგვხდება ხოლმე, თითქოს პირითა და ცხვირით ერთსა და იმავე ღროს ვსუნთქავთო. ხოლო გვიან ღამით, შუალამისას...

„შესდექ! — უბრძანა პეტერ მაიცენს შინაგანმა ხმამ. — განა ვერ ამჩნევ, რომ სწორედ ასევე იყო სკოპიჩნიკზეც, სადაც სარეცხავად დადიოდნენ ტემ-

¹ სამხრეთსლავური ფოლკლორის ზღაპრული არსებანი.



ნიკარელი ქალები? მხოლოდ იქ რცხილა კი არა, ბებერზე ბებერი სმობოლო-
ლება ანწლი იდგა. მის ძირშიაც იდგა წანწალა, ზუსტად ასეთი. ამ წანწალას
ჩაუვლის სწორედ ტემნიკარი“.

— დიახ, დიახ! იქ ჩაივლის! იქ უნდა ჩაიაროს, რომ მალნოვის მთა გა-
დაიაროს და რობში მივიდეს! — თქვა პეტერ მაიცენმა.

და დაინახა კიდევ ტემნიკარი.

ტემნიკარმა თოვლი დაბეკნა და მორვეისგან რამდენიმე ნაბიჯზე
დადგა. თოვლს დაეფარა ყოველი. ირგვლივ სიჩუმე იდგა. სკობინიკი
ყინვას შეეკრა, წანწალაც შიგ ჩაეყინა. მხოლოდ ყინულის ქვეშ წყნა-
რად ლიკლიკებდა წყალი.

ტემნიკარმა თვალეზზე ხელისგული აიფარა — გაქრა თოვლიც, ყინ-
ვაც, თავადაც ოცდახუთი წლის ახალგაზრდაა ახლა. გაზაფხული წკრია-
ლებს ირგვლივ, კაშკაშებს მზე. ტილჩკა შავი ანწლის ქვეშ დგას, მისი
თეთრი ხელები ჰაერში დაცურავს და სველ თეთრ ზეწარს თეთრ წან-
წალაზე ატყლაშუნებს.

ტემნიკარს მოუნდა ფეხაკრეფით მიპარვოდა ქალს, მაგრამ ადგილი-
დან არ დაძრულა, თავის თავზე ბრაზობდა.

„ეს რა უბედურებაა! ნეტა რად ქშინავენ ხოლმე ჭაბუკები სამჭედ-
ლოს საბერველივით კაი გოგოს დანახვაზე?“

ტუჩი მოიკვნიტა და წინ წავიდა. საძაგლად აჭრაჭუნდა კენჭები,
მაგრამ ტილჩკას არ მოუხედავს.

— ვითომ ვერ გაიგონე, სულელო! — სიხარულით შესძახა ტემნი-
კარმა, წინ გაიჭრა და ყმაწვილ ქალს წელზე მოხვია ხელი.

ვაიმეო, შესძახა ტილჩკამ, თუმცა არცთუ ისე ხმამაღლა, ახლად
მოიხედა და სველი ზეწარი სახეზე გადაუჭირა ჭაბუკს. მაგრამ მან უკვე
მოასწრო ქალის უბეში ხელის ჩაყოფა. ჩუხჩუხა ჩანჩქერივით დაეღრჭვა
თავზე ჭაბუკს გოგოს კისკისი.

— აჰ, შე ნადირო, ისევ გინდა დამაწყვიტო ლილები? ვერ მო-
გართვეს!

ტემნიკარმა მხრებში წაავლო ქალს ხელი და უკან დაახევინა, რომ
მისი მშვენებით დამტკბარიყო.

— ნუ სულელობ, ერნეი! — უთხრა ტილჩკამ და სველი ხელები კი-
სერზე შემოაჭდო. თითქოს მდუღარე გადაესხა ჭაბუკს.

— ტილჩკა...

ჰოდა, აი ისინი უკვე შავი ანწლის ძირას წვანან. ტემნიკარი ხმას არ
იღებს, ტილჩკა კი იცინის:

— ოჰ, ერნეი! ჩემო ნადირო! ერნეი, ერნეი! ჩემო, ჩემო! ჩემო! —
მეტი აღარაფერი თქმულა. ოღონდაც ტილჩკას ცრემლით გაბრწყინე-
ბულ ლურჯ თვალეზში მხიარულად მიცურავდა თეთრი ღრუბელი...

ტემნიკარი ნელა გადაბრუნდა ზურგზე და ის ღრუბელი მოიძია ცა-
ზე, მერე მიწის ფეთქვას მიუგდო ყური, მის გულისცემას რომ ეხმაურე-
ბოდა.

— ტილჩკა...



ქალიშვილის თეთრი ხელი გამოცოცხლდა, ფრთხილად დაეხვია ჭაბუკის მკერდზე და იქ ჩიტივით გაინაბა.

ჭაბუკი წყნარად იწვა და ცას შესცქეროდა, სადაც თეთრი ღრუბელი დაფარფატებდა.

— საით მიცურავს?.. რობის მხარეს...

სწორედ ამ დროს გაისმა საყვირის ხმა...

ტემნიკარი შეკრთა — ირგვლივ თოვლს დაუფარავს ყოველივე, სკოპინიკი ყინვას შეუკრავს, წანწალაც შიგ ჩაყინულა, თავად კი სამოცდაათი წლისაა.

— რაღას უდგებხარ? რა ოცნებებს აუტანიხარ? იჩქარე, რომ იმ ქაჯებმა არ მიგასწრონ! — უბრძანა თავის თავს, დათოვლილ ბილიკზე გააბიჯა და შავ ანწლს ჩაუარა. მაშინვე კვლავ გაისმა საყვირის ხმა...

პეტერ მაიცენი შეკრთა, თვალეზი გაუგანივრდა. საყვირის ხმა თანდათანობით მიწყდა. პეტერ მაიცენს ცივმა ოფლმა დაასხა, ისე გაქვავდა, თითქოს ყინვას შეებოჭოს. კვლავ საყვირის ხმას ელოდებოდა, მაგრამ არ გაუმართლდა ლოდინი.

„რა არის ეს? ტემნიკარის საყვირია?.. ჰო, მაგრამ ჩემს მოთხრობაში რომ საყვირი არ ყოფილა!..“

პეტერ მაიცენმა ყური მიუგდო.

სიჩუმეა... სიჩუმე და სიწყნარე...

„ეჰ, სულ ერთი არაა, არის თუ არ არის საყვირი! — ჩაიქნია მან ხელი. — ბოლოს და ბოლოს ხომ შეიძლებოდა ტემნიკარს ჰქონოდა იგი. მართალია, ეს ცოტა არ იყოს არაბუნებრივად მოეჩვენება კაცს, იმ დროს საყვირები არ იყო. მაგრამ... დაე, ჩაჰბეროს!.. დაე, დაუკრას საყვირი თუნდაც ჩემს ფიქრებში. მე ხომ იგი მოქმედებაში არ ჩამირთავს. არ ჩამირთავს, რადგან არ დამჭირვებია. ახლა კი, რობის გზაზე, საითაც ტემნიკარი მიიჩქარის, რაღაცამ უნდა შეაფუცხუნოს, რომ არ შეჩერდეს, დიდხანს არ გადაჰყვეს მოგონებებსა და სამშობლოსთან გამოთხოვებას... საყვირის ხმა — მოვალეობის ანგელოზის ხმაა. სიკვდილის ანგელოზისა, რამეთუ სიკვდილი თავისი არსობით ჩვენი უკანასკნელი და უმაღლესი მოვალეობაა. დიახ, დიახ!“


პეტერ მაიცენმა თავისი სიმღერა დაუსტვინა და გზა განაგრძო. მალე ბილიკი ტყეში დაიკარგა. კვლავ გამოჩნდა მალლა-მალლა ატყორცნილი ფიჭვები, მათ შუა კი მზის სხივის მრუდე ოქროს სვეტები. კვლავ გუნდ-გუნდად რიალებდნენ მუმლები და ბზუოდნენ კრაზანები. ჩაიქროლა შავმა ხოჭომ გამჭვირვალე ფრთებით, ნარნარად მოხაზა წრე და ხეებშუა გაქრა.

ბილიკი მარცხნივ უხვევდა, მოგრძო კორდზე გადადიოდა და მოცვის ბარდებში იკარგებოდა. პეტერ მაიცენი ტოტებგაშლილ წიფლის ძირას ჩამოჯდა და რამდენიმე ცალი მუქლურჯი ნაყოფი მოწყვიტა.

ისევ ამღერდა საყვირი. თითქოს უბრძანესო, წამოხტა პეტერ მაიცენი და სირბილით წავიდა პირდაპირ. მალე უკვე გზაზეც გავიდა. მთის აღმართს რომ მიუყვებოდა.

„ჰო, დაახლოებით ასეთი გზა ადიოდა მალნოვის მთისკენაც. ქვიანი, ციცაბო, თოვლით დაფარული და ტემნიკარიც...“

ტემნიკარი წინ მიუძლოდა პეტერ მაიცენს.



თოვლი ხმინად კრაჭუნობდა ფეხქვეშ.

— კარგები მყავხართ! — აქებდა და ამხნევებდა ტემნიკარი თავის ბებერ ფეხებს, — კარგები! იარეთ წინ, იარეთ, რომ იმ ძაღლთაპირებს გავუსწროთ! მივასწროთ მათ რობში! იქ კი დომინოვის ბილიკის თავზე კლდეებში დავიმალებით. ბილიკი იქ ვიწროა, ქვემოთ უფსკრულია, მაღლა — კლდეები. თუ ჩარევის გამოქვაბულში მისვლა სურთ, იმ ძაღლთაპირებმა ამ ბილიკზე უნდა გაიარონ. ჩვენ კი დაველოდებით მათ და მაშინ ვნახავთ, ვინ გამოეცხადება დღეს იესოს ბეთლემში!..

მან მალნოვის მთის წვეროზე ააღწია. მერე შეჩერდა და მიმოიხედა, უნდოდა თავის თეთრ, მყუდრო ხეობას გამოთხოვებოდა, მის წინ რომ გადაშლილიყო. ეს იყო მხოლოდ, იდრიიცა იკლაკნებოდა შავად ამ თეთრ ვაკეზე და შორიდან მოისმოდა ორთქლმავლის გაბმული კივილი, დანასავით რომ დაესო გულზე ტემნიკარს.

— მთელი ქვეყანა მაქვს მოვლილი და ამაზე ლამაზი ჩემს თვალს არაფერი უხილავს! — ნაღველნარევი სიამაყით თქვა ტემნიკარმა. — მე აქ ვცხოვრობდი... და ალბათ კარგა ხანსაც ვიცხოვრებდი სიხარულით, მაგრამ ისე გამოდის, რომ უნდა... უნდა გავეცალო...

ტემნიკარმა თავი ასწია. კრნის მწვერვალს ზამთრის თეთრი სამოსელი მოესხა და ხეობის სიღრმეში ბრწყინავდა.

— დიახ, ჩემო ძვირფასო კრნი კრნელო, სამოცდაათი წელი ვუყურეთ მე და შენ ერთმანეთს, ახლა კი უკანასკნელად ვუცქერით... მაშ, მაშ! ახლა კიდევ შეგვიძლია ერთმანეთს შევეხმიანოთ, ხვალ კი ვერ ვიქმთ ამას. მივდივარ!

— საით? — ტემნიკარის ხმით იკითხა კრნიმ.

— საით? — გაიმეორა კითხვა მოხუცმა. — სულ ახლოს! აგერ, რობში... იქ კი... რაღა გითხრა! თავად ხედავ, ნაჯახი მიჭირავს... ხოლო ჯიბეში ეს ცეცხლისმფრქვევი ეშმაკი მიდევს! — ტემნიკარმა წარბი შეიკრა და რევოლვერს ხელი მოუჭირა.

— ვხედავ. ვხედავ! — ამოიოხრა კრნიმ.

— რა თქმა უნდა! — თავი დაუქნია ტემნიკარმა. — შენ ხომ ჩემზე უფროსი ხარ და ეს ყველაფერი უკვე გინახავს... ამაზე უარესიც გინახავს!

— კი, მინახავს! — ამოიოხრა კრნიმ. — მხოლოდ იმას ვფიქრობ, რომ თურქების დროიდან არ მინახავს ასეთი სიმამაცე და ასეთი უმსგავსოება.

— მართალს ამბობ, მართალს! — დაეთანხმა ტემნიკარი. — ასეთი უმსგავსია ადამიანი! აბა წარმოიდგინე, სამოცდაათი წლის კაცმა ნაჯახი და რევოლვერი ავიღე ხელში და...

ტემნიკარი გაჩუმდა, რაღაც უხილავმა ძალამ წაუჭირა ყელში. თვალთ დაუბნელდა. კრნი გაიდღლაბნა და ტემნიკარს მოეჩვენა, თითქოს მთა შეშფოთებით შეინძრაო...

— რა არის ეს? — წყენით წაიხრინწინა ტემნიკარმა და თვალეებზე იდაყვი მოისვა. — დავბერდი კაცი, ცრემლი კინალამ მომადგა თვალზე. იცი, შეგეჩვიე... რაო, შე უსინდისო, შენც ინალვლებ განა, რომ ველარ მნახავ?



ზამთრის კრიალა მზით გაჩახჩახებული კრნი მხრებში უნდოდა ტემნიკარისათვის ეთქვა, ძალიან მიყვარხარ და ძალიანაც დაძენანებო, მაგრამ სიტყვის თქმაც ვერ მოასწრო. კვლავ საყვირის ხმა გაისმა.

ტემნიკარი შეკრთა.

— წავალ, რომ იმ ძაღლთაპირებმა არ მიმასწრონ! — თქვა მან, კრნის ხელი დაუქნია და მტკიცედ გაემართა რეიჩევის ბილიკისაკენ...

პეტერ მაიცენი გამოერკვა და ხელისგული თვალეებზე მოისვა.

იგი მთის წვეროზე იდგა. საყვირი ისევ ჟღერდა, ისევ ნაღვლიანი ხალხური სიმღერის დასაწყისს აკვნესებდა. მაგრამ ახლა პეტერ მაიცენი აღარ ბრაზობდა, სიტყვები რად ვერ მომიგონიაო. აღარც ხმა სწვდებოდა ისე ღრმად გულში. ირგვლივ ყოველივე ბუნებრივი და გასაგები გახდა. დიახ, ბუნებრივი და გასაგები გახდა ის ამბავი, რომ ერთმანეთს გადაეხლართა მისი გონებით შექმნილი და მის წინაშე გადაშლილი სამყარო.

ეს სამყარო მშვენიერი იყო. პეტერ მაიცენი გადასცქეროდა ფართოდ გაშლილ ხეობას, ტემნიკარის ხეობაზე ათჯერ მაინც უფრო დიდს. თეთრი ბილიკები ყოველი მიმართულებით სჭრიდა მწვანე მინდორს და ნაშუადღევის მზისგან ხეხილის ჩრდილს შეფარებულ სოფლებს ერთმანეთთან აკავშირებდა. შორს წყნარი კრკის ზოლი ბრწყინავდა, — მდინარე აუჩქარებლად მოედინებოდა, ხშირ ფოთლიანში მოსეირნე კეკლუც ლამაზმანსა ჰგავდა. ხეობის კიდე-კიდე, გორათა თავზე გადმომდგარიყვნენ ციხე-კოშკები, მიუკარებლად, მოღუშულად იყურებოდნენ. ალბათ იმიტომ, რომ ახალთახალი წითელ-წითელი სახურავებით გადახურეს და ამით გული ატკინეს ამ ხნიერ, დარბაისელ არსებებს. მომრგვალო გორაკების თავზე რძით გატიკნილ ძუძუსთავებივით ამართულიყვნენ პატარ-პატარა ეკლესიები, მოწმენდილ ცაში აეტყორცნათ სამრეკლოები და სიხარულის ღიმილით გადაჰყურებდნენ დოლენის მხარეს.


„ლამაზია! თუმცა ჩვენებურად არა, სხვანაირად“, — დაასკვნა პეტერ მაიცენმა და გზა განაგრძო. ახლა იგი გორაკის წვეროზე დაკლაკნილ ტალახიან გზას მიჰყვებოდა. მალე პირველ სახლსაც მიადგა. ხავსმოდებულ ხეების ძირას დიდ გუბურას წააწყდა. წყალი შიგ ჭუჭყიანი იყო, ჯგრო-ჯგროდ დასტრიანებდნენ ბუხები. ბალახებიდან ბაყაყები გუნდად გამოხტნენ და წყალში მოიღეს ტყაპანი. თანდათანობით წრეები გაქრა და მომწვანო ზედაპირზე თეთრი ღრუბელი აკიაფდა.

პეტერ მაიცენს გაუხარდა და თავი ასწია. ღრუბელი სწორედ მის თავზე იდგა. ბატკანივით ხუჭუჭა თეთრი, ქათქათა, მოგრძო ღრუბელი ლაყვარდ ცაზე მიცურავდა...

„აქა ხარ? სწორედ ამ მომწვანო, ჭუჭყიანი გუბურის თავზე?.. ჰო, არა უშავს, შენ ხომ გუბურაში არ გაისვრები, პირიქით — ყველა გუბურას გააკრიალე და დაამშვენებ. გამარჯობა! დღეს ნუ მოშორდები ცას!“

ღრუბელი ოდნავ შეირხა, თითქოს მხრები აიჩეჩა.

პეტერ მაიცენი ჯოხით დაემუქრა და გზა განაგრძო. მალე რაღაც ნაგებობებს წაადგა. აქედან ყველა როდი იყო ღვინის მარანი. ეს იყო დაბა, სადაც ათიოდე ძველი ძელური სახლი იდგა, თუმცა სახლები კი არა. ქოხმახები უფრო ეთქმოდა. ფანჯარაც არ უგავდა ფანჯარას, პატარა სარკმლები ჰქონდა.



შიგ კი მიხაკები, პელარგონიუმები და ფუქსიები ჩანდა. ყველაფერი დროშის-
მული იყო, ყოველივეს სიძველის იერი დაჰკრავდა. პეტერ მაიცენს უნებლიეთ
აღმოხდა:

— ნეტა თუ რაიმე შეიცვალა ამ სოფელში მას შემდეგ, რაც აქ პრიმოჟ
ტრუბარმა¹ გაიარა?

— ყიყლიყო... — გამოეხმაურა საიდანღაც მამალი, მაგრამ სიმღერა ვერ
მოათავა. რომ შემოსცხო და შემოსცხო, უცებ სული შეუგუბდა და ხმა ჩა-
ეწყვიტა.

მერე მძიმე ჯაჭვმა გაიყვარუნა. ქოხის კუთხიდან ბანჯგვლიანმა ძაღლმა
გამოჰყო თავი და დაიწკავეწკავა. იმ მიმჭკნარი მიხაკების, პელარგონიუმებისა
და ფუქსიების ფერი წითელი ენა გადმოეგდო ძაღლს.

— რაო, ძმობილო, ცხელა?

ძაღლს ხმა არ გაუღია — პირი იბრუნა და ისე მედიდურად მიატრიალა
ბანჯგვლიანი თავი, გამოსამშვიდობებლად კუდიც არ დაუქნევია.

ქოხს იქით ნაკელი იყო დახვავებული. გზაზე მისგან მომწვანო, მოშავო
სქელი წუნწუხი დამდგარიყო. შიგ სამი თეთრი იხვი ჭყუმბალაობდა, თუმცა
რადაც მანქანებით იმ მალლა მოცურავე ღრუბელივით მაინც თვალისმომჭრე-
ლად ქათქათანი ჩანდნენ.

— ღმერთმანი, ფრინველები ვართო, თქვენ უნდა თქვათ! — ჩაილაპარა-
კა პეტერ მაიცენმა. — ნეტა რა მადლი გცხიათ ასეთი, რომ ამ წუნწუხიდანაც
ასეთი სუფთები ამოდიხართ!

— მუ-უ-უ... — მოესმა ამ დროს ზურგს უკან..

პეტერ მაიცენმა მიიხედა. ბოსლიდან დიდი ღრუნჩი გამოეყო ძრო-
ხას.

— მუ-უ...

— გამარჯობა, ჭრელავ! — უთხრა პეტერ მაიცენმა და ახლოს მივიდა
ძროხასთან. — რაო, რა გინდა? მოგწყინდა განა? არცთუ ისე ცუდად ცხოვ-
რობ, ჩემო კარგო! დგახარ შენთვის გრილოში და იცოხნები.

— მუ-უ-უ... — დაიზმუვლა ძროხამ და პეტერ მაიცენს ხელზე ჩაოიანი
ენა მოუსვა.

— აბა, ნუ მექლესები, ღმერთმანი, არა მცალია. შუბლი რომ გფხანო,
შინ მიმეჩქარება. სამუშაო მაქვს.

— მუ-უ-უ...

— აბა უყურე, — შეჩერდა უცებ პეტერ მაიცენი, — კინაღამ არ დამა-
ვიწყდა ტემნიკარის ძროხა! — იგი უკან მობრუნდა და კვლავ ჭრელასთან მი-
ვიდა. — მადლობელი ვარ, ჩემო კარგო, რომ ხმა გამე! იცი, ჩემს გმირს, ტემ-
ნიკარსაც, ვისზედაც მოთხრობას ვწერ, ჰყავდა ძროხა. მართალი თუ გინდა,
ძროხები ჰყავდა, მაგრამ ჭრელა ყველაზე მეტად უყვარდა. ძალიან ლამაზი,
წყნარი ძროხა იყო. ერთი უბედურება სჭირდა მხოლოდ — ვერა და ვერ და-
მაკებულიყო. ტემნიკარი უბრაზდებოდა კიდევ, ნაწყენიც იყო, მაგრამ მაინც
ოთხ წელიწადს ება ბოსელში.

— მუ-უ-უ... — შეაწყვეტინა ძროხამ.

¹ პრიმოჟ ტრუბარი (1508—1586) — სლოვენელი განმანათლებელი, მწერალი, სლოვენური-
პროტესტანტიზმის მამამთავარი.

— დაიცა! — უთხრა პეტერ მაიცენმა და მიმოიხედა. გზის იქით ტანმორჩილ იფანს გაეშალა ტოტები. პეტერ მაიცენმა ჯიბიდან დანა იძრო, რამდენიმე ტოტი ჩამოაჭრა და ძროხას გაუწოდა, — აი, ხომ ხედავ!.. მაშასადამე, უკვე გითხარი, ტემნიკარს ლამაზი ძროხა ჰყავდა-მეთქი. და თავისი სიცოცხლის უკანასკნელ დღეს, მანამ რობში წავიდოდა, რათა იმ ძალღატაკებებს შეებოდა, ერთხელ კიდევ მოინახულა თავისი ძროხა. ძალიან უყვარდა ეს პირუტყვი და იმედადაც ჰყავდა. პარტიზანებმა რომ რევოლვერი მიაბარეს, ისიც ჭრელას ბაგაში დამალა. ჰოდა, ამ ცეცხლოვანი ეშმაკის წასაღებად რომ ბოსელში შევიდა, ჭრელას გამოელაპარაკა, შუბლი მოფხანა და უთხრა:

— იცი, ჭრელავ, მივდივარ! ომში მივდივარ! ოღონდ ასე ბრიყვივით ნუ შემომცქერი! მართლაც ომში მივდივარ! არც ვხუმრობ, არც ვჩმახავ რაიმეს და არც ვიკვეხნი...

— მუ-უ-უ... — დაიზმუვლა ჭრელამ.

— ვიცი! — ტემნიკარმა თვალები დახარა. — ოცი წელი ვყვებოდი. რა გმირიც ვიყავი ახალგაზრდობაში და ოცი წელი ვტყუოდი. მერე რად ვტყუოდი? მხოლოდ იმიტომ, როგორმე ხელი გაენძრია ჩემს ვაეს, ხომ იცი, რა ღვთის გლახაცა მყავს. ჰო, მხოლოდ ამიტომ! მერე, შენ გგონია, რაიმეს მივალწიე? არაფერსაც! მე ვყვები, ენას არ ვაჩერებ, იმას კი ჩაუყვია ხელი ჯიბეში, ფაშვს იქეჩავს და სულელივით ხითხითებს!.. ახლაც კი, როცა ყველა იბრძვის, ის შინ ზის და იქეჩება!.. ეჰ, რა ძნელია ვაჟკაცისათვის, როცა ვაჟი ქალაჩუნა გამოუვა! უფრო მეტად კი ის არის ძნელი, როცა იძულებული ხარ მოჩმახული მუშტი-კრივისა და ჩხუბის ამბებით იტრაბახო!.. რას იზამ! ჯერ იყო და ვიფიქრე, იქნებ ცოტა გამოვაფხიზლო-მეთქი, მერე კი ჩვეულებად მექცა, თუმცა დავრწმუნდი, რომ ამოა იყო... ასევე გავაგრძელებდი ალბათ, ეს ძალღატაკები რომ არ გამომჩენოდნენ...

— მუ-უ-უ... — დაიზმუვლა ძროხამ.

— მოვეშვათ ამ ამბავს! — ჩაიქნია ტემნიკარმა ხელი. — იცი, ჩემი ჩხუბის ამბებზე მუდამ საინტერესოდ ვყვებოდი ხოლმე. არათუ ვყვებოდი, ზოგჯერ ცოცხლად წარმოვადგენდი კიდევ. ერთხელ ისე გავცხარდი, რომ დავავლე სკამს ხელი, მინდოდა მეჩვენებინა, როგორ დავამსხვრიე ლამბა — მოვიქნიე ეს სკამი და მართლაც არ დავამსხვრიე!.. რაღა გასაკვირია, თუ სიამოვნებით უგდებდნენ ყურს! ზამთრის საღამოებში ვუზივართ ღუმელს, ყველა მოწყენილია. სწორედ ამ დროს მთხოვენ: „ერთხელ კიდევ გვიამბეთ, მამილო, როგორ იჩხუბეთ პლეშჩში!..“ ეს ჩემი ყველაზე უფრო განთქმული ჩხუბი იყო. მაშინ ტილჩკასთვის შეგვებით, თუმცა იმათთვის არ მითქვამს ეს. იანებ გრეგორჩევმა სიტყვა გადამიკრა, ტილჩკა შუადამისას ფანჯარას აღებსო, და მეც მეტი აღარ მინდოდა: წამოვვარდი, წამოვავლე სკამს ხელი და ვესროლე ლამბას, რომ დაბნელებულიყო იქაურობა. მერე ხელისგულებზე დავიფურთხე და შევუდექი საქმეს — თორმეტი ჭაბუკი მოვისროლე კარში, სხვებს კი დაკეტილი ფანჯრებიდან გადავუძახე. გაგიხარია, ამბავი იყო! როცა ყველაფერი მორჩა და დედაკაცებმა სანთლები მოიტანეს, დავინახე, თითქმის ყველა მინა ჩამელეწა, ყველა მაგიდა დამემტვრია და ექვსიოდე



სკამიც მომერყია, ხოლო ჭურჭელი ლაპარაკადაც არ ღირს. ჰო, ძაან ჩხუბი იყო!..

— მუ-უ... — დაიზმუვლა ძროხამ.

— ოჰ, რასაკვირველია! — ამოიოხრა ტემნიკარმა და თავი ჩაჰკიდა. — თავადაც კარგად ვიცი, რომ პლეშჩში ჩემს დღეში არ ვყოფილვარ და ჩემს სიცოცხლეში ერთხელაც არ მიჩხუბნია! რას იზამ! წლითი-წლობით ისე შევეჩვიე, ხალხი აღმეფრთოვანებინა ჩემი ჩხუბის ამბებით, ზოგჯერ, როცა მომეწყინებოდა ხოლმე, ჩემთვის ვყვებოდი... პირველად, რასაკვირველია, მრცხვენოდა ტყუილების ლაპარაკი, მერე კი... როგორღა უარმეყო საკუთარი ტყუილები? ამას ჯობდა დამეჭერებინა, რომ მართლაც ასე იყო, ზოგჯერ კი თვითონაც მზად ვიყავი დამეფიცა, ყველაფერი მართლაც ასე მოხდა-მეთქი. მერე რად არ უნდა მომხდარიყო ასე? რად არ უნდა დამერტყა? განა მშიშარა ვიყავი? ვინ მოგახსენათ! ღონიერი, კარგი ბიჭი გახლდით. ეს არის, შემთხვევა არ მომცემია ჩხუბისა... მაშ, ახალგაზრდამ შევირთე ცოლი. ჰოდა, წყნარად ვცხოვრობდით მე და ტილჩკა, არც არავის ვეჩხუბებოდით და არც არავის ვედავებოდით. რად უნდა მეჩხუბა? ხოლო ტილჩკა რომ მოკვდა, ჩემი გულიც მას გაჰყვა.

— მუ-უ-უ... — ნადვლიანად შეჰბლავლა ძროხამ.

— ნუ ბლავი, თუ გიყვარდე! — უთხრა ტემნიკარმა და ერთი ილღია გამხმარი სამყურა აიღო. — აჰა, სამყურა ღეჭე, თუმცა ღირსი კი არა ხარ. რას იზამ, რაკი ასეთი დღეა დღეს! — მან ძროხას თბილ კისერზე ხელი მოუცაცუნა და ბაგას მოშორდა. კარიდან კვლავ მოხედა: — იცი, ჭრელავ, ამ ერთხელ კიდევ გეტყვი, უკანასკნელად. ჭკუით იყავ, წინა თვეში არ იყო, რომ გაგიყვანე, ჰოდა, თუ ახლაც არაფერი გამოვიდა, იცოდე, პარტიზანებთან წასვლა მოგიწევს. აგერ მეორე თვეა უკვე დაგპირდი შენს თავს ინტენდანტ ურხს.

— მუ-უ-უ... — პირი მისკენ იბრუნა ძროხამ.

— რას იზამ, ჩემო ძვირფასო! ახლა ასეთი დროა, არავისა აქვს უფლება ბერწად იცხოვროს! — უთხრა ტემნიკარმა და ბოსლიდან გამოვიდა.

— მუ-უ-უ...

ტემნიკარს არ მოუხედავს, ნელა გაიხურა კარი. გულში უხაროდა, ჭრელას წასაყვანად რომ მოვლენ, მე აღარ ვიქნები ამქვეყნადო...

— მუ-უ-უ... — ზმუოდა ძროხა, უკვე მთლად შეეჭამა იფნის ფოთლები.

— დიდი გამრჯე ვინმე ხარ, კაცი ვერაფერს იტყვის! — პეტერ მაიცენმა ძროხას შუბლი მოფხანა. — მადლობელი ვარ, რომ ხმა გამე. ვინ იცის, იქნებ მართლაც არ მომგონებოდა ტემნიკარის ჭრელა...

— მუ-უ-უ...

— მუ-უ-უ... ჰო, ჰო... აბა რა იცი შენ ამ საქმისა? არაფერი! იქნევ კუდს და ზოგჯერ თუ წამოიზმუვლებ, ეს არის და ეს. — პეტერ მაიცენმა გაიციინა და თავი გაიქნია. — ვინ იცის, რას იტყოდნენ ახალი დროის ესთეტები, რომ ენახათ, როგორ გიყვები ჩემი გმირების ამბავს?.. უეჭველად იმას იტყოდნენ,



არაესთეტიკურიაო. აბა რა ვქნა? განა ტემინკარი კი არ ემასლაათებოდა თავის ძროხას? რა თქმა უნდა, ემასლაათებოდა, მაგრამ ის გლეხი იყო და არა მწერალი!.. მერე რა? განა მას სხვანაირად ესმის ცხოვრება?.. რას გვთავაზობენ ეს ახლად მოვლენილი ესთეტიკები? კუდს იქნევენ და დროდადრო გაურკვევლად ზმუიან. ესეც ხდება ხოლმე, რომ ყოველ ახალ კარებს მყის რქებით ეძგერებიან. ასეთ საქციელს კი დახვეწილ ესთეტიკობად ვერ მიიჩნევ. ბოლოს და ბოლოს ეს უფრო ნაკლებ ორიგინალურიც არის, ვიდრე ძროხას ხელოვნებაზე ესაუბრო კაცი.

— მუ-უ-უ... — გაეპასუხა ძროხა.

— ასეა! — თავი დაუქნია პეტერ მაიცენმა. — ახლა კი წავედი! უნდა ვიჩქარო. უკვე ყველაფერი მოვიფიქრე. ყველა მთავარი ეპიზოდი ჩემი თვალთ ვნახე, რობთან შეტაკების გარდა. მაგრამ სანამ იმას დავწერ, ბრძოლის ამბებსაც გავიგებ...

პეტერ მაიცენი გზას გაუდგა. გზა უფრო და უფრო ემსგავსებოდა ჭუჭყიან თხრილს. ბოლოს ისეთი ლაფი გადაეღობა წინ, კიდევ დაფიქრდა, ამ მახეს როგორ დავაღწიო თავიო.

სწორედ ამ წუთს კვლავ გაისმა საყვირის ხმა — ისე ახლოს და ისე ხმამალა, თითქოს სადღაც მალლა უკრავდნენ. პეტერ მაიცენს აღარც ახსოვდა საყვირი და პირველად დაიბნა კიდევაც მის ხმაზე, მერე კი ჩაფიქრდა.

„რაკი ასე ახლო ყოფილა, — გადაწყვიტა, — წავალ და ვნახავ, ვინ უკრავს!“

მან ჯოხი მოიმარჯვა და ლაფით სავსე თხრილიდან ამოხტა.



ისააკ გებელი

მოთხრობები

რუსულიდან

თარგმნა თამაზ კვაჭანტირაძემ

ჩემი სამტრედიის ახვავი

მაქსიმ გორკის

გავშვობისას ძალზე მინდობდა სამტრედე. ამაზე ძლიერი სურვილი ჩემს სიცოცხლეში არაფრისა მქონია. ცხრა წლისას მამა დამპირდა, გალიის და სამი წყვილი მტრედის ფულს მოგცემო. ცხრაას ოთხი წელი იწურებოდა. ნიკოლაევოს გიმნაზიის მოსამზადებელ კლასში გამოცდების ჩასაბარებლად ვემზადებოდი. ჩემი მშობლები ქალაქ ნიკოლაევოში ცხოვრობდნენ, ხერსონის გუბერნიაში. ამჟამად ასეთი გუბერნია აღარც არის, ოდესის რაიონს შეუერთეს.

ცხრა წლისა ვიყავი — გამოცდების მეშინოდა. არითმეტიკასა და რუსულში — ორთავეში ხუთზე ნაკლები არ უნდა მიმელო. ჩვენს გიმნაზიაში ნორმა ძალზე დაბალი იყო — ორმოცი ბიჭიდან ორ ებრაელზე მეტი ვერ მოხვდებოდა მოსამზადებელში. მასწავლებლები მათ

ეშმაკურად უსვამდნენ კითხვებს. ჩვენსავით ჩახლართულად კაცი შვილს არ ეკითხებოდნენ! ამიტომაც მამაჩემი სამტრედის სანაცვლოდ ორ ხუთიანს მოხვდა პლუსით. ჯვარს მაცვა — ძილისა და ღვიძილის სამანი მომერღვა. — გაბურბუსალებული გავედი გამოცდაზე და მაინც სხვებზე უკეთ ვუპასუხე.

ნიჭი მქონდა. მასწავლებლებს რაც არ უნდა ეეშმაკათ, ალესილ ტვინსა და მეხსიერებას ვერ წამართმევდნენ. ნიჭი მქონდა და ორი ხუთიც მივიღე. მაგრამ შემდეგ საქმე შეტრიალდა: ხორბლით მოვაჭრე ხარიტონ ეფრუსიმ თავისი შვილის მისაღებად ხუთასი მანეთი ქრთამი გაიღო, ხუთის ნაცვლად ხუთი მინუსით დამიწერეს და ჩემს ადგილზე პატარა ეფრუსი ჩარიცხეს. მამაჩემი ჯავრისგან ლამის გათავდა. ექვსი წლიდან მოყოლებული თავი გამომილაყა ყო-

ველგვარი მეცნიერებით. ამ მინუსმა კაცი შეშალა. ჯერ თავად მოინდომა ეფრუსის გალახვა, მერე ორი მტვირთავის დაქირავება გადაწყვიტა მის დასაბეთქად, მაგრამ დედაჩემმა განზრახულზე ხელი ააღებინა და მეც კვლავ ჩავუჯექი წიგნებს საგაისოდ, უკვე პირველი კლასის გამოცდებისათვის. ჩემგან ფარულად მშობლებმა მასწავლებელი შეაგულიანეს, ბარელამ პირველი კლასის პროგრამაც ამეცადინეო და, ვინაიდან იმედგადაწურულები ვიყავით, მე სამი წიგნი გავზუთხე: სმირნოვსკის გრამატიკა, ევტუშევსკის მაგალითების კრებული და პუციკოვიჩის რუსეთის ისტორიის სახელმძღვანელო. ახლა ბავშვები ამ წიგნებით აღარ სწავლობენ, მე კი სამივე წიგნი თავიდან ბოლომდე დავიზებირე და საგაისოდ მასწავლებელმა კარავაევმა რუსულ ენაში ნანატრი ხუთი პლუსით დამიწერა.

ეს კარავაევი — ოცდაათ წელს მიტანებული მოსკოველი ნასტუდენტარი — ცოტას წაიფხუკიანებდა. უინჟლილა კაცი იყო — გლეხის ბიჭივით ლოყებდაბრაწულს, ლაწვისთავზე მეჭეჭი აჯდა, საიდანაც კატის ქისონი ბეწვი ამოზრდოდა. გამოცდებს ოლქის მზრუნველის თანაშემწე პიატნიცკიც ესწრებოდა; ის კი გიმნაზიაში და მთელ გუბერნიაშიც დიდ კაცად ითვლებოდა. მზრუნველის თანაშემწე პეტრე დიდზე შემეკითხა — მე გონი წამერთვა, ვიგრძენი, რომ ახლა გადაწყდებოდა ჩემი ბედი და აღტაცებისა და თავდავიწყების უფსკრულში გადავეშვი.

პეტრე დიდზე პუციკოვიჩის წიგნის გარდა პუშკინის ლექსებიც ვიცოდი ზეპირად. ეს ლექსები ყელში ამომასკდა, აღამიანთა სახეები

თვლებში დამიყირავდა და ისე ამეჭრა, ვითარცა ბანქო ახლადგახსნილი დასტიდან. ისინი დიდხანს რიალებდნენ ჩემს თვალთა ფსკერზე, ამასობაში კი მე — აკანკალებული, გაწვართული — მთელი ხმით გავყვიროდი პუშკინის სტრიქონებს. დიდხანს ვიხრიწინე, არავის შეუწყვეტინებია ეს ჩემი უგონო ლაღადისი. წითლად დაბრმავებული, საღლაც აფრენილი — მე მხოლოდ ჩემკენ გადმოხრილი პიატნიცკის ბებერ სახესა და შევერცხლილ წვერს ვამჩნევდი. მან ბოლომდე ჩამათავებინა და კარავაევს გადაულაპარაკა — ჩემითა და პუშკინით აღტაცებულს:

— რა ხალხია! — აღმოხდა მოხუცს, — ამ თქვენს ურიკელებს ტვინში ეშმაკი უზით.

შემდეგ მე მომიბრუნდა:

— კეთილი, წადი, ჩემო კარგო...

კლასიდან დერეფანში გამოვედი, შეთეთრებულ კედელს მივეყრდენ და ჩემი მტანჯველი სიზმრებიდან ნელინელ გამოვერკვიე. ირგვლივ რუსის ბიჭები თამაშობდნენ, გიმნაზიის ზარი სულ ახლოს ეკიდა კიბის თავზე, დარაჯი ჩაჭყლეთილ სკამზე თვლემდა. დარაჯს ვუყურებდი და თანდათან ვიღვიძებდი. გარს ბავშვები შემომადგნენ, შეღიტინება უნდოდათ, ან იქნებ ჩემთან გათამაშებაც, მაგრამ ამ დროს დერეფანში პიატნიცკი გამოჩნდა: გვერდზე ჩამიარა და ანაზდად შეყოვნდა, მის ზურგზე სერთუკმა ეჭვის ტალღებად გადაიარა. ამ ფართო, ხორციან, ბატონკაცურ ზურგს შეშფოთება დავატყვე და მოხუცისკენ წავიწიე.

— ბავშვებო, — უთხრა მან გიმნაზიელებს, — ამ ბიჭს ნუ აწყენინებთ, — და მხარზე მსუქანი, ნაზი ხელი ჩამომადო, — ჩემო კარგო,




მამაშენს გადაეცი, რომ პირველ კლასში მიგიღეს.

მკერდზე ვარსკვლავი აუბრწყვი-
ალდა, ორდენებმა ლაცკანზე გა-
ირაწკუნეს, მოუღუნავმა ფეხებმა
თან წარიტანეს შავ მუნდირში გა-
მოხვეული მისი ვეება ტანი. ამ
სხეულმა ბნელი ვიწრო დერეფა-
ნი ისე გაიარა, როგორც კარჭაპმა
ღრმა არხი და დირექტორის კაბინეტ-
ში გაუჩინარდა. ტანმორჩილმა მოსამ-
სახურემ ფართიფურთით შეურბე-
ნინა ჩაი და მეც შინისაკენ მოგკურ-
ცხლე.

ჩვენს დუქანში მუშტარი იჯდა,
გლებკაცი და, შეჭოჭმანებული, ქე-
ჩოს იქექდა. დამინახა თუ არა, მა-
მამ იგი მიატოვა და ჩემი მონათხრო-
ბი წამსვე ირწმუნა. აფოფინებულმა
ნოქარს გასძახა, დახლს მიხედეო,
და გიმნაზიელის ქუდის საყიდლად
გავარდა. საცოდავმა დედაჩემმა
ძლივს გამომგლიჯა ხელიდან ამ გა-
ღარეულ კაცს. დედას მიტკლის ფე-
რი ედო და ჩემს თვალებში თავის
ბედისწერას კითხულობდა. იგი თავზე
ხელს მითათუნებდა, თან გულშემოყ-
რილი პირს მარიდებდა. დედამ თქვა,
რომ ჩარიცხულთა სიები გაზეთში იქ-
ნება და უფალი დაგვსჯის და ხალხის
სასაცილოც შევიქნებით, თუ გიმნაზ-
იელის ქუდს წინასწარ ვიყიდითო.
დედაჩემს მიტკლის ფერი ედო, იგი
ჩემს თვალებში თავის ბედისწერას
კითხულობდა და მწარე სიბრალუ-
ლით მომჩერებოდა, — მომჩერებო-
და, როგორც პატარა ხეიბარს, ვინაი-
დან მხოლოდ მან იცოდა, რაოდენ
სვეგამწარებული იყო ჩვენი ოჯახი.

ჩვენი გვარის ყველა მამაკაცი
მიმნდობი იყო ადამიანთა მიმართ,
წინდაუხედავი და ცუნდრუკა; არა-
ფერში არ გვიმართლებდა! პაპა-
ჩემი ერთ ღრთს რაბინი იყო ბელაია
ცერკოვში; მკრეხელობის გამო იქი-

დან გამოაპანღურეს, რის შემდეგაც
დეე ორმოცი წელი გააჯახირა სილა-
ტაკესა და აყალმაყალში, ქვეყნის
ენები შეისწავლა და მეოთხმოცე
წელს კიდევ ააფრინა. ბიძაჩემი
ლევ ვოლოჟინის ემიბოტში სწავ-
ლობდა, 1892 წელს იდეზერტირა,
გაიქცა და თან კიევის სამხედრო
ოლქის ინტენდანტის ასულიც გაი-
ყოლია. ბიძაჩემმა ეს ქალი კალი-
ფორნიაში წაიყვანა, ლოს-ანჯელოს-
ში, იქ მიაგდო და მურდალ სახლ-
ში მოკვდა, ზანგთა და მალაელ-
თა შორის. ამერიკულმა პოლიციამ
გარდაცვლილის მემკვიდრეობა გად-
მოგვიგზავნა—ყავისფერი რკინით შე-
მოსალტული დიდი ზანდუკი. ზან-
დუკში აღმოჩნდა სავარჯიშო გირები,
ქალის დალალი, ბაბუასეული ტალე-
სი, მოოქროულბუნციანი შოლტები
და ყალბი მარგალიტებით მოოჭვილი
ფერადი ჩაის კოლოფები. მთელი
ოჯახიდან სამნილა დავრჩით: მამა-
ჩემი, ოდესაში მაცხოვრებელი მისი
ღარტყმული ძმა სიმონი და მე. მა-
მაჩემი გულუბრყვილო კაცი იყო,
ადამიანებს სწყინდათ მათდამი გად-
მოდვრილი მისი უმინეზო სიყვარუ-
ლი და სანაცვლოს მოტყუებით
უზღავდნენ. ამიტომ მამას სწამდა,
რომ მის სიცოცხლეს ბოროტი სუ-
ლი განაგებს, რაღაც ამოუხსნელი
არსება, ბედი-მდეგარი; და აი, ერ-
თადერთი მეღა დავრჩი დედაჩემს
მთელი ოჯახიდან. სხვა ებრაელთა
მსგავსად, მეც ჩია ვიყავ, გაჩხინკუ-
ლი და მეცადინეობისაგან თავი მისკ-
დებოდა. ამას ყველაფერს ხედავდა
დედაჩემი, რომელიც ვერ დააბრმავა
თავისი ქმრის მათხოვრულმა სიამა-
ყემ და მისმა ჯიუტმა რწმენამ, რომ
ოდესმე ჩვენი ოჯახი დედამიწის
ზურგზე ყველაზე მდიდარი და ძლი-
ერი შეიქნებოდა. დედა ბედისაგან
სასიკეთოს არაფერს გამოელოდა. მას



ეწინოდა ნაადრევად გიმნაზიელის ტანისამოსის ყიდვისა და მხოლოდ სურათის გადაღების ნება დამართო.

ცხრაას ხუთი წლის ოც სექტემბერს გიმნაზიაში გამოაკრეს პირველ კლასში მიღებულთა სიები. შიგ მეც ვეწერე. მთელი ჩვენი საგვარეულო მოვიდა ამ სიების სანახავად, ბაბუაჩემის ძმა შოილიც კი მოჩანჩურდა გიმნაზიაში. მე მიყვარდა ეს ბაქია ბერიკაცი, ბაზარში რომ თევზით ვაჭრობდა. ქერცლმიკრული ტორები მუდამ სველი ჰქონდა, მათ გრილ, მშვენიერ სამყაროთა სუნი ასდიოდა. შოილი ტყუილების გუდაც გახლდათ: რაღას არ გვიყვებოდა პოლონეთის 1861 წლის ამბოხებაზე. ძველად შოილს სკვირში დუქანი ჰქონია და თავისი თვალით უნახავს, როგორ დახვრიტეს ნიკოლოზ I-ის ჯარისკაცებმა გრაფი გოდლევისკი და სხვა პოლონელი აჯანყებულნი; როგორც შენ გიყურებო—მიმტკიცებდა. ახლა კი ვხვდები, რომ შოილი ერთი უბირი და როხროხა ბერიკაცი იყო, მაგრამ მისი დაღობა დღესაც მახსოვს, სასმენად ღირდა. ჰოდა, შოილიც კი მოჩერჩეტდა გიმნაზიაში ჩემი გვარის ამოსაკითხად და საღამოს, ჩვენს მათხოვრულ ნადიმზე მაგრად მოუღებინა, იცეკვა და იბუქნავა.

მამაჩემმა გახარებულ გულზე ქვიფი გამართა და თავისი ამხანაგები—ხორბლით მოვაჭრენი, მაკლერები და ჩვენს ოლქში სამეურნეო მანქანების ვოიაჟერები მოიწვია. ეს ვოიაჟერები უბედური შემსაღებლები იყვნენ საქონლისა, ამიტომ გლეხები და მემამულეები მათ სათოფეზე არ იკარებდნენ. ებრაელთა შორის ისინი ყველაზე უფრო ნათრევი და მხიარული ხალხია. ჩვენს სუფრაზე ვოიაჟერებმა ხასიღური სამსიტყვიანი სიმღერა გააბეს და დაუსრულებ-

ლად აკრიმანჭულებდნენ. იმ დროს მისი ეშხს მხოლოდ ის იგრობობს, ვინც ხასიღებთან ერთად შეჰყარია პასექს, ანდა ვოლინში ყოფილა მათ მოყაყანე სინაგოგებში. ვოიაჟერებს გარდა მოხუცი ლიბერმანიც გვეწვია, იგი თორასა და ძველებრაულს მასწავლიდა. მას მოსიე ლიბერმანს ვეძახდით. მოხუცს ბესარაბიული ღვინო ცოტა ზედმეტი მოუვიდა, წითელი ყილეტი შეიხსნა და ჩემს საპატივცემულოდ ძველებრაულად სადღეგრძელო სჭექა. მოხუცმა მიულოცა ჩემს მშობლებს და თქვა, რომ მე დავამარცხე ჩემი მტრები, მე დავამარცხე ლოყებთანთალა რუსი ბიჭები და ჩვენი ბლენძია მდიდრების შვილები. ვითარცა გარდასულ ჟამს დავით, მეფემან იუდეველთა, გოლიათს სძლია და ვითარცა მე აღვზევდი გოლიათსა ზედა, ესე ვრი ჩვენი სძლევს თავისი გონების ძალით გარსშემოჯარულ მტრებს, ჩვენი სისხლი რომ სწყურიათ. ამის თქმა და მოსიე ლიბერმანს ტვითინი წასკდა, გული ამოუჯდა, ერთიც გადაჰკრა და შესძახა: „ვივატ!“ სტუმრებმა იგი წრეში ჩაიყენეს და, თითქოსდა ებრაული ქორწილიაო, ძველებური კადრილი გააჩაღეს. იმ დამით ყველამ მოუღებინა, დედაჩემმაც კი მოწრუბა ღვინო, თუმცაღა სასმელი არ უყვარდა და ამოუცნობ გამოცანად ესახებოდა, რამ უნდა ასვას კაცს არაყი. ამიტომაც იგი ყველა რუსს შეშლილად მიიჩნევდა და ვერ წარმოედგინა, როგორ უნდა ეცხოვრა ქალს რუს მამაკაცთან.

მაგრამ ნამდვილად ბედნიერი დრო უფრო გვიან დაგვიდგა: დედაჩემისთვის ეს დღეები მაშინ დაიწყო, როდესაც გიმნაზიაში წასვლის წინ დილით ბუტერბროდებს მიმზადებდა, როცა დუქნები დავიარეთ ჩემთვის ზურგჩანთის, საკალმის, პრია-

ლაყდიანი რვეულებისა და წიგნების საყიდლად. ბავშვებსავე ვერავინ გრძნობს ახალი ნივთების ეშხს. მათი სუნი პატარებს ისეთ ყრუოლას ჰგვრის, როგორც მეძებარს — კურდ-ღლის ნაკვალევი, და ის სიგიჟე იპყრობთ, რასაც შემდგომ — ასაკში შესულნი, პოეტურ აღმაფრენას ვეძახით. ეს წმინდა ბავშვური სიხარული ახალი ნივთების შეძენისა დედამისსაც გადაედო. ერთ თვეს ვეჩვეოდით საკალმეს და დილის ბინდებუნდს, როცა უზარმაზარი, გაჩახჩახებული მაგიდის კუთხეში ჩაის ვსვამდი და წიგნებს ზურგჩანთაში ვალაგებდი. ერთ თვეს ვეჩვეოდით ჩვენს ბედნიერებას და მხოლოდ პირველი მეოთხედის ბოლოსდა გამახსენდა მტრედები.

მათთვის ყველაფერი გამზადებული მქონდა — მანეთნახევარი და ყავისფრადშედებილი სამტრედე. სამტრედე პაპა შოილის ნახელავი გახლდათ, თორმეტი წყვილის საყოფი ბუდეები ჰქონდა, პატარ-პატარა თამასები და ერთიც განსაკუთრებული გისოსი სხვისი მტრედების მოსატყუებლად. ყველაფერი გამზადებული მქონდა და ოც ოქტომბერს, კვირადლით, ოხოტნიცკიზეც ვეპირებოდი სავაჭროდ, მაგრამ მოულოდნელი დაბრკოლებები გამომეხირა.

ეს ამბავი, რასაც ვიამბობთ — გიმნაზიის პირველ კლასში ჩემი ჩარიცხვა — ცხრაას ხუთი წლის შემოდგომას მოხდა. ნიკოლოზ მეფემ იმ ხანებში რუს ხალხს კონსტიტუცია უბოძა. ქალაქის საკრებულოს შენობის წინ ტუმბებზე შემხტარი შელანძღულპალტოიანი ორატორები ხალხს რაღაცას ექაქანებოდნენ. ღამ-ღამობით ბათქაბუთქიც ისმოდა და დედაჩემს უკვე აღარც უნდოდა ჩემი გაშვება ოხოტნიცკიზე. ოც ოქტომბერს, დილიდანვე, ბიჭები ზედ

პოლიციის უბნის წინ ქალაღლის ფრანებს უშვებდნენ, ჩვენმა წყლის მზიდავმა ჯეელმა კი თავისი საქმე მიატოვა და გამოპრანჭული, აჭარხალებული დაიწმარნებოდა ქუჩაში; მერმე იყო და, მეფუნთუშე კალისტოვის ბიჭებმა შუა ქუჩაზე ტყავის ხარბა გამოათრიეს და ვარჯიში გაახურეს. კაციშვილს არ დაუშლია, პოლიციელი სემერნიკოვი კიდეც უქებდა ჯომარდობას. სემერნიკოვს შინნაქსოვი შალი შემოერთყა წელზე და ჩექმები ისე უპწკილებდა, როგორც არასდროს. უფორმო პოლიციელმა ხომ სულ დააფეთა დედაჩემი და მტრედებზე აღარც მიშვებდა, მაგრამ უკანა კარიდან მაინც გავიპარე და ოხოტნიცკისკენ მოვუსვი.

მემტრედე ივან ნიკოდიმიჩი იქ თავის ამოჩემებულ ადგილას იჯდა. მტრედებს გარდა იგი კურდღლებსა და ფარშავანგსაც ჰყიდდა. კუდგალაღანებული ფარშავანგი ლატანზე იყლაყვებოდა, ფეხზე თოკი ება, რომლის ბოლო ივან ნიკოდიმიჩის მოწნულ სკამს ჰქონდა მოტანიებული. მისვლისთანავე ვიყიდე ერთი წყვილი ბოლოფაშფაშა მტრედი. ერთიც — ქოჩორა და, ტომსიკაში ჩაყუყულები, უბეში შევიჩინა. ორმოცი კაპიკი მომრჩა, მაგრამ მოხუცი ამ ფასად დედალ-მამალ კაუჭა მტრედებს არ იძლეოდა. ამ მტრედებისა მოკვიტნილი ნისკარტი მიყვარდა, მოკლე და თვინიერი. ორმოცი კაპიკი მათი ნაღდი ფასი იყო, მაგრამ მემტრედე არ მიკლებდა და ჩიტიჭერიას გატყუებულ ვნებით დაკენკილ თავის ყვითელ სახეს მარიდებდა. ბოლოს და ბოლოს, მუშტარი რომ აღარ გამოუჩნდა, ივან ნიკოდიმიჩმა მიმიხმო. საქმე ნანატრით ამეწყო, მაგრამ ვაი ამ აწყობას...



თორმეტი საათი იქნებოდა ან ცოტა მეტი, როცა მოედანი თექის ჩექმეზიანმა კაცმა გადმოჭრა. დასიებული ფეხები მას ჰაერ-ჰაერ მოატარებდნენ, დაშაშრულ პირისახეზე თვალები უელავდა.

— ივან ნიკოდიმიჩ, — ჩაულაპარაკა მემტრედეს, — მობოჭე შენი ავლადიდეზა. ქალაქში ყვევრებს კონსტიტუცია მიაართვეს. ბაბელების ბერიკაცს ისეთი მოაკერეს, ჭირი მოგჭამა...

ეს ჩაილაპარაკა და, ვითარცა ხნულში ჩამდგარი ფეხშიშველა გლეხიკაცი, ლალად გაუყვა თავის გზას.

— ძალიანაც მიუქარავთ, — წაიპუტუნა ივან ნიკოდიმიჩმა, — ძალიანაც მიუქარავთ! — მოხუცმა ხმას აუმაღლა, ფარშავანგს და კურდღლებს ხელი წამოუსვა და ორმოც კაპიკად მომაჩეჩა მტრედები.

ისინიც უბეში ჩავისვი და ხალხისაგან დაცლილი მოედანი მოვათვალიერე. ივან ნიკოდიმიჩის მხარზე ჩამოსკუპებული ფარშავანგი უკვე შორს მიირხეოდა, იგი იჯდა, ვითარცა მზე შემოდგომის ცრემლიან ცაზე, ვითარცა ივლისი ზის მდინარის აღაღანებულ ნაპირას — ბალახის გრძელ, ლორთქო ღეროში შეყონილი თაკარა ივლისი. ბაზარი დაცარიელდა, სულ ახლოს სროლის ხმა გაისმა. სადგურისაკენ მოვკურცხლე — სკვერი თვალებში დამიყირავდა — და ყვითლად დატკეპნილ უკაცრიელ შესახვევში კისრისტეხით შევვარდი. ჩიხის ბოლოს თვლებიან სავარძელში უფეხო მაკარენკო იჯდა — ქუჩა-ქუჩა პაპიროსებით მოვაჭრე. ჩვენი უბნის ბიჭები პაპიროსს მისგან ყიდულობდნენ. ბავშვებს უყვარდათ მაკარენკო და მეც მას მივაშურე.

— მაკარენკო, — გულამოვარდნილმა მხარზე ხელი მოვუთათუნე

ხეიბარს, — შოილი ხომ არ გინახავს?

ხეიბარს არაფერი უპასუხნია, წითელ ქონად და რკინად შეკრულ მის კუმტ პირისახეს აღმური შენთებოდა. იგი მოუსვენრად ცმუკავდა სავარძელში, მისი მოჩლაჩული მეუღლე კატიუმა კი ქუჩაზე დაყრილ ნივთებში იქექებოდა.

— არის რამე? — დაეკითხა უფეხო და სავარძელი მკვეთრად მიატრიალა, თითქოს წინასწარ იგრძნო, რომ ქალის პასუხი გულს შემოჰყრიდა.

— თოთხმეტი ცალი ნიფხავია, — უპასუხა წაკუზულმა, — ექვსიც ბალიშისპირი. ახლა თავსაფრებს ვითვლი.

— თავსაფრები! — ამოიკვნესა მაკარენკომ, გაიგუდა და წკმუტუნა ბგერები ამოუშვა. — ჩემი იღბალი დაიწვას, კატერინა, ჩემი... თავსაფრები კი არა, ხალხი ფართლით დაძღა...

და მართლაც. შესახვევზე ქალმა გადაირბინა, ლამაზი პირისახე ალეწოდა; ცალ ხელში ერთმანეთზე აკოკოლავეებული ფესკები ეჭირა, მეორეში — მთელი თოფი შალი. ბედნიერი, განწირული ძახილით მოუხმობდა თავის მიმოფანტულ ბალებს. მაკარენკო ყვირილით გამოენთო მას. ქალს მისთვის არ ეცალა, მირბოდა და კაბას მიაფრიალებდა. სავარძელი მიხრიგინებდა, ხეიბარი თავდაუზოგავად ექაჩებოდა სახელურებს, მაგრამ ქალს ვერ ეწეოდა.

— ქალბატონო, — მიაბღავლა მაკარენკომ, — ფართალი სადაა, ქალბატონო?

მაგრამ ფრიალა კაბა უკვე გაუჩინარდა. გვერდიდან მოლაყლაყებულმა ფორანმა შემოუხვია, ზედ ჯეელი გლეხი წამომართულიყო.

— ხალხი საით გაიქცა? — იკითხა მან და ცალუღელში მტოკავ ჯავლაგებს სადავე მოზიდა.



— ხალხი საყდართანაა საშოვარ-
ზე; ყველა იქაა... თუ კაცი ხარ, —
შეჰლაღადა მაკარენკომ, — რასაც
იშოვი, აგერ მომიზიდე, მყიდველი
ვარ...

ჯეელი წინ გადაიზნიქა და გასა-
ცოდანებულ ამლაყებს შოლტი გა-
უტყლაშუნა. ცხენებმა ხბორებივით
ჰყარეს ტლინკები და წათოხარიკდ-
ნენ. ყვითელი ქუჩა ისევ ყვითელი
და უკაცრიელი დარჩა. მაშინ უფე-
ხომ ჩამქრალი მხერა ჩემზე გადმო-
იტანა.

— ჩემი იღბალი რა ვთქვა, — ჩა-
იდუღუნა, — ჩემი იღბალი დაიწ-
ვას... — და მაკარენკომ დამუნიაწე-
ბული ტორი გამომიწოდა.

— უბეში რა გაქვს? — მითხრა
და ტომსიკა ამომაცალა, გულს რომ
მიტბობდა.

თავისი ტორით მან ტომსიკა მო-
ქექა და იქიდან ფითქინა მტრედი
ამოიყვანა. ჩიტი ფეფებაბლაკული
გაყუჩდა ფართო ხელისგულზე.

— მტრედები, — ჩაილაპარაკა მა-
კარენკომ და ბორბლების ღრჭიალით
მომიახლოვდა, — მტრედები, — გა-
იმეორა და სახეში მღეწა.

გაშლილი ხელი მღეწა, მტრედი-
ანი; კატიუშას მოჩლაჩული უკანალი
თვალეში ამომიტრიალდა და ქვაფე-
ნილს დავასკდი.

— ამათი სინსილა უნდა გაწყვი-
ტო, — წაისისინა კატიუშამ და ჭინ-
ჭებზე წამომართა, — ამათი ამყრალე-
ბული ჯიში უნდა ამოაგდო...

იგი რაღაცას კიდევ ამბობდა ჩვენს
ჯიშზე, მაგრამ მე უკვე აღარაფერი
მესმოდა. ქვაფენილზე ვეგდე და
საფეთქელს მიმთხლეული მტრედის
შიგნეული პირისახეზე მეღვენებო-
და. შიგნეული ჩამომეწლაწა ლოყაზე,
შიგნეული იგრიხებოდა, სკდებოდა
და თვალს მიბრმავებდა. მტრედის
ნაზი ნაწლავი შუბლზე დამსვარსვა-

ლებდა და მე მეორე თვალიც დავ-
ხუჭე, რათა არ დამენახა ჩემ წინ
გადახსნილი სამყარო. ეს სამყარო
პატარა და საშინელი იყო: კენჭი —
დედაბრისდარად დაღარული, ბაწრის
ნაგლეჯი და ფრთები, ჯერ კიდევ
რომ ფეთქდნენ. პატარა და საშინე-
ლი იყო ჩემი სამყარო, თვალნი და-
ვიხზე, რათა იგი არ დამენახა და
მიწას ჩავეკარ, მუნჯური მორჩილე-
ბით ჩემ ქვეშ განრთხმულ მიწას. გა-
თელილი ეს მიწა არაფრით წააგავდა
ჩვენს ცხოვრებას და არც გამოცდე-
ბის მოლოდინს ჩვენს ცხოვრებაში.
სადღაც შორს მასზე დაგელობდა ვე-
ება ცხენზე ამხედრებული უბედურე-
ბა, მაგრამ ფლოქვების ხმა თანდათან
მიყუჩდა და ანაზდად სიჩუმემ, მწარე
სიჩუმემ, უბედურების უამს ბალ-
ლებს რომ გააოგნებს, ჩემს სხეულსა
და შეჩერებულ მიწას შორის სამანი
მოარღვია. მიწამ ნედლი საფლავე-
ბი და ყვავილები ამოიფშვინა; მე
ვიყნოსე მისი სურნელი და გული
ამომესკვნა. მივაბიჯებდი თეთრი კო-
ლოფებით მოფენილ უცხო ქუჩაზე,
ეულად მივაბიჯებდი გასისხლიანე-
ბული ფრთებით თავშემკული თით-
ქოსდა საკვირაოდ გამოგვილ ფილაქ-
ნებზე და ისე მწარედ, ისე ხარბად
და შვეებით ვქვითინებდი, აღარასო-
დეს რომ აღარ მიტირია. ზემოდან
გაფითრებული მავთულები დამზმუ-
ოდნენ, ქუჩის ქოფაკი ჩემ წინ მი-
ზურზურებდა, გვერდით შესახვევში
ქილეტიანი გლეხი ხარიტონ ეფრუ-
სის ფანჯრის ჩარჩოს ამტვრევდა. ხის
უროს ურაცუნებდა, მთელი სხეუ-
ლით იდრიკებოდა და თრობის, ოფ-
ლისა და სულიერი ძალისხმევის კე-
თილ ღიმილს აფრქვევდა. ნაფოტები
სხლტებოდნენ, ნაფოტები ჰკვნესდ-
ნენ, ნაფოტებმა წკრიალით დატენეს
ქუჩა. გლეხი ანგრევდა მხოლოდ იმი-
სათვის, რათა გადაზნეჭილიყო, გა-



ოფლიანებულები და ეყვირა არ-
ნახული სიტყვები რაღაც უცნაურ,
იმ წამს შექმნილ ენაზე. იგი ყვი-
როდა ამ სიტყვებს, ღაღადებდა, ცის-
ფერი თვალები შიგნიდან ამოულად-
ღაღდა. ამასობაში ქუჩაზე საკრებუ-
ლოდან მომავალ მორწმუნეთა პრო-
ცესიაც გამოჩნდა; შეღებილწვერია-
ნი ბერიკაცები ქოჩორგადასლექილი
ხელმწიფის სურათს მოასვენებდნენ,
პროცესიას თავს ბაირალები დას-
ტორტმანებდა. წინ ალექსილი დედა-
ბრები მოტატყანებდნენ. ყილეტიანმა
გლებმა მათ დანახვაზე ურო გულზე
მიიხუტა და ბაირალებს აედევნა.
პროცესიის ჩავლას დავუცადე და
შინ წავლასლასდი. კარმოფლემილი
სახლი გამოცარიელებული დამიხვ-
და, სამტრედის წინ ბალახი ჩექმებით
გადაეთქერათ. კუზმა და რჩენი-
ლიყო სახლში. კუზმა, ჩვენი მეეზო-
ვე, ფარდულში იჯდა და მკვდარ
შოილს აპატიოსნებდა.

— რას ამოიკარ აპუტარი, — ჩა-
იბუზღუნა ბერიკაცმა, — საუკუნეა
გარეთ დატანტალებ... ვერა ხედავ, იმ
ჩემანალებმა პაპაშენი კიტრივით გა-
აგორეს...

კუზმამ ამოიქსუტუნა, ზურგი შე-
მაქცია და ბაბუაჩემს შეხსნილი
ხვანჯრიდან ჭანარი ამოუღო. ორი
ჭანარი ჩაეთხარათ ბაბუასათვის, ერ-
თი ხახაში, მეორე — ლაჯებშუა და
თუმცადა ბაბუა მკვდარი იყო, ერთი
ჭანარი ჯერ კიდევ ფეთქავდა და
თახთახებდა.

— პაპა გაგვიგორეს, სხვისთვის
ხელი არ უხლიათ. — თქვა კუზმამ
და თევზები კატისაკენ მოისროლა, —
ვენაცვალე ჯანში, ყველას დედის

სული ამოუტრიალა... იქნებ შაურია-
ნები დაგედო თვალებზე...

მაგრამ მაშინ, ათი წლის ღლაპმა,
არ ვიცოდი, რა საჭირო იყო მკვდრი-
სათვის შაურიანები.

— კუზმა, — წავიჩურჩულე, —
გვიშველე, კუზმა...


მეეზოვეს მივეტმასნე, ხელი მო-
ხანხალეებულ ზურგზე შემოვხვიე და
მხერა ბაბუაჩემისკენ გავაპარე. შო-
ილი იწვა ნახერხებში, მკერდშეჭყ-
ლეტილს წვერი აპბურდნოდა, შიშ-
ველი ფეხები ჯანზე გაეფშოკა, —
წვირიანი, ლურჯი ჭლიკვები უკვე გა-
შეშვებოდა. კუზმა მის ირგვლივ
დაფუთფუთებდა, ყბას უკრავდა, გუ-
ლა ვერ მოეოხებინა და მიცვალე-
ბულს ისე უკირკიტებდა, როგორც
ბალდი მოშლილ სათამაშოს. ბოლოს
ცხედარს წვერი ჩამოვარცხნა და
დაწყნარდა.

— ყველას დედის სული ამოუტ-
რიალა, — ღიმილით გაიმეორა და
კვამს თვალებით მიესიყვარულა, —
ურჯულოები რომ დაგვცემოდნენ,
თათრები, კუდიით ქვას ასროლინებ-
და, მაგრამ ჩვენებურები მოვიდნენ,
რუსები, თანაც დედაკაცებით, ბალ-
ლებით... ჩვენი კაცი რას დაგინ-
დობს, მაგათი ამბავი მე მკითხე...

მეეზოვემ მიცვალეებულს ნახერხი
მოაპნია, დურგლის წინსაფარი მო-
იხსნა და ხელი ჩამჭიდა.

— წამო მამაშენთან, წამო, —
ბუტბუტებდა და ხელს უფრო და
უფრო მიჭერდა, — გადარეული და-
გეძებს დილიდან...

და კუზმამ გადასახადის ამკრეფ
ინსპექტორის სახლისაკენ წამიყვანა,
სადაც ჩემი მშობლები აფარებდნენ
თავს, რბევას გადარჩენილნი.



სარდაფში

ბავშვობაში ტყუილების გუდა გახლდით—კითხვის ბრალი იყო. ტვინი ნიადაგ აღგზნებული მქონდა. ვკითხულობდი გაკვეთილებზე, შესვენების დროს, ვკითხულობდი გზადაგზა — შინისაკენ მიმავალი, ვკითხულობდი ღამით—გრძელსუფრიანი მაგიდის ქვეშ შეყუყუალი. წიგნში ჩაჩერებულს თვალსა და ხელს შუა გამისხლტა ყველა სიამე ამა სოფლისა: შატალოები ნავსადგურში, ბერძნების ქუჩაზე საბილიარდოში სიარული, ლანყერონზე ცურვა. არც ამხანაგები მყავდა. ან ვის რაში გამოადგებოდა ჩემისთანა დამთხვეული?

ერთხელ ჩვენს საუკეთესო მოსწავლეს მარკ ბორგმანს ხელში წიგნი დავუნახე სპინოზაზე. ახლახან წაეკითხა და გულმა ვერ მოუთმინა გარს-შემოხვეული ბიჭებისათვის ესპანეთის ინკვიზიციაზე არ ეამბნა. მისი მონაყოლი მეცნიერული ლუღლუღი იყო — ბორგმანის სიტყვებს პოეზიისა არა ეცხო რა. თავი ველარ შევიკავე და ლაპარაკში ჩავერიე. მათ ვინც მოისურვა ჩემი მოსმენა. მე დავუხატე ძველი ამსტერდამი, მისი გეტოს მიმწუხრი. აღმასების მჩარხავი ფილოსოფოსები. წანაკითხს ბევრი საკუთარიც წავუმატე — უამისოდ არ შემეძლო. ჩემი ფანტაზია დრამატულ სცენებს ამძაფრებდა, დასასრულს ასხვაფერებდა, დასაწყისს იდუმალების ბურუსში ხვევდა. სპინოზას სიკვდილი, მისი თავისუფალი, ეული დატევება ამა სოფლისა ბრძოლად წარმოვსახე: სინედრიონი მონანიებას აიძულებდა სულთმობრძავს, იგი არ ტყდებოდა. აქვე რატომღაც რუბენსიც ვახსენე. ჩემი ვარაუდით. იგი სპინოზას სასოფლმალთან უნდა სდგომოდა და

მიცვალებულის სახის ნილაბი აელო.

თანაკლასელები პირდაფჩენილნი მისმენდნენ: ეს ფანტასტიკური ამბავი დიდი ეშხით მოვყევი. ზარის ხმაზე უხალისოდ დავიშალენით. შემდეგ დასვენებაზე ბორგმანმა გამიხმო, მკლავგაყრილი დავმასლაათობდით დერეფანში. გამოხდა ხანი — დავმეგობრდით. ბორგმანი არ ჰგავდა ზოგიერთ ყოყლოჩინა ფრიადოსანს. მისი ძალუმი ტვინისათვის მთელი გიმნაზიური სიბრძნე ცოდნის წიგნის მხოლოდ ანაბანა იყო, იგი კი ამ წიგნის არსს ჩაჰკირკიტებდა დაყინებით. მას რომ არაჩვეულებრივი, დიდი მეცნიერის ცხოვრება ელოდა, ამას თორმეტი წლის ღლაპებიც ვგრძნობდით. მარკი გაკვეთილებს არც ამზადებდა, მხოლოდ ისმენდა. ჩემმა წრეგადასულმა ფანტაზიორობამ ეს თავშეკავებული და ფხიზელი ბიჭი დამაახლოვა.

იმ წელს მესამეში გადავედი. გაჭირვებული სამიანებით მქონდა უწყისი გადაჭრელებული. ჩემი ბოდვები იმდენად უცნაური იყო, რომ შეჩქვიფებული მასწავლებლები ორს ველარ მიწერდნენ. ზაფხულის დასაწყისში ბორგმანმა თავის აგარაკზე მიმიპატიჟა. მამამისი საგარეო ვაჭრობის რუსულ ბანკს დირექტობდა. ეს კაცი ერთ-ერთი იმათგანი იყო, ვინც ოდესა მარსელად თუ ნეაპოლად აქცია; მას ძველი ოდესელი დიდვაჭრის სისხლი უჩქედდა. ბორგმანის მამა დამცინავი, თავაზიანი დარდიმანდი გახლდათ, რუსულს ერიდებოდა და ლივერპულელი კაპიტნების უხეშ ენაზე ხლიჩინებდა. აპრილში, როცა იტალიური ოპერა გვეწვია, ბორგმანი წვეულებებს მართავდა მათ პატივსაცემად საკუთარ ბინაში. გაფიყვინებუ-



ამ დარბაზობის შემდეგ მთელი კვირა თავი ბანკის დირექტორად მეზმანებოდა: სინგაპურთან და პორტ-საიდთან მილიონიან ოპერაციებს ვაკვარახჭინებდი, იახტა შევიძინე და ოკეანეთში ვმოგზაურობდი. შაბათს ნელინელ გამოვფხიზლდი — ხვალისათვის უმცროსი ბორგმანი უნდა მწვეოდა. რაც მას მოვუყევი, იმის მსგავსიც კი სინამდვილეში არ არსებობდა; არსებობდა სხვა რამ, ბევრად უფრო საოცარი, ვიდრე ჩემი მონაგონი იყო, მაგრამ თორმეტი წლისამ ჯერ კიდევ არ ვიცოდი, ამქვეყნად სიმართლისათვის როგორ მომეგლო. პაპაჩემი ლეივიციხოკი, ყალბი თამასუქების გამო გამოპანდურებული რაბინი, მეზობლებსა და ჩვენი უბნის ბიჭებს შერეკილად მიაჩნდათ. ბიძაჩემი სიმონ-ვოლფიც ახირებული, ჯაჯლანაკაცი იყო. უაზრო ენერგიით დატენილი. ერთადერთი ბოზკას იმედი მქონდა. ბიცოლაჩემს ეამაყებოდა ჩემი მეგობრობა ბანკირის ვაჟთან, ეს ურთიერთობა მომავალი კარიერის დასაწყისად მიაჩნდა და სტუმრისთვის მურაბიანი შტრუდელი და ვაშლის ღვეზელი გამოაცხო. ბიცოლაჩემმა ამ ნამცხვრებში მთელი თავისი გული ჩაათქვიფა, ბრძოლაში ესოდენ გამძლე გული ჩვენი ტომისა. ფეხებდაფიყვინებული ბაბუა თავისი დაკონკილი ცილინდრით მეზობლებთან გადავკარგეთ, აპელხოტების ოჯახში. ჭირი მოვჭამე, რომ სტუმრის წასვლამდე შინ არ მობრუნებულიყო. სიმონ-ვოლფიც გავისტუმრეთ, იგი დუქან „დათუნიაში“ წავიდა თავის ძმაკაც ქორვაჭრებთან ჩაის სასმელად. ამ დუქანში ჩაისთან ერთად არაყსაც სვამდნენ, ამიტომაც სიმონ-ვოლფი, ჩემი ვარაუდით, კარგა ხნით უნდა შეყოვნებულიყო. ჩვენი ოჯახი გამოიჩინებოდა

სხვა ებრაელთა ოჯახებისგან: გვარში ლოთებიც გვყავდა, ჩვენებს გენერლის ქალიშვილთათვისაც აუხდიათ ნამუსი, გაუტაცხიათ და მერე საზღვართან მიუგდიათ, ჩვენი პაპა ყალბ თამასუქებს აწერდა ხელს და მიტოვებულ ცოლებს შანტაჟს უწყობდა.

რა არ ვიღონე, რომ სიმონ-ვოლფი მთელი დღით დამეთესა; წვითა და დაგვით ნაგროვები სამი მანეთი მივეცი; სამი მანეთის დახარჯვას კი დრო უნდა; ჰოდა, სიმონ-ვოლფიც გვიან დაბრუნდება და ბანკის დირექტორის შვილი ვედარასოდეს შეიტყობს, რომ ჩემი მონათხრობი ბიძაჩემის მამაც მკლავსა და კეთილ გულზე მტკნარი სიცრუეა. გულს რომ ჩაჰკითხვოდი, ეს არც იყო სიცრუე, მაგრამ თვალი მხოლოდ წვირიანსა და ჯაჯლანა სიმონ-ვოლფს ხედავდა და ამ დაბურდულ ჭეშმარიტებას ძნელად საცნაურს ხდიდა.

კვირა დილით ბოზკა შალის ყავისფერ კაბაში გამოეწყო, დიდრონა. კეთილი ძუძუების დანდალით მთელ ბინას მოედო. თავს მანდილი წაიკრა, შავი ყვავილებით ამოტვიფრული მანდილი, სინაგოგაში მხოლოდ განკითხვის დღესა და როშ-გაშონოს დღესასწაულზე რომ იკრავენ ხოლმე. ბოზკამ სუფრაზე განოალაგა ნამცხვარი, მურაბა, კრენდელები და მოლოდინად იქცა. სარდაფში ვცხოვრობდით. ჩვენი დერეფნის ოღროჩოღრო იატაკზე რომ გამოიარა, ბორგმანმა წარბები აწკიპა. წინკარში წყლით სავსე უზარმაზარი კასრი იდგა. მარკს მიხედვით მოხედვა არ ვაცალე, წინ ჩემი საოცრებანი გადმოვულაგე: ვაჩვენე ბაბუაჩემის ნაკეთები ნათურაჩახრახნილი მალვიძარა — ყოველი ჩამორეკვისას ნათურა ინთებოდა. ვაქსიანი კასრი გამოვუტანე: ამ ვაქსის



რეცეპტი ლეივი-იცხოკის საიდუმლოება იყო და ქვეყნიერების ზურგზე არავის უმხელდა. შემდეგ პაპაჩემის ხელნაწერებს ჩავუჯექით. პაპა ებრაულად წერდა უშველებელ კვადრატულ ფურცლებზე, კაცს რომ გეოგრაფიული რუკები ეგონებოდა. ხელნაწერს „უთავო კაცი“ ერქვა. შიგ ლეივი-იცხოკი თავის სკვირულ და ოდესელ მეზობლებს აღწერდა: მეკუბოვეებს, სინაგოგის მგალობლებს, ებრაელ ლოთიბაშებს, თვითმარქვია წინადამცვეთებს, მზარეულ დედაკაცებს. მოქმედ პირებად ახირებული, ბლუკუნა ხალხი გამოჰყავდა, ყველას გრძელი ცხვირები, ჩამუწუკებული კინკრიხობები და მონგრეული თეძოები ჰქონდა.

კითხვის დროს ყავისფერ კაბაში გამოწყობილი ბობკაც მოგვეახლა. სამოვრით ხელში შემოცურდა, ფეხზე მისი თბილი, კეთილი ძუძუები ეწყო. სტუმარი გავაცანი: ძალზე სასიამოვნოაო, ჩაილაპარაკა და, გახევებულმა, გაოფლილი, დაშაშრული ხელი გაუწოდა. საქმე ნანატრივით აეწყო, აპელხობები ბაბუაჩემს შინ არ უშვებდნენ. ჩვენ თავისუფლად დავბუჯურობდით მის საგანძურში: თალმუდის ზვინებსა და გრამატიკების ზღვაში. მარკი გააბრუა ვაქსიანმა კასრმა, უცნაურმა მადვიძარამ და თალმუდის სამოცდაექვსმა ტომმა—ამის ნახვა მართლაც მხოლოდ ჩვენთან შეიძლებოდა.

ორ-ორი ჭიქა ჩაიც მივირთვით შტრუდელით — კმაყოფილი ბობკა თავის კანტურით გაგვეცალა. ნეტარების გრძნობა დამეუფლა, ყელი მოვიღერე და უსაყვარლესი სტრიქონების კითხვა დავიწყე. კეისრის ცხედარს დამხობილმა ანტონიუსმა პირი რომის ხალხისკენ მოიღო:

ო, რომაელნო, მეგობარნო, მოქალაქენო, ყურნი მომაპყართ. პატივი დამდეთ.

მე არ ვაპირებ კეისარზე ხოტბის აღვლენას, მხოლოდდა მსურის საბოლოო ვალი მივაგო...

ასე იწყებს ანტონიუსი თვისი ვერაგული ქსელის გაბმას. მე სული შემიგუბდა და ყელი ჩამიშრა:

ის მეგობარი ჩემი იყო, ერთგულთ მოყვარე, პატივმოყვარეს თუმც უწოდებს ეხლა ბრუტოსი... ხოლო ბრუტოსი, თავად უწყით, ღირსი კაცია...

რომი აავსო მან ტყვეებით, ომში ნაშოვნით, გამოსასყიდით გაამდიდრა ჩვენი სალარო. ვგების ესე ჩაუთვალთ პატივმოყვრობად... რაჟამს ხილვიდა სილატაკეს, ცრემლებსა ჰღვრიდა.

ეგზომ გულჩვილი სად ვინახავთ პატივმოყვრობა. მაგრამ ბრუტოსი მას უწოდებს პატივმოყვარეს, ხოლო ბრუტოსი, თავად უწყით, ღირსი კაცია.

ლუპერკალიის, ხომ ხედავდით, დღესასწაულზე სამეზის ვეცადე მე გვირგვინი მისთვის დამედგა, არ დამანება ამ ვითომდა პატივმოყვარემ...

მაგრამ ბრუტოსი მას უწოდებს პატივმოყვარეს, ხოლო ბრუტოსი, თავად უწყით, ღირსი კაცია.

ჩემ თვალწინ—სამყაროს ბურუსში — ბრუტოსის სახე თახთახებდა. იგი ჩაიტეტკა და ცარცზე უთეთრესი გახდა. გარს ავად მოღუდუნე რომის ხალხი შემომადგა. ხელი აღვმართე — ბორგმანმა მორჩილად გააყოლა მას მზერა — მომუჭული მარჯვენა ამიცახცახდა, ხელი აღვმართე... და ფანჯარაში დავინახე ბიძაჩემი სიმონ-ვოლფი და მისი ავან-ჩავანი ჩარჩი ლეიკახი. ორივენი ირმის რქებით გაწყობილ საკიდარსა და მონჯდრეულ წითელ ზანდუქს მოათრევდნენ ეზოში. ისინი ბობკამაც შეამჩნია ფანჯრიდან. სტუმარი ვიღას გახსენებია, დაფეთებუ-



შურიან კასკას სისხლიანი ჭრილობის
კვალი,
აქ, აქ ჩაუშვა, ღრმად ჩაუშვა თვისი
ხანჯალი
უსაყვარლესმა მისმა კაცმა, მისმა
ბრუტოსმა.
ვითარ აღმოსკდა ალისფერი სისხლის
ნაკადი,
ოდეს მახვილი ჭრილობიდან ამოიწვავდა...

სიმონ-ვოლფის ჩახშობა არავის
ძალუძდა. იატაკზე წამომჯდარი
ბობკა სლუკუნებდა და სისხლს აწი-
ტებდა. ლეიკახი აულელვებლად ექა-
ჩებოდა ზანდუკს ტიხარს იქით. ამა-
სობაში ჩემმა დამთხვეულმა ბაბუ-
ამაც მოაღწია ჩემდა შემწედ. იგი
აპელხოტებს დაუძვრა, ფანჯარასთან
მოფოჩიალდა და ვიოლინო ააწრი-
პინა, ალბათ სიმონ-ვოლფის გინე-
ბის ჩახშობა ეწადა. ბორგმანმა ფან-
ჯარას აჰხედა, მიწას რომ უს-
წორდებოდა, და თავზარდაცემული
უკან მიაწყდა: საცოდავი ბაბუაჩემი
თავის ლურჯ, გახევებულ პირს
ღონაზავდა, თავზე შავი ცილინდრი
წამოემხო, სპილოს ფეხები გაება-
ჯიჯგებინა და გაყვითლებულ წვერს
ფანჯარაში აცანცარებდა. მარკი აღ-
გილიდან მოსხლტა...

— არაფერია, — წაიჩურჩულა
მან, — ღმერთმანი, არაფერია...

ეზოში გაიელვა მისმა მუნდირმა
და ქუდმა.

მარკი წავიდა და მეც დავმშვიდ-
დი. დაღამებას ველოდი. როცა ბა-
ბუამ ებრაული კაუჭა ასოებით მთე-
ლი ფურცელი ააჭრელა — იგი აღ-
წერდა აპელხოტებს, სადაც ჩემი
წყალობით მთელი დღე გაატარა—და
დასაძინებლად დაწვა, დერეფანში
გამოვიპარე. იატაკი იქ მიწისა იყო.
გრძელ და დაკონკილ პერანგში გა-
მოხვეული, ფეხშიშველა მივფათუ-

რობდი სიბნელეში გრილ სიბნელეში
ძელთა ღრიტოებში ხმლებივით
ელავდა ქვაფენილი. კუთხეში, რო-
გორც ყოველთვის, პირთამდე წყლით
სავსე კასრი იდგა. შიგ ჩავეშვი.
წყალმა შუაზე გამკვეთა. სული შე-
მიგუბდა, ამოვიყურეყუმალე. ზემოთ,
თაროდან გულგრილად დამჩერებო-
და კატა. მეორედ უფრო დიდხანს
გავუძელი. ირგვლივ წყალი ბუყბუ-
ყებდა და ჩემი კვხესა შიგ ინთქმე-
ბოდა. თვალი გავახილე და კასრის
ძირში პერანგის კალთა და მჭიდროდ
მიტყუპული ფეხები დავინახე. ძა-
ლამ ისევ მიმტყუნა, ამოვიყურეყუ-
მალე. კასრთან პერანგის ამარა ბა-
ბუა იდგა, პირში ეული კბილი
ულაყლაყებდა.

— შვილო ჩემო,—ღირსებითა და
ზიზლით დამიმარცვლა მან. — ახლა-
ვე შევსვამ საფალარათო ზეთს, რა-
თა საფლავზე ნობათი მოგართვა.

მე განწირულად დავიკვივლე და
ქვასავით წავედი ფსკერისაკენ; ბა-
ბუას სუსტმა მარჯვენამ ამომათრია.
და მაშინ, იმ დღეს პირველად, მე ავ-
ტირდი. ცრემლთა საუფლომ, მშვე-
ნიერმა და უკიდევანომ. ყველაფერი
გადალექა ჩემს თვალთაგან.

გონს საწოლში მოვეგე, საბანში
ჩაფუთნული. ბაბუა სტვენა-სტვენით
მიმოდრიოდა ოთახში. მსუქანი ბობ-
კა ძუძუებით მითბუნებდა ხელებს.

— როგორ აძაგდაგებს ჩვენს პა-
ტარა სულელს, — თქვა ბიცოლამ,—
არა, სადღა შერჩა ამნაირი ძაგდაგის
ლონე...

ბაბუამ წვერს მოზიდა, დაუს-
ტვინა და სიარული განაგრძო. კედ-
ლის მიღმა განწირულად ხრიალებ-
და სიმონ-ვოლფი. მთელი დღის
ნაომარს, დამლამობით მას გვერდ-
შეუბრუნებლად ეძინა ხოლმე.



ბი ლე მოკასანი

ცხრაას თექვსმეტი წლის ზამთარმა პეტერბურგში მომისწრო; ჯიბეში ფულის ნაცვლად ყალბი პასპორტი მედო. ალექსი კაზანცევს — რუსული სიტყვიერების მასწავლებელს — რომ არ შევეკედლებინე, შიმშილით სული ამომძვრებოდა.

იგი რიყეზე ცხოვრობდა — ერთ მივარდნილ, ჩაყვითლებულ, აქოთებულ ქუჩაზე. თავისი უბადრუკი ჯამაგირი რას ეყოფოდა და ორიოდ გროშს ესპანურიდან თარგმნით შოულობდა: იმ ხანებში ბლასკო იბანიესის სახელი ამობრწყინდა.

კაზანცევს თვალთაც არ ენახა ესპანეთი, მაგრამ ძილშიაც კი იგი აბოდებდა: სად რა ციხე-კოშკი, მდინარე და სანახები იყო — ხუთი თითივით იცოდა. მასთან სხვებიც აფარებდნენ თავს, ჩემსავით ცხოვრების კალაპოტიდან ამოვარდნილნი. ნახევრად ვშიმშილობდით; ათასში ერთხელ წვრილ-წვრილ შემთხვევებზე ბულვარულ გაზეთებში თუ გვიბეჭდავდნენ ორიოდ სტრიქონს.

დილაუთენია საცხედრეებთან ან პოლიციის უბანთან დავერჭობოდნი ხოლმე.

ჩვენთან შედარებით კაზანცევი ბედნიერი კაცი იყო: მას სამშობლო მაინც ჰქონდა — ესპანეთი...

ნოემბერში გადამწერლის ადგილი გამომიჩნდა ობუხოვოს ქარხანაში. ურიგო საქმე არ იყო, თანაც ჯარისაგან მათავისუფლებდა.

უარი ვთქვი დავთრებში ქექვაზე. ჯერ კიდევ მაშინ, ოცი წლისამ, ჩემს თავს ვუთხარი: შიმშილი გერჩივნოს, ციხე და მაწანწალობა მაგიდასთან ათ საათს ყურყუტს-მეთქი. ამ აღთქმაში რაიმე განსაკუთრებულ

ვაყვაცობას ვერ ვხედავ, ეს კია, სიტყვად არ გამიტეხია და არც გავტეხ; სისხლში მქონდა წინაპართა სიბრძნე გამჯდარი: ოფლის ღვრად მხოლოდ შრომა ღირს, ჩხუბი და ქალთან წოლა, სხვა არაფერი.

ამ ჩემს ბაქიბუქს რომ უსმენდა, კაზანცევი თავის გამეჩხერებულ ყვითელ ქოჩორს იჩეჩდა და შიმშილრევი ალტაცებით მიმწერდა.

შობას ბედმა გაგვიღიმა: გამომცემლობა „ალციონის“ მფლობელმა ვექილმა ბენდერსკიმ განიზრახა ხელახლა გამოეცა მოკასანის თხზულებანი. თარგმნა მისმა ცოლმა რაისამ ისურვა, მაგრამ ეს საქმე თურმე არც ისე იოლი გამოდგა.

კაზანცევს, ცნობილ მოესპანურეს, დაეკითხნენ, რაისა მიხაილოვნას დამხმარე ხომ არავინ გეგულებათო. მანაც ჩემი თავი ურჩია.

მეორე დღეს ნათხოვარ პიჯაკში გამოწყობილი ვეახელი ბენდერსკებს. ისინი ნევსკის კუთხეში ცხოვრობდნენ. ფინური გრანიტის სახლი სვეტებით, სათოფურებითა და ქვის გერბებით იყო მორთული. ომის წინ ბევრმა უგვარიშვილო ბანკირმა, ალებ-მიცემობით მოსუქებულმა ბევრმა მონათლულმა ებრაელმა აიშენა პეტერბურგში ულაზათო, ზიზილპიპილოებით აჭყატული ციხე-ღარბაზები.

საფეხურებზე წითელი ნოხი ეფინა. კიბის თავზე დათვები ატოტილიყვნენ, დაფჩენილ ხახებში ბროლის ჭადები უბრდღვიალებდათ.

ბენდერსკები მესამე სართულზე ცხოვრობდნენ. კარი მკერდმაღალმა მოახლემ გამიღო და ძველ სლავურ ყაიდაზე გაწყობილ სასტუმრო ოთახში შემიძღვა. კედლებზე რერიხის იისფერი სურათები ეკიდა, ადა-



მისუამინდელი ურჩხულები და ლოდები. კუთხეებში. ბუჯერებზე, ძველებური ნახელავი ხატები ესვენა. მკერდმაღალი მოახლე აღერებული მიმოდიოდა ოთახში. შხვართი გოგო იყო, ოდნავ ელამი და მედიდური, ჭროლა თვალეში სიმრუშე ჩაჰბუდებოდა. მოახლის წელის ნებიერ მიმოტანას რომ ვუყურებდი, გავიფიქრე, სარეცელში ალბათ კალმახივით ასხმარტალდება-მეთქი. კარების წინ ფარჩის ფარდა შეიღბა. ოთახში შავთმიანი და ვარდისფერთვალემა ქალი შემოვიდა — მკერდსაკრავში გადაგრული დიდრონი ძუძუების თანთალით. ბენდერსკაიაში უმაღლ იგრძნობდით სტეპის მაძლარი ქალაქებიდან დაძრული ებრაელი ქალების მათრობელა ჯიშს. თავიანთი გაქსუებული ქმრების ფულებს ეს ქალები ქონის ვარდისფერ, თხელ ფენად გადაიკრავენ ხოლმე მუცელზე, ქინჩსა და მომრგვალებულ მხრებზე. მათმა დაბინდულმა, ნაზმა ღიმილმა ლამის გადარიოს გარნიზონის ოფიცრობა.

— მოპასანი ჩემი ერთადერთი გატაცებაა, — მითხრა რაისამ.

იგი ოთახიდან გავიდა, ცდილობდა სავსე თეძოების რყევა შეეკავებინა. უკან „მის გარიეტის“ ხელნაწერით შემობრუნდა. მის თარგმანში მოპასანის ცინცხალი, მოსხლეტილი და ვნებით დატენილი ფრაზის კვალიც კი გამქრალიყო. ბენდერსკაიას გულისგამაწვრილებელი სიზუსტით ეთარგმნა ყოველი ფრაზა, დუნედ და უსიცოცხლოდ. — ისე, როგორც წინათ წერდნენ ებრაელები რუსულად. ხელნაწერი შინ წამოვიღე და კაზანცევის მანსარდაზე, მძინარეთა ხვრინვაში მთელ ღამეს ვჩეხე სხვისი თარგმანი. ამ საქმემ თანდათან გამიტაცა: ერთდროულად იბადება კარგი და უხეირო ფრაზა, მთე-

ლი მულამი ოდნავ შეშამჩნევ რაობაშია: მკლავით სადავეს უნდა გრძნობდე, რათა სიტყვას ქედი დროზე მოუდრიკო.

დილით ბენდერსკაიას გასწორებული ხელნაწერი მივუტანე. რაისათურმე არ ცრუობდა, როცა მოპასანს თავისი ერთადერთი გატაცება უწოდა. კითხვის დროს უძრავად იჯდა — თითებჩაწნული. მისი სრულა მკლავები მდინარეებად ეშვებოდნენ დაბლა, შუბლი გადასტეტკვოდა, მჭიდროდ გამოკრულ ძუძუებს შორის მოქცეული არშია მალმალ აუდ-ჩაუდიოდა.

— როგორ მოახერხეთ ეს?

და მეც ავლაპარაკდი სტილზე, სიტყვათა ლაშქარზე, სადაც ყველა ჯურის იარაღი უნდა ამოქმედო. ადამიანის გულს ყოველგვარ მახვილზე უფრო მოწყლავს წერტილი, დროულად დასმული. იგი მისმენდა, თავი გვერდზე გადაეხარა, წითლად შეღებილი ბაგე გაჰპობოდა, ყორნის ბოლოსებრ უელავდა გადაჭიმული, შუაზე გაყოფილი თმა. დანდობილად დაბჯენოდა ხალიჩას მისი ძლიერი და ნაზი წვივები. მაღალ ფეხებს გამჭვირვალე აბლაბუდა შემოკვართოდა.

მოახლემ სინით საუზმე მოგვართვა და თავისი ამძუნებული თვალეები აგვარიდა.

პეტერბურგის მზე მქრქალ, უსწორმასწორო ხალიჩაზე გაწვა. მაგიდის ზემოთ, თაროებზე, მოპასანის ოცდაცხრა ტომი გამწკრივებულიყო. ქანცმილეულმა მზემ თითები მიადნო წიგნების ტარსიკონის ყუებს — ცხელი გულის მშვენიერ საფლავს.

ლურჯი ფინჯნებიდან ყავას ვწრუპავდით, თანაც „იდილიას“ ვთარგმნიდით. ალბათ გახსოვთ ჯეელი დურგლის ამბავი, შიმშილისაგან



დაოსებულმა რძემოწოლილ ფაშფაშა დედაკაცს ძუძუ რომ გამოსწოვა. ეს მოხდა ნიცადან მარსელისაკენ მიმავალ მატარებელში, ირგვლივ თაკარა შუადღე ღუოდა და ყელყელა ვარდების ბაღები ზღვისაკენ ექანებოდნენ...

ბენდერსკებიდან ბედ ოცდახუთი მანეთი გამოვიყოლე. იმ ღამეს ჩვენი კომუნა ჭუკივით გამოთვრა. შავ ხიზილალას კოვზებით ვთქვლევდით, ზედ ძეხვს ვატანდით. შეზარხოშებული, ლევ ტოლსტოის მოვსდექი:

— შეშინდა თქვენი გრაფი, დაფეთდა... მისი რელიგია შიშია, შეეშინდა სიცივის, სიბერის—და რწმენისაგან ფაჩუჩები მოიქსოვა...

— კიდევ რას მეტყვი?... — ნისკარტა თავის კანტურით მეკითხებოდა კაზანცევი.

საწოლებამდე ვეღარ მივალწიეთ. იქვე იატაკზე მივყრილვართ. იმ ღამეს ჩვენი მეზობელი კატია დამესიზმრა, ორმოცი წლის მრეცხავი; დილდილობით მდულარეს გვაძლევდა ჩაისათვის. ხეირიანად არც შემეხედა, ძილში კი რაღას არ ჩავდიოდით, ღამის სული გამეპარა მის ხვევნა-აღერსში. დილით სულმა წამძლია და ჩაისათვის მივადექი...

შალმოხვეული, გაცრეცილი დედაკაცი გამომეგება. ჭაღარაგარეული ფერფლისფერი ბუწუწებითა და დაფუთქული ხელებით.

მე უკვე ყოველ დილით ბენდერსკებთან ვსაუზმობდი. ჩვენმა კომუნამ ცოტათი სული მოითქვა: მანსარდაზე ახალი ღუმელი დავიდგით, წასახემსიც გვეშოვებოდა. რაისამ ორჯერ დამიმგზავრა კუნძულებზე. გულმა ვერ მომიტმინა და ჩემი ბავშვობა გავიხსენე. არ ველოდი, ასეთი პირქუში მონათხრობი


თუ გამომივიდოდა: თახვის ქუდს ქვემოდან შიშით მომჩერებოდა მოწყლიანებული თვალები, საწყალობლად ფახულობდა წამწამთა მწითური ისრები.

რაისამ ქმარი გამაცნო — პირყვითელა ებრაელი მოშიშვლებული თავითა და ბრტყელი, ძლიერი, ირიბად ატყორცნილი სხეულით. ხმები დადიოდა, რასპუტიხთან არისო დაახლოებული. სამხედრო დაკვეთებით მიღებულმა მოგებამ ეს კაცი შლევს დაამსგავსა: თვალები შეშლილივით უპრიალებდა, სინამდვილე დაემსხვრა და დაუქუცმაცდა. რაისა შემცბარი წარუდგენდა ხოლმე მეუღლეს ახალ ნაცნობებს. არიფი ვიყავ და ეს ცოტა გვიან ვიაზრე.

ნაახალწლევს ბენდერსკაიას კიევიდან დები ესტუმრნენ. დილით „ყაბულის“ ხელნაწერით მივადექი. რაისა შინ არ დამიხვდა და საღამოს ისევ მივბრუნდი. სასტუმრო დარბაზში სადილობდნენ. იქიდან აცუნდრუკებულ მდედრთა კისკისი და მამრთა ხორხოცი მოისმოდა: ახალგამომცხვარი მდიდრების ოჯახებში სუფრაზე მუდამ ხმაურია. კილონალი ებრაული იყო — სლიფინითა და ღულუნა დაბოლოებებით. ზურგმოშიშვლებული რაისა სადარბაზო კაბის შარიშურით შემომეგება. მისი ჭიშიანი ფეხები ლაქის მოძიგძიგე ქოშებში წონასწორობას გაჭირვებით იცავდნენ.

— ჩემო კარგო, რომ იცოდეთ, რა მთვრალი ვარ, — და მან პლატინითა და ზურმუხტით დამძიმებული ხელები გამომიწოდა.

მისი ტანი მუსიკის ხმაზე კუდსდაყრდნობილი გველის სხეულივით სანსალებდა. ბეჭდები რაწკუნობდნენ, რაისა ხუჭუჭა თავს ასავსავებდა; უცებ ეს სხეული მოირღვა და მოვარაყებულ სავარძელში ჩაიშა-



ლა. გაპუდრულ ზურგზე ნაჭდევი გამოუჩნდა.

კედლის მიღმა კვლავ იფეთქა სიცილი. ოთახში რაისასებრ ტანადი და ჩათქვირული დები შემოცვივდნენ; ტუჩზემოთ ბუსუსები აჩნდათ, თმებჩამოშლილებს ძუძუები წინ წამოეყარათ. ისინიც თავთავიანთ ბენდერსკებზე გათხოვილიყვნენ. ოთახი დაყურსულ მდებრთა უმიზნო სიცილით გაიჭექა. ქმრებმა დები ბეწვის მანტოებსა და ორენბურგულ შალეებში შეფუთნეს, შავ ჩექმებში ჩაჭედეს. ქათქათა თავსაფრებიდან მხოლოდ ატკრციალებული ლოყები, ფიქალი ცხვირები და სემიტურ თვალთა მრუმე ციალი გამოკრთოდა. ყველანი ხორხოციტ წავიდნენ თეატრში, სადაც შალიაპინს „ივლითში“ უნდა ემღერა.

— მუშაობა მომინდა, — ჩაიკრუტუნა რაისამ და შიშველი მკლავები დაეძაბა, — მთელი კვირა გაგვებარა...

სასადილოდან მან ბოთლი და ორი ფეხიანი ჭიქა შემოიტანა. აბრეშუმის კაბაში კერტებდაბერილი ძუძუები უთანთალებდა.

— ძველისძველია, — თქვა რაისამ და ჩამოასხა, — ოთხმოცდასამი წლის მუსკატია. თუ გამიგო, ქმარს ვერ გადავურჩები...

ოთხმოცდასამ წელში ჩამოსხმულ მუსკატთან საქმე ჩემს დღეში არა მქონია. ამიტომ დაუფიქრებლად გადავუშვი ზედიზედ სამი ჭიქა. ამ ჭიქებმა ნარინჯისფერი ცეცხლი შემომაგზნო და მუსიკით დამტენა.

— მე მთვრალი ვარ, ჩემო კარგო... დღეისთვის რა გვაქვს?

— დღეისთვის „L'aveu“ გვაქვს...

— მაშ ასე, ვიწყებთ: „ყაბული“. მოთხრობის მთავარი გმირი მზეა,

le soleil de France!... მზის გავარვარებული წვეთები მწითურ სელესტას დაეშხეფა და ჭორფლად იქცა. მზემ თავისი ირიბი სხივებით, ღვინთა და თავნახადით ყავისფრად გაუჯანგრა ცხვირ-პირი მეეტლე პოლიტს. კვირაში ორჯერ ეზიდებოდა ქალაქში სელესტა ნაღებს, კვერცხებსა და ქათმებს. მგზავრობაში პოლიტს თოთხმეტ სუს უხდიდა, ათს თავისთვის და ოთხსაც ბარგისას.

და ყოველი მგზავრობისას პოლიტი ეშმაკურად ჩაუპატუნებდა ხოლმე თვალს წითურა სელესტას: „როდისღა ვისიამოვნებთ, ma belle?“² — „რას გულისხმობთ, მოსიე პოლიტ?“ კოფოზე მოხტუნავე მეეტლე უხსნიდა: „ვისიამოვნებთ, ეს ნიშნავს, რომ ვისიამოვნებთ, ეშმაკმაც დალაზვროს... მე და თქვენ — მოწმე რად გვინდა!“ — „არ მიყვარს ასეთი ხუმრობა, მოსიე პოლიტ“, — ეტყოდა ხოლმე სელესტა და ვაჟის ფეხს თავის ჯანიან წვივებს არილებდა.

მაგრამ ეს ეშმაკის ფეხი პოლიტი სულ იკრიჭება, სულ ხითხითებს — ერთხელ იქნება და ჩვენ ვისიამოვნებთ, ma belle, — და მზიარული ცრემლები მოგორავს მის მზედაკრულ სახეზე.

რაისას მივუჭახუნე და ძველისძველი მუსკატის კიდევ ერთი ჭიქა გადავკარით.

თვალეზგამოციებული მოახლე ოთახში გაილანდა და გაუჩინარდა.

Ce diable de Polyte³... ორი წლის განმავლობაში სელესტას მისი ორმოცდარვა ფრანკი დაედო ვალად. ეს ორმოცდაათი ფრანკია ორფრანკნაკლებ! და ერთხელ, როცა ისინი

¹ საფრანგეთის მზე (ფრანგ.).

² ლამაზო (ფრანგ.).

³ ეს ეშმაკის ფეხი პოლიტი (ფრანგ.).



დილიყანსში მარტონი დარჩნენ და ნაყლურწმა პოლიტმა ჩვეულებისამებრ ჰკითხა: „ხომ არ გვესიამოვნებია, მამზელ სელესტა?“—ქალმა თვალები დახარა და წაიბუტბუტა: „მე მზად გახლავართ, მოსიე პოლიტ...“

რაისა ხარხარით გადაემხო მაგიდას. *Ce diable de Polyte...*

დილიყანსს თეთრი ჯაგლაგი ება. და გაუყვა ნება-ნება გზას თეთრი ჯაგლაგი — სიბერისაგან გავარდისფერებული ჩიჩვირით. საფრანგეთის მხიარული მზე დასთამაშებდა მოყუჩებულ დილიყანსს: ქალ-ვაჟთან მოწმე რა საჭიროა...

რაისამ ჰიჭა გამომიწოდა. ეს მუხუთე იყო.

— მოპასანს გაუმარჯოს, *mon vieux!*...

— ხომ არ გვესიამოვნებია დღეს, *ma belle...*

რაისასაკენ გადავიხარე და ვაკოცე. ქალს ტუჩები შეუტოკდა და დაებერა.

— სასაცილო ხართ,—ჩაიხრიწინა რაისამ და გადაიზნიქა.

იგი კედელს აეკრა და შიშველი მკლავები გადაშალა. მხრებსა და მკერდზე ტალები აუფორაჯდა. არც ერთი ჯვარცმული ღვთაება არ ყოფილა ესოდენ მაცთუნებელი.

— კეთილი ინებეთ და დაბრძანდით, მოსიე პოლიტ...

მან ზურგმოვარაყებულ ლურჯ სავარძელზე მიმითითა. ბორძიკით გავემართე იქითკენ.

ლამემ ჩემი მათხოვრული სიყმაწვილე ერთი ბოთლი ოთხმოცდასამი წლის მუსკატითა და ოცდაცხრა წიგნით, — სიბრალულით, გენიით, ვნებით დატენილი ოცდაცხრა პე-

ტარდით დანაღმა. ფეხზე წამოგვარდნი, — სკამი აყირავდა, — თავი წიგნების თაროს ავახალე. ოცდაცხრა ტომი ხალიჩას დაასკდა, გადაიფურჩქნა და ყალყზე შედგა... და ნება-ნება დაიძრა ჩემი იღბლის თეთრი ჯაგლაგიც.

— სასაცილო ხართ, — ამოიგმინა რაისამ.

გრანიტის სახლი ქმრისა და დების მობრუნებამდე დავტოვე. ფხიზელი ვიყავ — ბეწვის ხიდზე გადავივლიდი — მაგრამ ტორტმანი მეწადა; მეც მივირწეოდი და ვმღეროდი ჩემ მიერ იმ წამს შექმნილ ენაზე. დაბინდულ ქუჩაზე ნისლის ბოლქვები დარონინებდა, მოთუხთუხე კედლების მიღმა ურჩხულები ბლაოდნენ, ქვაფენილი მუხლებსა ჰკვეთდა მოსიარულეთ.

სახლში კაზანცევს ეძინა. სკამზევე თვლემდა, გამხდარი ფეხები განზე გაეფშოკა, თავზე ყვითელი ბუწუწები წამოჰფოფროდა. წინ 1624 წელს გამოცემული „დონ-კიხოტი“ ედო, პერცოვ დე ბროგლიოსადმი მიძღვნილი. ჩუმად დავწექი, ლამპა მოვიჩოჩე და ეღუარდ დე მენიალის წიგნი გადავშალე — „გი დე მოპასანის ცხოვრება და შემოქმედება“.

კაზანცევი ტუჩებს აცმაცუნებდა, თავი დროდადრო ეყანთრებოდა.

იმ ღამეს ეღუარდ დე მენიალისგან შევიტყვე, რომ მოპასანი 1850 წელს დაბადებულა. მამამისი ნორმანდიელი მებატონე იყო, დედა — ლაურა დე პუატივენი — ფლობერს ბიძაშვილად მოხვდებოდა. ოცდახუთისა იყო, როცა მემკვიდრეობით გადმოსულმა სიფილისმა თავი შეახსენა. მასში დაბუდებული სიკასკასე და ნაყოფიერება ავადმყოფობას თავს არ უღებდა. ჯერ იყო და „მა-

¹ შე ძველო (ფრანგ.).



კიკმა და ჰიპოხონდრიამ გატანჯა, შემდეგ სიბრმავის აჩრდილი წამოაღვა თავს: თვალს აკლდებოდა. ეჭვიანი გახდა, უკარება და შარიანი. თავის წერას მაინც კბილებით ჩააფრინდა, მისი იახტა ხმელთაშუა ზღვის ნაპირებს ასკდებოდა; ტუნისში გაიჭრა, მაროკოში. შუა აფრიკაში — და წერდა, წერდა განუწყვეტლივ. ორმოცი წლისამ, უკვდავებასთან წილნაყარმა, ყელი გამოიჭრა; სისხლისაგან იცლებოდა, მაინც გადარჩა. საგიჟეთში გამოამ-

წყვდიეს... დაოთხილი ბიჭად იქცა თურმე. აი, უკანასკნელი ჩანაწერი მისი ავადმყოფობის სევდიან მატია-ნეში: „Monsieur de Maupassant va s'animaliser“ (ბატონი მოპასანი პირუტყვად იქცა). ორმოცდაორისა მოკვდა, დედამისის სიცოცხლეშივე.

წიგნი ჩავათავე და წამოვდექი. ფანჯრის მინებს ნისლი მიჰგლესოდა და სამყარო დაეფარა. გული მომეწურა... და მენიშნა სასწაული ჭეშმარიტების.

□

დანტეს ქუჩა

ბუთიდან შვიდამდე ჩვენი სასტუმრო „Hôtel Danton“¹ ლამის ცად აეტანა ვნებიან კვნესას — ჩანდა, ნომრებში ამ საქმის დიდოსტატები რომ იღვწოდნენ. ამან, ცოტა არ იყოს, განმაცვიფრა, ვინაიდან საფრანგეთში ჩამოსვლისას მეგონა, რომ ეს ერი მუხლებში მოიხსუსტებდა. რაც მართალი მართალია, ჩვენთან ქალებს ასე ვერ ახურებენ. ჟან ბიენელმა, ჩემმა კარის მეზობელმა, ერთხელ მითხრა:

— Mon vieux, ათასწლიანი ისტორიით ჩვენ შევქმენით ქალი. სადილი და წიგნი; ამათში ნურავინ შეგვეცილება...

წანაკითხ წიგნებსა და ნანახ ქალაქებზე მეტად საფრანგეთი ჟან ბიენალმა შემაცნობინა — ნახმარი ავტომობილებით მოვაჭრემ. გაცნობისთანავე გამოძკითხა, სად ვსადილობდი, სად ვვახშმობდი, რომელ საროსკიპოში დავდიოდი. ჩემმა

პასუხმა კაცი პირდაპირ შეზარდა — On va refaire votre vie²...

ასეც მოვიქეცი. სადილად გადავინაცვლეთ ღვინითა და რქოსანთ საქონლით მოვაჭრეთა დუქანში — Halles aux vins-ის³ პირდაპირ. ფლოსტებში ფეხწაკრულ სოფლებს ცუგრუმელებს მოჰქონდათ წითელ საწებელში ჩაწყობილი კიბორჩხალები, ნივრითა და ქამა სოკოთი შეკმაზული შემწვარი კურდღლები და ისეთი ღვინო, სხვაგან რომ ვერ დალევდი. ბიენალი უკვეთდა, მე ვინდიდი, მაგრამ ვინდიდი იმდენს, რამდენსაც ფრანგები. იაფი არ მიჯდებოდა, მაგრამ ფასი კი ნაღდი იყო. ამდენივე მეხარჯებოდა სენტ-ლაზარის სადგურის მახლობლად მდებარე საროსკიპოშიც. ბიენალს ამ დაწესებულების მკვიდრთათვის ჩემი წარდგენა უფრო გაუჭირდა, ვიდრე პარლამენტის სხდომაზე რომ

² უნდა შევცვალოთ თქვენი ცხოვრება (ფრანგ.).

³ ღვინის ბაზარი (ფრანგ.).

¹ სასტუმრო დანტონი (ფრანგ.).



მეთხოვა დასწრება იმ დროს, როცა სამინისტრო ემხობა. შებინდებულს Porte Mailot-ზე კაფეში ვვახშობდით, სადაც ავტომობილები და მოკრივეთა მენეჯერები იკრიბებოდნენ. ჩემი მოძღვარი ერის იმ ნაწილს ეკუთვნოდა, რომელიც ავტომობილებით ვაჭრობს — სხვა ნაწილი ამ მანქანებს იცვლის. იგი რენოს აგენტი იყო და საქმე ძირითადად რუმინელ საქმოსნებთან ეჭირა, საქმოსანთაგან ყველაზე ბინძურ ხალხთან. მოცლილობის უამს ბიენალი მიხსნიდა ნახმარი მანქანების შესყიდვის ხელოვნებას. ამისათვის, მეუბნებოდა, რივიერაში უნდა ჩახვიდე სეზონის ბოლოს, როცა ინგლისელებს ეზარებათ ორი-სამი თვის ნახმარი მანქანების უკან წაყვანა. თავად ბიენალი საღებავდამსკდარ „რენოზე“ იჯდა, რომელსაც ისე მართავდა, როგორც სამოედო — ძაღლების მარხილს. კვირაობით ამ ჯართით ას ოც კილომეტრზე მივჩაყვავებდით, რუმინში, საკუთარ სისხლში მოთუშული იხვის საჭმელად. ჟერმენიც თან გვახლდა ხოლმე, ხელთათმანების გამყიდველი Rue Royale-ზე¹ მოვაჭრე მაღაზიიდან. ბიენალმა მას ოთხშაბათი და კვირა დაუნიშნა. ხუთზე მოდიოდა. მოსვლისთანავე ერთმანეთს რაღაცას წაუბუტუნებდნენ, შემდეგ მესმოდა დაცემულ სხეულთა ბაგუნი, წამოწივლება, ბოლოს კი იწყებოდა ქალის ნაზი აგონია:

— Oh, Jean²...

ჩემთვის ვანგარიშობდი ხოლმე: აი, შემოვიდა ჟერმენი, კარი მოიხურა, ერთმანეთს აკოცეს, ქალიშვილმა ქუდი, ხელთათმანები მაგიდაზე დააწყო და, ჩემი გამოთვლით, მეტი დროც აღარაფერზე რჩებოდათ, გახ-

დასაც ვერ ასწრებდნენ. ხმაამოუღებლივ პირდაპირ ქვეშაგებში გადაეშვებოდნენ კურდღლებივით. გმინვას რომ მორჩებოდნენ, მეოცსიცილით იგუდებოდნენ და თავიანთ საქმეებზე ჭუკჭუკებდნენ. მე ეს ყველაფერი ხუთი თითივით ვიცოდი, რადგანაც ერთმანეთისაგან მხოლოდ თხელი ტიხარი გვყოფდა. დაჩურჩულებაც მესმოდა: გავიგე, ჟერმენი და მაღაზიის მფლობელი ანრიში ხშირად რომ კინკლაობდნენ; ქალის მშობლები ტურში რომ ცხოვრობდნენ და ჟერმენი დროდადრო მონახულებდა ხოლმე მათ; ერთ-ერთ შაბათ დღეს რომ მან ბეწვის მოსაცმელი იყიდა, მეორე შაბათს კი გრანდოპერაში „ბოჰემას“ მოუსმინა. მოსიე ანრიში თავის გამყიდველებს აიძულებდა სადა კოსტუმი — tailleur³ ეტარებინათ. მოსიე ანრიშმა გაგვიინგლისელა ჟერმენი — უმკერდო, მოძრავ და თმააბულულებულ საქმიან ქალად გვიქცია, მაგრამ სავსე წვივები, გულიანი ტკრციალი, წყლიანი თვალების დაკვირვებული მზერა და, რაც მთავარია, გონდაკარგული გმინვა — oh, Jean! — ეს ყველაფერი ბიენალისათვის ქალმა მაინც შეინარჩუნა.

პარიზული დაისის ნაზ ბურუსსა და ოქროში ნებივრად მიცურავდა ჩვენ წინ ჟერმენის თხელი, მკვირვად ასხმული სხეული. ქალი სიცილის დროს ყელს გადაიგდებდა ხოლმე და ვარდისფერ, მარჯვე თითებს მკერდზე იხუტებდა. ასეთ დროს სიამოვნებისაგან გული მეწურებოდა. არსად არაა მარტობა ისე გაძაღლებული, როგორც პარიზში...

ეს ქალაქი მარტობით ჯვარცმანა უცხოელთათვის.

ჟერმენი ბიენალზე მეტად ჩვენ

¹ მეფის ქუჩა (ფრანგ.).

² ო, ჟან... (ფრანგ.).

³ ქალის ინგლისური კოსტუმი (ფრანგ.).



გვჭირდება-მეთქი, გამიელვებდა ხოლმე თავში. ამასობაში მარსელში გავემგზავრე. თვის თავზე პარიზში დავბრუნდი. ველოდებოდი ოთხშაბათს, რათა ჟერმენის ხმა გამეგონა.

ოთხშაბათს კედლის მიღმა სიჩუმე სუფევდა. ბიენალს დღე შეუცვლია. ქალის ხმა მხოლოდ ხუთშაბათს გაისმა, ზუსტად ხუთზე. ამჯერად ბიენალმა გახდა აცალა თავის სტუმარს. ჟერმენს თურმე ხმაც შესცვლოდა, ეს უკვე აღარ იყო სახსრებიდან გამოტანილი ვედრება *oh, Jean...* და მას მოდევნებული დუმილი, მტანჯველი დუმილი სხვისი ბედნიერებისა. ეს ყველაფერი შესცვალა შინაურულმა ბლარძუნმა, ხრიწინა წამოკივლებამ. დივანში ჩახლეწილი შეცვლილი ჟერმენი კბილებს აკრახუნებდა და მსუყე, გაწეული ბგერებს გამოსცემდა.

ქალს მოსიე ანრიშეც აღარ უჭირავია, შვიდ საათამდე იბუყბუყა და წასასვლელადაც გაემზადა. მის დასანახად კარი გამოვღრიჭე — დერეფანში მულატი ქალი მოძაგუნობდა ცხენის კუდივით გამოფსკვნილი თმითა და დიდრონი ძუძუების ქიან-ქიანით.

ბიენალს დავუკაკუნე; მოთელილი და ფერდაკარგული — უპიჯაკოდ მიგდებულიყო საწოლზე გამოხუნებული წინდებით.

— *Mon vieux*, ჟერმენი დაითხოვეთ?

— *Cette femme est folle*¹, — მიპასუხა და ტანში გაკბურძგლა. — მაგას ფეხებზე ჰკიდია, ზამთარია თუ ზაფხული, დილაა თუ საღამო; მადამუაზელ ჟერმენს ძალიან არ ენაღვლება, გიჭირს თუ გილხინს, მოგაჯდება და უნდა აჭენაო... სანამდე, ეგ მარტო მადმუაზელ ჟერმენმა იცის.

ბიენალი საწოლზე წამოჯდა, მარცხლის ტოტებში გაწლობილი წვივები ულაყლაყებდა, ოფლისაგან გაზინთულ მის თმაში სინათლე ატანდა, ნერვიულად უთრთოდა სამკუთხა ულვაშები. ოთხფრანკიანმა მაკონმა მეგობარი ოდნავ გამომიკეთა. დესერტის შემდეგ მან მხრები აიჩეჩა და თავისთვის ჩაილაპარაკა:

— რა მესიყვარულება, როცა ამქვეყნად არიან რუმინელები, თამასუქები, გაკოტრება, რესორმომტვრეული მანქანები. *Oh, j'en ai plein le dos*²...

ერთმა თლაშო კონიაკმა კაფე „დუპარიში“ იგი უკვე ხასიათზე მოიყვანა. ტერასაზე ვისხედით, თეთრი საჩრდილობლის ქვეშ. ელექტრონათურებით გაჩახჩახებულ ტროტუარზე ბრბო მიედინებოდა. ჩვენ წინ ასფალტს ნალმივით გაწეულილი მანქანა დააკვდა. იქიდან ინგლისელი დასიასამურის მოსასხამიანი დიაცი გადმოვიდნენ. სუნამოებისა და ბეწვის ზვირთებში ჩვენკენ მოცურავდა ქალის უჩვეულოდ გრძელთსხეული და მომცრო, ფაიფურისებრი კრიალა თავი. მის დანახვაზე ბიენალი წინ გადაიხარა, ფეხი აათამაშა და თვალი ისე ჩაუკრა, როგორც *Rue de la Gaîté*³-ელ კახპას. ქალმა ჩაიღიმინა, ვარდისფერი თავი ოდნავ დახარა და გველური ტანის ზღარზვნით გაუჩინარდა კარებში. მას ლიწინ-ლიწინით მიჰყვა გამტრიკინებული ინგლისელი.

— *Ah, canaille!*⁴, — აღმოხდა ბიენალს, — ორი წლის წინ ჭიქა აპერიტივზეც კისრულობდა...


ერთმანეთს გვიან დავშორდით. ჩავითქვი, შაბათს ჟერმენს გავუვლი

² ისედაც არ მაკლია თავსამტვრევი (ფრანგ.).

³ დროსტარების ქუჩა (ფრანგ.).

⁴ ეშმაკმა დალახვროს! (ფრანგ.).

¹ ეგ ქალი ნაკრავია (ფრანგ.).



და, თუ ყაბულს იქნება, თეატრში წავიყვან, შარტრშიც გავისეირნებთ-მეთქი. მაგრამ მათი ნახვა — ბიენალისა და მისი სატრფოსი — თურმე უფრო ადრე მეწერა. მეორე დღეს, მწუხრის ჟამს, ოტელ „დანტონის“ ვესტიბიულში ლურჯად აფრიალდნენ პოლიციელთა მოსასხამები. როცა დარწმუნდნენ, რომ მე მაღამ ტრიუფოს მდგმური ვიყავი, გამატარეს. ჩემს ოთახთან ჟანდარმები დამიხვდნენ. ბიენალის ნომერი გაღებულ იყო. იგი სისხლის ტბაში იწვა. ნახევრად ღია, ამღვრეულ თვალებში ქუჩური სიკვდილის ნიშანი ჩაჰყინვოდა. მისთვის ყელი გამოეჭრა — საცოდავი ბიენალისათვის — და ოსტატურადაც გამოეჭრა. Tailleur-ის კოსტუმში გამოწყობილი ჟერმენი მაგიდას უჯდა. თავის დაკვრით მომესალმა.

ეს მოხდა საღამოს ექვსზე, სიყვარულის საათზე — ყველას ჰყავდა ოთახში ქალი. ნახევრად შიშვლები, პაყებივით ბარძაყებამდე ასკვანჩულ წინდებში — ისინი წასვლამდე ნაჩქარევად იბუდრებოდნენ სარკის წინ. კარი ყველას გამოეღო, წაღებზე ზონრებშეხსნილი კაცები დერეფანში ჩაწკაპულიყვნენ. სახემიმჭკნარი იტალიელი ველოსიპედისტის ოთახში ბალიშებში ჩამხობილი ქვითინებდა ფეხშიშველა გოგო. დაბლა ჩავედი მაღამ ტრიუფოს გასაფრთხილებლად: ამ ბავშვის დედა სან-მიშელის ქუჩაზე გაზეთებსა ჰყიდდა. დიასახლისთან დანტეს ქუჩის მთელი საქალეთი შეყრილიყო. აქ იყვნენ მემწვანილეები და კონსიერჟები, წაბლითა და შემწვარი კარტოფილით მოვაჭრენი, ჩიყვიანი, გადანდალებული ხორცის გროვები, ბალნიანი, ქლოშინა, თვალდაღიბრული დედაკაცები.

— Voila qui n'est pas gai, —

ვთქვი შესვლისას, — quel malheur!
— C'est l'amour, monsieur...
Elle l'aimait²...

მაღამ ტრიუფოს ლილისფერი ძუძუები ებერებოდა, სპილოს ფეხები გაეზაჯიჯებინა, თვალები უელავდა.

— L'amore, — გაიმეორა სინიორა როკამაც, რესტორნის მფლობელმა დანტეს ქუჩაზე. — Dio corriga quelli, chi non conoseono l'amore³...

დედაკაცები შექუჩდნენ და ატატყანდნენ; ლაწვეები ციებ-ცხელებიანებივით წამოენთოთ, თვალები ლამის ბუდიდან გადმოცვენოდათ.

— L'amour, — გაიმეორა მაღამ ტრიუფომ და ზედ მომადგა, — c'est une grosse affaire, l'amour⁴...

ქუჩიდან საყვირის ხმა გაისმა, მარჯვე ხელებმა მოკლული დაბლა ჩამოარბენინეს და საავადმყოფოს კარეტაში შედეს. იგი ახლა ნომრად იქცა — საცოდავი ბიენალი — და მისი სახელი პარიზის მიქცევაში ჩაინთქა. ფანჯარას მიმდგარმა სინიორა როკამ გვამს მზერა გააყოლა. იგი ფეხმძიმედ იყო, მუცელს ძლევა მოსილად გამოენგრია სხეული; დატალულ, შემუშებულ მის პირისახეს და ყვითელ თმას მზემ გადაუარა.

— Dio, — წარმოთქვა სინიორა როკამ, — tu non perdoni quelli, chi non ama...⁵

გაცრეცილ ლათინურ კვარტალს თავს ღამე წამოემხო; ტანმოკლე

¹ აი, ვინ არის ეხლა ცოდვა! ეს რა უბედურებაა! (ფრანგ.).

² სიყვარულია ეს, ბატონო... ქალს უყვარდა იგი... (ფრანგ.).

³ სიყვარული... უფალი მიაგებს მას, ვინც სიყვარული არ იცის (იტალ.).

⁴ სიყვარული... სიყვარული, ეს დიდი რამეა... (ფრანგ.).

⁵ უფალო, შენ არ მიუტევებ მას, ვინაც სიყვარული არ იცის (იტალ.).



ბრბო მიმოიფანტა, სახლებიდან ნივრის ოხშივარმა ამოხეთქა. სიბნელემ შთანთქა მადამ ტრიუფოს სახლის გოთური ფასადი ორი სარკმლითა და სურთი დაფარული ნაკოშკარით.

საუკუნენახევრის წინ აქ დანტონი ცხოვრობდა. თავისი ფანჯრიდან იგი

უმზერდა კონსიერჟერის ციხეს, სენაზე მსუბუქად გადატყორცნილ ხიდებს, მდინარეს მიჯარულ უჩინო შენობებს და ამავე სურნელს ისუნთქავდა.

ქარი უბერავდა; კვნესოდა ჩაობებული ძელები და ალაცათის მოლაცლაცებული ბჭეები.

□

ღ ი ბ რ კ ს ო

მოთხმეტი წლისა თეატრალური „ბარიგების“ მოჭრჯულელებელი ძმობის წევრი გახლდით. ჩვენი თავკაცი კოლია შვარცი იყო, ნიადაგ თვალმოწკურული უღვაშა თაღლითი. მას იმ დათარსულ წელიწადს შევეყარი, ოდესაში იტალიური ოპერა რომ ჩაფლავდა: იმპრესარიო გაზეთის რეცენზენტებმა გააბრიყვეს, მარტოოდენ რიგიანი ანსამბლიც კმარაო, და სავასტროლოდ ანსელმო და ტიტო რუფო აღარ მოიწვია. თავად ხომ გაკოტრდა და ჩვენც ლამის მშრალზე დაგვსვა. მერმე დაგვაიმედეს, შალიაპინს მოვიწვევთო, მაგრამ მან თითო გამოსვლაში სამი ათასი მოითხოვა. მის ნაცვლად სიცილიელი ტრაგიკოსი დი გრასო გვეწვია თავის დასიანად. სასტუმროს ნაღდი ბალაგანი მოადგა: ფურგონებში ჩახლეწილი ბალღები, კატები, თუთიყუშიანი გალიები რომ დაინახა, კოლია შვარციმა ხელი ჩაიქნია:


— ამათგან არაფერი გამოდნება...

მსახიობი ჯერ ბაზარს ეწვია, შემდეგ თეატრში მობრძანდა. პირველ წარმოდგენას ორმოცდაათამდე მაყურებელი თუ დაესწრო — ნახევარ ფასადაც ვერავის შევასაღეთ ბილეთები.

იმ დღეს სიცილიური ხალხური დრამა გვიჩვენეს—ამბავი ჩვეულებრივი, ვითარცა დღე-ღამის მონაცვლეობა. მწყემსმა შეძლებული გლეხის გოგო დანიშნა. თავდაპირველად ყველაფერი უშფოთველად მიმდინარეობდა, მაგრამ ქალაქიდან ხავერდისყილეტიანი მებატონის ვაჟი ჩამობრძანდა და ქალიც ვაგლახად შეიმღვრა: ჩამოსულს რომ ელაპარაკებოდა, ხან უადგილოდ კისკისებდა და ხან ენა ებორკებოდა. ამის შემყურე მწყემსი თავს დამფრთხალი ჩიტივით ატრიალებდა. მთელი პირველი მოქმედება იგი ხან კედელს იყო აკრული, ხან სცენიდან სადღაც იკარგებოდა, ისევ ბრუნდებოდა და დადარაჯებულივით იცქირებოდა აქეთ-იქით.

— დავიბრიდეთ, — გვითხრა შესვენებაზე კოლია შვარციმა, — ეს საქონელი კრემენჩუგში თუ გასაღდება...

მეორე მოქმედების დაწყებამდე გოგო უკვე ლალატისათვის მომწიფდა: ახლა იგი სხვა ქალი იყო — ფიცხი და აცუნდრუკებული. მან ფაცატუცით უკან მიაჩეჩა საქმროს ნიშნობის ბეჭედი. მწყემსმაც ქალიშვილი წალოსთან მიიყვანა, წმინდა ქალწულის შეღებულ ქანდაკებასთან:



— სინიორა, — გულშიჩამწვდომად უთხრა თავის სიცილიურ კილოზე და პირი მოარიდა, — წმინდა ქალწულს სურს, რომ მომისმინოთ... ქალაქელ ჯოვანის წმინდა ქალწული იმდენ ქალს მისცემს, რამდენსაც ინებებს. მე კი თქვენ გარდა არავინ მინდა... მარიამ ღვთისმშობელი, ჩვენი უბიწო მფარველი, ამასვე გეტყვი, თუ რჩევას ჰკითხავთ, სინიორა...

ქალიშვილს წმინდა ქალწულისათვის ზურგი შეექცია და მწყემსის სიტყვებზე ფეხს მოუთმენლად აბაკუნებდა. არ არსებობს — ვაგლახ! — დედამიწის ზურგზე ქალი, შეშლილი რომ არ იყოს იმ წუთებში, როდესაც მისი ბედი წყდება. იგი მუდამ მარტოა ამ დროს, ქალწულ მარიამისთვის არა სცხელა და არც არაფერს ეკითხება მას...

მესამე მოქმედებაში ქალაქიდან ჩამოსულ ჯოვანის წერამ უწია. იგი სოფლის სადალაქოში იპარსებოდა, ავანსცენაზე ძლიერი მამაკაცური ფეხები წამოეყარა და სიცილიის მზე ყილღატზე ულივლივებდა. სცენაზე სოფლის ბაზრობას გვიჩვენებდნენ. შორს, კუთხეში მწყემსი იდგა. ჩუმად იდგა, მოყაყანე ბრბოთი გარშემორტყმული. შემდეგ თავჩაქინდრულმა ქედი ნელინელ გამართა და მისმა დაუინებულმა, გაღვივებულმა მხერამ ჯოვანი საგარძელში ააწრიალა. ბოლოს მან დალაქს ხელი ჰკრა, წამოხტა და პირგამომშრალმა პოლიციელს შეუყეფა, სავეჯო და პირბნელი ხალხი აქაურობას მოაცილეო. მწყემსი, ვისაც დი გრასო თამაშობდა, ჩაფიქრებული იდგა, მერმე გაიღიმა, აიწია, ოპერის სცენას გადაევიდა, ჯოვანის მხრებზე დაახტა, კბილებით ყელში ჩააფრინდა და, ცხროიანივით დაელმებული, ღრენა-ღრენით მის სისხლს

დაეწაფა. ჯოვანიმ ძირს წაართანი მოიღო. უხმაუროდ, მძიმედ დაშვებული ფარდის უკან გაუჩინარდნენ მკვლელი და მისი მსხვერპლი. რაღას უნდა დავლოდებოდით და კისრისტეხით გავცვივდით თეატრალურ შესახვევში სალაროსაკენ — იგი მეორე დღეს უნდა გაღებულიყო. ყველაზე წინ კოლია შვარცი მირეკავდა. გამთენია „ოდესის ცხელ-ცხელმა ამბებმა“ თეატრში ნამყოფ რამდენიმე ათეულ ბედნიერს აუწყა, რომ წუხელ მათ საუკუნის ყველაზე საოცარი მსახიობი იხილეს.

იმ ჩამოსვლაზე დი გრასომ ითამაშა ლირი, ოტელო, „სამოქალაქო სიკვდილში“, ტურგენევის „ხიზანში“ და ყოველი სიტყვითა და ყოველი მოძრაობით გვარწმუნებდა, რომ კეთილშობილურ ვნებათა გამძაფრებაში მეტი სიმართლე და იმედია, ვიდრე უღიმღამო კანონებში ამა სოფლისა.

ამ წარმოდგენებზე ბილეთების ფასი უბედურად ავარდა. ბარიგებზე ნამდვილი ნადირობა გაჩაღდა, მუშტრები მათ დუქნებში ეძებდნენ, — იდგა იქ ერთი გნასი და შეზარხოშებულ გადამყიდველთა უწყინარი ბილწსიტყვაობა.

თეატრალურ შესახვევში მტვრიანი, ვარდისფერი პაპანების ჭავლი შემოიჭრა. თექის ფლოსტებიანმა მედუქნეებმა ქუჩაში გამოალაგეს ღვინის მომწვანო ბოთლები და ზეთისხილის კასრები. დუქნების წინ მოთუხთუხე კარდალებში მაკარონი იხარშებოდა და მისი ოხშივარი ზეცად მიიკარგებოდა. დედაბრები, მამაკაცის ფეხსაცმელები რომ ეცვათ, ნიჟარებსა და სუვენირებს ყიდდნენ და შეჭოჭმანებულ მუშტრებს ყვირილ-ყვირილით უკან მისდევდნენ. წვეროსანი მდიდარი ებრაელები ეტლებს სას-



ტუმრო „ჩრდილოეთთან“ აყენებინებდნენ და მორიდებულად უკაკუნებდნენ კარზე შავგვრემან, ტუჩდალინდლულ ზონზროხა ქალებს, დიგრასოს დასის მსახიობებს. ყველა ბედნიერი იყო თეატრალურ შესახვევში ერთის გარდა და ეს ერთი სწორედ მე გახლდით. ვილუპებოდი და საშველი არ ჩანდა! მამაჩემს წუთიწუთზე შეეძლო მოეკითხა თავისი საათი, რომელიც უნებართვოდ ავიღე და კოლია შვარცს მივაგირავე. კოლიას ოქროს საათი გაუტკბა. ესეც არ იყოს, დილდილობით ჩაის ნაცვლად ბესარაბიული ღვინის მსმელი კაცი საათის საათის უკან დაბრუნება ძნელი გადასაწყვეტი იყო, თუმცა მისი ვალი კარგა ხნის წინ გავისტუმრე. რას იზამ, ამნაირი გუნებისა გახლდათ. მისგან არაფრით განსხვავდებოდა მამაჩემის გუნებაც. მათ შუა გაჭყლეტილს სხვათა ბედნიერებისათვის აღარ მცხელოდა. სხვა გზა არ მქონდა, კონსტანტინეპოლში უნდა გადავხვეწილიყავი. „Duke of Kent“-ის მეორე მექანიკოსთან საქმეც ჩავაწყვე, მაგრამ ზღვაში გასვლამდე გადავწყვიტე დიგრასოს გამოვმშვიდობებოდი. იგი უკანასკნელად თამაშობდა მწყემსს, რაღაც იდუმალი ძალა მიწას რომ ააწყვეტს. თეატრში მთელი იტალიური კოლონია მოვიდა მელოტი, ბრგე კონსულის მეთაურობით. აქ იყვნენ მობუზული ბერძნები, ფანატიკურად თვალგაშტერებული წვეროსანი ექსტერნები და გრძელხელება უტოჩკინი. კოლია შვარცმაც მოიყვანა ფოჩიან ლილისფერ შალში გამოხვეული თავისი მეუღლე. ეს ქალი ცირკში საჭიდაოდ იყო დაბადებული, ტრამალივით უსასრულო მის ტანს სადღაც შორს მოთელილი, ძილისაგან დაფიქვინებული პირისაზე აბოლოებდა. ფარდის დაშვებისას ეს

სახე ცრემლებით იყო მორწყული.

— მაწანწალავ, — უთხრა მან კოლიას თეატრის გამოსასვლელში, — ახლა ხომ ნახე, რაც ყოფილა სიყვარული...

მადამ შვარცი მძიმედ მიაფლატუნებდა უზარმაზარ ტერფებს ლანყერონის ქუჩაზე, მხრები უთახთახებდა, ცრემლებს დაელტო მისი მრგვალი, თევზისებრი თვალები. ნიკაპაძაგაგებულმა ქალმა მთელი ქუჩის გასაგონად ჩამოუთვალა კოლიას ის ქალები, ქმრებთან სიამტკბილობით რომ ცხოვრობენ:

— გეხუტუნეო—ეფერებიან იმათ ქმრები — გეხვანხვალე, შემოგიარე...

გაბუსუნებული კოლია მეუღლის გვერდით მიაბიჯებდა და შიგადაშიგ ჩუმად ქშინავდა. მე, ჩვეულებისამებრ, სლუკუნ-სლუკუნით მივსდევდი უკან. მადამ შვარცმა სული მოითქვა, ამ დროს ჩემი ფლიკვინი შემოესმა და ქმარს მიუტრიალდა:

— მაწანწალავ,—გადმოუქაჩა თავისი თევზის თვალები,—მიე ბავშვს საათი, ნუ გამომატყენებინებ თავს ამ შუა ქუჩაში...

კოლია შედგა, პირი დააღო, მაგრამ გონს სწრაფად მოეგო, საათი ხელში ჩამჩურთა და თანაც მწარედ მიჩქმიტა.

— სხვა რა ვიცი შენგან, — გულამომჯდარი მოსთქვამდა მადამ შვარცი და მისი ბოხი ხმა სულ უფრო და უფრო ყრუდ აღწევდა ჩემამდე,— დამაოთხებ და მაჯირითებ... როდემდე შეუძლია ქალს ლოდინი, მაწანწალავ, როდემდე?..

ცოლ-ქმარი პუშკინის ჩასახვევში თვალს მიეფარა. საათჩაბლუჯული მარტო დავრჩი და ანაზდად — ისე ნათლად, როგორც არასდროს,—დავინახე საკრებულოს შენობის ცადატყორცნილი სვეტები, ფოთლებით მოყვითლებული ბუღვარი, მთვარის



ათინათით აბრწყინებული ბრინჯაოს
პუშკინი — პირველად დავინახე ჩემ
ირგვლივ სამყარო იმგვარი, როგო-

რიც სინამდვილეში ყოფილა — მიმ-
ცხრალი და გულისმომწყვლელად
მშვენიერი.

□

კვირის დღე

ხვირისწერა დასრულ-
და; რაბინი დაღლილი
ჩაესვენა სავარძელში, შემდეგ ოთახი-
დან გამოვიდა და ხავერდგადაკრუ-
ლი მაგიდების მწკრივს გადახედა,
მუცელაჭრელებული უხსენებელი-
ვით რომ მიიკლაკნებოდა ეზო-
ში და კუდი ჰოსპიტლის ქუჩაზე გაე-
ყო. ხარბად გალობდნენ ამ მუცელზე
ფერები: ნარინჯი და წითელი ხავერ-
დი.

ახლომახლო ბინები სამხარეულოდ
გადაექციათ. გამჭვარტლული კარე-
ბიდან გიზგიზა ალი გამოკრთოდა,
ფუმფულა და მობარბაცე ცეცხლის
ალი. მის კვამლიან სხივებში ბებრუ-
ხანების სახეები, დედაკაცთა თამ-
თამა ლაბაბები და გაღვინთული ძუ-
ძუები იწვოდნენ. ადამიანთა ამ
აფუებულ, საამოდ ამყრალეზულ
ხორცების გროვას წურწურით ჩა-
მოსდიოდა ვარდისფერი ოფლი, ვარ-
დისფერი, ვითარცა ქაფი ცოფიანი
ძაღლის ლაშებზე. სამი ქალი ქვა-
ბებს დასტრიალებდა. დანარჩენი
ჭურჭელსა რეცხდა. მათ თავს ადგა
რეიზლი — თორას გრაგნილისებრ
ტრადიციული—მოციცქნილი, ოთხ-
მოცი წლის კუზიანი დედაბერი.

სანამ სუფრას მიუსხდებოდნენ,
ვიღაც უცნობი ახალგაზრდა სტუმ-
რებში გაძვრა-გამოძვრა და ბენია
კრიკი მოძებნა. მან განზე გაიყვანა
ბენია კრიკი.

— მომისმინეთ, კეისარო, — უთხრა
ახალგაზრდამ, — თქვენთან ორი დე-

რი სიტყვა მაქვს... კოსტეცკელმა ხა-
ნა ბიცოლამ გამომგზავნა...

— გისმენ, — უპასუხა ბენია კრი-
კმა, მეტსახელად კეისარმა, — რა
ორი დერი სიტყვაა?

— ხანა ბიცოლამ შემოვიტვალათ,
გუშინ უბანში ახალი ბოქაული მო-
ვიდაო...

— ეს გუშინწინ ვიცოდი, — უპა-
სუხა ბენია კრიკმა, — სხვა?!

— ბოქაულმა ძაღლები შეკრიბა
და ელაპარაკა...

— ახალი ცოცხი კარგად ჰგვის, —
თქვა ბენია კრიკმა, — გამოჭერას
გვიპირებს. სხვა?!

— ის თუ იცით, გამოჭერას რო-
დის გვიპირებთ?

— გამოჭერას ხვალ გვიპირებს.

— კეისარო, გამოჭერას დღეს გი-
პირებენ.

— ვინ გითხრა ეს, ბიჭი?

— ხანა ბიცოლამ მითხრა. იც-
ნობთ ხანა ბიცოლას?

— ვიცნობ ხანა ბიცოლას. სხვა?!

— ...ბოქაულმა ძაღლები შეკრიბა
და უთხრა: „ჩვენ ბენია კრიკი უნდა
მოვგუდოთ, იმიტომ რომ, სადაც
ხელმწიფე-იმპერატორი სუფევს, აქ
კეისრის ადგილი აღარ არის. დღეს,
როცა კრიკი დას ათხოვებს და ყვე-
ლანი მასთან იქნებიან, სწორედ
დღეს უნდა გამოვიჭიროთ“...

— სხვა?!

— ძაღლებს შეეშინდათ, უთხრეს,
დღეს რომ დავეცეთ, პურ-მარლის
დროს, ბენია გაცეცხლდება და სის-



ხლის ფასად დაგვიჯდებაო. ბოქაულ-
მა კი — მე თავმოყვარეობა უფრო
ძვირად მიღირსო...

— კარგი, წადი... — უთხრა კე-
ისარმა.

— ხანა ბიცოლას რა ვუთხრა და-
ნაბარებზე?

— უთხარი, ბენიამ დანაბარები
იცის-თქო.

ახალგაზრდა წავიდა, მას უკან მი-
ჰყვა ბენიას სამი ძმაკაცი. ნახევარ
საათში დავბრუნდებითო — დაიბა-
რეს და ნახევარ საათში მართლაც
დაბრუნდნენ. ეს იყო და ეს.

სუფრასთან არც ხნოვანების მი-
ხედვით დამსხდარან — ჩურჩუტი სი-
ბერე არანაკლებ უბადრუკია, ვიდრე
ცუნდრუკა სიყმაწვილე — და არც
ქონებისა: მძიმე ქისა ცრემლებითაა
ნაგვირისტალი.

სუფრის თავში ნეფე-დედოფალი
დასხეს — ეს მათი დღე იყო. გვერ-
დით სენდერ ეიხბაუმი, კეისრის სი-
მამრი მოკალათებულიყო — ეს კი
მისი უფლება გახლდათ. სენდერ
ეიხბაუმის ამბავი მოსაყოლად ღირს.

როგორ გახდა ბენია კრიკი, მძარ-
ცველი და მძარცველების თავკაცი.
ეიხბაუმის სიძე? როგორ დაესიძა
იგი კაცს, ვისაც არც მეტი, არც ნაკ-
ლები. სამოცი მეწველი ძროხა დაუ-
დიოდა? ერთი წლის წინ ბენიამ ეიხ-
ბაუმს წერილი მისწერა.

„მოსიე ეიხბაუმ, — წერდა იგი. —
გთხოვთ ხვალ დილით სოფლის ქუ-
ჩაზე, № 17 ჭიშკრის ქვეშ ამოსდოთ
ოცი ათასი მანეთი. თუ ამას არ
იზამთ, რაღაც საარაკო საქმეს დაგ-
მართებთ და მთელი ოდესის სალა-
პარაკოდ გაგხდით. პატივისცემით,
ბენია კრიკი“.

ამ წერილებზე, სამ ერთი-ერთმა-
ნეთზე გარკვევით ნაწერ ბარათებზე,
ეიხბაუმს ყურად არ გაუპარტყუნე-
ბია. ბენიამაც თავის საქმეს მიხედა.

ისინი ღამით მოვიდნენ: ცხრანი
იყვნენ, ხელთ ჭოკები ეპყრათ. ჭო-
კებს გაფისული ძონძები ეხვია. ცხრა
ვარსკვლავი აგიზგიზდა ეიხბაუმის
ბოსელთან. ბენიამ კლიტეები ჩა-
მოიღო და სათითაოდ გამოასხა ძრო-
ხები. საქონელს იქვე დახვდა და-
ნიანი მუტრუკი. ერთი დარტყმით
წამოაქცია მან ძროხა, შემდეგ კი
რბილად შეუცურა დანა გულში.
სისხლით მოტბორილ მიწაზე ცეცხ-
ლოვან ვარდებად აბრღვიალდნენ
ჩირაღდნები და რევოლვერმაც დაი-
ქუხა. ბენიამ სროლით გაფანტა საძ-
როხესთან მოქოთქოთე მწველავები.
ამის შემდეგ სხვებმაც დასცალგს
იარაღი ჰაერში, ვინაიდან იარაღი
თუ ჰაერში არ დასცალე, შეიძლე-
ბა კაციც შემოგაკვდეს. და მხო-
ლოდ მაშინ, როცა მეექვსე ძრო-
ხა სასიკვდილო ბლავილით აიპლა-
კა კეისრის ფერხთით, ეზოში
ნიფხვისამარა ეიხბაუმი გამოვარდა
და იკითხა:

— ბენია, რას სჩადი, თუ იცი?

— მე ის ვიცი, მოსიე ეიხბაუმ,
რომ მე თუ ფულს არ მივიღებ,
თქვენ ამათ კუდის რიქსაც ვერ მი-
იღებთ. ამას წყალი არ გაუვა...

— შინ შემოდი, ბენია.

შინ ისინი მორიგდნენ. დაკლული
საქონელი თანაბრად გაიყვეს. ეიხ-
ბაუმს კი ხელშეუხებლობის გარან-
ტია ებოძა, სათანადოდ დამოწმებუ-
ლი და ბეჭედდარტყმული. მაგრამ
სასწაული ამის შემდეგ მოხდა.

თავდასხმის დროს, იმ მრისხანე
ღამეს, როცა სიკვდილის სუნნაკრა-
ვი ძროხები ბლადნენ და დედების
სისხლზე აცურებული ხბორები ფე-
ხებს ასხმარტალებდნენ, როცა ჩი-
რაღდნები შავი ალქაჯებით იკლავ-
ნებოდნენ, მერძევე დედაკაცები კი,
ბრაუნინგთა მეგობრული მზერით
დაფეთებულნი, ცივად გაჰკიოდნენ—



იმ მრისხანე ღამეს გულამოჭრილი პერანგისამარა გამოვარდა ეზოში ბებერი ეიხბაუმის ქალიშვილი ცილია, და გამარჯვებული კეისარი დამარცხდა.

ორი დღის შემდეგ ბენიამ ყოველგვარი გაფრთხილების გარეშე ეიხბაუმს შეწერილი ფული უკლებლივ დაუბრუნა, სალამოს კი შინ ეწვია. კეისარი ნარინჯისფერ კოსტუმში გამოწყობილიყო, სამაჯურებში ბრილიანტები უელავდა. იგი შევიდა ოთახში, ეიხბაუმს მიესალმა და მისი ქალიშვილის—ცილიას ხელი სთხოვა. მოხუცს ტვინში სისხლმა აასხა, მაგრამ გაუძლო: მას ოცი წლის სიცოცხლე კიდევ ეწერა.

— მომისმინეთ, ეიხბაუმ,—უთხრა ბენიამ,— როცა თქვენ მოკვდებით, ებრაელთა პირველ სასაფლაოზე დაგმარხავთ, ზედ ჭიშკართან. ვარდისფერი მარმარილოს ძეგლს დაგიდგამთ, ეიხბაუმ! თუ მოისურვებთ, ბროდის სინაგოგის ხახამად დაგსვამ. ჩემს საქმეს შევეშვები და კომპანიონად გაგიხდებით — ორასი ძროხა გვეყოლება, თქვენ გარდა ყველა რძის ვაჭარს მოვუხაზავ. აგარაკს აგიშენებთ; საცა თქვენ იცხოვრებთ, იმ ქუჩაზე ქურდი ვერ გაიჭაჭანებს... თანაც ნუ დაგავიწყდებათ, ეიხბაუმ, რომ ყმაწვილკაცობაში არც თქვენ ბრძანებულხართ მამა აბრამის ბატკანი. ჩვენ შორის დარჩეს და, ვინ გამდიდრდა ყალბი ანდერძით? სიძედ კეისარი გვეყოლება, ეიხბაუმ, ვინმე ნაბიჭვარი კი არა, კეისარი...

და მან, ბენია კრიკმა, თავისი გაიტანა, ვინაიდან ცხელი სისხლი ჰქონდა, ცხელი სისხლი კი სამყაროს მეუფეა. ახლადშეუღლებულნი მაძღარ ბესარაბიას ეწვივნენ და სამი თვე ყურძენსა, საჭმელ-სასმელსა და სასიყვარულო ოფლში ცურავ-

დნენ. შემდეგ ბენია ოდესაში დაბრუნდა თავისი ორმოცი წლის ჩიყვიანი დის, დვოირას დასაქორწინებლად. მას შემდეგ, რაც სენდერ ეიხბაუმის ამბავი გაიგებთ, ჩვენც დაუბრუნდეთ დვოირა კრიკის, კეისრის დის, ქორწილზე.

სტუმრებს სუფრაზე მოართვეს ინდაურები, შებრაწული დედლები, ბატები, დაკეპილი თევზი და წვნიანი, საიდანაც სადაფისებრ გამოკრთოდა ლიმნის ტბები. სამეფო ჯილასავით ირწეოდა ყვავილები ბატების უსიცოცხლო თავებზე. მაგრამ განა შემწვარ ფრინველს გამორიყავს ხოლმე ოდესის ზღვის ქაფიანი ტალღები?

ყოველგვარი ნუგბარი ჩვენი კონტრაბანდისა, მზისა და მიწის შეუღლების ყველა ნაყოფი, რასაც სახელი გავარდნია კიდითი კიდე, იმ ვარსკვლავიან ღამეს თავის გამბრწუნელსა და მაცდუნებელ საქმეს აკეთებდა. უცხო ღვინო სტომაქს ახურებდა, სხეულს ტკბილად ამტვრევდა, ტვინს აბრუებდა და იწვევდა ბლოყინს — ბუკის საბრძოლო მოხმობასავით მეღერს. ზანგმა კოკმა „პლუტარქისამ“, სამი დღის წინ რომ შემოვიდა ნავსადგურში პორტ-საიდიდან, საბაჟოს ზურგს უკან გადმოატარა იამაიკური რომის ღიბიანი ბოთლები, ზეთივით ბლანტი მადერა, პირპონტ მორგანის პლანტაციისეული სიგარები და ფორთოხლები იერუსალიმის შემოგარენიდან. აი, რას გამორიყავს ხოლმე ოდესის ზღვის ქაფიანი ტალღები, აი, რას წააწყდებიან ზოგჯერ ოდესელი მათხოვრები ებრაელთა ქორწილებზე. დვოირა კრიკის ქორწილზე ისინი წააწყდნენ იამაიკურ რომს და, ღორებივით გაყეყილებმა, ყავარჩნებით ყურთასმენისწამლები ბრახუნი ასტეხეს. ეიხბაუმმა ფილეტი გაიხსნა,



თვალეზმომწყურული შეჰყურებდა ეშხში შესულ კრებულს და განცხრომით ასლოკინებდა. ორკესტრი ტუშს უკრავდა, თითქოს აღლუმიაო, მხოლოდ ტუშს — და სხვას არაფერს. ბანდიტებს, მტკიცედ შეკრულ რიგებად რომ ისხდნენ, თავდაპირველად უცხო თვალის ერიდებოდათ, მაგრამ შემდეგ თანდათან აიწყვიტეს: ლიოვკა კაცაპმა თავის საყვარელს არყის ბოთლი გადააფშვინა, მონია „არტილერისტმა“ ნაგანი ჰაერში მიუშვა. მაგრამ ღრეობამ უკანასკნელ სამანს მაშინ მიაღწია, როცა ძველებური ადათ-წესის მიხედვით ნეფე-დედოფლის დასაჩუქრება დაიწყო. მაგიდაზე შემხტარი სინაგოგის შამესები თავაწყვეტილი ტუშის ქუხილში გალობით აცხადებდნენ შემოწირული მაყუთისა და ვერცხლის კოვზების რაოდენობას. და აქ უკვე კეისრის ძმაკაცებმა უჩვენეს ქვეყანას ცისფერი სისხლისა და ძველბიჭური მარიფათის ფასი: ვერცხლის ფეშხუმებზე ისინი უდარდელი ყესტით აპნევდნენ ოქროს ფულს, ბეჭდებსა და მარჯანს.

ისინი — უბნის ძველბიჭები — ყოლოსფერ ყილეტებში გამოწკებილიყვნენ, მხრებზე ცეცხლისფერი პიჯაკები მოეგდოთ, მათ ჯანიან ბარძაყებს ლამის შემოსკდომოდა ლაყვარდისფერი ტყავის შარვლები. ასხლეტილი და მუცელგადმოგდებული ბანდიტები ტუშის ხმას ტაშს აყოლებდნენ, „გორკაო“ — ბლაოდნენ და პატარძალს ყვავილებს ესროდნენ. ის კი, ორმოცი წლის დგოირა, ბენია კრიკის და, და კეისრისა, ჩიყვისაგან თვალეზგადმოქაჩული, ბალიშების გორაზე მოკალათებულიყო გამწლიკვული, დარდისაგან დამუნჯებული ყმაწვილის გვერდით, ეიხბაუმის ფულით რომ იყო ნაყიდი.

დასაჩუქრება ის იყო მთავროდებოდა; შამესები დაოსდნენ და კონტრაბასიც ველარ მიჰყვებოდა ვიოლინოს, როცა ეზოში ტრუსის სუნმა შემოჟონა.

— ბენია, — უთხრა შვილს უფროსმა კრიკმა, მყრალი ხასიათის ძველმა მედროგემ, — ბენია, თუ მიხვდები, ცხვირში რა მილიტინებს? მე ცხვირში ჭვარტლის სუნი მილიტინებს...

— მამილო, პურ-მარილი მიიღეთ, — სთხოვა კეისარმა გატრეტილ მამას, — და ამ ბითურობას ყურადღებას ნუ მიაქცევთ.

უფროსმა კრიკმა შვილს დაუჯერა. მან პურ-მარილი მიიღო. მაგრამ კვამლის ბოლქვები სულ უფრო სწამლავდა ჰაერს. შორს ცის კიდურიც შეწითლდა და სადღაც უკვე ამოსრიალდა ცეცხლის დაშნასავით ვიწრო ენა. სტუმრები წამოიშალნენ და ჰაერი დასუნეს, დედაკაცებიც აეივჟივდნენ. მაშინ მძარცველებმაც ერთმანეთს გადახედეს. მხოლოდ ბენია არ იმჩნევდა არაფერს და თავს იკლავდა.

— ქეიფი ჩამიშალეს, — ყვიროდა სასოწარკვეთილი, — ძვირფასებო, გემუდარებით, მიიღეთ პურ-მარილი...

ამ დროს ეზოში სწორედ ის ყმაწვილი გამოჩნდა, ვინც ქეიფის დასაწყისში მოვიდა.

— კეისარო, — თქვა მან, — ორი ღერი სიტყვა მაქვს თქვენთან...

— მიდი, — ნება დართო კეისარმა, — შენ რა გამოგილევს ორ ღერ სიტყვას.

— კეისარო, — წარმოთქვა უცნობმა ახალგაზრდამ და სიცილი წასკდა, — ნაღდი სეირია, პოლიციის შენობას თაფლის სანთელივით უკიდიია.

მედუქნეებს ენა მუცელში ჩაუვარდათ, მძარცველებმა ჩაიქირქი-



სას საქმეს ძორჩა და შინისაკენ გამოემართა. პროხოროვსკის ჩასახვევთან მჭედელი ივან პიატირუბელი შემოეყარა.

— გრაჩს ვახლავარ, — უთხრა მან, — შენს ეზო-ყურეში ვილაც ქალი დაწრიალებს.

გრაჩმა გზა განაგრძო და თავის ჭიშკართან ზვინივით ქალი დაინახა, ლოყებდაბრაწული და გავასქელი.

— მამი, — დაიბუხუნა ქალმა, — მოგვდი ლოდინით, მთქნარებისაგან ყბები მეღრძო... საქმე ასეა — ტულჩინში ბებია მომიკვდა...

გრაჩი საზიდარზე წამომართულიყო და თვალეზადქცეული მისჩერებოდა ქალიშვილს.

— ნუ ხვანცალობ ცხენების წინ, — იყვირა უცებ მან. — სადავე ჩამომართვი... ცხენებს გადამირევ...

გრაჩმა შოლტი გაატლაშუნა, ბასკა ცხენს აღვირში სწვდა და თავლისკენ გაუძღვა: მერე ცხენები გამოხსნა და სამზადში დატრიალდა. ქალიშვილმა მამის პაჭიჭები თოკზე გაფინა, ქვიშით გახეხა გაჯანგრული ჩაიდან და თუჯის ქვაბით ზრაზა შეათბო.

— ნავაგში ჩამხრჩვალხართ, მამილო, — თქვა მან და ფანჯრიდან მოისროლა იატაკზე დაგდებული აქოთებული ტყაპუჭი, — მაგრამ გამოვახედებ თვალეზში აქაურობას, თუ ვყოფილვარ ქალი, — დაიქაღნა ბასკამ და მამამისს ვახშამი მიართვა.

მოხუცმა არაყი მოსვა მომინანქრებული ჩაიდნიდან და ზრაზა შეატანა, ბედნიერი ბავშვობის სურნელი რომ ასდიოდა. შემდეგ შოლტი აიღო და გარეთ გაძოვიდა. ბასკამ ფეხები მამისეულ შტიბლეტებში სტუცა, ნარინჯისფერი კაბა გადაიცვა, თავზე საბუღარივით ქუდი დაიკოსა და მოხუცს უკან გამოენტო. ქალი გარეთ, სკამზე მოკა-

ლათდა. საღამომ იმძლავრა, დამარცხებული დღის თავი ზღვაში ჩააგორა და ჰორიზონტი ჩამოასისხლა. დალნიცკიზე ვაჭრობა შეწყდა და ბანდიტები ქალაქგარეთ მოყუჩებულ იოსკა სამეულსონის საროსკიპოსკენ დაიძრნენ. ფერად-ფერად პიჯაკებში გამოწყობილი მძარცველები გასრიალებული ეკიპაჟის საფეხურს ცალი ფეხით დარდიმანდულად დაბჯენოდნენ. თვალეზადმოქაჩულებს გაწვდილი მარჯვენით პაპიროსის ქალაქში შეფუთული თაიგულები ეპყრათ. ბანდიტების ეტლები ნება-ნება მიირწეოდნენ, თითო ეკიპაჟში თითო თაიგულიანი კავალერი იჯდა, მაღალ კოფოებზე — თითქოს ქორწილიაო — ბაფთებით ყელდამშვენებული მვეტლები წამოსკუპულიყვნენ. საქალეთმა გულგრილად გააყოლა თვალი ამ ნაცნობ პროცესიას, ებრაელ დედაბრებს უკვე ყელში ამოსვლოდათ იგი. მხოლოდ მედუქნეთა და გემის ოსტატთა ვაჟები სკდებოდნენ შურით მოლდავანკის ძველბიჭების შემყურე.

მეზაყლის ვაჟს სოლომონჩიკ კაპლუნსა და მის ძმაკაც მონია „არტილერისტსაც“ სხვათა მარჯვანის ეს ელვარება თვალეზსა სჭრიდა. ორთავემ ბასკას ჩაუარეს წინ, ორნივე კაცნაგემი ქალიშვილებივით მიიკვანწებოდნენ. შემდეგ ერთმანეთს რაღაც გადაულაპარაკეს და ბასკას ხელებით ანიშნეს — ამნაირად გასამოვნებთ, თუ მოისურვებო. ბასკამაც ეს უმაღ მოისურვა, ვინაიდან იგი ერთი ყრუ, გამოუსვლელი გოგო იყო, წონით ცენტნერს უკაკუნებდა, თანაც მთელი თავისი ბავშვობა პოდოლსკის მაკლერების ვირეშმაკა მონაგართან, მოხეტიალე ბუკინისტთა და მოიჯარადეთა ვაჟებს შორის გაატარა და სოლომონჩიკ კაპლუნისთანა ჯეელი თვალითაც არ ენახა.



ამიტომ, დაინახა თუ არა კაპლუნი, შტიბლეთიანი მსხვილი ფეხები მიწას გაუსვ-გამოუსვა და დაიბუხუნა:

— მამი, შეხედე, ამ ყმაწვილს როგორი ჩასახუტუნებელი კობტა ფეფუკები აქვს...

— ეჰეი, პანი გრაჩ, — ჩაილაპარაკა იქვე მჯდომმა ბებერმა ებრაელმა, გვარად გოლუბჩიკმა, — ვგონებ, თქვენი ნუკრი ნეკერს თხოულობს...

— ჩემი სადარდებელიც ეგ იყოს, — უპასუხა ფროიმ გრაჩმა, ხელში შოლტი შეათამაშა და იმ ღამით არხეინად წაუძინა, ვინაიდან მოხუცს არ დაუჭერა. არ დაუჭერა და შეცდა. გოლუბჩიკი მართალი გამოდგა — გაქნილ მაჭანკალსა და მდიდარი მიცვალებულების ღამისმთევებს, მას სიზმარიც კი დაეჭერებოდა. ფროიმ გრაჩი შეცდა. მართალი გოლუბჩიკი გამოდგა.

ის დღე იყო და ბასკა ყოველ საღამოს მზითევს იმზადებდა გაზიზინებულ ორსულ ქალებში ჩამჯდარი. მის ჯანიან მუხლისთავეებზე ზვინ-ზვინად ეწყო ტილო. ფეხმძიმე ქალები დღითიდღე ივსებოდნენ და იბერებოდნენ, ვითარცა ჯიქანი იჭექება საძოვარზე გაზაფხულის ვარდისფერი რძით; ამ ქორდედალა ქალების ქმრები სამუშაოდან ბრუნდებოდნენ, აბურდულ წვერებს ონკანქვეშ იწურავდნენ და გზას უტევდნენ კუზიან დედაბრებს. ისინი გაპიტკინებულ შვილიშვილებს ვარცლებში ახვანჭალებდნენ, მერმე ხელისგულს მკვრივ დუნდულებზე უტკაცუნებდნენ და გაცრეცილი წინსაფრებით ამშრალეებდნენ: და ტულჩინელმა ბასკამაც იყნოსა მოლდავანკის მსუყე სურნელი, იმ მოლდავანკისა, ნიადაგ სავსე რომ იყო ძუძუთა ბავშვებით, გაფენილი სარეცხითა და დილაძდე გულდაგულ

მოჭრიალე საქორწილს სარეცლე-ბით; იყნოსა და თავადაც მოუნდა ამგვარი ცხოვრება, მაგრამ აღმოჩნდა, რომ ცალთვალა გრაჩის ქალიშვილს ხეირიანი ვინმე აო შეეძლოდა. ამის შემდეგ ქალის პირიდან სიტყვა „მამა“ აღარ ამოსულა.

— ბრუტიანო, — უხმოადა ხოლმე ვახშმად, — ბრუტიანო, მობრძანდით და ყლაპეთ...

ასე გრძელდებოდა მათამ, ვინემ ბასკამ ექვსი ღამის პერანგი და ექვსი წყვილი არშიიანი საცვალი არ შეიკერა. ბოლო ძაფი რომ ამოუყარა, ქალი მოულოდნელად წრიპინა ხმით ატირდა და გრაჩს უთხრა, აქამდე რომ ყურსაც არ აბარტყუნებდა:

— ყველა ქალიშვილს რაღაც უხარია ამ წუთისოფელში, მარტო მე ვცხოვრობ სხვისი საწყობის მოყარაულე ღამის დარაჯივით. ჩამაბარეთ პატრონს, მამილო, ვიდრე უფალს არ ჩავბარებვიარ...

გრაჩმა კარგა ხანს უსმინა ქალიშვილის წიკვინს, მეორე დღეს კი ტილოს წამოსასხამი მოიგდო მხრებზე და მებაყლე კაპლუნს ეწვია დუქანში.

კაპლუნის დუქანზე მოოქრული აბრა ბრჭყვინავდა. უკეთესი დუქანი ოდესაში არ მოიძევებოდა. შიგ მრავალი ზღვისა და ჩვენთვის უცნობი, მშვენიერი ქვეყნების სურნელი იდგა. ფარეში ბიჭი სარწყულით აგრილებდა მალაზიას და მისი ასაკისათვის ყოვლად შეუფერებელ სიმღერას ღიღინებდა. მებაყლის შვილი სოლომონჩიკი დახლში იდგა. ამ დახლზე საბერძნეთიდან შემოზიდული ზეთისხილი, მარსელის ერბო, მარცვალი ყავა, ლისაბონის მალაგა, „ფილიპ და კანოს“ ფირმის სარდინები და კაიენური პილპილი დაღანებდა. თავად ყილეტიანი კაპ-



ლუნი მზისგულზე დაძვარიყო და წითლად ახარხარებულ საზამთროს თანქლავდა; მზე თავდაუზოგავად აჭერდა მაგიდაზე გაწოლილ მის ვეება ღიბს, მაგრამ ვერაფერი დაეკლო მისთვის. ამასობაში მებაყლემ ტილოს წამოსასხამიანი გრაჩი დაინახა და ფერიფური წაუვიდა.

— დილა მშვიდობისა, მოსიე გრაჩ, — მიესალმა იგი სტუმარს და ჩაიჩოჩა, — გოლუბჩიკმა გამაფრთხილა, გესტუმრებო, და თქვენთვის გირვანქა ჩაი გადავადებინე — იშვიათი რამ საქონელი არის...

და მებაყლემ ლაპარაკი გაახურა ოდესაში ჰოლანდიიდან შემოტანილ ახალი მარკის ჩაიზე. გრაჩმა უსმინა, უსმინა და ბოლოს შეაწყვეტინა — ალალი, ნაღდი ვინმე იყო:

— ალალი, ნაღდი ვინმე ვარ, — თქვა ფროიმმა, — ჩემს ცხენებს ვუდგვივარ და შიგადაშიგ ჩემსას ვჩაღლიჩობ. ბასკას მზითევში ვატან ახალ თეთრეულს და პატარა მაყუთს, სართად აჰა. ჩემი ბებერი თავიც. ვისაც ეს ეცოტავება, ჯანდაბამდის გზა ჰქონია...

— რატომ ჯანდაბამდის, — წაილაპარაკა კაპლუნმა და მედროგის ტორს ხელი მოუთათუნა, — ამისთანა სიტყვებს ნულა გამაგონებთ, მოსიე გრაჩ. თქვენ ხომ ისეთ კაცად გიცნობთ, ვისაც შეუძლია სხვას დაეხმაროს და, სხვათა შორის, ზოგჯერ აწყენინოს კიდევ. ისიც ვიცი, რომ კრაკოველი რაბინი არა ბრძანდებით... ისე, რაღა დაგიძალოთ და, ჯერჯერობით არც მე ვგრძნობ ფრთების ამოტეხვის ღიტიხს ბეჭებზე; ეს ისე, სხვათა შორის... მაგრამ მაღამ კაპლუნს... გვყავს ჩვენ ოჯახში ასეთი დიდებული ქალი... რა სურს მაღამ კაპლუნს, ეს თავად უფალმა არ უწყის...

— მე კი ვუწყვი. — გააწყვეტინა

გრაჩმა, — მე ვიცი, რომ სოლომონჩიკს მოსწონს ბასკა, მაგრამ მაღამ კაპლუნს მე არ მოვწონვარ...

— დიახაც არ მომწონხართ, — დაიყვირა კართან მოყურადე მაღამ კაპლუნმა და აპარპალებული წამოიშართა შემინულ დახლთან, — არ მინდებხართ, გრაჩ, როგორც ტიფი, როგორც პატარძალს არ უნდა ძირმაგარა ცხვირის წვერზე. ნუ დაგავიწყდებათ, რომ ცხონებული პაპაჩვენი მებაყლე იყო, განსვენებული მამაც და ჩვენს მარაქაში უცხოს ვერ გავირევთ...

— არ გაირევთ და ნუ გაირევთ... — დაეთანხმა გრაჩი გააღმასებულ მაღამ კაპლუნს და შინისაკენ გამოსწია.

იქ მას ნარინჯისფერ კაბაში გამოპრანჭული ბასკა ელოდა. მაგრამ მოხუცს მისთვის ზედაც არ შეუხედავს, საზიდრის ქვეშ ტყაპუჭი წაიგდო და თავი მისდო დასაძინებლად. იძინა კიდევ მანამდის, სანამ ბასკას გოლიათურმა მკლავმა არ გამოათრია იქიდან.

— ბრუტიანო, — უჩვეულო ხმით წაუსისინა ქალიშვილმა. — როდემდე ვითმინო თქვენი მუდრეგ-მედროგული საქციელი... რას ჩაგიგუბებიათ პირში წყალი, ა, ბრუტიანო...

— ბასკა, — თქვა გრაჩმა. — სოლომონჩიკს უნდებარ, მაგრამ მაღამ კაპლუნს მე არ ვუნდივარ, სასიამაოდ მებაყლეს ერჩევთან.

მოხუცი ისევ მოკალათდა საზიდრის ქვეშ, ბასკა კი სიბნელეში გაუჩინარდა.

ეს ყველაფერი შაბათს მოხდა, უქმეზე; დაისმა თავისი ჩაწითლებული თვალი ირგვლივ მიმოატარა და დროგის ქვეშ მოხრიალე გრაჩს მიაბჩინა. ეს მომდურავი მზერა სინდისის ქენჯნასავით არ მოეშვა ბასკას მამას, ვინემ ზეზე არ წამოაგდო და მწვა-



ნედ მოღალანე დალნიცკის ქუჩაზე არ გაიყვანა. დალნიცკზე ჯოროსანი თათრები და თურქები მიედინებოდნენ. მათ მექა მიმოელოცათ და შინ ბრუნდებოდნენ, ორენბურგის ტრამალებსა და ამიერკავკასიაში. გემმა ისინი ოდესაში გადმოსხა და მათაც ნავსადგურიდან პირდაპირ ლიუბკა შნეივეისის, მეტსახელად — ლიუბკა კაზაკის საფუნდუკეს მიაშურეს. ზოლიან, გახეხებულ ხალათებში ლულაქაბაბივით გამოხვეულ პილიგრიმებს უდაბნოს ზინტლი და ზეთი გასდიოდათ, წინასწარმეტყველის ნეშტის თაყვანისცემის მიმანიშნებლად თათრებს ფესკებზე თეთრი პირსახოცები შემოეგრაგნათ. მლოცველებმა ლიუბკას საფუნდუკისაკენ ჩაუხვიეს, მაგრამ ჭიშკართან მოზიმზიმე ბრბოში გაეხიზნენ: იქ ქამარში ქისაგაჩრილი ლიუბკა შნეივეისი მთვრალ გლეხკაცს სცემდა და ქვაფენილზე ათრევდა: ცალ მჯიღს დაირასავით უხათქუნებდა ცხვირ-პირში, მეორეთი კი გულისპირში ჩაჰფრენოდა და წაქცევას არ ანებებდა. გლეხს ტუჩიდან და ყურისძირიდან სისხლი მოჰყონავდა; იგი ჩაფიქრებული მისჩერებოდა ლიუბკას, თითქოს ვერა სცნობსო, ბოლოს მიწას წაედღავა და ჩაიძინა. ლიუბკამ მივდებულს ბოლო წიხლი ჩააზილა და დახლს დაუბრუნდა. საფუნდუკის დარაჯმა ევზელმა ჭიშკარი მიუხურა და გზად მიმავალი ფროიმ გრაჩი შეიპატიჟა.

— გრაჩს ვახლავართ. — მიესალმა იგი, — თუ გნებავთ ნაღდ ცხოვრებას შეავლოთ თვალი, ჩვენთან შემობრძანდით, სასეირო ყელამდევა...

და დარაჯმა გრაჩი მიიყვანა კედელთან. სადაც წინა დღით ჩამოსული მლოცველები ჩამომხდარიყვნენ. მწვანეჩალმიანი მოხუცი თურქი — ფოთოლივით გამწვანებული და ფირფიცა მოხუცი თურქი ბალახზე


ესვენა, ცივი ოფლით დაცვარული, თვალებს ატრიალებდა და ხიხინებდა.

— ესეც ცხოვრებისეული დრამა ოპერიდან „თურქული ციებ-ცხელება“, — თქვა ევზელმა და გამოხუნებულ პიჯაკზე მედალი გაისწორა, — კვდება ბებერი, მაგრამ ექიმს ვინ დაგაძახებინა! რჯულში უწერიათ, მაჰმადისაგან მომავალი გზაში თუ მოკვდები, ყველაზე დიდი პატივი და იღბალია... ხალვაშ, — ჩასძახა ევზელმა სულთმობრძავს და აროხრობდა. — ექიმი მოგიყვანე, ხალვაშ, უნდა მოგარჩინოს...

თურქმა ბავშვური ძრწოლით ახედა დარაჯს და სიძულვილით სავსე მზერა მოარიდა. კმაყოფილი ევზელი — ეს რა ვიანგლეო — გრაჩს ღვინის სარდაფში ჩაუძღვა. სარდაფში ლამპები ხრჩოლავდა და მუსიკაც ჰქუხდა. წვეროსანი ბებერი ებრაელები რუმინულსა და ებრაულ სიმღერებს უკრავდნენ. მენდელ კრიკი სუფრას მისჯდომოდა, მომწვანო ჭიქიდან ღვინოს სვამდა და შვილებს, ბენიასა და ლიოვკას, აგინებდა. ჩახრინწულად, ძრწოლისმომგვრელად ხაოდა, შვილებმა დამასახიჩრესო, მეინახეებს ჩაფშვნილ კბილებს უჩვენებდა, მუცელი მოედლილია და სეირის მაყურებლებს ნაიარევზე ხელს აკიდებინებდა. ფაიფურის სახიანი ვოლინელი ცადიკები მის ზურგს უკან ატუზულიყვნენ და, თვალებადქცეულნი, უსმენდნენ მენდელ კრიკის ქიჩმაჩს. მათი აღფრთოვანება გრაჩს გულს ურევდა.

— ბრახანა ბერიკაცი, — ჩაიბურტყუნა მან და ღვინო მოატანინა. შემდეგ გრაჩმა დიასახლისი მოიხმო, ლიუბკა კაზაკი. იგი შემოსასვლელთან იგინებოდა და ზეზეულა უბერავდა არაყს.

— ამოშაქრე, — დაუყვირა მან



ბენია კრიკმაც, როგორც იქნა, გა-
ალო კატიუშას ოთახის კარი.

— მოსიე გრაჩი, — დაირცხვინა
სახეგაბრწყინებულმა ბენიამ და ზე-
წარი გადაიფარა, — სანამ ახალგაზრ-
დები ვართ, ქალი ცეცხლი გვგონია,
მაგრამ რანაირი ცეცხლია ეს, მო-
სიე გრაჩი, რაც მეტს ასხურებ, მით
უფრო ეკიდება...

ბენიამ ჩაიცვა, კატიუშას ქვეშა-
გები გაუსწორა. ბალიში აუფუშფუ-
შა და მოხუცთან ერთად ქუჩაში გა-
მოვიდა. მასლაათით მივიდნენ რუ-
სულ სასაფლაომდე და სწორედ იქ,
რუსულ სასაფლაოსთან მორიგდნენ
ბენია კრიკი და ცალთვალა გრაჩი,
ძველი ბანდიტი. მორიგდნენ, რომ
ბასკას მზითევში მოჰყვებოდა სამი
ათასი ფულად, ორი ჯიშიანი ცხენი
და მარგალიტის ყელსაბამი. იმაზეც
შეთანხმდნენ, რომ კაპლუნებს ორი
ათასი გადაეხადათ ბასკას საქმრო-
სათვის: მათ შელახეს ოჯახის თავ-
მოყვარეობა — კონსტანტინეპოლის

ზეთისხილით მოსუქებულმა კაპლუნ-
მა ფეხქვეშ გათელა ბასკას პირველი
სიყვარული — ამიტომაც ბენიამ სა-
ჭიროდ მიიჩნია, რომ ეს თანხა სა-
კუთარი ხელით ამოეღო.

— ეს მე მომანდე, მამილო, —
უთხრა მან სასიმამროს, — და ღვთის
შეწევნით ყველა მებაყლეს მოვუხა-
ზავთ...

ეს ითქვა გამთენია, ღამეც გას-
რულდა, — და აქ იწყება ახალი ამ-
ბავი, ამბავი კაპლუნთა ოჯახის დაცე-
მის, მისი ნელინელ კვდომის, ცეცხ-
ლის წაკიდებისა და ღამეული სრო-
ლების. ეს ყველაფერი კი — ამპარტა-
ვან კაპლუნთა ბედი და ბედი ქალწულ
ბასკასი გადაწყდა იმ ღამეს, როდესაც
გრაჩი და მისი მოულოდნელად მოვ-
ლენილი სასიძო რუსული სასაფლა-
ოს გაყოლებით დამასლაათობდნენ.

ბიჭები გალავანს გადაღმა ექა-
ჩებოდნენ ქალიშვილებს და ისმოდა
პრამტაპრუმტის ხმა საფლავის ლო-
დებზე.

□

ფროიმ ბრაჩი

ბრაჩას ცხრამეტ წელს
ბენია კრიკის ხალხი მო-
ხალისეთა ჯარის არიერგარდს დაეცა.
ოფიცრობას ყელი დასჭრა და ალა-
ლიც დაითრია. გასამრჯელოდ ოდესის
საბჭოს მათ სამი დღით „მოქმედების
თავისუფლება“ სთხოვეს. უარი რომ
მიიღეს, ყაჩაღებმა ჯერ იყო და ალექ-
სანდრეს პროსპექტის ყველა დუქნი-
დან მთელი ფართალი გაზიდეს, მერ-
მე კი ურთიერთკრედიტის საზოგადო-
ებას მოსდგნენ: ბანკის კართან კლი-
ენტს თავაზიანად წინ გაატარებდნენ
ხოლმე, შემდეგ კი მეარტელეებს

სთხოვდნენ, ფულითა და ძვირფასეუ-
ლობით სავსე ტომრები იმ ავტომო-
ბილში ჩაელაგებინათ, ქუჩაში რომ
იციდოდა. თვე გავიდა და ბანდიტების
დახვრეტაც დაიწყეს. ხმა დაირხა, და-
ჭვრებსა და დაპატიმრებებში ვინმე
არონ პესკინის ხელი ურევიაო. მას
სახელოსნო ჰქონდა გახსნილი,
ოღონდ რისა, კაციშვილმა ვერ გაარ-
კვია. ბინაში დაზგა ედგა — გრძელი
მანქანა ტყვიის მობრეცილი ლილ-
ვით; იატაკი ნახერხითა და ასაკინძი
მუყაოთი იყო მოფენილი.

გაზაფხულის ერთ მშვენიერ დი-



ლას პესკინს სახელოსნოში ნაცნობი ეწვია, მიშა იაბლოჩკო.

— არონ, — უთხრა სტუმარმა პესკინს, — გარეთ ხოშიანი ამინდია; ჩემი სახით შენ ისეთ ტიპთან გაქვს საქმე, ვისაც შეუძლია პატარა პურმარილი იკისროს არკადიაში. ნაღდად გაგეცინება, მაგრამ ზოგჯერ მინდა მთელი ეს ბაზარი თავიდან ამოვიგდო...

პესკინი გამოეწყო და მიშა იაბლოჩკოს გაჰყვა არკადიაში. საღამომდე დრო ატარეს. ბინდბუნდზე მიშა იაბლოჩკომ იმ ოთახში შეალაჯა, სადაც მადამ პესკინა თავის თოთხმეტი წლის გოგოს ვარცლში ახვანჭალებდა.

— გამარჯობათ, — ქუდი მოუხადა ქალს მიშამ, — არაჩვეულებრივად ვისიამოვნეთ. ჰაერია — უკეთესს ვერ ინატრებ, მაგრამ თქვენს მეუღლესთან ყოფნას ვირის დაკოდვა ჯობნებია. დიდი მომაბეზრებელი ვიღაცაა...

— ახალი ამბავი! — წამოიძახა მადამ პესკინამ, ქალიშვილს თმაში ხელი სტაცა და მიაქინჩურ-მოაქანჩურა, — სად ბრძანდება ეგ თაღლითი?

— ბაღჩაში ისვენებს.

მიშა თავაზიანად გამოემშვიდობა ქალს და წავიდა. მადამ პესკინამ კარგა ხანს უცადა ქმარს და, მის შემოსვლას რომ საშველი აღარ დაადგა, ბაღჩაში გააკითხა. პანამის ქუდჩამოფხატული მისი მეუღლე სკამის საზურგეს მიჰყრდნობოდა და იკრიჭებოდა.

— თაღლითო! — უთხრა მადამ პესკინამ, — რა გაცინებს... სისხლი გამიშრო შენმა ქალიშვილმა, თავს არ იბანს. წამობრძანდი და უთხარი რამე...

პესკინი დუმდა და კბილებს კრეჭდა.

— თახსირო! — დაიწყო მადამ პესკინამ, პანამის ფარფლქვეშ შეიჭვრიტა და იკივლა.

კივილზე მეზობლები მოცვივდნენ.

— ცოცხალი არაა, — უთხრა მათ პესკინამ, — მკვდარია.

ქალი შეცდა: თავგაჩეჩვილ პესკინს ტყვიით ორ ადგილას ჰქონდა მკერდი გახვრეტილი, მაგრამ ჯერ კიდევ ფეთქავდა. წამსვე ებრაელთა საავადმყოფოში გააქანეს. თავად ექიმმა ზილბერბერგმა გაუკეთა დაჭრილს ოპერაცია, მაგრამ პესკინს სიცოცხლე აღარ ეწერა — მაგიდაზევე დარჩა; იმავე ღამეს ჩეკამ კოლია ლიაპიდუსი და მისი ძმაკაცი, მეტსახელად „შავო“, დააპატიმრა. პირველი მიშა იაბლოჩკოს ახლდა მეეტლედ, მეორე — ეტლს არკადიაში უცდიდა ზღვის პირად, ტრამალისაკენ მიმავალ მოსახვევში. დაკითხვა დიდხანს არ გაგრძელებულა, ისინი მალე მიახვრიტეს. მხოლოდ მიშა იაბლოჩკო დაუსხლტათ ხელიდან — მის კვალს ვერ მიაგნეს. ასე რომ, კარგა ხანმა განვლო, ვიდრე ფროიმ გრაჩს სახლში მზესუმზირის გამყიდველი დედაბერი მიადგებოდა. მას მკლავი მზესუმზირით სავსე კალათში გაეყარა, ცალი წარბი აფუჩფუჩებულ ბუჩქივით აჯდა, მეორე წარბის ორიოდე ღერი კი სადღაც ქუთუთოს ქვემოთ მიკარგულიყო. ფროიმ გრაჩი თავლის წინ იჯდა და ლაჭებშუა მომწყვდევულ ბადიშს — არკადის ეთამაშებოდა. ეს ბიჭი სამი წლის წინ გამორეკა მისი ქალიშვილის — ბასკას ძალუმმა საშომ. პაპამ სალოკი თითი გაუწოდა არკადის, ისიც მოებლაუჭა, ღერძსავით ჩამოეპროწიალა და გაქან-გამოქანდა.

— შენცა ხარ, რაღა... — უთხრა შვილიშვილს ფროიმმა და თავისი ერთადერთი თვალი მიაშტერა.



მათთან მივიდა წარბაფუჩფუჩებუ-
ლი დედაბერი, რომელსაც მამა-
კაცის დაგლეჯილი შტიბლეტები
ეცვა.

— ფროიმ, — წარმოთქვა ბებრუ-
ხანამ, — მე მითქვამს, რომ ამ ხალხს
სისხლი არა აქვს. არა აქვთ სიტყვა...
ცოფიან კატებსავით გვხოცავენ,
სიკვდილის წინ ხმას არ გვაღებინე-
ბენ... ეგენი კბილებით უნდა დატკვი-
რო, მაგ ძაღლებს ღვიძლი უნდა ამო-
არიდო... ეჰ, შენ ღუმხარ, ფროიმ, —
განაგრძო მიშა იაბლოჩკომ, — ბიჭე-
ბი კი შენს სიტყვას ვუცდიოთ...

მიშა წამოდგა, კალათას მკლავი
მოუნაცვლა, ყორანა წარბი აზიდა და
გზას გაუყვა. მოედანზე, ეკლესიას-
თან, ნაწნავებიან სამ გოგონას ერთ-
მანეთისათვის წელზე ხელები მოეხ-
ვიათ და დასეირნობდნენ.

— გოგუცუნებო. — მიეალერსა
მათ მიშა იაბლოჩკო. — თქვენი სა-
კადრისით რომ გვრაფერით გაგიმას-
პინძლდებით?... — მიშამ გოგოებს
ჯიბეებში ჭიქით მზესუმზირა ჩაუპნია
და ეკლესიის უკან გაუჩინარდა.

ეზოში მარტოსულად დარჩენილ-
მა ფროიმ გრაჩმა სივრცეს მძიმედ
გაუშტერა თავისი ერთადერთი თვა-
ლი. იგი უძრავად იჯდა, ნაალაფარი
ჯორები თავლაში თივას ახრაშუნებ-
დნენ, ეზოში ნაპატიები ჭაკები და
კვიციები დაბალახობდნენ. წაბლის
ჩრდილში მედროგეები კარტს ჩას-
ჯდომოდნენ და ღროღადრო სასმელს
ეძაბრებოდნენ. ქარმა ზედიზედ ხურ-
ვილით შეასუნთქა შეთეთრებულ
კედლებს, ეზოში ცისფრად გასავა-
თებული მზე იღვრებოდა. ფროიმი წა-
მოდგა და გარეთ გამოვიდა. პროხო-
როვსკის ქუჩის სამზარეულოები ზე-
ცას კვამლის გასაცოდავებულ ფთი-
ლებს აფუტებდნენ. ფროიმმა გადაჭ-
რა საძველმანო ბაზარი, სადაც ხალხი
ტანზეშემოხვეული ფარდებით ვაჭ-

რობდა, ეკატერინეს ძეგლთან ჩაუბ-
ნია და ჩეკას შენობაში შეალაჯა.

— ფროიმი ვარ, — უთხრა კო-
მენდანტს, — უფროსთან მიმიშვი.

ჩეკას თავმჯდომარედ იმ ხანებში
მოსკოველი ვლადისლავ სიმენი იყო.
მან გამომძიებელ ბოროვიოს უხმო,
რათა ფროიმის ასავალ-დასავალი გა-
მოეკითხა.

— უბედური ჰყავს გამჩენს, —
უპასუხა ბოროვიომ, — მთელი ოდე-
სა ხელში უჭირავს...

კომენდანტმა კაბინეტში შემოა-
ყვანა უშველებელი მწითური მოხუ-
ცი. ცალთვალა და ყბანაიარევი.

— უფროსო, — თქვა შემოსვლის-
თანავე მან, — ვისზე ნადირობ, თუ
იცი? არწივებზე. საქმეს ვილასთან
დაიჭერ, უფროსო, ჩეჩმასთან?

სიმენმა ხელი უჯრისაკენ გააპარა.

— ცარიელ-ტარიელი ვარ, — ხე-
ლები გაშალა ფროიმმა, — ხელში
არაფერი მაქვს. არც ჩეჩმის ყელში
მიდევს რამე, კართანაც არავინ დამი-
ტოვებია... ჩემი ბიჭები გამოუშვი,
უფროსო, შენი ფასი თქვი...

მოხუცი სავარძელში ჩასვეს, კო-
ნიაკი მოართვეს. ბოროვიო კაბინე-
ტიდან გამოვიდა და მოსკოვიდან ჩა-
მოსული გამომძიებლები და კომის-
რები შეკრიბა.

— ერთ ტიპს გიჩვენებთ, — უო-
ხრა მათ, — მთელი ეპოპეაა. მეორეს
ეგეთს ვერ ნახავთ...

და ბოროვიო მოუყვა მათ, რომ
ბენია კრიკი კი არა, ცალთვალა
ფროიმი გახლდათ ორმოცი ათასი
ოდესელი ქურდის ნამდვილი თავკა-
ცი. მისი კვალი შენიღბული იყო,
მაგრამ ყველაფერი — ფაბრიკების და
ბანკების გატეხვა, მოხალისეთა და
მოკავშირეთა ჯარებზე დაცემა — ამ
ბებრის გეგმით ხდებოდა. ბოროვიო
მოხუცს დაელოდა, მასთან მუსაიფი
ეწადა. ფროიმი არ ჩანდა. გამომძიე-



ბელს ლოდინი მოსწყინდა და მის ძებნას შეუდგა. მთელი შენობა დაიარა, ბოლოს „სიკვდილის ჭიშკარშიც“ შეიჭვრიტა. კედელთან ბრეზენტწაფარებული ფროიმ გრაჩი ეგდო, თავზე ორი წითელარმიელი ადგა და ქალღმერთი გახვეულ თუთუნს ექაჩებოდნენ.

— ნაღდი დათვია. — უთხრა ბოროვოის ხნიერმა წითელარმიელმა, — რა ჯანი ჰქონია ამ უპატრონოს... ამისთანა ბებერი თუ არ მოკალი, თავისით მისდღემჩი არ მოკვდება. გულბოყვში ათი ვაზნა ეჯდა, მაინც კინალამ დაგვტორა...

წითელარმიელს პირისახე აუჭარხალდა, თვალები ულაპლაპებდა, კაკარდიანი ქუდი გვერდზე მოექცა.

— აჩმახებ შენაც, — შეაწყვეტიანა მეორემ, — მოკვდა და მოკვდა, როგორც სხვები, იგრე ესეც...

— რას ჰქვია სხვები, — იყვირა უფროსმა, — ზოგი იცრემლება, მუხლებზე ფორთხიალობს, ზოგს კი კრინტს ვერ დააძვრევენ... რას ჰქვია სხვები...

— ჩემთვის ყველა ერთნაირია, — ჯიუტად გაიმეორა ახალგაზრდა წითელარმიელმა, — მაგათ ვარჩევ სწორედ!..

ბოროვოი დაიხარა და გვამს ბრეზენტი წამოხადა. მოხუცის სახეს მოძრაობის ნაკვალევი შერჩენოდა.

გამომძიებელი თავის ოთახში დაბრუნდა, ატლასშემოკრულ მომრგვალო დარბაზში. იქ შეკრება მიმდინარეობდა საქმეთა წარმოების ახალ წესებზე. ვლადისლავ სიმენი ლაპარაკობდა უწიგნურად შედგენილ განაჩენებსა და ძიების ოქმებზე, იმ უწესრიგობაზე, რაც მას ადგილზე დახვდა. სიმენი მოითხოვდა, რომ გა-

მომძიებლები ჯგუფებად დაყოფილიყვნენ, იურისკონსულტებთან მომზადებულიყვნენ და საქმეები მოსკოვის მთავარი სამმართველოს მიერ დამტკიცებული ნიმუშების მიხედვით წარემართათ.

ბოროვოი თავის კუთხეში იჯდა და უსმენდა. იგი განცალკევებით იჯდა. სხვებისაგან მოშორებით. კრების შემდეგ სიმენი მასთან მივიდა და ხელი მოჰკიდა.

— გატყობ, ჩემზე დაიბოდმე, — უთხრა მან, — მაგრამ ნუ დაივიწყებ, საშა, რომ ჩვენ ხელისუფლება ვართ, სახელმწიფო ხელისუფლება...

— თქვენზე არ დავბოდმილვარ, — პირი მოარიდა ბოროვოიმ, — თქვენ ოდესელი არა ხართ... იმ ბებერთან ბევრი რამ იყო დაკავშირებული; თქვენ ამას ვერ გამიგებთ...

ისინი გვერდიგვერდ ჩამოსხდნენ, თავმჯდომარე, ვისაც ოცდახუთიც კი არ შესრულებოდა, და მისი ხელქვეითი. სიმენს ბოროვოის მარჯვენა ეჭირა და ხელს უჭერდა.

— მიპასუხე, როგორც ჩეკისტმა, — დაარღვია ღუმელი სიმენმა, — მიპასუხე, როგორც რევოლუციონერმა, განა საჭირო იყო ის კაცი მომავალი საზოგადოებისათვის?

— რა ვიცი, — მზერაგაყინული ბოროვოი გაუნძრევლად იჯდა, — ალბათ არ იყო საჭირო...

მან თავს ძალა დაატანა და მოგონებებიდან გამოერკვა. შემდეგ გუნებაგამოკეთებულმა ბოროვოიმ მოსკოვიდან ჩამოსულ ჩეკისტებს კვლავ მოუთხრო ფროიმ გრაჩის — ამ დაუნდობელი, მოუხელთებელი კაცის თავგადასავალი, მოუყვა მის საოცარ ამბებს, უკვე წარსულს რომ ჩაბარდნენ.



Xეიფე Xოისი

უღისე

ინგლისურიდან თარგმნა

წინასიტყვაობა და შენიშვნები დაურთო ნიკო ყიასაშვილმა



„კალიფსოს“ ეპიზოდს „უღისეში“ (იხ. „საუნჯე“ № 1, 1976) მოხდევს „ლოტოფაგები“, რომელიც კვლავ ლეოპოლდ ბლუმის ერთდღიანი ოდისეას გაგრძელებაა.

ბლუმის ეპიზოდებიც თანდათან ისევე იტვირთება რთული ასოციაციებითა და ცნობიერების ნაკადის სხვა ატრიბუტებით, როგორც ეს საექსპოზიციო ნაწილებში დავინახეთ (სტივენ დედალოსის პირველი სამი ეპიზოდი. იხ. „ხომლი“, № 6, 1971). რთული ასოციაციები, უამრავი ისტორიული რეალია, ლიტერატურული თუ მუსიკალური ალუზიები შესატყვისად მეტკომენტარს მოითხოვს. კომენტარების სიუხვე კი თავის მხრივ ტვირთავს, ამძიმებს ტექსტს. ბუნებრივად დაისმის კითხვა: რა ჯობია, უკომენტაროდ წაიკითხო ჯოისი და დაგრჩეს მხოლოდ ის, რისი მოტანაც შეუძლია მას დღევანდელი არაინგლისურენოვანი მკითხველისათვის, თუ გაიშიფროს, აიხსნას ის, რაც „უღისეს“ ისტორიულ-კულტურულ ფონს შეადგენს, რაზეც აიგო ეს რომანი, რაც დიდწილად აპირობებს მისი მხატვრული ფუნქციის გაგებასაც. მთარგმნელმა თავიდანვე ეს მეორე გზა აირჩია, რადგან ქართველ მკითხველს არც ქართულად და არც რუსულად არ გააჩნია ის დიდძალი კრიტიკულ-ინფორმაციული ლიტერატურა, რომელიც ჯოისის ირგვლივ არსებობს და რომელშიც „უღისეს“ კითხვისას ხშირად იხედება თვით ყველა განათლებული ინგლისელი ლიტერატორიც კი.

ამ მეხუთე ეპიზოდშიც („ლოტოფაგები“), როგორც ყოველთვის, ჰომეროსის ანალოგია მეტად პირობითია: ჯოისი იყენებს მხოლოდ ერთ მოტივს „ოდისეადან“, კერძოდ, ოდისევსისა და მის თანამგზავრთა ჩასვლას „ბალახიჭამია ლოტოფაგების ქვეყანაში“ (იხ. „ოდისეა“, თარგ. ზ. კიკნაძისა და თ. ჩხენკელის, „ნაკადული“, 1975, გვ. 141-142). ჰომეროსის ლოტოფაგები მოგზაურებს თავაზობენ ლოტოსს და ვინც მას შეჭამს, ყველაფერი ავიწყდება და შინ დაბრუნების სურვილი ეკარგება.

ამით იწყება და ამითვე მთავრდება ანალოგია. არსებითად ბლუმსა და ოდისევსს ერთმანეთთან არაფერი აკავშირებთ. თვით სიუჟეტური ანალოგიაც კი ბოლომდე არ არის მიყვანილი: ოდისევსი დაძლევს ცდუნებას და არ მიეკარება ლოტოსს, ბლუმი კი ამ ეპიზოდში სწორედ ჰომეროსისეული „ლოტოსის“ ნარკოტიკული ეფექტის ზეგავლენას განიცდის. ამას გარდა, ოდისევსი გამუდმებით იტანჯება შინ, პენელოპესთან დაბრუნების სურვილით, ბლუმი კი შინიდან მიდის სწორედ მაშინ, როცა იცის, რომ მის ცოლს საყვარელი უნდა ესტუმროს.

ჰომეროსის პოემაში ლოტოსი გაუბზარავი ბუნების, მთლიანი, ძლიერი ადამიანის საცდუნებლად მოგონილი მანია, ჯოისის პაროდულ წარმოსახვაში კი სწორედ ადამიანის შინაგანი პათოსია მოდუნებული, სწორედ ბლუმის მიზანსწრაფვაა გაუფასურებული — ადამიანური ყოფის, მისი ამქვეყნიური არსებობის არარაობის შეგრძნების გამო.

ამავე დროს, როგორც ეს წინა ეპიზოდის მიმართაც აღინიშნა (იხ. „საუნჯე“, № 1, 1976), ბლუმის „წვრილფეხობა“ თანაარსებობს ადამიანურ სითბოსთან, ბუნდოვან სურვილთან, ახლოს იყოს სხვა ადამიანთან, იპოვოს სულიერი შვილი, უპატრონოს, მოუაროს, გაათბოს იგი, ე. ი. მონახოს აზრი ადამიანური არსებობისა, რაღაცნაირი ასპარეზი მოუძებნოს ღრმად ჩამარხულ ჰუმანიზმს. ეს არის ჯოისის ძალა, ეს აძლევს მას უფლებას დამკვიდრდეს დიდ ლიტერატურაში. მეორეს მხრივ სწორედ ამ ჰუმანიტური საწყისის ღრმად „ჩამარხულობა“, იმის შეუძლებლობა, რომ იგი დიდ, მასშტაბურ, ჰეროიკულ, პათეტურ ბასიათში და მოქმედებაში გამომჟღავნდეს თუ გაიშალოს — წარმოადგენს მოდერნისტული ხელოვნების საერთოდ და კერძოდ ჯოისის „ულისეს“ პესიმისტური თვალთახედვის საფუძველსაც.

ეპიზოდის უკანასკნელი სიტყვაა „ყვავილი“. მასში თავს იყრის ჯოისისეული „ლოტოფაგების“ ყველა მინიშნება თუ სიმბოლო. ყვავილი, უპირველეს ყოვლისა, თვითონ ლეოპოლდ ბლუმის „სინონიმი“ („ბლუმ“ ინგლისურად ყვავილს ნიშნავს, ლეოპოლდის მამა-პაპათა გვარი უნგრეთში ყვავილს ნიშნავდა, მისი ფსევდონიმიც „ფლაუერ“ — ყვავილია.). ამავე დროს ამ ეპიზოდის ანალოგიაც ჰომეროსთან სწორედ „ყვავილის“ (მცენარის) მეშვეობით ხორციელდება (ბლუმი — ფლაუერი — ყვავილი — ლოტოსი).

ჰომეროსისეული „ლოტოსის ეფექტი“ (დავიწყება, ნებისყოფის მოდუნება) ამ მეხუთე ეპიზოდში ერთის მხრივ თხრობის „მეთოდით“ ან „ტექნიკით“ გამოიხატება, რასაც ჯოისმა ნარციზში უწოდა, ხოლო მეორეს მხრივ რამდენიმე ძირითადი სიმბოლოსა თუ განზოგადებული დეტალის გამოკვეთით.

სენდიმაუნტის სანაპიროზე ფიქრებში წასული სტივენის მსგავსად (მესამე ეპიზოდი — „პროტეოსი“) ბლუმიც თვითდაკვირვების თავისებურ ექსტაზშია ჩავარდნილი. ნარციზში ჯოისის რომანის კონტექსტში მორალურ, ფსიქოლოგიურ და მითიურ პლანებში წარმოიდგინება (მორალურად ნარციზში ქედმაღლობას გულისხმობს, ფსიქოლოგიურად ინფანტილიზმსა თუ შეგალომანიას, მითიურ პლანში კი — სიკვდილს) და ეს ყველაფერი ოსტატურად არის კონდენსირებული თავმოყრილი საკუთრივ „ნარციზულ“ მოტივში (ბლუმის აბაზანაში წოლისა და თავისი სხეულის ხილვით ტკბობის სურათი). „ლოტოსის ეფექტს“ ემსახურება ეპიზოდში ბოტანიკისა და ქიმიის სფეროდან ამოგლეჯილი ცოდნის კუნძულები, რაც ბლუმს დიდი ინტელექტუალური განცხრომის საშუალებას აძლევს: ბლუმმა იცის „ყვავილების ენა“ (რომელიც ყვავილი რისი სიმბოლოა, რისი მაუწყებელი), მისთვის შორეული აღმოსავლეთი „სათბურს“ წარმოადგენს, იგი ხან არქიმედის კანონს იხსენებს და ხან კი თავისუფალი ვარდნის კანონს, ხოლო აფთიაქში დახვავებული მცენარეული თუ ქიმიური წამლები მას ნარკოზის მოვლენას აგონებს. დაბოლოს ჰომეროსისეული ლოტოსის გრძნეული თვისება ჯოისის „ლოტოფაგების“ ძირითად სიმბოლოში — ზიარების რიტუალში მჟღავნდება: რელიგიური რიტუალი ადუნებს, აბრუებს, ატყუებს მორწმუნეს, ხოლო ლათინური კი მას საბოლოოდ ათავსავს.

მაგრამ ტაძარი, ზიარება მხოლოდ „ლოტოსის ეფექტისათვის“ არ ჰქირდება ჯოისს. რელიგიური მოტივი კვლავ „ულისეს“ ერთ-ერთ ყველაზე ძლიერ სიმბოლოს — ქრისტეს ამოტივტივებს: ყვავილთა შორის ყველაზე ხშირად ვარდი მოიხსენიება, ვარდს კი თორმეტფოთლოვანს ხატავდნენ ეკლესიის ვიტრაჟებზე, როგორც ქრისტესა და მისი თორმეტი მოციქულის გამოხატულებას. ბლუმის სხეული ეპიზოდის ბოლოს Corpus Christi-სავით არის ჩამბალი აბანოს აბაზანა-ბარძიმში და ზედ ზიარების წყალი გადასდის (აკი ბლუმს ეშლება კიდევ — ჰგონია, რომ ზიარების ნაწილები წყლიან ბარძიმში ყრია). დუბლინელი მეშჩანი-მოხელე, პაწია უმნიშვნელო ადამიანი იგივე ქრისტეა, სიკეთის ღმერთი, ნამდვილი ადამიანური სიკეთის და არა ყალბი საეკლესიო რიტუალის ღმერთი. იგი ამავე დროს პაროდული მინიშნებაცაა უნივერსალური სიკეთის მთესველ მამაღმერთზე, თავის სულიერ შვილს რომ დაეძებს სტივენ დედალოსის სახით.

მაინც ყველაფერი ამოა: თვითონ ბლუმიც მოდუნებულია, „ლოტოსნაჭამია“, არანამ-



დვილია. მისი ურთიერთობა მართასთან პლატონური სიყვარულის პაროდიაა, მით უფრო, რომ მას უპირისპირდება მოლისა და ბოილენის „რეალური“ ურთიერთობა. ყველაფერი მთვარეულ ყოფაშია, ყველა დუბლინის ქუჩებში მოხიარულე ჯარისკაცებივით დასიცხული დაიარება.

და ეპიზოდის ბოლოში კვლავ პაროდული აკორდი: „ყვავილის“ სიმბოლიკის გრძელი რიგი იმით მთავრდება, რომ იგი, როგორც სხეულის ნაწილის გამომხატველი მეტაფორა, ბლუმისა და მასთან ერთად მთელი დუბლინის, მთელი ირლანდიის ფიზიკურ და სულიერ იმპოტენციას მიანიშნებს.



სერ ჯონ როჯერსონის სანაპიროთი ბატონი ბლუმი მიდიოდა დინჯად, ჩაუარა სატვირთო მანქანებს, უინდმილ ლეინს, ლისკის ზეთის სახდელ ქარხანას, ფოსტა-ტელეგრაფს. შეეძლო ეს მისამართიც მიეცა¹. მეზღვაურთა თავშესაფარსაც გასცდა. სანაპიროს დილის აურზაურს თავი აარიდა და ლაიმ სტრიტით წავიდა. ბრედის კოტეჯებთან დაბახანის ქარგალი უსაქმოდ იდგა, ნარჩენების ვედრო ჯაჭვით ეჭირა და დაღეჭილი სიგარეტის ნამწვავს ქაჩავდა. უფრო პატარა გოგო კი შესცქეროდა, შუბლი ეგზემით ჰქონდა დაფუფხული და ხელში უხალისოდ ეჭირა კასრის დაბრეცილი სალტე. უთხარი, თუ მოსწევს, აღარ გაიზრდება. ეჰ, მოსწიოს, ცხოვრება იავარდით არა აქვს მოფენილი, ლუდხანებთან ატუზული დგას, რომ მა შინ წაიყვანოს. წამო სახლში დესთან, მა. ამ დროს ნაკლები მოძრაობაა: ცოტა ხალხი იქნება. ტაუნსენდის ქუჩისაკენ გაუხვია, ბეთილის პირქუშ ფასადს ჩაუარა. ილი, დიახ: ღვთისა: ალეფ, ბეთ². ნიკოლზის დამკრძალავ ბიუროსაც ჩაუარა. თერთმეტ საათზეა. საკმაოდროა. მე მგონი, კორნი კელეჰერმა ო'ნილი გააცურა. თვალეზღანუჭული მღერის. კორნი. ერთხელ შეხვდა პარკში ლამით. რა მოხდება ამით³. პოლიციის ჯაშუში. მაშინ დაფქვა თავისი გვარი და მისამართი ჩემი ტრულაილათი. ნამდვილად გააცურა. იათად ჩაფალით, რაშიც უნდა იყოს. ჩემი ტრულაილათი, ტრულა-ილა-ილათი.

უესტლენდ როუზე „ბელფასტის და აღმოსავლური ჩაის კომპანიის“ ვიტრინასთან შეჩერდა და ცინკის ქალაღლის პარკებზე იარლიყები წაიკითხა: რჩეული თაიგული, უმაღლესი ხარისხი, საოჯახო ჩაი. საკმაოდ თბილა. ჩაი. ტომ

¹ ბლუმი მიდის აბანოში, თან გზად ფოსტაში აპირებს შევლას, რათა ცოლის უჩუმრად წერილი მიიღოს. ახლა გაიფიქრა — შეეძლო ამ უფრო ახლოს მდებარე ფოსტის მისამართი მიმეცათ. მისი მარშრუტი ერთობ რთულია: ჯონის ჩვეული გულმოდგინებით იცავს სიზუსტეს დუბლინის ქუჩებისა და შენობების დასახელებისას, რაც საშუალებას იძლევა ზედმიწევნით ზუსტად დადგინდეს — რა გზით უახლოვდება ბლუმი აბანოს. მთელი ეს დატეხილი მარშრუტი დუბლინის რუკაზე გრაფიკულად ორი კითხვის ნიშნით გამოისახება.

² ბეთილი — იერუსალიმთან ახლოს მდებარე წმიდა ადგილი. ებრაულად „ბეთ“ — „სახლი“, „ილი“ — „ღვთისა“. „ალეფ“, „ბეთ“ — ებრაული ანბანის პირველი ორი ასოა. ბლუმი ჩაუვლის ბეთილის „სულის ხსნის ლაშქრის“ შენობას ლომბარდის ქუჩაზე.

³ რომელიღაც სიმღერის სიტყვები.

კერნანს¹ უნდა გამოვართვა. დასაფლავებაზე ვერ ვთხოვ, თუმცა, სანამ მისი თვალეები დინჯად განაგრძობდნენ კითხვას, ქუდი მოიხადა, მშვიდად შეისუნთქა ბრიოლინის სუნი და მარჯვენა ხელი ნელი მოძრაობით გადაისვა წარბსა და თმაზე. ცხელი დილაა. დაშვებული ქუთუთოების ქვემოდან მისმა თვალეებმა ქუდში პატარა მოკეცილი ტყავი მონახეს. უმაღლესი ხარისხის ქუდ². აქ არის. მარჯვენა ხელი ქუდში ჩაეშვა. თითებმა უცებ მოძებნეს ბარათი ტყავის ქობის ქვეშ და ჟილეტის ჯიბეში გადაიტანეს³.

როგორ თბილა. მისმა მარჯვენა ხელმა კიდევ ერთხელ უფრო ნელა გაიმეორა მოძრაობა: რჩეული თაიგული, უმაღლესი ხარისხის ცეილონის ჩაისაგან. შორეული აღმოსავლეთი. შესანიშნავი ადგილია ალბათ: მსოფლიოს ბაღი, დიდი ზანტი ფოთლები, ზედ რომ შეგიძლია იცურო, კაკტუსები, ყვავილოვანი მდელოები, გველოვან ლიანებს რომ უხმობენ. ნეტავი თუ მართლა ასეა. ეს სინგალელები მზეზე ყრიან dolce far niente-ში⁴. მთელი დღე ხელსაც არ განაძრევენ. წელიწადში ექვსი თვე სძინავთ. საჩხუბრად ნამეტანი ცხელა. ჰავის ზეგავლენა. საღათას ძილი. უსაქმურობის ყვავილები⁵. ჰაერი ყველაზე მარგებელია. აზოტი. სათბური ბოტანიკურ ბაღში. მგრძნობიარე მცენარეები⁶. წყლის შროშანები. დაქანცული ფოთლები. მთვლემარე უძლურება ჰაერში. იარე ვარდის ფურცლებზე. წარმოიდგინე, რომ ცდილობ ჯიგარი და ძროხის თავ-ფეხის ლაბა შექამო. სად არის ის უმაწვილი, იმ სურათში რომ მოგკარი თვალი? აჰ, მკვდარ ზღვაში, ზურგზე მოცურავე, წიგნს კითხულობს ქოლგაგაშლილი. ვერ ჩაძირავდი, რომ გეცადა: ისეა მარილით გაჯერებული. იმიტომ, რომ წყლის წონა. არა, წონა წყალში უდრის წონას... თუ მოცულობაა, რომ უდრის წონას? რაღაც ამის მაგვარი კანონია. ვენსი სკოლაში გვასწავლიდა, თითების ტკაცატკუცით. კოლეჯის კურიკულუმი. მოტკაცუნე კურიკულუმი, წონა რაღაა, როცა ამბობ, წონაო? ოცდათორმეტი ფუტი წამში, ერთ წამში. ვარდნილი სხეულების კანონი: ერთ წამში, ერთ წამში. ყველა მიწაზე ვარდება. დედამიწა. სწორედ დედამიწის მიზიდულობის ძალაა წონა⁷.

მიბრუნდა და ზანტად გადაჭრა ქუჩა. ის გოგო როგორ მიდიოდა ძეხვებით? აი, რაღაცნაირად. სიარულში გვერდითა ჯიბიდან დაკეცილი „ფრიმენი“

1 ტომ კერნანი ერთ-ერთი ანგლო-ირლანდიური კომპანიის აგენტია. „ულისეს“ გარდა ჯონისს გამოყვანილი ჰყავს „დუბლინელებშიც“ (მოთხ. „ღვთის წყალობა“).

2 როგორც ჩანს, ქუდის ეტიკეტი გაცრეცილია.

3 ჯონისის ჩვეული ხერხი: იგი პერსონაჟის თვალეების, ხელეებისა თუ თითების მოძრაობას ისე აღწერს, თითქოს მათ ადამიანის ნებისაგან დამოუკიდებელი „არსებობა“ გააჩნდეთ. ამით მიღწეულია გარეგნულად სტატიკური, მშვიდა, ობიექტური, ნატურალისტური სურათის ეფექტი, რაც თავის მხრივ გამოხატავს ბლუმის მექანიკურ მოძრაობას (არსებობას!). მის სომნაბულურ მდგომარეობას ამ ეპიზოდში.

4 „ნეტარ არაფერში“ (იტალ.). სინგალელები — ცეილონის მკვიდრნი.

5 ბაირონს ახალგაზრდობაში დაწერილი აქვს ლექსების კრებული „უსაქმურობის საათები“.

6 პერსი ბიში შელის აქვს ლექსი „მგრძნობიარე მცენარე“.

7 ბლუმისათვის დამახასიათებელი ფსევდო-მეცნიერული მსჯელობის ნიმუში. თუ განათლებული ინტელიგენტი სტივენ დედალოსი თავის მედიტაციებში არისტოტელეს, შექსპირს თუ ლესინგს იხსენებს, ლეობლდ ბლუმს ძლივს ყოფნის საშუალო სკოლაში და პოპულარული პრესიდან მიღებული ერუდიცია. მაგალითად, ბლუმმა პოპულარული სამეცნიერო ლიტერატურიდან იცის, რომ მკვდარი ზღვის წყალი მართლაც მარილების მაღალ პროცენტს შეიცავს და მის ზედაპირზე ადამიანის სხეული თავისუფლად ტივტივებს. (მის ფიქრებში გაულებული „კურიკულუმი“ ამ შემთხვევაში ნიშნავს „მოსამზადებელ კურსს“).



ამოიღო, გადაშალა, გრძლად დაგრაგნა და ყოველ ზანტ ნაბიჯზე შარვლის ტოტზე იცემდა. ვითომც არაფერი: უბრალოდ შემოვიარე გასაგებად. ერთ წამში, ერთ წამში. ერთ წამში ნიშნავს ყოველ წამში. ტროტუარიდან ფოსტის კარს მანვილი მზერა სტყორცნა. ყუთი დაგვიანებული ფოსტისთვის. აქ ჩააგდეთ. არავინაა. მიდი.

სადარბაზო ბარათი გაიწოდა სპილენძის ცხაურაში.

— წერილი ხომ არაფერია ჩემთვის? იკითხა.

სანამ ფოსტის მოხელე ქალი წერილების ყუთს სინჯავდა, ბლუმი ჯარში გაწვევის პლაკატს უყურებდა, ზედ ჯარის ყველა სახეობის პარადი რომ იყო გამოსახული. თან გრაგნილის წვერი ცხვირთან მიეტანა და ახლად ნაბეჭდ ქალაქს ენოსავდა. ალბათ პასუხი არ არის. იმ დღეს ნამეტანი შევტოპე. ფოსტის მოხელემ ცხაურიდან ბარათი და წერილი მოაწოდა. ბატონმა ბლუმმა მადლობა გადაუხადა და სწრაფად შეავლო თვალი კონვერტზე დაბეჭდილ მისამართს.

ჰენრი ფლაუერს¹, ესკვაირს.

მოკითხვამდე. უესტლენდ როუს საფოსტო განყოფილება.

აქვე.

მაინც მიპასუხა. ბარათი და წერილი გვერდითა ჯიბეში ჩაიციურა, თან კვლავ ჯარისკაცების პარადს ათვალიერებდა. სად არის ბებერი ტუიდის რაზმი? გადამდგარი ჯარისკაცი. აგერ: დათვის ბეწვის ქუდი და მოსართავი ბუმბული. არა, გრენადერია. აწკეპილი ყოშები. აგერ: დუბლინელი სამეფო რაზმის მსროლელი. წითელფარაჯიანები. მეტისმეტად მყვირალაა. ალბათ ქალები იმიტომ დასდევენ. ფორმა. ჯარში გაწვევასა და წრთვნას აადვილებს. მოდ გონის წერილი იმის თაობაზე, რომ მათ ღამით ოკონორის ქუჩაზე გამოჩენა აეკრძალოთ: ჩვენი ირლანდიის დედაქალაქის სირცხვილი². ართურ გრიფითის გაზეთი იმავე ხაზს ანვითარებს ახლა³: ვენერიული სნეულებისაგან დამპალი ჯარი: გამომთვრალი იმპერია. დასიცხულებს ჰგვანან: დამიზნებულებით დადიან. წინ იყურე. ერთი-ორი, ერთი-ორი. ჭამე: ამე. ძილი: ილი. მისი სამეფო უდიდებულესობისა. ცეცხლფარეშად ან პოლიციელად გამოწყობილს ვერასოდეს ნახავ. მასონად კი⁴.

ფოსტიდან ნელა გამოვიდა და მარჯვნივ გაუხვია. ლაყბობა: ვითომ საქმეს უშველიდა. ხელი ჯიბისაკენ წავიდა და საჩვენებელმა თითმა გზა გაიკვლია კონვერტის გადასაკეცთან. მიაწვა და ახია. ქალები ვითომ სიფრთხილეს არ აკლე-

¹ ფლაუერი ბლუმის მიერ მართასთან მიწერ-მოწერისათვის შერჩეული ფსევდონიმია. ინგლისურად სიტყვები „ბლუმ“ და „ფლაუერ“ ყვავილს ნიშნავს. ისიც აღსანიშნავია, რომ უნგრულად ყვავილი არის „ვირაგ“, ხოლო ბლუმის მამის ნამდვილი გვარი (ბლუმები წარმოშობით უნგრელი ებრაელები არიან) სწორედ ვირაგია. როგორც გვიან ირკვევა, ბლუმმა „ირლანდიურ დროებაში“ გამოაქვეყნა განცხადება: „გვესაჭიროება მოხდენილი მბეჭდავი ქალი, ჟენტლმენს ლიტერატურულ საქმიანობაში რომ მიეხმარება“. განცხადებას 44 ქალი გამოეხმაურა, რომელთაგან ბლუმმა მართა კლიფორდთან გამართა მიწერ-მოწერა.

² 1904 წლის მაისსა და ივნისში ირლანდიურ პრესაში მართლაც მსჯელობდნენ დუბლინის ქუჩებში ინგლისის ჯარის მოძრაობის შესახებ.

³ გაზეთს ერქვა „ირლანდიელთა ერთობა“.

⁴ იგულისხმება, რომ მეფე ედვარდ მეშვიდე (1901-10) ჯარის სხვადასხვა ნაწილების ფორმას იცვამდა ხოლმე, მაგრამ არასოდეს არ გამოწყობილა საპატიო მეხანძრედ ან პოლიციელად. გამეფებამდე 27 წლის მანძილზე იგი ინგლისელ ფრანკმასონთა ბელადი იყო.

ბენ. არა მგონია. თითებმა წერილი გამოაძვრინეს და კონვერტი ჯიბეში დაკ-
მუჭნეს. რალაცაა ზედ მიმაგრებული: იქნებ ფოტოსურათი. თმა? არა.

მაკკოი. ჩქარა მოიშორე. ხელს შემიშლის. არ მიყვარს ხალხი, როცა.

— გაუმარჯოს ბლუმს. საით?

— გაგიმარჯოს, მაკკოი. კაცმა რომ თქვას, არსაით.

— როგორ გიკითხობ?

— კარგად. თქვენ როგორ ბრძანდებით?

— ვარ რა, თქვა მაკკოიმ.

შავ ჰალსტუხს და კოსტუმს შეხედა და ჩუმი პატივისცემით იკითხა:

— რამე ხომ არ... იმედია, არაფერი შეგემთხვათ? ვხედავ, თქვენ...

— ო, არა, თქვა ბატონმა ბლუმმა. საბრალო დიგნემი, მოგეხსენებათ.

დღეს ასაფლავებენ.

— აბა, აბა, საწყალი. დიახ, დიახ, რომელ საათზე?

ეს ფოტოსურათი არ არის. იქნებ სამკერდე ნიშანია.

— თე... თერთმეტზე, უპასუხა ბატონმა ბლუმმა.

— უნდა მოვასწრო მისვლა, თქვა მაკკოიმ. მაშ თერთმეტზე? მხოლოდ წუ-
ხელ გავიგე. ვინ მითხრა? ჰოლოპენმა¹. ხომ იცნობთ ჩოლახას?

— ვიცნობ.

ბატონმა ბლუმმა ქუჩის გასწვრივ გროვენორის სახლთან მდგარ კაბრი-
ოლეტს გახედა. შვეიცარმა ჩემოდანი საბარგულზე შემოსდო. ქალი გაუნძრევ-
ლად იდგა, ელოდა, სანამ კაცი, ქმარი, ძმა, ჰგავდა, ჯიბეებს მოიფხეკდა ხურდი-
სათვის. მოხდენილი პალტო მრგვალი საყელოთი, თბილი, ასეთი დღისათვის,
საბანს ჰგავს. დგას, ვითომ არაფერიყო, ზემოდან დაკერილ ჯიბეებში ხელებ-
ჩაწყობილი. იმ ამპარტავან არსებასავით პოლოს მატჩზე. ქალები მიუკარებ-
ლები არიან, სანამ არ მიეკარები. ლამაზი ქალი და კალთამადლიანი ქალი რას
გაუყვიაო. თავს იკავებენ და მზად კი არიან, რომ ჩაბარდნენ. პატიოსანი ქალ-
ბატონი, და ბრუტუსი კი არის კაცი პატიოსანი². ერთხელ დაიპყარ და ამპარ-
ტავნობაც გაუქრება.

— ბობ დორანთან³ ერთად ვიყავი, ლოთობის მორიგი შემოტევა აქვს, და
იმასთან, რა ჰქვია, ბენტემ ლაიონზთან⁴. კონუეის ლუდხანაში ვიყავით.

დორანი, ლაიონზი კონუეის ლუდხანაში. ქალმა ხელთათმანიანი ხელი
თმასთან მიიტანა. შემოვიდა ჩოლახა. გადაკრულში. თავი უკან გადასწია და
რიდესავით ჩამოფარებული ქუთუთოების ქვემოდან⁵ დაინახა მზეზე აკრიალე-
ბული ლაიკის ყვითელი ხელთათმანები, ნაქარგი. დღეს მშვენივრად ვხედავ.
იქნებ ნესტიანი ჰაერი ხელს უწყობს შორსმხედველობას. ლაპარაკი აქეთურ-
ზე-იქითურზე. ქალბატონის ხელი. რა მხრიდან ავა?

— და მან თქვა: ეს რა დაემართა ჩვენს საბრალო მე-

¹ ჰოლოპენი ჯოისს გამოყვანილი ჰყავს მოთხრობაში „დედა“ („დუბლინელები“).

² ანტონიუსის ცნობილი სიტყვები შექსპირის „იულიუს კეისრიდან“.

³ ბობ დორანი გვხვდება მოთხრობაში „პანსიონი“ („დუბლინელები“).

⁴ მოთხრობა „სუროს დღის“ გმირი („დუბლინელები“).

⁵ დედოფალი გერტრუდი ჰამლეტს ეუბნება („ჰამლეტი“, მოქ. I, სურ. 2): „გამუდმებით ნუ
დაეძებ მიწაში შენი რიდესავით ჩამოფარებული ქუთუთოებით კეთილშობილ მამაშენს“ (შექს-
პირის მთარგმნელები, მათ შორის მაჩაბელიც, ვერ ინარჩუნებენ რიდესავით ჩამოშვებული ქუ-
თუთოების სახეს).



გობარ პედის! რომელ პედის? ვთქვი მე. საბრალო პედი დიგნემს, თქვა მან.

ქალაქგარეთ მიდიან: ბროუდსტონში ალბათ. მაღალყელიანი ყვითელი ფეხსაცმელები. ფოჩებიანი თასმები ჰკიდია. კაი ტან-ფეხი. ნეტავი მაგ ხურდას რას აცოდვილებს? დამინახა, რომ ვუყურებ. თვალი მუდამ სხვა კაცისკენ გაუბით. უკანდასახევად. შეიძლება გამოადგეს. მშვილდის სამარქაფო ისარი.

— რა რო? ვთქვი მე. რა დაემართა? ვთქვი მე.

ამაყი: მდიდარი: აბრეშუმის წინდები.

— დიახ, თქვა ბატონმა ბლუმმა.

მაკკოის მოლაპარაკე პირისახისაგან ოდნავ განზე გაიწია. ჰა-ჰა და ავა.

— რა დაემართა? თქვა მან. მოკვდა, თქვა მან. თან აიღო და დაისხა. პედი დიგნემზე ბრძანებთ? ვთქვი მე. ვერც კი დავიჯერე, როცა გავიგე. ერთად ვიყავით „ცისარტყელაში“ აი ამ პარასკევს თუ ხუთშაბათს. დიახ, თქვა მან. გაგვშორდა. ორ შაბათს მიიცვალა, საწყალი.

შეხედე! შეხედე! აბრეშუმი ელავს მდიდრული წინდები თეთრად. შეხედე! მძიმე ტრამვაი ზარის წკარუნით შუაში ჩამოუდგათ.

დაეკარგა. ჭირი შენს რახრახა მიჭყლეტილ ცხვირს. თითქოს გარეთ დასტოვესო. სამოთხე და ფერიები¹. მუდამ ასე ხდება. სწორედ მაშინ. გოგო იუსტასის ქუჩაზე სადარბაზოში, მგონი, ორშაბათს, წვივსაკრავს ისწორებდა. მეგობარი ეფარებოდა, არ გამოჩნდესო. Spirit de corps². აბა, რას მიშტერებიხარ?

— დიახ, დიახ, თქვა ბატონმა ბლუმმა და ამოიოხრა. კიდევ ერთი წავიდა ჩვენგან.

— ერთ-ერთი საუკეთესოთაგანი, თქვა მაკკოიმ.

ტრამვაიმ გაიარა. ლუბ ლაინის ხიდისკენ წავიდნენ, ქალის მდიდრული ხელთათმნიანი ხელი ფოლადის სახელურზე. ციმციმი, ციმციმი: ქუდის ბაბთის ბოლოების გაელვება მზეზე: ციმციმი, ციმ.

— ცოლი ხომ კარგად? თქვა მაკკოის შეცვლილმა ხმამ.

— ო, დიახ, თქვა ბატონმა ბლუმმა. შესანიშნავად, გმადლობთ.

დახვეული გაზეთი სასხვათაშორისოდ გახსნა და სასხვათაშორისოდ წაიკითხა:

ოჯახი რა ოჯახია,
ხორცი თუ არ აქვს მუდამ?
კონსერვიმაინც მოგქონდეს
პლამტრის დუქნიდან უნდა³.

— ჩემს მეუღლეს სწორედ ახლა დაუდეს კონტრაქტი. თუმცა ჯერ კიდევ საბოლოოდ არ არის გადაწყვეტილი.

ჩემოდანი წამოვა ისევ⁴. ვერაფერს დამაკლებს. მე არა, გმადლობთ.

¹ „სამოთხე და ფერიები“ ტომას მურის ცნობილი აღმოსავლური პოემის „ლალა რუკის“ მეორე ნაწილის სათაურია. არსებობს მისი რამდენიმე მუსიკალური დამუშავება (მათ შორის რობერტ შუმანისა).

² სოლიდარობის გრძნობა (ფრანგ.).

³ პლამტრის საკონსერვო ფირმა მართლაც არსებობდა დუბლინში, თუმცა ასეთი რეკლამა „ფრიმენ ჯორნელში“ არ გამოქვეყნებულა.

⁴ ბლუმმა მაკკოის მიიჩნევს ავანტიურისტად, ჩემოდნებს რომ თხოულობს და უკან აღარ აბრუნებს ხოლმე (მოთხრობა „ღვთის წყალობა“ „დუბლინელებში“).

ბატონმა ბლუმმა დიდრონქუთუთოებიანი თვალეზი თავშეკავებული თავა-
ზიანობით მიაპყრო.

— ჩემს ცოლსაც, თქვა მან. ოცდახუთში მღერის იმ საზეიმო საღამოზე
ალსტერ ჰოლში, ბელფასტში.

— მართლა? თქვა მაკკოიმ. დიდად მოხარული ვარ. ვინ აწყობს?

ქალბატონი მერიონ ბლუმი. ჯერ არ ამდგარა. დედოფალი ლოგინს იწვა,
მიერთმევედა პურს და ¹... უწიგნოდ. არავითარი წიგნი. ჭუჭყისაგან გაპოხილი
ბანქოს ქაღალდი ეწყობ მის თეძოსთან შვიდ-შვიდად. შავტუხა ქალბატონი და
ქერა ვაჟი. კატის ბუმბულა შავი ბურთი. კონვერტის მოხეული ზოლი.

სიმღერა
ძველი
სატრფიალო,
ისმის სიმღერა ძველი ²...

— ეს გასტროლოგიით არის, გამიგეთ? დაფიქრებით თქვა ბატონმა ბლუმმა.
„სატრფიალო“. კომიტეტი შეიქმნა. წილი და მოგება.

მაკკოიმ თავი დაუქნია და უღვაშის ბოლო მოიწიწკნა.

— ო, თქვა მან. ეს კარგი ამბავია.

წასვლა დააპირა.

— ძალიან მიხარია, რომ კარგად გრძნობთ თავს, თქვა მან. შევხვდებით
როგორმე ერთმანეთს.

— დიახ, თქვა ბატონმა ბლუმმა.

— რა უნდა გითხრათ, თქვა მაკკოიმ. იქნებ ჩემი გვარი მოგეწერათ სიაში?
მინდა დავესწრო დასაფლავებას, მაგრამ, იცით, იქნებ ვერ შევძლო. სანდი-
კოვში დამხრჩვალს ეძებენ და შესაძლოა მე და გამომძიებელს მოგვიხდეს წას-
ვლა, თუ გვამი იპოვენ ³. სადმე მოაწერეთ ჩემი გვარი, თუ ვერ მოვედი,
კარგი?

— კი, ბატონო, თქვა ბლუმმა და წასვლა დააპირა. ყველაფერი რიგზე იქ-
ნება.

— ძალიან კარგი. თქვა მაკკოიმ და სახე გაუნათდა. დიდად გმადლობთ.
უსათუოდ წამოვიდოდნი, რომ შემეძლოს. კარგად მენახეთ. ს. პ. მაკკოი სავსე-
ბით იკმარებს.

— გაკეთდება, მტკიცედ უპასუხა ბატონმა ბლუმმა.

ამ ძველ ანკესზე ვერ წამომაგო. მოსინჯა. მეც მნახა რა არიფი. ვერ მი-
ვართვი. ჩემოდანი განსაკუთრებით მიყვარს. ტყავის. ხუფწამოცმული კუთხე-
ებით, დამოქლონილი კიდევებით, სახელურიანი ორჯერადი საკეტი. ბობ კო-
ულიმ თავისი ათხოვა კლოუს რეგატის კონცერტისათვის შარშან და ის ჩე-
მოდანი დღესაც მოდის.

ბრანსუიკის ქუჩისკენ მიმავალმა ბატონმა ბლუმმა ჩაიღიმა. ჩემს მეუღლეს
სწორედ ახლა დაუდეს კონტრაქტი. წრიპინა ჭორფლიანი სოპრანო. ყველის-

¹ ზემოთ ნახსენები საბავშვო ლექსის გაგრძელება.

² წინა ეპიზოდში ნახსენები პოპულარული სიმღერა „ძველი სატრფიალო“, რომელიც
ბლუმის ცნობიერებაში მუდამ ადიულტერის გააზრების შედეგად ამოტივტივდება ხოლმე.

³ „დუბლინელების“ მიხედვით, მაკკოი ქალაქის პროკურატურაში მუშაობს და თან გან-
ცხადებებს აგროვებს გაზეთებისათვის.



ქერქა ცხვირი. თავისებურად არა უშავს რა: პატარა ბალადების შესასრულებლად. პეწი აკლია. მე და შენ, არა რო? ერთ ბედს ქვეშა ვართო. მიძვრება. მოგშლის რა. განსხვავება არ ესმის დალოცვილს? მგონია, ასეთი რამეები იცის. მე კი არ მიყვარს. ვიფიქრე, ბელფასტი იმოქმედებს-მეთქი. იმედია, იქ ყვავილმა არ იმატა. არა მგონია, მეორედ რომ ააცრევინოს. თქვენი ცოლი და ჩემი ცოლი.

ნეტავი ხომ არ მითვალთვალებს?

ბატონი ბლუმი კუთხეში იდგა და მისი თვალები ათასფრად აჭრელებულ სარეკლამო სტენდს ათვალიერებდა. კენტრელ და კოკრინის ლიმონათი (არომატული). კლერის საზაფხულო ვაჭრობა. არა, პირდაპირ წავიდა. ოჰო. ამ სალამოს „ლია“ გადის¹: ქალბატონი ბენდმენ პალმერი². კიდევ ერთხელ ვნახავდი ამ როლში. გუშინ სალამოთი ჰამლეტს თამაშობდა. კაცების როლის შემსრულებელი. იქნებ სულაც ქალი იყო³. რატომ მოიკლა თავი ოფელიამ? საწყალი მამა როგორ ყვებოდა ხოლმე კეიტ ბეიტმენზე ამ როლში!⁴ ადელფის თეატრის წინ ლონდონში მთელი დღე იდგა ხოლმე, რომ წარმოდგენაზე მოხვედრილიყო. ეს იყო ჩემს დაბადებამდე ერთი წლით ადრე: სამოცდა ხუთში. ანდა რისტორი ვენაში⁵. მოიცა, რა ჰქვია? მოზენტალისაა⁶. რაქილი, არა? არა⁷. მამა ყოველთვის იმ ადგილს იხსენებდა, ბებერი ბრმა აბრაამი ხმას რომ იცნობს და სახეზე თითებს დაადებს.

— ნათანის ხმა! მისი ვაჟის ხმა! ნათანის ხმა მესმის, ვინც ჩემს ხელში მწუხარებითა და ტანჯვით მომაკვდავი მამა მიატოვა, ვინც მამამისის სახლი მიატოვა და მამამისის ღმერთი მიატოვა.

ყოველი სიტყვა ისეთი ღრმააზროვანია, ლეოპოლდ.

საწყალი მამა! საწყალი კაცი! კიდევ კარგი, ოთახში არ შევედი და სახეზე არ დავხედე. რა დღე იყო! ო, ღმერთო! ო, ღმერთო! ფუ! ეჰ, ვინ იცის, იქნებ მისთვის უკეთესიც იყო.

¹ მეცხრამეტე საუკუნეში ამ სახელწოდების რამდენიმე პიესა დაიწერა. ბლუმი, როგორც ჩანს, გულისხმობს ამერიკელი დრამატურგის ოგუსტინ დეილის პიესას „ლია, ებრაელი ქალიშვილი“.

² თავისი დროისათვის კარგად ცნობილი მსახიობი ქალი, რომელმაც 1892 წელს პირველად შეასრულა ჰამლეტის როლი. სხვათა შორის იმავე პერიოდში იდგმებოდა „ლიაც“.

³ ედვარდ ვაინინგმა 1881 წ. ფილადელფიაში გამოსცა წიგნი „ჰამლეტის საიდუმლო“, სადაც ავტორი ამტკიცებს, რომ ჰამლეტი იყო კაცად გადაცმული ქალი (ეს „პიპოთეზა“ შემდგომ აიტაცეს ფროიდისტებმა).

⁴ კეიტ ბეიტმენი (1842-1917) — ცნობილი ანგლო-ამერიკელი მსახიობი, რომელმაც სახელი გაითქვა ლიას, ჯულიეტას, ლედი მაკბეთისა და მედეას როლების შესრულებით.

⁵ ადელაიდა რისტორი (მარკიზა კაპრანიკა დელ გრილო, 1821-1906) — ცნობილი იტალიელი მსახიობი, რომელსაც მოზენტალის „დებორაშიც“ უთამაშნია.

⁶ სოლომონ ჰერმან ფონ მოზენტალი (1821—77) — გერმანელი დრამატურგი, რომანისტი და ლიბრეტისტი. მისი „დებორა“ მეტად პოპულარული პიესა იყო და მისი რამდენიმე ინგლისური გადაკეთებაც არსებობდა (ერთ-ერთი მათგანი იყო სწორედ ოგუსტინ დეილის „ლია“).

⁷ ბლუმი ცდილობს გაიხსენოს მოზენტალის „დებორა“. რაქილის სახელი მას ორი ასოციაციით ახსენდება: ჯერ ერთი, რაქილი არის ლიას და (იხ. შესაქმე, 29, 16: „ხოლო ლაბანისნი იყუნეს ასულნი ორნი, სახელი უფროსისა ლია, და სახელი უმრწემესისა, რაქილ“), ხოლო მეორეც, „რაქილის“ ფრანგული ფორმა „რაშელ“ აგონებს ბლუმს ცნობილ ფრანგ მსახიობს რაშელს (ელიზა ფელიქსი, 1821-58), რომელსაც მაშინდელი პრესა რისტორისა და ბეიტმენის გვერდით იხსენიებდა.

ბატონმა ბლუმმა კუთხეში შეუხვია და ეტლების სადგომთან დრულ ჯაგლაგებს ჩაუარა. აღარ ღირს ამაზე ფიქრი. საჭმლის მიცემის დროა. ნეტავი იმ მაკკოს კი არ გადავყროდი.

მიუახლოვდა და ოქროსფერი შვრიის ხრაშუნი გაიგონა, ნელი წკლაპუნი. მათი დიდრონი ირმის თვალები შეჰყურებდნენ, სანამ ცხენის სასიამოვნო შარდიანი შვრიის სიმყრალეში ჩაივლიდა. მათი ელდორადო¹. საბრალო სულელები! ყველაფერი ფეხებზე ჰკიდიათ ტომარაში გრძელცხვირებ ჩარგულებს. ლაპარაკისათვის არა სცალიათ. საჭმელი და თავშესაფარი მაინც აქვთ. დაკოდილებიც არიან: ფეხებს შუა შავი გუდაპერჩის ნაგლეჯი უქანავენთ². ასეც ბედნიერებად გრძნობენ ალბათ თავს. კეთილ საბრალო არსებებს ჰგვანან. მათი ჭიხვინი მაინც შემაწუხებელია ხოლმე.

ჯიბიდან წერილი ამოიღო და გაზეთში ჩასდო. აქ შეიძლება შეეჩხოს. შესახვევი უფრო საიმედოა.

მეეტლეთა თავშესაფარს ჩაუარა³. საოცარი მოხეტიალე ცხოვრება აქვთ ამ მეეტლებს, ყოველგვარ ამინდში, ყველგან, დაქირავებულნი მთელი დღითა თუ მხოლოდ ერთ ადგილას მისასვლელად, არავითარი საკუთარი ნება. *Voglio e non*⁴. სიგარეტის მიწოდება მიყვარს ხოლმე. გულლია ხალხია. ჩავლისას ერთმანეთთან წახუმრება იციან. ჩაილიღინა:

La ci darem la mano

La la lala la la.

კამბერლენის ქუჩაზე გაუხვია, რამდენიმე ნაბიჯი გაიარა და სადგურის კედელთან ჩარდახის ქვეშ შეჩერდა. არავინაა. მიიღის ხე-ტყის საწყობი. ერთმანეთზე დაწყობილი მორები. ნანგრევები და გასაქირავებელი სახლები. ფრთხილი ნაბიჯით გადაიარა კლასებად დახაზული ეზო მიტოვებული სალკით. უშეცდომოდ⁵. ხე-ტყის საწყობთან სათამაშოდ ჩაცუცქული ბავშვი, მარტო, თითოთ აგორებდა შუშის ბურთულებს. ბრძენი ჭრელი კატა, თვალებხამხამა სფინქსი, თავისი თბილი დირედან იცქირება. აფსუს, ხელს ვუშლი. მუჰამედმა წამოსასხამის კალთა მოიჭრა, კატა რომ არ გაედვიძებინა⁶. გახსენი. ერთ დროს მეც ვთამაშობდი ამ ბურთულებით, როცა იმ ბებრუხანას სკოლაში დავდიოდი. რეზედა უყვარდა. სკოლა ქალბატონი ელისისა. და ბატონი?.. წერილი გაზეთშივე გახსნა.

ყვავილი. ეს მგონი... ყვითელი ყვავილი გაბრტყელებული ფოთლებით. ესე იგი, არ გაჯავრებულა? რას იწერება?

¹ სამხრეთ ამერიკის ზღაპრული განძის ქალაქი, ესპანელები რომ დაეძებდნენ. ამასთან „ელდორადო“ ნიშნავს „მოოქროულს“, რაც ტექსტში ეხმიანება „ოქროსფერი შვრიის ხრაშუნს“.

² უნაყოფობა, სქესობრივი იმპოტენცია ჯოისის „ლოტოფაგების“ ერთ-ერთი დაფარული, მაგრამ ამავე დროს ძირითადი მოტივია: ყველა და ყველაფერი მოღუნებულია, აქტივობის, ქმედების, ნაყოფიერების უნარს მოკლებული.

³ „ეტლების სადგომი“, „მეეტლეთა თავშესაფარი“ და ა. შ. დუბლინის რეალიებია. მათი მოძებნა ცნობარებში და სპეციალურ რუკაზეც კი შეიძლება.

⁴ „მინდა და არა“ (იტალ.). აგრეთვე მომდევნო რეფრენიც იტალიურად მოცარტის ოპერადან არის („დონ ჟუანი“).

⁵ ე. ი. ბავშვების მიერ დახაზული კლასები ისე გადაიარა, თამაშის წესი არ დაურღვევია.

⁶ ვარაუდობენ, რომ იგულისხმება მეცნიერისა და მაჰმადიანთა წმინდანის მუჰამედ იბნ ისმაილ ალ-ბუხარის მიერ მოთხრობილი ამბავი (ბუხარი გარდაიცვალა 870 წ.).

ძვირფასო ჰენრი,

მივიღე თქვენი გამოგზავნილი წერილი, რისთვისაც დიდ მადლობას მოგახსენებთ. ვწუხვარ, რომ ჩემი ბოლო წერილი არ მოგეწონათ. რატომ მიღებთ კონვერტში მარკებს? ძალიან ვბრაზობ თქვენზე. ნეტავი შემეძლოს, რომ დაგსაჯოთ ამისათვის. ცუდი ბიჭი გიწოდეთ იმიტომ, რომ ის მეორე სიტყვა არ მიყვარს. მითხარით, გეთაყვა, იმ სიტყვის ნამდვილი მნიშვნელობა. ოჯახში ბედნიერი არა ხართ, საბრალო პატარა ცუდო ბიჭო? ნეტავი შემეძლოს, რომ დაგეხმაროთ რამით. მომწერეთ, გეთაყვა, რას ფიქრობთ ჩემზე. მე ხშირად ვფიქრობ თქვენს ლამაზ სახელზე. ძვირფასო ჰენრი, როდის შევხვდებით? თქვენ არც კი იცით, რა ხშირად ვფიქრობ თქვენზე. არასოდეს ასე არ გაუტაცოვარ მამაკაცს. ამიტომ ძალიან ცუდად ვგრძნობ თავს. თუ შეიძლება, მომწერეთ გრძელი, გრძელი წერილი. იცოდეთ, თუ არ მომწერთ, დაგსჯით. ახლა თქვენ უკვე იცით, რა გელით, ცუდო ბიჭო, თუ არ მომწერთ. ო, როგორ მინდა თქვენთან შეხვედრა. ძვირფასო ჰენრი, ნუ მეტყვით უარს, სანამ მოთმინების ფიალა არ ამვსებია. მაშინ ყველაფერს გეტყვით. მაშ ხახვამდის, ცუდო ძვირფასო. დღეს ისე საშინლად მტკივა თავი და ახლავე მომწერეთ წერილი თქვენს ნაღვლიან

მართას.

P.S. შემატყობინეთ, გეთაყვა, რა სუნამოს ხმარობს თქვენი ცოლი. მინდა ვიცოდე.


ყვავილი ქინძისთავს ააგლიჯა, დაყნოსა მისი თითქმის უსუნო სურნელი და გულის ჯიბეში ჩაიდო. ყვავილების ენა¹. ქალებს მოსწონთ, რადგან ყურს ვერაფერს მიუგდებს. ანდა იქნებ მოწამლული თაიგული მის მოსაკვდინებლად. შემდეგ ნელა გააგრძელა გზა და ხელმეორედ გადაიკითხა წერილი, თან ცალკეულ სიტყვებს ბურტყუნებდა. ვბრაზობ ტიტები თქვენზე ძვირფასო კაცყვავილო დავსჯი თქვენს კაკტუსს თუ არ გეთაყვა საბრალო ცისანა როგორ მინდა იგბი თქვენთან ძვირფასო ვარდები როცა ჩვენ ძალე ანემონი შევხვდებით ყველაფერს ცუდო ღამის ყვავილი ცოლი მართას სუნამო². ბოლომდე რომ ჩაიკითხა, გაზეთიდან ამოიღო და კვლავ გვერდითა ჯიბეში ჩაიდო.

ოდნავმა სიხარულმა ბაგე გაუხსნა, გამოცვლილია პირველი წერილის შემდეგ. საინტერესოა, თვითონ თუ დაწერა. გულმოსულს თამაშობს: ჩემისთანა ოჯახიშვილს, პატიოსან ქალიშვილს. იქნებ როგორმე შევხვედროდით კვირადღეს ლოცვის შემდეგ. გმადლობთ: ვერ მოგართვით. ჩვეულებრივი სასიყვარულო დავიდარაბა. მერე გაქცევა-გამოქცევა. ისეთივე აყალმაყალით, როგორც მოლისთან. სიგარა აგრილებს. ნარკოტიკი. შემდეგში უფრო მეტს გავბედავ. ცუდო ბიჭო; დაგსჯი: რა თქმა უნდა, სიტყვების ეშინია. სასტიკი ვარ? რატომაც არა. ცდა მაინც ღირს. ყოველ ჯერზე ცოტ-ცოტა.

თითებით ისევ სინჯავდა წერილს ჯიბეში და ქინძისთავი ამოაძრო. ჩვეულებრივი ქინძისთავი, ჰმ. ქვაფენილზე გადააგდო. საიდანღაც მისი ტანსაცმე-

¹ ფლორიგრაფია: ყვავილებისათვის სხვადასხვა ტრადიციული სიმბოლური მნიშვნელობების მინიჭება.

² წერილის ცალკეული სიტყვების კითხვაში ჩართულია ბლუმის შინაგანი მონოლოგი, სადაც სხვადასხვა ყვავილების გახსენება ორაზროვან და ხშირად პიკანტურ ასოციაციებს ბადებს.



ლიდან: ქინძისთავით დამაგრებული. გასაოცარია, რამდენი ქინძისთავი
ვიათ ხოლმე. ვარდი უეკლოდ ვის გაუგონია¹.

დუბლინის ქუჩის ხმები მის თავში ყაყანებდნენ. ის ორი ბოჭი იმ სალა-
მოს კუმბიში, ერთმანეთს მიტმასნილნი წვიმაში.

მარიამ იცის ნიფხვის ტოტების
დაბმის წესი და რიგი,
ქინძისთავს მაინც ნულარ დაჰკარგავს,
რომ არ ჩავარდეს იგი².

იგი? ისინი. რა საშინლად სტკივა ქალს თავი. ალბათ თვიური აქვს. ანდა
მთელი დღე საბეჭდ მანქანას უზის. მხედველობის დაძაბვა ცუდია კუჭის ნერ-
ვებისათვის. რა სუნამოს ხმარობს თქვენი ცოლი? მოდი და ასეთი რამ მო-
იგონე!

„რომ არ ჩავარდეს იგი“.

მართა, მარიამი³. სადღაც მინახავს ეს სურათი. ახლა დამავიწყდა, ძვე-
ლი მხატვარი ანდა ნაყალბევი. ის კი ზის მათ სახლში, მუსაიფობს. იღუმალი.
ის ორი ბოჭიც კუმბიდან უსმენს.

„რომ არ ჩავარდეს იგი“.

სალამოს საამო განწყობა. არავითარი ხეტიალი. ინებივრე; წყნარი მწუხ-
რი; ჯანდაბამდის გზა ჰქონია. დაივიწყე. მოყვე იმ ადგილებზე, სადაც ყო-
ფილხარ, უჩვეულო ადათ-ჩვევებზე. მეორეს. თავზე დოქმედგმულს ვახშამი
მოჰქონდა⁴: ხილეულობა, ზეთის ხილი, ჭის შესანიშნავი ცივი წყალი, ლოდი-
ვით ცივი, როგორც ეშტაუნის კედლის ნასვრეტი⁵. ქალაღის ფინჯანი უნდა
წავიღო ხოლმე თან, როცა მარულაზე წავალ. ქალი უსმენს დიდი შავი მშვი-
დი თვალებით. მოუყევი: კიდევ და კიდევ. ყველაფერი. შემდეგ ამოიხვრა: სი-
ჩუმე. ხანგრძლივი, ხანგრძლივი, ხანგრძლივი სიმშვიდე.

რკინიგზის ხიდის ქვეშ რომ გადიოდა, კონვერტი ამოიღო, სწრაფად და-
ხია და ნაკუწები გზაზე მოფანტა. ქალაღის ნაფლეთები აფარფატდნენ, ნო-
ტიო ჰაერში ჩაიძირნენ: თეთრი ფარფატი, და მერე ყველა ჩაიძირა.

ჰენრი ფლაუერი. შეგეძლო ასევე დაგეფლითა ასი გირვანქა სტერლინგის
ჩეკი. ქალაღის უბრალო ნაგლეჯი. ლორდმა აივემ ერთხელ ირლანდიის ბან-
კში შვიდციფრიანი ჩეკით მილიონი გაანაღდა⁶. ნახე, ლუდით რა ფულის გაკე-
თება შეიძლება. და მაინც მეორე ძმას ლორდ არდილონს, ამბობენ, პერანგის
გამოცვალა დღეში ოთხჯერ უხდებო⁷. ტანზე ტილი თუ სხვა რაღაც საშინელე-

¹ მე-15 საუკუნის დროინდელი ანდაზა.

² რომელიღაც ქუჩური სიმღერის სიტყვები.

³ წერილის ავტორი მართა და სიმღერაში ნახსენები მარია ბლუმის ცნობიერებაში ბიბ-
ლიურ ასოციაციას იწვევს (იხ. სახარება ლუკასი, 10, 38-42).

⁴ „ხოლო მართა მიმოდაზრუნვიდა მრავლისა მსახურებისათვის...“ (ლუკა, 10, 40).

⁵ დუბლინის ფენიქსის პარკის ჩრდილოეთით ერთ-ერთ ადგილს გადმოცემით უკავშირებენ
საარჩევნო კომპანიის დროს მიღებულ ქრთამებს: ამომრჩეველი „კედლის ნასვრეტში“ შე-
ყოფდა ცარიელ ხელს და იქიდან ფულით სავსეს გამოიღებდა; ამის შემდეგ მას წმინდა გუ-
ლით შეეძლო დაეფიცა, რომ არ იცოდა, თუ ვისგან მიიღო ფული.

⁶ ედვარდ სესილ გინესი, აივეს გრაფი (1847—1927) ლუდის ცნობილ მწარმოებელთა
ოჯახის წარმომადგენელი იყო დუბლინში.

⁷ სერ ართურ გინესი (1840—1915) იყო პოლიტიკოსი და დუბლინის სამეფო საზოგა-
დოების პრეზიდენტი.



ბა უჩნდებაო. მილიონი გირვანქა, მოიცა. პინტა ორი პენსი, ქვარტი ოთხი პენსი, გალონი ლუდი რვა პენსი, არა, ერთი შილინგი და ოთხი პენსი გალონი ლუდი. ოცში რამდენი ერთი და ოთხია? თითქმის თხუთმეტი, დიახ, ზუსტად. თხუთმეტი მილიონი კასრი ლუდი.

რას ვამბობ, კასრები-მეთქი? გალონები. მაინც მილიონამდე კასრი გამოდის.

ქალაქში შემოსული მატარებლის ვაგონებმა გრუხუნით გადაუარეს თავზე. თავში კასრები დაუხტოდნენ: უფერული ლუდი ადგაფუნდა შიგ, აქაფდა. კასრების სარქველები ამოვარდა და უზარმაზარი უფერული ნიაღვარი გადმოსცდა, ერთიანად მოჩქეფდა, ველზე ჭანჭრობებში მოიკლაკნებოდა და ზანტად მოგროვილი სითხის მორევი ქაფის დიდრონფურცლოვან ყვავილებს ატრიალებდა.

ყველაწმიდის ღია უკანა კარს მიაღვა¹. ტაძრის კარიბჭეში რომ შედიოდა, ქუდი მოიხადა, ჯიბიდან ბარათი ამოიღო და კვლავ ტყავის ქობის ქვეშ ამოიღო. ფუი! რატომ მაკკოის მალინგარის საშვზე არ ჩამოვუგდე ლაპარაკი.

იგივე განცხადება კარზე. მისი უსამღვდლოესობის ჯონ კონმის წირვა წმიდა პედრო კლავერიისა და აფრიკული მისიის გამო². ჩინეთის მილიონების გადარჩენა³. საინტერესოა, როგორ უხსნიან ამას წარმართ ჩინელებს⁴. ერთი უნცია ოპიუმი ურჩევნიათ. ზეციურნი. საშინელი ერეტიკოსობაა მათთვის. გლედსტონის მოქცევისათვის ლოცულობდნენ, ის კი თითქმის უგონოდ იყო⁵. ასევე პროტესტანტებიც. დოქტორი უილიამ ჯ. უოლში ჭეშმარიტ რჯულზე მოვაქციოთ. მათი ღმერთი ბუდა მხარეთქოზე წამოწოლილა მუზეუმში⁶. განცხრომაშია ლოყაზე ხელშემოდებული. სურნელოვან ჩხირებს უკმევენ⁷. Ecce Homo⁸-სავით კი არა: ეკლის გვირგვინი და ჯვარი. გონივრული აზრი: წმიდა

¹ წმიდა ენდრუს ტაძარი, რომაული კათოლიკური ეკლესია უესტლენდ როუზე (ბლუმი შედის მეორე კარიბჭიდან, კამბერლენდის ქუჩიდან).

² ჯონ კონმი რეალურად არსებული პიროვნებაა (ირლანდიელი იეზუიტების თვალსაჩინო მოღვაწე). წმიდა პედრო კლავერი (1581-1654) — ესპანელი იეზუიტი მისიონერი, რომელმაც 44 წელი გაატარა სამხრეთ ამერიკაში აფრიკიდან ჩამოსახლებულ ზანგებთან. „აფრიკულ მისიაში“ იგულისხმება იეზუიტი მისიონერების ინტენსიური მოღვაწეობა აფრიკის კონტინენტზე მე-19 ს. მეორე ნახევარში.

³ დიდი წინააღმდეგობისდა მიუხედავად, იეზუიტი მისიონერები განაგრძობდნენ მოღვაწეობას ჩინეთის რამდენიმე ქალაქში.

⁴ „წარმართი ჩინელები“ — ბრეტ ჰარტის ერთ-ერთი ბალადის მიხედვით შექმნილი სიმღერის სახელწოდება.

⁵ უილიამ იუარტ გლედსტონი (1809-1898) — ინგლისის ოთხზვის პრემიერ მინისტრა. დიდად პოპულარული პიროვნება ირლანდიაში „თვითმმართველობის“ იდეის დაცვის გამო. გლედსტონის კათოლიკურ რჯულზე მოქცევა ბლუმის ფანტაზია არის, რაც ეყრდნობა დუბლინის კათოლიკე არქიეპისკოპოსის უილიამ უოლშის (1841-1921) მიერ თავის ეპარქიაში მიწერილ წერილს, სადაც უოლში მოუწოდებს კათოლიკურ ეკლესიას ილოცოს მომაკვდავი გლედსტონის სულისათვის.

⁶ ბლუმი ამ მომენტში იმყოფება დუბლინის ეროვნული გალერეის მახლობლად, სადაც მთავარ შესასვლელში ბუდას დიდი ქანდაკება იდგა.

⁷ სპეციალურად დამზადებული ჩხირები, რომლებსაც ჩინელები ნარკოტიკულ საშუალებად იყენებდნენ.

⁸ „კაცი იგი“ (ლათ.). „გამოვიდა იესო გარე, და ედგა ეკლისა გვირგვინი და ძოწეული სამოსელი. და ჰრქუა მათ პილატე: აჰა კაცი იგი!“ (იოანე, 19,5). ბლუმი შესაძლოა გულისხმობს უნგრელი მხატვრის მანკაქსის სურათს Ecce Homo, რაზეც სხვათა შორის ჯოისს დაწერილი აქვს სპეციალური ესსე.



პატრიკი და სამყურა¹. საჭმელი ჩხირები? კონმი: მარტინ კანინგემი იცნობს: კეთილშობილი გარეგნობა აქვს. ვნანობ, მაგას არ მიემართე მოლის მისაღებად გუნდში მამაო ფარლის ნაცვლად, სულელად რომ მოჰქონდა თავი. ამას ასწავლიან მაგათ. ეგეც ეგ არის, მზის სათვალეს გაიკეთებს და ოფლის ღვრით შავკანიანების მონათვლას მოჰყვება. შუშები თვალს მოსჭრით, ბზინავენ. ერთი შემახედა, როგორ ჩამომსხდარან გარშემო პუტკუნა ტუჩებით, მონუსხულნი, სმენად ქცეულნი. ნატიურმორტი. რძესავით თუ სვლეპენ მის ნათქვამს.

წმიდათაწმიდა ლოდის ცივი სურნელი უხმობდა. გაცვეთილი კიბეები აიარა, კარი შეაღო და ფრთხილად შევიდა უკანა მხრიდან.

რალაც ხდება: ძმობა². აფსუს, რა სიცარიელეა. მშვენიერი მყუდრო ადგილია, ვინმე გოგოს გვერდით რომ იჯდე. და ვინ არს მოყუას ჩემდა? ³ საათობით მიტკუცულნი ნელი მუსიკის თანხლებით. ის ქალი შუაღამეს, ჟამის წირვისას. მეშვიდე ცა⁴. დაჩოქილი ქალები, თავჩაქინდრულნი. კისერზე პირისფერ ყულფწამოცმულები⁵. მთელი წყება საკურთხეველთან ჩაჩოქილიყო. პატერმა მათ ბუტბუტით ჩაუარა, თან ის რალაც ეჭირა ხელში. თვითეულთან ჩერდებოდა, იღებდა ზიარების ნაწილებს, წვეთებს ჩამოაცლიდა (წყალში არ აწყვია? ⁶) და ქალს სათუთად პირში უღებდა. ქალის ქუდი და თავი დაიხარა. ახლა მეორეს: პატარა ბებრუხანას. პატერი დაიხარა, მისთვის პირში ზიარება რომ ჩაედო, თან გამუდმებით ბურტყუნებდა. ლათინურად⁷. ახლა შემდეგს, დახუჭე თვალები, გააღე პირი⁸. რაო? Corpus, სხეული. გვამი. კარგი მოფიქრებაა ლათინური. ჯერ გამოათაყვანებს ხოლმე. მომაკვდავთა სავანე⁹. მგონი, არც ლეჭავენ; პირდაპირ ყლაპავენ¹⁰. შესანიშნავი აზრია; გვამის ნაწილების ჭამა, რა თქმა უნდა, კაციჭამიები ამით მოიხიბლებიან.

განზე იდგა და უცურებდა, თუ როგორ ჩაივლიდნენ მათი ბრუციანი ნიღბები რიგებს შორის, თითო-თითოდ, და თავის ადგილებს ეძებდნენ. სკამთან მივიდა და კუთხეში ჩამოჯდა, ცილინდრი და გაზეთი მუხლებზე დაიდო. ამ ქოთნებს რომ ვატარებთ, ჩვენს თავებზე მორგებული ქუდები უნდა გვეხუროს. მის გარშემო აქა-იქ კვლავ თავდახრილნი ისხდნენ პირისფერი ყულფებით, ელოდნენ, როდის დაუდნებოდათ ის კუჭებში. რალაც მაცას მაგვარი: პურია

¹ ლეგენდის მიხედვით, ირლანდიის მფარველმა წმინდა პატრიკმა სამყურა ბალახი გამოიყენა, რათა ირლანდიის მეფე ლაოგერისათვის სამების იდეა განემართა.
² იგულისხმება რომაულ კათოლიკურ ეკლესიაში ჩამოყალიბებული რელიგიური ერთობა. თუ ძმობა, რომელიც ერთგულებასა და ურთიერთდახმარებას ქადაგებს.
³ მსაჯულის კითხვა მიმართული ქრისტესადმი (ლუკა, 10, 29).
⁴ პტოლომეს კოსმოლოგიის გარდა „მეშვიდე ცა“ გვხვდება ებრაელთა და მაჰმადიანთა თქმულებებში, როგორც სრულყოფილებისა და უმაღლესი ბედნიერების სიმბოლო (ღმერთის სამყოფელი).
⁵ რელიგიური ძმობის წევრები სპეციალურ თავშალსა თუ მოსასხამს ატარებდნენ. როგორც ჩანს, ჯოისის მიერ აღწერილ შემთხვევაში ძმობის წევრები თავისი საზოგადოების თუ ერთობის რეგულარულ შეკრებას ზეიმობენ.
⁶ ბლუმს ეშლება: ზიარების ნაწილები წყალში არ აწყვია.
⁷ ასეთ შემთხვევაში ლათინური ტექსტია: Corpus Domini nostri... (ხორცი უფლისა ჩვენისა...).
⁸ ინგლისური სახუმარო ლექსის სტრიქონი.
⁹ დუბლინის სამხრეთ რაიონში მდებარე კათოლიკური საქველმოქმედო საავადმყოფო უიმედო ავადმყოფებისათვის.
¹⁰ რელიგიური ადათის მიხედვით, წმიდა ნაწილებს კბილით არ უნდა შეეხო.



ასეთი: უფუებელი პურნი იგი შესაწირავთანი¹. ერთი შეხედეთ. ღმერთმანი, ბედნიერად გრძნობენ თავს. შაქარყინული. ნამდვილად. დიახ, ანგელოზების პურს ეძახიან². დიდი აზრია ამაში: შენში შიგნით თითქოს ღმერთის სასუფეველს გრძნობ. პირველი მზიარებლები. სალოკი ნაყინი. ყველას ერთ კოპწია საოჯახო წვეულებაზე წარმოუდგენია თავი, როგორც თეატრში, ყველანი ერთ პაერს სუნთქავენ. ასეა. დარწმუნებული ვარ. მარტობას ისე აღარ გრძნობენ. ჩვენს ძმობაში. იქიდან მერე ცოტა ხალისიანები გამოდიან. გამოსავალს უძებნიან დაგროვილ ენერჯიას. რაც ნამდვილად გწამს, ის არსებობს კიდევ. განკურვნი ლურდეში, დავიწყების წყლები³, და ნოკის გამოცხადება, ქანდაკებებს სისხლი სდიოდა⁴. მოხუცს აღსარების სკამთან ჩასძინებია. აი საიდან ისმის ხვრინვა. ბრმა რწმენა. დაივანა და მოვედინ სუფევად შენი⁵. ყველა ტკივილს აყუჩებს. მერმის ამ დროს გაგელვიძოს.

დაინახა, როგორ შეინახა პატერმა ბარძიმი, საგულდაგულოდ. ერთი წამით დაიჩოქა მის წინ და დიდი რუხი ლეჩო გამოაჩინა, ფოჩებიანი რალაც რომ ეცვა, იმის ქვემოდან. ქინძისთავი რომ დაკარგოდა, როგორ მოიქცეოდა. მელოტი ლაქა უკანიდან. ზურგზე ასოები ი. ნ. მ. ჰ. არა: ი. მ. კ. მოლიმ ამიხსნა, ერთხელ რომ ვკითხე: იყო მცოდველი კაცი. ანდა არა: იტანჯებოდა მუდამ კაცი⁶. პირველი? იესო ნემსებით მიბმული ჰკიდა⁷.

შევხვდეთ ერთ კვირადღეს ლოცვის შემდეგ. უარს ნუ მეტყვით. შემოვა ვუალოთ და შავი ჩანთით. ბინდბუნდი და სინათლე მის უკან⁸. შეიძლება აქ ყოფილიყო კისერზე ბაფთაშებმული და მაინც სხვა რამ გაეკეთებინა უჩუმრად. ასეთები არიან. ის ყმაწვილი, უძლეველთა საქმეში თავისიანების წინააღმდეგ რომ მისცა ჩვენება, გვარად კერი, ყოველ დილით ეზიარებოდა ხოლმე. სწორედ ამ ეკლესიაში. პიტერ კერი. არა, პიტერ კლეივერში ამერია. დენის კერი⁹. ძნელი წარმოსადგენია. ცოლისა და ექვსი შვილის პატრონი. და მაინც

¹ მათე, 12,4. ბლუმს ერთმანეთში ერევა „მაცა“ და „სეფისკვერი“, ებრაული და ქრისტიანული რელიგიური აღატები. ეს ბლუმის „უნიადგობის“, „უსახლკარობის“, მისი „უსამშობლობის“ მიმნიშნებელი კიდევ ერთი დეტალია.

² ბლუმი პირდაპირ თარგმნის ლათინურ panis angelorum-ს, რაც წმიდა ზიარების სინონიმია.

³ ლურდე სამხრეთ საფრანგეთში მდებარე კათოლიკე პილიგრიმების უძველესი სამკურნალო ადგილია, სადაც 1858 წ., გადმოცემის თანახმად, 14 წლის გოგონას ღვთისმშობელი გამოეცხადა. „დავიწყების წლები“ — ყველაფრის განკურვნის ძალა რომ აქვთ.

⁴ ნოკი — დასავლეთ ირლანდიის სოფელი, სადაც 1879 წ., გადმოცემის თანახმად, რამდენიმე კაცს ქანდაკების მსგავსი ღვთისმშობელი და მოციქულები გამოეცხადნენ. ამის შემდეგ ამ ადგილს სასწაულებრივი სამკურნალო თვისებები მიაწერეს.

⁵ ბლუმის ცნობიერებაში სახარების ტექსტი მის დროინდელ რელიგიური შინაარსის მქონე სიმღერებთან არის აღრეული თუ დაკავშირებული.

⁶ ი. მ. კ. ნამდვილად ნიშნავს: „იესო მაცხოვარი კაცთა“ (ლათინურად: I. H. S. — Iesus Hominum Salvator).

⁷ ი. ნ. მ. ჰ. ნიშნავს: „იესო ნაზარეველი, მეუფე ჰურიათა“ (ლათინურად: I. N. R. I. Iesus Nazarenus Rex Iudaeorum).

⁸ გილბერტ და სალივანის ერთ-ერთი ოპერეტის გმირი უშნო ქალს თხოულობს ცოლად და მას გულს უკეთებენ — სიბნელეში კარგი მოგეჩვენება სინათლის ფონზეო.

⁹ ჯეიმზ კერი (1845-83) „უძლეველთა საზოგადოების“ აქტიური წევრი. მონაწილეობდა ინგლისის გუბერნატორის მკვლელობაში, მაგრამ სასამართლოზე თავისიანების წინააღმდეგ გამოვიდა. მისი სახელი ბლუმს ხშირად ეშლება.

სულ იმ მკვლევლობას ამზადებდა. ამ ფარისევლებს, კარგი სახელია მაგათთვის, რაღაც ფლიდური აქვთ. არც საქმეში არიან წესიერნი. არა, აქ არ არის: ყვაფილი: არა, არა. მართლა, კონვერტი თუ დავხიე? როგორ არა: ხიდის ქვეშ.

პატერმა ბარძიმის გამორეცხვა დაიწყო; მერე უცებ მოხდენილად გადაჰკრა. ღვინო. უფრო არისტოკრატიულია, ვიდრე, მაგალითად, მათთვის ჩვეული ვინების ლუდი, ან კანტრელის ლიმონათი თუ კოკრინის ზარდანიჩოიანი შუშხუნა რომ დაელია (არომატული). ამათ წვეთს არ აძლევს: ღვინოსა შეწირვისასა: მარტო ნაწილებს. არაფერი ნუგეშია. ღვთისმშობელში თაღლითობა, მაგრამ სრულიად მართებული: ასე რომ არა, ერთმანეთზე უარესი ლოთი მათხოვრები მოდგებიან, ცოტა დამალევიან. უცნაურია მთელი ეს გარემოცვა. სრულიად მართებული, სავსებით მართალი.

ბატონმა ბლუმმა უკან მიიხედა ქანდარისაკენ: როგორც ჩანს, არავითარი გალობა არ იქნება. აფსუს. ნეტა ვინ არის აქ ორდანიტი? მოხუცმა გლინმა იცოდა, როგორ აელაპარაკებინა საკრავი, vibrato¹, წელიწადში ორმოცდაათი გირვანქა სტერლინგი ჰქონდაო, ამბობენ, გარდინერის ქუჩაზე. იმ დღეს მოლი კარგ ხმაზე იყო, როსინის Stabat Mater². ჯერ მამაო ბერნარდ ვოგანის წირვა. ქრისტე თუ პილატე? ქრისტე, მაგრამ მთელ საღამოს ნუ გადაგვაყოლებ. მუსიკა უნდოდათ. ფეხების ბაკაბუკი შეწყდა. ქინძისთავის დაცემას გაიგონებდა კაცი. მოლის ვუთხარი, ხმა იმ კუთხისკენ მიმართე-მეთქი. ჰაერში თრთოლვას ვგრძნობდი. სრული ხმით. ყველა ზემოთ იყურებოდა.

Quis est homo!³

ზოგიერთი ძველი საგალობელი შესანიშნავია. მერკადანტე: უკანასკნელი შვიდი სიტყვა⁴. Gloria. მოცარტის მეთორმეტე მესაში. ის ძველი რომის პაპები მუსიკის, მხატვრობის, ქანდაკებისა და ყოველნაირი სურათების ტრფიალნი იყვნენ. მაგალითად პალესტრინაც⁵. მხიარულად, ძველებურად ატარებდნენ დროს. სანამ იყო ეს ძველი დრო. ჯანმრთელებიც იყვნენ: გალობა, ლოცვის რეჟიმი, თან მოხარული სასმელები. ბენედიქტინი. მწვანე შარტრეზი. და მაინც საჭურისები ჰყავთ გუნდში, ეს ნამეტანია. რანაირი ხმაა? ალბათ უცნაური მოსასმენია მათი საკუთარი ძლიერი ბანების შემდეგ. იციან თავისი საქმე. მერე ალბათ ველარაფერს გრძნობენ. ერთგვარი დამაწყნარებელი საშუალება. არაფრის დარდი. ქონი დაედებათ ხოლმე, არა? ღორმუცელები, მალელები, გრძელფეხება. ვინ იცის? საჭურისი. ესეც ხეირია.

ბატონმა ბლუმმა დაინახა, როგორ დაიხარა პატერი და აკოცა საკურთხეველს, მერე მიმოიხედა და ჯვარი გადასახა ყველას. პირჯვარი გადაიწერეს და წამოდგნენ. ბატონმა ბლუმმა მიიხედ-მოიხედა, ადგა, თან წამოწეულ ქულებს

¹ „მორთოლვარედ“ (იტალ. მუსიკალური ტერმინი).

² „ღვთისმშობელი იდგა“ (ლათ.) — ღვთისმშობლის სადიდებელი შუასაუკუნეობრივი ჰიმნი, რომლის საუკეთესო მუსიკალური დამუშავება როსინის ეკუთვნის.

³ „ვინ არის ის კაცი“ (ლათ.). როსინის შემონახსენები ღუეტის პირველი სიტყვები. სხვათა შორის. 1904 წ. აპრილში დუბლინში ეს პარტია უმღერია ვინმე „მოლის“.

⁴ იტალიელ კომპოზიტორ სავერიო მერკადანტეს (1795—1870) დაწერილი აქვს 60 ოპერა, მაგრამ „შვიდი უკანასკნელი სიტყვა“ მას არ ეკუთვნის. ბლუმმა საერთოდ ხშირად ცდებოდა, რითაც ჯოისი მის ზერელე განათლებას გვაჩვენებს.

⁵ ჯოვანი პალესტრინა (1524-94) ითვლება პოლიფონიური საგალობლების ოსტატად. მას რამდენიმე მფარველი პაპი ჰყავდა და მოცარტის მესის გახსენებამ შესაძლოა პალესტრინას „პაპი მარცელუსის მესა“ ამოატივტივა ბლუმის ცნობიერებაში.

ზემოდან იცქირებოდა. სახარების კითხვისას, რა თქმა უნდა, ფეხზე უნდა იდგე. შემდეგ ყველა ისევ მუხლებზე დაეშვა და ის კი წყნარად დაჯდა თავის სკამზე. პატერი საკურთხევლიდან ჩამოვიდა, ხელში კონდაკია თუ რაღაც ეჭირა, და ის და მედავითნე ბიჭი ერთმანეთს ლათინურად გამოელაპარაკნენ. შემდეგ პატერმა დაიხოქა და დაიწყო კითხვა:

— ღმერთო შესახიზარო ჩვენო და ძალო...

ბატონმა ბლუმმა კისერი წაიგრძელა, რომ სიტყვები გაეგონა. ინგლისურია. ძვალი მიუგდე მაგათ. ბუნდოვნად მახსოვს. რამდენი ხანია, რაც უკანასკნელად იყავი წირვაზე? ¹ Gloria ² და უმანკო ქალწულისა, ღვთისმშობლისა. მეუღლისა მისი იოსებისა. პეტრესი და პავლესი. უფრო საინტერესო იქნებოდა, რომ გესმოდეს, რის შესახებაა ლაპარაკი. მართლაც შესანიშნავი ორგანიზაციაა, საათივით აწყობილი. აღსარება. ყველას უნდა. მაშ ყველაფერს გეტყვით. მონანიება. დამსაჯეთ, გეთაყვა. მძლავრი იარაღია მათ ხელში. ექიმზე და ვექილზე მეტი. ქალები გიჟდებიან. და მე ჩუჩუჩუჩუჩუჩუ. და თქვენ კი ჩაჩაჩაჩაჩაჩა? მერე და თქვენ რატომ? ბეჭედზე დაიხედა მოსაბოდიშებლად. დერეფნის მოჩურჩულე კედლებს ყურები აქვთ გამობმული. ქმარი გაოცებულია. იგებს. ღმერთის პაწია ხუმრობა. **შემდეგ ქალი გამოდის.** ვითომ მოინანია. საამო დარცხვენა. ლოცვა საკურთხეველთან. სალამი შენდა მარიამ, წმიდაო მარიამ. ყვავილები, საკმეველი, დაღვენთილი სანთლები. სახის სიწითლეს ფარავს. სულის ხსნის ლაშქრის ყალბი მიბაძვა. კრებაზე სიტყვით გამოვა მონანიებული კახპა. როგორ ვპოვე ღმერთი. კარგი მაგარი თავი აბიათ იმ ვაჟბატონებს რომში: მთელ წარმოდგენას თვითონ დგამენ. ფულში კი არ ბანაობენ? ანდერძებიც: მავანი მრევლის პატერს მის სრულ გამგებლობაში. ჩემი სულის მოსახსენებელი აღაპები ითქვას სახალხოდ. სავანეები და დედათა მონასტრები. პატერი მოწმედ ფერმანაგის მემკვიდრეობის საქმეში. ვერ დააბნევ. ყველაფერზე ზუსტი პასუხი მოეძებნებოდა. თავისუფლება და აღზევება ეკლესიისა, ჩვენი წმინდა დედისაჲ. ეკლესიის დოქტორნი ³: მათ შეთხზეს მთელი ეს თეოლოგია.

პატერი ლოცულობდა:

— წმიდაო მიქაელ მთავარანგელოზო, გვესარჩლე ჩვენ ომსა შინა; წინააღმდეგ სიბოროტისა და საფრთხეთა ეშმაკისათა იქმნენ შემწე ჩვენი. (უბრძანოს მას ღმერთმან, სულთქმით ვედრებით;) შენც მთავარო ზეციერ მხედრობათაო, ეშმაკი და სხვანი ბოროტნი სულნი, რომელნიც სულთა წარსაწყმედლად მიმოვლიან ქვეყანასა ზედა, ღვთიური ძალითა ჯოჯოხეთსა შინა შთაჰყარე.

პატერი და მედავითნე ადგნენ და გავიდნენ. ყველაფერი დამთავრდა. ქალები დარჩნენ: საქმე მადლობისა ⁴.

¹ ბლუმი თავის თავს მიმართავს სტანდარტული კითხვით, რითაც მიმართავენ აღსარებაზე მისულს: „რამდენი ხანია, რაც უკანასკნელად, იყავით აღსარებაზე?“

² „დიდებულის“ (ლათ.) ლოცვის სრული პასაჟია: „დიდებულის და უმანკო ქალწულისა, ღვთისმშობლისა მარიამისა, ნეტარისა მამა იოსებისა და წმინდანთა მოციქულთა პეტრესი და პავლესი“.

³ რომის პაპის მიერ 1295 წ. დაწესებული ტიტული, რასაც თეოლოგ სწავლულებს უბოძებდნენ განსაკუთრებული დამსახურებისათვის.

⁴ წირვის დასასრული.

ჯობია ავიფახო. ძმაჲ ჯიბგირა. შეიძლება თეფშით ჩამოიაროს. მოინადეთ თქვენი სააღდგომო ვალი¹.

ადგა. ერიჰა. ნუთუ ჟილეტის ეს ორი ღილი სულ ასე მქონდა გახსნილი. ქალებს მოსწონთ. არ სიამოვნებთ, თქვენ თუ არ... რატომ ადრე არ მითხარით. არასოდეს გეტყვიან. ჩვენ კი. უკაცრავად, ქალიშვილო, პატარა (ჰმ!) რალაც (ჰმ!) ბეწვი გაქვთ. ანდა ქვედატანი უკან დუგმაგახსნილი. მთვარის სხივის დანახვა კვალად². და მაინც უფრო მოსწონხარ, როცა ყველაფერი რიგზე არა გაქვს. კიდევ კარგი, უფრო სამხრეთით არ იყო. ჩაიარა გვერდითა დერეფანი, თან ფარულად იკრავდა ღილებს, და მთავარი შესასვლელით სინათლეზე გავიდა. ერთ წამს დაბრმავებული იდგა ცივ შავ მარმარილოს თასთან, სანამ მის წინ და მის უკან ორი ნორწმუნე ხელებს ქურდულად ჰყოფდა აიაზმაში. ტრამვაი; პრესკოტის სამღებროს მანქანა³; ქვრივი ძაძებში. შევამჩნიე, რადგან თავად ვარ შავებში. ქუდი დაიხურა. რა დროა ახლა? თხუთმეტია. ჯერ ადრეა კარგი იქნება ის ნაყენი დავამზადებინო სახისათვის. სად არის? თუმცა იმ დღეს სვენის აფთიაქი ლინკოლნზე. აფთიაქები იშვიათად იცვლიან ადგილს. მწვანე და ოქროსფერი შუშის ჭურჭელი აბრებზე ადგილიდან ძნელი დასაძვრელია. ჰამილტონ ლონგის აფთიაქი, დაარსებული წარღვნის წელს. ჰუგენოტების სასაფლაო იქვეა. ერთხელ უნდა მივიღე და ვნახო.

უესტლენდ როუს გაუყვა სამხრეთით. რეცეპტი კი მეორე შარვალშია. ო, გასაღებიც დამავიწყდა. ხათაბალაა ეს დაკრძალვები. მაგრამ ეს მაგ საცოდავის ბრალი არ არის. როდის შევუკვეთე უკანასკნელად? მოიცა. მახსოვს, სოვერენი დავახურდავე. თვის პირველი რიცხვი იყო, ვგონებ, თუ ორი. ო, შეუძლია რეცეპტების დავთარში მონახოს.

მეაფთიაქემ დავთარი ფურცელ-ფურცელ გადაშალა. თითქოს რალაცა გამომშრალის და ფხვიერის სუნი უდისო. გამომხმარი თავის ქალა. და ბებერი. ცოდნის ქვის ძიება. ალქიმიკოსები. ნარკოტიკები ჯერ გონებას ალაგზნებენ და მერე გაბერებენ. შემდეგ ლეთარგია. რატომ? რეაქცია. მთელი ცხოვრება ერთ ღამეში. თანდათან ხასიათს გიცვლის. მთელი დღე ბალახების, მალამოების, სადიზინფექციო საშუალებების გარემოცვაში. ალებასტრის ქათქათა ჯამები. როდინი და ფილთაქვა. Aq. Dist. Fol. Laur. Te Virid⁴. მარტო სუნი მოგარჩენს. როგორც კბილის ექიმთან დარეკილი ზარი. ექიმი ბაც! ცოტა თვითონაც უნდა იმკურნალოს. მალამოთი თუ ემულსიით. პირველმა კაცმა, მოსარჩენად რომ მოწყვიტა ბალახი, დიდი ვაჟკაცობა გამოიჩინა. ნაყენები. სიფრთხილეა საჭირო. ეს ყველაფერი საკმარისია, რომ გონი დაგაკარგვინოს. ცდა: ლურჯ ლაკმუსს აწითლებს. ქლოროფორმი. ოპიუმის დიდი დოზა. საძილე მიქსტურა. სიყვარულის ბანგი. ყაყაჩოს ტკივილდამაყუჩებელი წვენი, ხველებისათვის

¹ იგულისხმება სწორედ „ვალის მოხდა“ და არა მხოლოდ ფულადი შესაწირავი, რადგან ამ შემთხვევაში მლოცველისაგან მოითხოვდნენ პირობას, რომ იგი ერთხანს არ გააცდენდა წირვას და აღსარებაზეც ივლიდა.

² ბლუმის მეტყველებისათვის, სტივენისაგან განსხვავებით, დამახასიათებელია უადგილო შექსპირული ალუზიები. ჰამლეტი მიმართავს აჩრდილს: „გვითხარ, რას ნიშნავს, რომ მკვდარ სხეულს, სრულად შეჭურვილს მოგსურვებია მთვარის სხივის დანახვა კვალად“.

³ როგორც რომანის ბოლოს ირკვევა, ბლუმს „ფრიმენ ჯორნელის“ იმ დღის ნომერში მოუთავსებია პრესკოტის სამღებროს რეკლამა.

⁴ გამოხდილი წყალი, დაფნის ფოთოლი, მწვანე ჩაი (ლათ.).

უვარგისი. ფორებს ხურავს, ლორწოს აღიზიანებს. შხამები ერთადერთი სამკურნალო საშუალებაა. ხსნა იქ არის, საიდანაც ყველაზე ნაკლებ მოელი. ბუნების ეშმაკობა.

— დაახლოებით ორი კვირის წინათ, ბატონო?

— დიახ, თქვა ბატონმა ბლუმმა.

ელოდა დახლთან, თან წამლების მძაფრ სუნს იყნოსავდა, ღრუბლისა და ლუფას მტვრიან მშრალ სუნს. რამდენი დრო მიაქვს ადამიანის სატკივრების ჩამოთვლას.

— ტკბილი ნუშის ზეთი და ნავთობ-ეთერის ნაყენი, თქვა ბატონმა ბლუმმა, და კიდევ ნარინჯის ყვავილის წყალი...

მოლის კანი მართლაც ცვილივით ნაზი და თეთრი გაუხდება ხოლმე.

— და თეთრი ცვილიც, თქვა მან.

უფრო მუქად გამოუჩენს თვალებს. მიყურებდა, თვალებამდე ზეწარათარებული, ესპანელი, საკუთარ სხეულს ყნოსავდა, სანამ სამაჯურებს ვიკრავდი. ეს შინაური რეცეპტები ზოგჯერ საუკეთესოა: ხენდრო კბილებისათვის; ჭინჭარი და წვიმის წყალი; ამბობენ, დოში ჩამბალი დაფქვილი შვრიაო: კანის საკვები: მოხუცი დედოფლის ერთ-ერთ ვაჟს, მგონი, ოლბენის მთავარს, მხოლოდ ერთი კანი ჰქონდა. ჰო, ლეოპოლდს¹. ჩვენ სამი გვაქვს. მეჭეჭები, კოყრები და მუწუკები გვიფუჭებენ. სუნამოც ხომ გინდა. რა სუნამოს ხმარობს თქვენი? Peau d'Espagne². ნარინჯის ყვავილი. სუფთა დოს საპონი. წყალი ისეთი სასიამოვნო ხდება. მშვენიერი სუნი აქვს ამ საპნებს. დროა აბაზანა აქვე კუთხეში. ჰამამ. თურქული³. დაზელვა. ჭუჭყი აგიგორდება ჭიპზე. კარგია, კარგი გოგო რომ გიგორებს ჭუჭყს. ვფიქრობ, მე თვითონ. ჰო, მე. იმის გაკეთება აბაზანაში. უცნაური სურვილი. წყალი წყალს. საქმე და სიამოვნება ერთად. აფსუსს, მასაჟის დრო არ არის. მთელი დღე ცოცხლად ხარ. დასაფლავება მოსაწყენი იქნება.

— დიახ, ბატონო, თქვა მეაფთიაქემ. ორი შილინგი და ცხრა პენსი. ბოთლი მოიტანეთ?

— არა, თქვა ბატონმა ბლუმმა. გამიმზადეთ, თუ შეიძლება, მოგვიანებით შემოვივლი. იმ საპონსაც ავიღებ. რა ღირს?

— ოთხი პენსი, ბატონო.

ბლუმმა საპნის ნაჭერი ნესტოებთან მიიტანა. სასიამოვნო ლიმონის ცვილი.

— ამას ავიღებ, თქვა მან. სულ სამი შილინგი და ერთი პენსი იქნება.

— დიახ, ბატონო, თქვა მეაფთიაქემ. შეგიძლიათ ერთად გადაიხადოთ, ბატონო, როცა შემოვივლით.

— კეთილი, თქვა ბატონმა ბლუმმა.

აფთიაქიდან ნელი ნაბიჯით გამოვიდა, დახვეული გაზეთი ილლიაში ჰქონდა ამოჩრილი, ცივ ქალაქში გახვეული საპონი მარცხენა ხელში ეჭირა.

მის ილლიასთან ბენტამ ლაიონზის ხმამ და ხელმა თქვა:

— ბლუმს გაუმარჯოს, რა ამბებია? დღევანდელია? ერთ წუთს გვაჩვენეთ.

¹ იფულისხმება დედოფალ ვიქტორიას უმცროსი შვილი ოლბენის მთავარი, რომელიც მეტად სუსტი აღნაგობისა ყოფილა.

² „ესპანური კანი“ (ფრანგ).

³ ჰამამის სასტუმრო და აბანო მაშინდელ სეკვილის (ახლანდელი ოკონელის) ქუჩაზეა.



ულვაშები ისევ მოუპარსავს, ღმერთო ჩემო! გრძელი, ცივი ზედა ტუჩი. უფრო ახალგაზრდა გამოვჩნდეთ. შერეკილს ჰგავს. ჩემზე ახალგაზრდაა.

ბენტამ ლაიონზის ყვითელმა შავფრჩხილებიანმა თითებმა გაზეთი გაშალეს. არც მაგას აწყენდა დაბანვა. ტურტლის მოშორება. დილა მშვიდობისა, პიერზის საპონი თუ იხმარეთ? მხრებზე ქერტილი აყრია. გოგრას გაპოხვა უნდა.

— მინდა ვნახო, რას წერენ ფრანგულ ცხენზე, დღეს რომ გამოდის, თქვა ბენტამ ლაიონზმა. სად ჯანდაბაშია?

დაჭმუჭვნილ ფურცლებს აშრიანებდა, თან მაღალ საყელოს ნიკაპს უხახუნებდა. ნაპარსის ქავილი. ვიწრო საყელო, თმა გასცვივა. აჯობებს გაზეთი დავუტოვო, თავიდან მოვიშორო.

— შეგიძლიათ დაიტოვოთ, თქვა ბატონმა ბლუმმა.

— ესკოტი. ოქროს თასი. მოიცათ. წაილულულა ბენტამ ლაიონზმა. ნახევარი წუ... მაქსიმუმ ორი.

— აღარა მჭირდება, გადაგდებას ვაპირებდი, თქვა ბატონმა ბლუმმა.

ბენტან ლაიონზმა უცებ აიხედა და ოდნავ მოჭუტა თვალები.

— როგორ? თქვა მისმა მკვეთრმა ხმამ.

— შეგიძლიათ დაიტოვოთ-მეთქი, უპასუხა ბატონმა ბლუმმა. აღარა მჭირდება, სწორედ გადაგდებას ვაპირებდი¹.

ბენტამ ლაიონზი ერთ წამს შეეყოყმანდა, თან თვალებს ჭუტავდა. შემდეგ გაშლილი ფურცლები ხელებზე დაუყარა ბატონ ბლუმს.

— გავრისკავ, თქვა მან. აიღეთ, გმადლობთ.

კონვეის კუთხისაკენ გაქანდა. თავქუდმოგლეჯილი.

ბატონმა ბლუმმა კვლავ მოხდენილად დაკეცა ფურცლები და შიგ საპონი ჩადო, ეღიმებოდა. სულელური ტუჩები აქვს ამ ყმაწვილს. სანაძლეო. ბოლო ხანებში რაღაც ავადმყოფობად იქცა. კურიერი ბიჭები ბაცაცობენ, რომ ექვსპენსიანი დადონ. სანაძლეოს დებენ დიდ ინდაურზე. ესეც საშობაო სადილი სამ პენსად. ჯეკ ფლემინგმა თამაშში ფული გაფლანგა და მერე ამერიკაში გაიპარა. ახლა სასტუმროს პატრონია. აღარასოდეს ბრუნდებიან. ხორცი ეგვიპტურ ქოთნებში².

ხალისიანად მიდიოდა აბანოების მეჩეთისაკენ. მეჩეთის წითლად გამომწვარ აგურებს გაგონებს, მინარეთებს. დღეს კოლეჯში სპორტული შეჯიბრებები ყოფილა. თვალი შეავლო ცხენის ნალის ფორმის აფიშას კოლეჯის პარკის ჭიშკარზე: ველოსიპედისტი ორად მოკაკვული, როგორც ქაშაყი ჯამში³. საშინელი რეკლამაა. აი მრგვალი რომ გაეკეთებინათ, ბორბალივით. მანების ადგილას კი: სპორტი, სპორტი, სპორტი: და დიდი მორგვი: კოლეჯი. კაცს თვალში რომ მოხვდეს.

აგერ ჰორნბლაუერი დგას დარაჯის ჯიხურთან. კარგი ურთიერთობა გქონდეს: შეუძლია თავის დაკვრით შეგიშვას. გამარჯობათ, ბატონო ჰორნბლაუერ! გაგიმარჯოთ, ბატონო!

მართლაც და დიდებული ამინდია. ცხოვრება სულ რომ ასეთი იყოს. კრი-

¹ ლაიონზს ჰგონია, რომ ბლუმი მას მიანიშნებს, „ჭადრაზე“ (ცხენის სახელი) ღირს თამაშიო. ეს გაუგებრობა უფრო გვიან გაირკვევა. ბლუმი ფრაზაში „აღარა მჭირდება“ სულაც არ მიანიშნებს ცხენის სახელს „ჭადრა“.

² გამოსვლათა მოხსენი, 16, 3 (იხ. „ხომლი“, № 6, გვ. 165, შენიშვნა 12).

³ სიმღერის სიტყვები.

კეტის ამინდია. იჯექი საჩრდილობლის ქვეშ. ერთმანეთზე მიყოლებით აწოდებენ. აუტი. აქ კრიკეტს ვერ თამაშობენ. და მაინც კაპიტანმა ბულერმა ფანჯარა გატეხა კლუბში კილდერის ქუჩაზე უხეიროდ გასროლილი ბურთით. დონბრუკის ბაზრობა უფროა მათთვის შესაფერისი. რა დავიდარაბა ატყდა, როცა მაკკართი კათედრაზე ავიდა¹. სიცხის ტალღა. დიდხანს არ გასტანს. მეტად წარმავალია, ცხოვრების სრბოლა, რა არის ცხოვრების სრბოლაში ყველაზე უფრო ძვირფასი?²

ახლა კი ბანაობის განცხრომა: წყლის სუფთა აბაზანა, გრილი ემალი, საამო ნელთბილი დინება. ესე არს ხორცი ჩემი³.

წინასწარ ხედავდა საკუთარ ფერმიხდილ სხეულს, გამოტილს, შიშველს, სითბოს წიაღში, სურნელოვანი საპნის ქაფით დაზელილს, ნაზად განბანილს. ხედავდა საკუთარ ტანს და კიდურებს, წყალი რომ ლივლივით გადასდიოდა და ატივტივებდა, ქვემოდან ოდნავ აწვეებოდა, მოყვითალო ლიმონისფერს. საკუთარ ჭიბს, ხორცის ბუტკოს⁴. და ხედავდა თავისი ბუჩქის ატივტივებულ შავ გადახლართულ კულულებს, მოტივტივე თმის ნაკადს ათასების ღუნე მამის გარშემო, უსიცოცხლო მოტივტივე ყვავილს⁵.

¹ ირლანდიური ბალადის სიტყვები.

² იმ დროს პოპულარული სენტიმენტალური ოპერეტის სიტყვები (ბლუმის კვაზი-ფილოსოფიური მსჯელობის ნიმუში).

³ ლუკა, 22,19.

⁴ იხ. „პროტეოსის“ ეპიზოდი („ხომლი“ № 6, 1971 წ., გვ. 160), სადაც სტივენ დედალოსი ფიქრებში იხსენებს მისტიკურ ექსტაზს: „გინდა დმერთებს დაეძარო? შენს საკუთარ ჭიბს დააშტერდი“. ბლუმი თითქოს „უსრულებს“ სტივენს ამ „მოთხოვნას“, რაც თავის მხრივ მისტიკოსი ბერების რიტუალს გულისხმობს და ამდენად ამ მეხუთე ეპიზოდის ძირითად სიმბოლოსაც („წმიდა ზიარება“) ეხმიანება.

⁵ ბლუმის სომნამბულური არსებობისა თუ უნიათობის, მისი სულიერი და ხორციელი იმპოტენციის მისანიშნებლადაც ჯოისი მიმართავს სიმბოლოს, რომელსაც კონკრეტული სახე უძევს საფუძვლად: „ათასების მამა“ ანალოგია „ათასების დედის“, რასაც ინგლისსა და ირლანდიაში ეძახიან ნოტიო ადგილების დასაფარავ მცენარეს (*Saxifraga stolonifera*).